

Xaasongaxango 2006 Edition

Language:
Country:
Publisher:
Copyright:
Last Updated: 2023-10-20
ID: 1868aed3-7d65-4be0-8a2e-e78aa7280d44
ISO: kao
ISBN:

MACU.....	4
MARAKA	26
LUKA	40
YAY	63
KEWALOLU	81
ROMENGOLU.....	105
1 KORETENGOLU.....	115
2 KORETENGOLU.....	125
GALASINGOLU.....	132
EFESINGOLU	136
FILIPENGOLU.....	140
KOLOSENGOLU	143
1 TESALONIKENGOLU	146
2 TESALONIKENGOLU	148
1 TIMOTE.....	150
2 TIMOTE.....	153
TITE	155
FILEMON	157
HEBUROLU.....	158
YAXUBA	166
1 PIYERE	169
2 PIYERE	172
1 YAYA.....	174
2 YAYA.....	177
3 YAYA.....	178
YUDE.....	179
YITALOLU	180

MACU

1 Isa Kirisita burujuwo fele: Isa bota mansaxe Dawuda to, Dawuda bota Burehima to. ² Burehima xa Nsiyaxa bange, Nsiyaxa xa Yaxuba bange, Yaxuba xa Yuda nin a badinxelu bange. ³ Yuda xa Faresi nin Sera bange, wolu na tun mu Tamare le ti. Faresi xa Eseron bange, Eseron xa Arama bange. ⁴ Arama xa Aminadabe bange, Aminadabe xa Nason bange, Nason xa Salumon bange, ⁵ Salumon xa Bowasi bange, wo na tun mu Arahabu le ti. Bowasi xa Yobede bange, wo na tun mu Ruti le ti. Yobede xa Yese bange. ⁶ Yese xa mansaxe Dawuda bange. Mansaxe Dawuda xa mansaxe Sulemani bange, wo na tun mu Uri musu le ti. ⁷ Sulemani xa Robuwamu bange, Robuwamu xa Abiya bange, Abiya xa Asafu bange, ⁸ Asafu xa Yosafati bange, Yosafati xa Yoramu bange, Yoramu xa Osiyasi bange, ⁹ Osiyasi xa Yowatamu bange, Yowatamu xa Asasi bange, Asasi xa Esekiyasi bange. ¹⁰ Esekiyasi xa Manase bange, Manase xa Amon bange, Amon xa Yosiyasi bange. ¹¹ Yosiyasi xa Yekoniya nin a badinxelu bange, Banisirayila dinḡolu mutata xa taxa Babilone tumo men. ¹² Banisirayila dinḡolu taxaninma Babilone jamano xan, Yekoniya xa Salatiyeli bange, Salatiyeli xa Sorobabeli bange, ¹³ Sorobabeli xa Abiyode bange, Abiyode xa Eliyakime bange, Eliyakime xa Asore bange, ¹⁴ Asore xa Sadoke bange, Sadoke xa Asime bange, Asime xa Eliyude bange, ¹⁵ Eliyude xa Eleyasare bange, Eleyasare xa Matan bange, Matan xa Yaxuba bange, ¹⁶ Yaxuba xa Mariyama xe Yusufu bange, Isa men be kilila xo Kirisita, Mariyama xa wo bange. ¹⁷ X'a ta Burehima ma fo xa si Dawuda ma, yelemakun tan nin naani le tanbita. Wo xo, x'a ta Dawuda ma fo xa si Banisirayila dinḡolu muta waxato ma xa taxa Babilone jamano xan, yelemakun tan nin naani le tanbita. X'a damuta wo waxato ma fo xa si Kirisita bange tumo ma, yelemakun tan nin naani le tanbita. ¹⁸ Isa Kirisita la wuluwo napa fele: A na Mariyama tun mu Yusufu mamutamuso le ti. Jannin Yusufu x'a lon musu ti, a arajigeta Ni Senunḡo barako to. ¹⁹ A xe Yusufu tun mu moxo tilinḡinḡo le ti. A tun nte a fe xa Mariyama toxo tija. Yusufu x'a latege a fan xono x'a futukuwo dabula duguwo to. ²⁰ X'a tu í miirila wo ma, Marigi la melesiyo do nata a ma siibo to, x'a fo a pen xo: «Yusufu, Dawuda mamarinḡo, í xana sila xa Mariyama ta í musu ti, a arajigeninḡo be dinḡo men na, wo keta Ni Senunḡo le barako to. ²¹ A be nala wulula dinxe la. Í si a toxola xo

Isa, bawo a be nala a la moxolu kisila i la junubolu ma.» ²² Wo kuwolu bee keta, walasa Marigi xa xumo men dun a la kila da, wo xa ke, ²³ xo: «Xarafandin xelonbalo si arajige, a si wulu dinxe la, men si toxola xo Emanuyeli», wo toxo xoto xo: «Ala nin ntelu mu». ²⁴ Yusufu wulininma sinnoxo to, a xa nin ku innu ke í xo Marigi la melesiyo x'a fo a pen na men. A xa Mariyama ladun, ²⁵ bari ku man dun i nin i ḡoxo te jannin Mariyama xa wulu wo dinxe la. Yusufu xa dinḡo toxola xo Isa.

2 Isa bangeta Betileheme, Yude maro xono, mansaxe Herode tilo, a bangeninḡo xo, lonna dolu bota Koton xa si Yerusaleme, xa njinixalo ke xo: ² «Yahudiyalu la mansaxe men birin bangela, a be min? N x'a la loolo je Koton, n nata x'a batu.» ³ Mansaxe Herode xa wo me tumo men, a hakilo ḡaxamita anin Yerusaleme bee. ⁴ A xa jamano sadaxalasibaxa kuntigolu bee nin sariya karanmoxolu kamari x'e njinxaxa Kirisita xa xan xa bange dula men. ⁵ I x'a jaabi xo: «Betileheme, Yude maro la», bawo kila xa men safe, wo felenti: ⁶ «Betileheme, ite men be Yuda jamano to, í nte gallundin ti Yuda gallubalu to; bawo kuntigo do be nala bola ite to, men si n na jamano, Banisirayila mara.» ⁷ Herode xa lonnalulu kili duguwo to, x'e njinxaxa loolo bowaxati jonjonḡo la. ⁸ Wo xo, a x'e ki Betileheme x'a fo i pen xo: «Alu taxa deenano xibaruya jonjonḡo njinin. Nin alu x'a je, alu na n nabo a xalama, walasa n du xa taxa a batu.» ⁹ I xa mansaxe la xumolu me tumo men, i taxata. I xa loolo je, i tunnu xa men nakorosi Koton, a bulata i na, fo xa taxa í lo dindinḡo be dula men kunto. ¹⁰ I xa loolo je tumo men, i nitodiyata haali. ¹¹ I dunta bugo xono, i xa dindinḡo nin a na Mariyama je. I x'e ḡongi, xa dindinḡo batu. Wo xo, i x'e la donolu tofirin x'a so sano nin digico la, anin fen suma di-manḡo do, men toxo xo mire. ¹² Wo xo, Ala xa lonnalulu lasobi siibo to xo i xana i koppa Herode bata ma. I xa je goori, xa taxa sila xote fe i la jamano xan. ¹³ Lonnalulu taxaninma, Marigi la melesiyo do x'é yita Yusufu la siibo to, x'a fo a pen xo: «Wuli í xa dindinḡo nin a na ta, í x'é bori xa taxa Misira jamano xan. Tu je fo nte x'a fo í pen tumo men í x'é koppa; bawo Herode be nala dindinḡo njinina x'a faxesa.» ¹⁴ Yusufu wulita suwo to, xa dindinḡo nin a na ta xa taxa Misira, x'é dugu non. ¹⁵ A tuta je fo Herode sata tumo men. Wo na ma, Marigi xa men dun a la kila da, wo keta xo: «N xa n dinxe kili xa

bo Misira.» ¹⁶ Herode x'a lon tumo men xo lonnalu x'a janfa, a diminbeteta. A xa moxolu bula xa Betileheme nin a senbetogallolu dindinḡolu bee faxa, mennu siyo man tanbi san fula la, x'a ben lonnalu la waxati foninḡo ma. ¹⁷ Wo to, kila Yereḡi la xuma foninḡo keta xo: ¹⁸ «Moxolu xa kulexanḡo me xa bo Rama gallo to, kule nin xasixanba, Raseli le be xasila a dinḡolu la saya la, a nte a fe a juso xa mafaxa, bawo i sata xa ban.» ¹⁹ Herode saninma, Marigi la melekiyo do x'a fan yita Yusufu la, siibo to, Misira jamano xan, ²⁰ x'a fo a pen xo: «Wuli í xa dindinḡo nin a na ta, í nin i x'e koppa Banisirayila jamano xan, bawo men tunnu be dindinḡo nofe x'a faxa, wolu sata.» ²¹ Yusufu wulita wo ḡa in xa dindinḡo nin a na ta, x'e koppa Banisirayila jamano xan. ²² Bari kabirin a x'a me xo Arakelawusi bulata a fa Herode no to Yude mansaxeya la, a silata xa taxa non. Ala xa Yusufu lasobi siibo to, a taxata Galile maro xono. ²³ A sigita gallo do to men toxo xo Nasareti. Wo ḡa ma, kilalu la ḡin xuma fonin in keta xo: «A si kili xo Nasaretingo.»

3 Wo tumo, Batiselila Yaya bota, xa waajulo damuta Yude wulo xono xo: ² «Alu tuubi; katugala Ala la Mansaya sutiyata.» ³ Kila Esayi xumata men na kuwo to, wo mu Yaya le ti, a xo: «Moxo do fetenxanḡo si bo wulo xono x'a fo xo: Alu Marigi la silo toben, x'a la sila mesenḡolu latilin!» ⁴ Nogomati doroko le tun be Yaya xanna, a la tetositilanḡo tun mu gulo le ti. A baluwo tun mu tonḡo nin wulaxonoliyo le ti. ⁵ Yerusaleme gallo moxolu, Yude maro moxo bee anin Yuruden babulo lamininḡo bee tunnu be nala a ma. ⁶ I tunnu b'e loxan i la junubolu la. A tun be wolu batisela Yuruden bajiyto. ⁷ Yaya x'a je tumo men xo Farisiyalu nin Sadusen diino moxolu kiika be nala nin i si batise, a xo i pen xo: «Foonedinḡolu! Jon x'a yita alu la, alu si kisi ḡa men Ala la diminḡo ma, men be nanin?» ⁸ Alu kewalolu ke mennu s'a yita xo alu tuubita. ⁹ Alu xana i miiri x'a fo alu xono to xo: «N mu Burehima mamarinḡolu ti.» ¹⁰ N' b'a fola alu pen xo Ala si sin no xa ḡin kuru innu yelemax'e ke Burehima bonsonḡolu ti. ¹¹ Nendo tata yirolo lillo tego xanma xa ban. Yiri wo yiri nte din ḡuma kela, wo si tege xa fili ta to. ¹² Nte ken be alu batisela jiyto le la x'alu latuubi. Bari men be nanin nte xo, wo barako xa bun nte ti. Haali nte nin a man xan xa a la samatolu bo a to. Wo si alu batise Ni Senunḡo nin ta la. ¹³ A la ḡosurundulanḡo b'a bulu x'a la ḡo surundu. A si ḡoke-so ke kurukuro xono, bari ḡaḡa, a si ta sabalo ke xa wo jani.» ¹⁴ Wo tumo, Isa bota Galile xa na Yaya bata Yuruden bada la nin a s'a batise. ¹⁵ Yaya tun man son. A xo a pen xo: «Nte le maakuwo b'a la ite xa nte batise, ite dun si nte haabandi ḡa di, xo n' x'e batise?» ¹⁶ Isa x'a jaabi xo: «A tu wo xa ke saasa, bawo n xa xan xa Ala sago dafa.» Wo to, Yaya sonta. ¹⁷ Isa batiseta doron, a yeleta xa bo jiyto, sanxulo dayeleta, a xa Ala Niyo jigito je a xan í xo jenetubanḡo. ¹⁸ Xumaxanḡo do bota

sanḡo to xo: «ḡin mu n' Dinxe baato le ti, men na kuwo xa di bete nte pen.»

4 Wo xo, Ala Niyo taxata Isa ti wulo xono, walasa Sentane x'a xotobo. ² A xa tan naani tili nin tan naani su ke a nte domoli kela. Wo xo, xonxo x'a muta. ³ Sentane x'e sodun a la x'a fo a pen xo: «ḡin í mu Ala Dinxe le ti, a fo xo ḡin kuru innu xa yelemaxa ke buurolo ti.» ⁴ Isa x'a jaabi xo: «A be safenin Kitaabo to xo: «Moxo nte balula domolifenḡo doron na, bari xuma wo xuma be bola Ala da, a be balula wo lelu la.» » ⁵ Wo xo, Sentane taxata a ti gallu senunḡo to, nin wo mu Yerusaleme ti, x'a lalo Alabatusuba sanḡo to, ⁶ x'a fo a pen xo: «ḡin í mu Ala Dinxe le ti, í butun dugo ma xo; bawo a be safenin Kitaabo to xo: «Ala si yanmarolu di a la melekoyolu ma í la kuwo la, i s'í ta i bulolu to, walasa í sinḡo xana xosi kuru la.» » ⁷ Isa x'a jaabi xo: «A be safenin Kitaabo to xo: «Í xana Marigi í la Ala xotobo.» » ⁸ Sentane taxata a ti tugun kurujanba do sanḡo to, xa duniya jamanolu nin i xono nafalu bee yita a la. ⁹ A xo a pen xo: «N' si ḡinnu bee di í ma, nin í x'e ḡongi n' xoto, xa n' batu.» ¹⁰ Wo to, Isa xo a pen xo: «Taxa xa bo jan, Sentane! Bawo a be safenin Kitaabo to xo: «Í si Marigi í la Ala batu, xa baaro ke ate kilin doron pen.» » ¹¹ Wo xo, Sentane x'e soobo a la. Melekoyolu x'e sodun a la, x'a maakuwolu ḡiḡa. ¹² Isa x'a me tumo men xo Yaya bulata kaso la, a taxata Galile. ¹³ A bota Nasareti xa taxa sigi Kaperenahun gallo to, wo men be siginin Galile dalaba da la, Sabulon nin Nefutali maro xono. ¹⁴ Wo ḡa ma, kila Esayi xa xumo men fo, wo keta xo: ¹⁵ «Sabulon maro, Nefutali maro, maro men be ḡatilin-nin dalaba ma, anin men be Yuruden bajiyto xofe, Galile maro, ite men mu siya tolu sigidula ti!» ¹⁶ Jamano moxo men tunnu be siginin dibo to, wolu xa keneyaba je! Moxo men tunnu be siginin jamana dibima xono, anin men tunnu be saya bulu, keneya bota wolu pen.» ¹⁷ Kabirin wo tumo, Isa xa waajulo damuta xo: «Alu tuubi, katugala Ala la Mansaya x'e sutiya!» ¹⁸ Xa Isa tu í taxamala Galile dalaba senbo fe, a xa badinma fula je; Simon, nin a be kilila xo Piyere, anin a doxoxe Andere. I tunnu be jalafilo la dalaba to, bawo molila le tunnu mu. ¹⁹ Isa xo i pen xo: «Alu a lo n' nofe, n' si alu ke moxonininnalu ti.» ²⁰ Wo no bee to, i x'e la jalalu bula, x'a lo a nofe. ²¹ Isa taxata ḡa dondin tumo men, a xa badinma fula xote je; Yaxuba nin a doxoxe Yaya. Sebede dinḡo le mu wolu ti. I tunnu nin i fa Sebede le be i la xulunḡo xono, x'e la jalalu toben. Isa x'e kili. ²² Wo no bee to, i x'e fa nin i la xulunḡo tu je, x'a lo Isa nofe. ²³ Isa tun be taxaxan Galile maro dula bee. A tun be moxolu laxaranna i la Alabatusuwolu xono, xa Ala la Mansaya xibaru Dimanḡo fo, xa moxolu la jangarolu nin i la felu bee kendeya. ²⁴ A toxo bota Siri jamano dula bee, i xa jangarutolu bee lasi a ma: Jangaru sifa kiika nin dimin kiika be moxo mennu la, jinnetolu, ketujan-garutolu anin namatolu. Isa xa wolu kendeya. ²⁵ Jama-

ba x'a lo a nofe, xa bo Galile nin Dekapole maro xono, xa bo Yerusaleme nin Yude maro anin Yuruden ba xo.

5 Isa xa wo jamaba je tumo men, a yeleta kuro do xan. A x'é sigi tumo men, a la xarandinḡolu x'e so-dun a la. ² A x'a damuta x'e laxaran xo: ³ «Mennu x'a lon xo i mu fangantanḡo ti Ala ḡa xoto, heero be wolu ḡen; bawo Ala la Mansaya mu i lelu ta ti. ⁴ «Mennu juso be xasinin, heero be wolu ḡen; bawo i juso si sumaya. ⁵ «Mennu be sabarinin, heero be wolu ḡen; bawo i si duguxulo soto ke ti. ⁶ «Tilinningḡa xonxo nin a mindoxo be mennu la, heero be wolu ḡen; bawo i si fa. ⁷ «Hinno be mennu jusukunḡo la, heero be wolu ḡen; bawo hinno si ke wolu la. ⁸ «Mennu jusukunḡo xa senu, heero be wolu ḡen; bawo i si Ala je. ⁹ «Mennu be benḡo ḡininna moxolu te, heero be wolu ḡen; bawo i si kili xo Ala dinḡolu. ¹⁰ «Mennu be tooronin tilinningḡa silo taxamo xanma, heero be wolu ḡen; bawo Ala la Mansaya mu i lelu ta ti. ¹¹ «Nin moxolu be alu nanila, x'alu tooro, xa jaxuxaro la alu la nte la kuwo koso, heero be alu ḡen. ¹² Alu ḡapa, xa ḡaxali; bawo baraaḡiba be alu ḡen sanḡo to. Kila mennu nata alu ḡa, wo dulu toorota wo ḡa in ne. ¹³ «Ate lelu mu duniya xooxo ti. Nin xooxo diya bota a la, a si ke no xooxo ti ḡa di tugun? Nafa fusi nte a la tugun fo x'a bon banto to, moxolu x'e taxama a xan. ¹⁴ «Ate lelu mu keneya ti duniya ḡen. Gallo men be siginin kuro kunte to, wo me dugu no. ¹⁵ Moxo me lanpo lamana xa miranḡo do labuti a kun na. Bari í b'a lamanala le x'a sigi a sigilanḡo xan, nin a si keneya bo luxonomoxolu ḡen. ¹⁶ Alu la keneya xa xan xa bo wo ḡa kilin in ne ma moxolu ḡa xoto, walasa nin i si alu la ke-wale ḡumalu je, x'alu Fa tantu, men be sanḡo to. ¹⁷ «A xana ke alu ḡen xo nte nata le xa Musa la sariya nin kilalu la xumolu bo je. N' man na x'e bo je, n' nata le x'e dafa. ¹⁸ Tonḡa la, n' b'a fola alu ḡen xo: Jannin sanxulo nin duguxulo xa sanko, haali sariya safedin doxomandin kilin, walla a xumadin mesemandin kilin me bo je, fo kuwo bee xa si a danḡo ma. ¹⁹ Wo le x'a tu, men je sariyalu bee to doxomandinḡo sooso, xa tolu digi wo la, wo tigo si doxoya bee ti Ala la Mansaya xono. Bari moxo wo moxo je sariya labatu xa tolu digi wo ḡoxon na, wo si bunḡa Ala la Mansaya xono. ²⁰ N' b'a fola alu ḡen xo: Nin alu man tilin xa tanbi sariya karanmoxolu nin Farisiyalu xan, alu me dun Ala la Mansaya xono abada. ²¹ «Alu x'a me xo a fota alu benbalu ḡen xo: "Í xana moxo faxa. Moxo wo moxo je a moxopoxo faxa, kiito xa xan xa tege wo tigo xan." ²² Bari nte b'a fola alu ḡen xo: Moxo wo moxo je dimin a moxopoxo xoto, wo tigo nin kiito xa xan. Moxo wo moxo je a moxopoxo kili xo "naluma", Yahudiyalu la Kiititegekafo xa xan xa kiito tege wo tigo xan. Men b'a moxopoxo kilila xo "jage", wo tigo nin jahanaba ta xa xan. ²³ Nin í nin í la sadaxo taxata sadaxajanidula, xo í b'a dila Ala ma, nin í hakilo jigita a la xo í x'é moxopoxo junubo ta, ²⁴ í la sadaxo tu sadaxajanidula, xa taxa

benḡo ḡinin í nin í moxopoxo te folo. Wo xo, í si na í la sadaxo di Ala ma. ²⁵ «Nin í nin í keleḡoxo be taxanin kiititegedula, í tariya xa benḡo ḡinin í nin a te, x'alu tu wo silo xan, walasa a xana í dun kiititegedula bulu, wo x'é dun garado bulu x'é bula kaso la. ²⁶ Tonḡa la, n' b'a fola í ḡen xo í me bo non abada nin í man wo julo bee sara. Haali kuseeti, a me tu í la. ²⁷ «Alu x'a me xo a fota xo: "Í xana fuyanḡa ke." ²⁸ Bari nte b'a fola alu ḡen xo: Moxo wo moxo je wandimuso mafele, xa jarabi a la, wo tigo xa fuyanḡa ke a jusukunḡo la xa ban. ²⁹ Nin í kininbulu ḡakeso le be junubo lasila í ma, a woloxoti, x'a fili dulajan; bawo í xa bono í balasubo dula kilin to, wo xa fisa í balasubo muume xa fili jahanaba xono. ³⁰ Nin í kininbulu le be junubo lasila í ma, a tege x'a fili dulajan; bawo í xa bono í balasubo dula kilin to, wo xa fisa í ma, í balasubo muume xa fili jahanaba xono. ³¹ «A fota tugun xo: "Nin men x'a musu futuwo sa, wo tigo xa xan xa futusakayito di a ma." ³² Bari, nte b'a fola alu ḡen xo: Moxo wo moxo je a musu bula, x'a tara a man fuyanḡa ke, wo b'a musu bulala fuyanḡa la; xe men du je musu futusaninḡo ta, wo xa fuyanḡa ke. ³³ «Alu x'a me tugun xo a fota n benbalu ḡen xo: "Í xana í xalixanḡo tija, bari nin í x'é xali Marigi ḡa xoto, í xalixanḡo latimme." ³⁴ Bari nte b'a fola alu ḡen xo alu xana i xali muume. Alu xana i xali sanxulo la, bawo wo mu Ala la mansasigilanḡo le ti; ³⁵ alu xana i xali duguxulo la, bawo wo mu Ala sinxoto korondome le ti; alu xana i xali Yerusaleme la, bawo wo mu Mansaba la gallo le ti. ³⁶ Í xana í xali í fan mansakunḡo du la, bawo í me a no xa í kunsina kilin laxoyiya walla x'a lafin. ³⁷ Alu la xumo xa ke "iyoyi" walla "ayi" doron ti. Nin do kafuta wo ma, wo bota Sentane le to. ³⁸ «Alu x'a me xo a fota xo: "Na sara mu ḡa le ti, ḡinḡo sara mu ḡinḡo ti." ³⁹ Bari nte b'a fola alu ḡen xo alu xana alu ta sara moxo jaxolu ma. Nin do x'é fenta í kininbulu tama to, boxo do du lo a ḡen. ⁴⁰ Nin do b'a fe xa í kili kiititegedula, xa í la dorokexotobulo ta, a tu je a xa í la dorokeba du ta. ⁴¹ Nin moxo do xa í diyakuwa x'a la dono la í kun, xa kilometere kilin ḡoxon ke, a la í kun xa kilometere fula ke. ⁴² Nin men x'é tara, wo so. Nin do b'a fe xa fen do donto í ma, í xana í ban wo ma. ⁴³ «Alu x'a me xo a fota xo: "Í moxopoxo xanu x'é ban í jaxo to." ⁴⁴ Bari nte b'a fola alu ḡen xo: Al'alu jaxolu xanu. Mennu b'a lola alu nofe, x'alu tooro, alu Ala matara wolu ḡen, ⁴⁵ walasa alu xa ke alu Fa men be sanḡo to dinḡolu ti. Katugala ate b'a la tilo labola moxo jaxolu nin moxo betolu bee ḡen. A be sanjiyo lanala moxo tilinningḡolu nin moxo tilinbalolu bee ḡen. ⁴⁶ Nin alu be alu xanubaxolu doronnu xanula, alu si baraaḡi joman soto? Sagallemutala dulu nte wo ḡoxon kela ba? ⁴⁷ Nin alu be alu badinḡolu doron nelu xontonna, wo mu kuba ti ba? Alalonbalo dulu nte wo ḡoxon kela ba? ⁴⁸ Atelu kennu xa ke moxo dafaningḡolu ti, í xo alu Fa men be sanḡo to be dafanin ḡa men.

6 «Al'alu fannu korosi, alu xana alu la Alapasilanɗa kuwolu ke x'alu fannu yita moxolu la. Nin alu xa wo ke, alu me na barajji soto alu Fa la, men be sanɗo to. ² Nin í be sadaxo dila segebaxantunɗo ma, xana buutu fo í ɗa walasa moxolu x'é je x'é lasaxa. Fulankafo lelu b'a kela ten Alabatusuwolu xono anin bedolu to. I be wo kela nin moxolu s'i jagi. Tonɗa la, ń b'a fola alu ɗen xo i x'e la barajjo soto xa ban. ³ Bari nin ite be sadaxo dila segebaxantunɗo ma, í numanbulo xana í kininbulo la ku keta lon, ⁴ walasa wo xa ke fen duguninɗo ti. Nin wo keta, í Fa men be ku duguninɗolu jela, wo si í barajji. ⁵ «Nin alu be Ala matarala, alu xana a ke í xo fulankafolu b'a kela ɗa men; bawo a xa di wolu ɗen x'e lo Alabatusuwolu xono anin bedolu to xa Ala matara, walasa moxolu x'e je. Tonɗa la, ń b'a fola alu ɗen, wolu x'e la barajjo soto xa ban. ⁶ Bari ite, nin í be Ala matarala, dun í la bugo xono, xa da taxun í da la. Í Fa matara non, men be dula duguninɗo. Ate men be ku duguninɗolu jela, wo si í barajji. ⁷ «Nin alu be Ala matarala, alu xana saagi xumolu xan fu sinɗa kiika ti, í xo Alalonbalolu b'a kela ɗa men. Wolu hakilo la x'e la xuma kiika le b'a tula i la taralolu be mutala. ⁸ Alu xana wolu ladigi; bawo alu Fa men be sanɗo to x'a lon alu maakuwo be fenɗo mennu la, jannin alu xa wolu ɗinin a la. ⁹ Atelu xa xan xa Ala matara ɗa men, wo fele: "N Fa men be sanɗo to, í toxo la senuya xa lon, ¹⁰ na í la Mansaya ti, í sago be kela sanɗo to ɗa men, a xa ke duguxulo xan wo ɗa ma. ¹¹ N na bi baluwo di n ma, ¹² n na haxxolu yaafa n ma, í xo n dulu be yaafala n haxxetabaxolu ma ɗa men. ¹³ Í xana a tu n xa dun xotoboliku xono, bari n kisi Jaxumanɗo ma. [Katugala mansaya nin sintigiya anin nooro mu ite le ta ti, fo abada. Amiini.]" ¹⁴ «Nin alu be yaafala moxolu ma, alu Fa men be sanɗo to si yaafa alu dulu ma; ¹⁵ bari nin alu nte yaafala tolu ma, alu Fa me alu dulu la haxxolu yaafa alu ma. ¹⁶ «Nin alu be sunna, alu xana alu ɗalu tosiisi í xo fulankafolu b'a kela ɗa men. Wolu b'e ɗa tosiisila, walasa moxolu x'a lon xo i be sunnin. Tonɗa la, nte b'a fola alu ɗen xo i x'e la barajjo soto xa ban. ¹⁷ Bari ite, nin í be sunna, í ɗada ku, xa latikolonɗo ke í kunɗo la, ¹⁸ walasa moxolu xana a lon xo í be sunnin, fo í Fa men be dula duguninɗo kilin doron. Í Fa men ɗa be ku duguninɗolu la, wo si í barajji. ¹⁹ «Alu xana naafulu lakamari x'a lamara alu fannu ɗen ɗin duniya in to, tunbolu si a tija jan men, sama walla sonɗo si a muta jan men, sunɗo dulu si dalu xati, xa suupalo ke jan men. ²⁰ Bari alu naafulo lakamari alu fannu ɗen sanɗo to; tunbolu me a soto non x'a tija, sama me a muta non, sunɗolu me non dalu xati no xa talo ke. ²¹ Bawo í la naafulo be jan men, í jusukunɗo du be kela non ne. ²² «Moxo ɗa le mu a balo lanpo ti. Nin í ɗalu xa ɗin, í balo bee be keneya la. ²³ Bari nin í ɗalu man ɗin, í balo bee be dibo le to. Bari keneya men xa xan xa ke ite la, nin wo keta dibo ti, wo mu dibiba le ti de.

²⁴ «Moxo si me baaro ke no marigi fula ɗen. Nin a be kilin jaxuyanin, a be do xanunin ne. Walla nin a be notonin kilin na, a nte do jaatela. Alu me baaro ke no Ala nin xaaliso ɗen i ɗoxo la. ²⁵ «Wo le x'a tu, ń b'a fola alu ɗen xo: Alu xana hanme alu baluɗa la x'a fo xo: "Ntelu si mun domo, anin n si mun min?" Alu xana hanme alu feetofataɗa la x'a fo xo: "Ntelu si n feetofato soto ɗa di?" Nilamaya man xole domolo ti ba, fo balo man xole faano ti? ²⁶ Alu xonolu mafele, i nte fen lanna, i nte fen tegela, i nte fen nasawula kurukuru xono, bari alu Fa men be sanɗo to be i labalula. Atelu man fisa bete wolu ti ba? ²⁷ Jon be alu to, nin wo la hanmo si haali dondin kafu no a siyo ma? ²⁸ «Mun dun na alu be hanmela faanu kuwo la? Alu wulaxonobaxolu firo boɗa mafele. I nte baara kela, i nte wurundili kela. ²⁹ Wo bee nin a ta, nte b'a fola alu ɗen xo, haali mansaxe Sulemani nin a la saramaya bee, a la faanolu beteya man wolu kilin ta bo. ³⁰ Nin Ala be wulaxonobinɗo feetofatala ten, wo men be je bi, sinin a si fili ta to, a me atelu feetofata bete ba xa tanbi wo xan? Alu la lannaya xa doxo. ³¹ Alu xana hanme x'a fo xo: "N si mun domo? N si mun min? N si mun ke xa n fannu feetofata?" ³² Alalonbalo lelu be wo fenɗolu bee ɗininna tuma bee. Alu Fa men be sanɗo to x'a lon xo alu maakuwo be wo fenɗolu bee la. ³³ Alu Ala la Mansaya nin a la tilininɗa ɗinin folo. Nin wo keta, wo fenɗolu bee si di alu ma xa kafu wolu ma. ³⁴ Alu xana hanme sinin kuwo la; bawo sinin be sinin ma. Lunɗo bee sege si a fan bo.

7 «Alu xana kiiti tege moxo xan, kiiti me tege alu dulu xan, ² bawo alu be kiito tegela tolu xan ɗa men, kiito si tege alu dulu xan wo ɗa kilin in ma. Alu be tolu ta sumanna sumannilannɗo men na, alu ta si suman wo la. ³ Mun na dokkondinɗo men be í badinɗo ɗa to, í be í ɗa lola wo to, x'a tara salo men be í fan ɗa to, í ɗa nte wo la? ⁴ Í s'a fo ɗa di í badinɗo ɗen xo: "Í lo, ń xa dokkondinɗo bo í ɗa to," x'a tara salo be í fan ɗa to? ⁵ Fulankafu in, salo bo í fan ɗa to folo; nin wo keta, í si jelo ke a ɗa ma, xa dokkondinɗo bo í badinɗo ɗa to. ⁶ «Alu xana fen senumanɗolu fili wulolu xoto, i xana taxa i yelema x'alu serende. Alu xana xononkese daxolenɗolu fili lelu xoto, i yelemato xana taxa lo i to. ⁷ «Alu Ala matara, a si di alu ma; alu ɗininno ke, alu si soto ke; alu da konkon, da si yeke alu ɗa. ⁸ Moxo wo moxo je Ala matara, wo si soto ke; men je ɗininno ke, wo si fen je; men je da konkon, da si yeke wo ɗa. ⁹ Atelu to, moxo joman si son xa kuro di a dinɗo ma, nin a xa buuro ɗinin a la? ¹⁰ Walla a si sa di a dinɗo ma nin a xa ɗego ɗinin a la? ¹¹ Atelu mennu xa jaxu, nin atelu xa fen ɗuma diɗa lon alu dinɗolu ma, alu Fa men be sanɗo to, wo me fen ɗumalu di a tarabaxolu ma bete bete ba, xa tanbi atelu xan? ¹² «Awa, fen wo fen nin alu b'a fe moxolu x'a ke alu ɗen, alu dulu xa wo ɗoxon ke i ɗen. Wo le fota Musa la sariya nin kilalu la kitaabolu xono. ¹³ «Alu dun da doxomandinɗo fe. Ba-

wo da men be taxala halagilo ma, wo da xa bun, a silo taxama xa di, a taxamabaxolu xa sa. ¹⁴ Bari silo men be taxala nilamaya banbalo ma, wo da xa doxo, a silo taxama xa xole, a taxamabaxolu man sa. ¹⁵ «Alu i korsi kila fanolu ma. I saaxama be nala alu ma, bari i xono to, i mu turuma lelu ti. ¹⁶ Alu s'i lon i la kewalolu ma. Resendin moninjo si xati jogonsaase la ba? Walla turodinjo si xati njaninjuwo la ba? ¹⁷ Yiri numa si din numa ke, bari yiro men man jin, wo si dinjo ke men man jin. ¹⁸ Yiri numa me din ke no, men man jin. Yiro men du man jin, wo me din numa ke no. ¹⁹ Yiri wo yiri nin a nte din numa kela, wo si tege xa fili ta to. ²⁰ Wo na kilin in ma, alu si kila fanolu lon i la kewalolu ma. ²¹ «Mennu be n kilila xo: "Marigi, Marigi", wolu bee nte dunna Ala la Mansaya xono, fo n Fa men be sanjo to sago kebaxolu. ²² Kiito lunjo, moxo kiika s'a fo n pen xo: "Marigi, Marigi", n man kilaya ke i toxo la ba? N man jinnolu xoyi moxolu to i toxo la ba? N man kawaku kiika ke i toxo la ba? ²³ Wo to, nte s'a fo wolu pen xo: "N man alu lon abada. Alu bo n xoto, kujaxukela innu." ²⁴ «Nte be men fola alu pen jin ti, xo moxo wo moxo be nte la jin xuma innu lamela, x'e ke, wo tigo be le i xo moxo hakilima, men x'a la bunjo jusigi fataxulo xan. ²⁵ Sanjiyo nata, xolu woyota, fopolu tegeta xa na wo bunjo xan, bari a man boyi; bawo a tun be lonin fataxulo xan. ²⁶ Bari nte be men fola alu pen jin ti, nin moxo wo moxo be nte la jin xuma innu lamela, nin a nte i kela, wo tigo be le i xo hakilintanjo, men x'a la bunjo jusigi kepo xan. ²⁷ Sanjiyo nata, xolu woyota, fopolu tegeta xa na wo bunjo xan, a woman in boyita muruxumerexe.» ²⁸ Isa x'e soto wo xaranjo la tumo men, jama dabaro tuta bannin a la moxo-laxaranja la, ²⁹ bawo ate tun nte i laxaranna i xo i la sariya karanmoxolu; katugala barako tun be ate la xaranjo le to.

8 Isa jigininma xa bo kuro to, jamaba x'a lo a nofe. ² Bagito do x'e sodun, x'e nongi a xoto, x'a fo a pen xo: «Marigi, nin a xa di i pen, i si sin no xa nte kendeya, anin xa n senuya.» ³ Isa x'a bulo tosaba x'e maxa a la, a xo: «A diyata n pen, senuya!» Wo no bee to, a senuyata, bago x'a bula. ⁴ Wo xo, Isa xo a pen xo: «I xana fen fo moxo si pen, bari taxa i yita sadaxalasibaxo la. Kila Musa xa sadaxo men waajibiyi, wo bo, men s'a yita i la xo i senuyata.» ⁵ Isa dunta Kaperenahun gallo xono tumo men, sorodasi jalatigiba do x'e sodun, x'a matara xo: ⁶ «Marigi, n na baaradinjo be lanin luwo ma, a be muruxunin, a be degunin bete.» ⁷ Isa xo a pen xo: «N si taxa a lakendeya.» ⁸ Sorodasi jalatigiba x'a jaabi xo: «Marigi, nte nin a man xan i xa dun nte la luwo ma, bari xuma kilin doron fo, n na baaradinjo si kendeya. ⁹ Bawo kuntigo dolu be nte kunna, nte du be sorodaso dolu kunna. N s'a fo do pen xo: "Taxa," a si taxa. N s'a fo do xote pen xo: "Na," a si na. N s'a fo n na jonxe pen xo: "Nin ke," a si wo ke.» ¹⁰ Isa xa wo xumo me tumo

men, a dabaro banta x'a fo a nofemoxolu pen xo: «Tonja la, n b'a fola alu pen xo: N man jin noxon lan-naya je moxo si la, haali Banisirayila xono. ¹¹ N b'a fola alu pen xo moxo kiika si na xa bo koton nin tiliboyi x'e sigi, i nin Burehima nin Nsiyaxa nin Yaxuba, xa domolo ke sanxulo Mansaya xono. ¹² Bari men tunnu be kela Ala la Mansaya dinjolu ti, wolu si fili banto to, dibo to. Xaso nin dafatakinjo si ke non.» ¹³ Wo xo, Isa x'a fo sorodasi jalatigiba pen xo: «Taxa, i xa men fo, wo si ke i pen, x'a la i la lannaya xan.» Wo waxato fan, a la baaradinjo kendeyata. ¹⁴ Isa taxata Piyere la luwo ma. A xa Piyere bitanmusu tara lanin, xando b'a la. ¹⁵ Isa x'e maxa a bulo la tumo men, xando fatata a ma. A wulita xa Isa la haajolu ke. ¹⁶ Suwo kuta tumo men, moxolu nin jinnetolu kiika nata Isa ma. A xa jinnolu xoyi a la xumaxanjo la, xa jangarutolu bee kendeya. ¹⁷ Wo na ma, kila Esayi la xuma in keta xo: «A x'e dun n na toorolu xoto, xa n na jangarolu kendeya.» ¹⁸ Isa xa jama je a lamininnin tumo men, a x'a la xarandinjolu yanmaru xo i xa taxa dalaba boxo do. ¹⁹ Sariya karanmoxo do x'e sodun a la x'a fo a pen xo: «Karanmoxo, i je taxa dula wo dula, n s'a lo i nofe.» ²⁰ Isa xo a pen xo: «Wuwo be kunkuwulolu kun, naxanjo be xonolu kun, bari dula nte Moxo Dinxe bulu, a s'i tofopo jan men.» ²¹ A la xarandin kilin xote x'a fo a pen xo: «Marigi, a tu folo, nte xa taxa n fa fure lasi.» ²² Isa x'a jaabi xo: «A lo n nofe, a tu furelu x'e la furelu lasi.» ²³ Isa nin a la xarandinjolu dunta xulunjo xono. ²⁴ Nakun kilin ma, fopoba wulita dalaba xan fo fanfe tun be njin xa xulunjo latunu. Wo x'a tara, Isa tun be sinnoxonin. ²⁵ Xarandinjolu x'e sutiya a la, x'a lakuni, x'a fo a pen xo: «Marigi, n kisi! N je tu de!» ²⁶ Isa x'e jaabi xo: «Mun na alu be silala? Alu la lannaya xa doxo.» A woman in wulita xa xuma xolen fopo nin jiyo pen. Wo keninma, fopo lota, jiyo x'e mala lep. ²⁷ Bee dabaro banta, i xo: «Nin mu jon ti, nin haali fopo nin jiyo b'a xumaxanjo labatula?» ²⁸ Isa sita dalaba boxo do tumo men, Gadarangolu la jamano xan, jinneto fula bota xaburufe to xa na a kunben. I la jaxuya kujaxo, moxo si tun me fatiya xa tanbi wo silo fe. ²⁹ Wo jinnetolu kuleta xo: «Ala Dinxe, mun x'e si ntelu ma? I nata le ba xa n tooro jan, jannin waxato xa si?» ³⁰ Legooreba do tun be dula-jan, domolo la. ³¹ Jinnolu xa Isa matara xo: «Nin i be n xoyila, n bula n xa taxa dun jin legoore in to.» ³² Isa x'e jaabi xo: «Alu taxa!» Wo keninma, jinnolu bota xe fula innu to, xa taxa dun legoore in to. Wo na in, wo legoore gidita, x'e parati kurumalanjo la, xa jigi dalaba to, xa sa. ³³ Lenegaanilalu x'e bori xa taxa gallo xono, xa wo kuwolu bee laxali, anin men keta wo jinnetolu la. ³⁴ Wo na in, gallo moxo bee bota xa taxa Isa kunben. I x'a je tumo men, i x'a matara xo a xa taxa, xa bo i la jamano xono.

9 Isa dunta xulunjo xono, xa dalaba tege xa taxa a la gallo to. ² Moxolu nata xe muruxunte do ti a ba-

ta, a be lanin larango to. Isa xa wo moxolu la lannaya je tumo men, a xo xe muruxunte nen xo: «Nin din, í haki lo lasigi! Í la junubolu yaafata!»³ Wo to, sariya karanmoxo dolu xo i xonoto xo: «Nin xe in be Ala toxo tijnala.»⁴ Isa x'e la miiriya lon, a xo: «Mun na nin miiri jaxu in be alu jusukunjo la?»⁵ X'a fo: «Í la junubolu yaafata," walla: "Wuli, í x'é taxama." Wo xuma fulo to, joman fo xa di?»⁶ Bari n b'a fe le alu x'a lon xo a sinjo be Moxo Dinxe nen xa junubolu yaafa duguxulo xan.» Wo to, a xo muruxunte nen xo: «Nin x'é yanmaru, wuli, í x'é la larango ta, xa taxa í bata!»⁷ Xe wulita wo na in, x'a la larango ta, xa taxa a bata.⁸ Moxolu xa wo je tumo men, i silata. I xa barako bula Ala nen, bawo a xa nin noxon sin di hadamadinjolu ma.⁹ Isa tanbito dula do la, a xa xe do je siginin sagallemutadula, wo tun toxo xo Macu. Isa xo a nen xo: «A lo n nofe.» Macu wulita x'a lo a nofe.¹⁰ Isa tun be domolo la Macu bata; x'a tu non, sagallemutala kiika nin kujaxukela xotelu nata kafu a nin a la xarandinjolu ma xa domolo ke.¹¹ Farisiyalu xa wo je tumo men, i xo Isa la xarandinjolu nen xo: «Mun na alu karanmoxo nin sagallemutalalu nin kujaxukelalu be domolo kela i noxo fe?»¹² Isa xa wo xumolu me tumo men, a xo: «Moxo kendolu maaku nte dogotooro la, jangaruto lelu maakuwo b'a la.¹³ Alu taxa i miiri nin xuma innu xoto ma xo: "Men xa di n nen, wo mu hinno le ti, marafen sadaxa nte." Bawo moxo mennu be i fannu jaatenin moxo tilinninjolu ti, nte man na wolu kili, nte nata junubeto lelu kili, x'e kisi.»¹⁴ Wo to, Batiselila Yaya la xarandinjolu x'e sodun Isa la, x'a njininxo xo: «Mun na ntelu nin Farisiyalu be sunna, x'a tara ite la xarandinjolu nte sunna muume?»¹⁵ Isa x'e jaabi xo: «Maapoxe tojoxolu si nitokuwa no ba, x'e nin maapoxe tu i noxo fe? Abada, wo me ke no. Bari lunjo si na, maapoxe si buusi i la, nin wo keta, i si sun.¹⁶ «Moxo si me faanuxono kuto la faanu xoto ma. Nin wo keta, wo kuto si xotomango saba, x'a fara fo faraja jaxu.¹⁷ Moxo me dolo kuto ke sumalle xotolu to. Nin wo keta, dolo kuto kumuto si sumallolu te; bono si ke dolo to, sumallolu si tija. Bari, dolo kuto kedula mu sumalle kuto lelu ti. Nin wo keta, i bee si lamara bete.»¹⁸ Xa Isa tu wo xumo la, Yahudiyalu la namoxo do nata í njongi a xoto, x'a fo a nen xo: «Nin dinmuso birin banna saasa. Í me na í bulo la a xan ba, nin a si nilamaya?»¹⁹ Isa nin a la xarandinjolu wulita x'a lo a nofe.²⁰ Laada banbalo tun be muso do la, kabirin san tan nin fula. Wo nata Isa xo ma, x'é sodun a la, x'é maxa a la dorokexuwo la.²¹ Bawo a tun be í son a xonoto xo: «Nin haali n maxata a la doroko la, n si kendeya.»²² Isa x'é xofele, x'a je, a xo a nen xo: «Nin dinmusu, í hakilo lasigi, í la lannaya x'é kendeya» Wo nondin kilinjo to, muso kendeyata.²³ Isa sita namoxo in na luwo ma tumo men, xa fulefolalu je anin jama, wolu be sonxola, a xo: ²⁴ «Alu bo jan; bawo dindinjo man sa. A be sinnox-

onin ne.» I jeleta a ma.²⁵ Jama labota banto to tumo men, Isa dunta bunjo xono, xa dindinjo saninjo muta a bulo ma doron, a wulita.²⁶ Wo xibaro wanwanta jamano dula bee.²⁷ Isa taxata xa bo non, a tanbito, fiyonto fula x'a lo a nofe, i be kulexan xo: «Dawuda Mamarinjo, hinna n na!»²⁸ Isa sita luwo ma tumo men, fiyontolu x'e sodun a la, Isa x'e njininxo xo: «Alu be lanin a la xo nte si alu palu ye le no ba?» I x'a jaabi xo: «Iyo, Marigi.»²⁹ Wo to, Isa x'é maxa i palu la x'a fo xo: «A xa ke alu nen x'a ben alu la lannaya ma.»³⁰ I palu yeleta. Isa x'a xoleya i ma xo: «Alu xana a tu moxo si x'a lon de!»³¹ Bari, kabirin i bota, i xa Isa toxo fo wo jamano dula bee.³² I be nala taxala tumo men, moxolu nata xe jinneto do ti Isa bata, men tun mu muumuwo ti.³³ Kabirin Isa xa wo jinno xoyi, muumuwo xa xumo damuta. Jama dabaro banta. I xo: «Nin noxon man je Banisirayila abada.»³⁴ Bari Farisiyalu tunnu b'a fola xo: «A be jinnolu xoyila xa bo moxolu to jinnolu la kuntigo le barako la.»³⁵ Isa tun be taxaxan gallubalu nin gallundinjolu to, xa moxolu laxaran i la Alabatusuwolu xono, xa Ala la Mansaya xibaru Dimango fo. A tun be jangaru nasifa nin felu bee kendeyala.³⁶ Isa xa jama je tumo men, i hinno x'a muta; bawo i tunnu segeta, anin i gigo meseyata, í xo negaanibaxa nte saaxo mennu ma.³⁷ Wo to, a x'é xantu a la xarandinjolu nen xo: «Senefen nadarata xa sa, bari baarala xa doxo.»³⁸ Wo to, alu fuututigo matara, walasa a xa baarala kiika bula i xa taxa a la senefenjolu ladara.»

10 Isa x'a la xarandin tan nin fulo kili xa sinjo di i ma xa jinnolu xoyi xa bo moxolu to, xa jangaruto nasifa nin felu bee kendeya.² Kiladin tan nin fulo toxolu fele: Folo, Simon, nin a be kilila xo Piyere, nin a doxoxe Andere; Sebede dinxelu: Yaxuba nin a doxoxe Yaya;³ Filipe nin Baratelemi; Tomasi nin sagallemutala Macu; Alife dinxe Yaxuba nin Tade;⁴ Simon, men be kilila xo Seloti, nin Yudasi Isikariyoti men xa Isa janfa.⁵ Isa x'a la xarandin tan nin fulo ki xa taxa waajulo la, xa nin yanmaru innu di i ma xo: «Alu xana taxa siya tolu bata, alu xana dun Samaringo dulu la gallu si xono.⁶ Alu taxa Banisirayila moxolu bata, wo mennu mu saaxa sankoninjolu ti.⁷ Alu taxato xa waajulo ke x'a fo moxolu nen xo Ala la Mansaya sutiyata.⁸ Alu jangarutolu kendeya, xa furelu lakuni, xa bagitolu senuya, xa jinnolu xoyi x'e labo moxolu to. Alu xa men soto Ala la fu, alu wo di moxolu ma fu.⁹ Alu xana sanu, walla xaalisi, walla xaalisi mesen bula alu kun.¹⁰ Alu xana fudi ta taxamo xanma, walla doroke fula, walla samatolu, walla guma. Baarakela nin a la domolo xa xan.¹¹ «Nin alu sita gallu wo gallu to, galluba walla gallu mesendin, alu njininxalo ke nin moxo be je, men si alu jigiyi a bata. Nin wo moxo sotota, alu tu non fo alu taxatumo xa si.¹² Nin alu dunta luwo ma, alu xontonno ke.¹³ Nin wo luwo moxolu sonta x'alu jigiyi, alu la heero si jigi wo luwo moxolu xan, bari nin i man son

x'alu jigiyi, alu la heero me jigi wo luwo xan. ¹⁴ Awa, nin lu wo lu moxolu walla gallu wo gallu moxolu man alu jigiyi, anin nin i man alu la xumolu lame, alu boto wo luwo walla wo gallo xono, alu si alu sinnabanxo konkon x'a bo alu sinḡolu la. ¹⁵ Tonḡa la, ḡ b'a fola alu nen xo: Kiito lunḡo, Sodome nin Gomore gallolu la kiito si newoya xa tanbi wo gallo ta xan.» ¹⁶ «A fele, nte be alu kila í xo saaxolu, warolu temo to. Alu kewuya í xo salu, xa ke jalagibalo ti í xo jenetubanḡo. ¹⁷ Al'alu fannu korosi hadamadinḡolu ma, bawo i si alu muta xa taxa alu dun kiititegelalu bulu, x'alu buwo gaḡo la i la Alabatusuwolu xono. ¹⁸ I si taxa alu ti goferenerolu nin mansaxelu ḡa xoto nte la kuwo koso. Wo si ke sabaabu ti, alu xa nte la kuwo seedeya wolu nin siya tolu nen. ¹⁹ Bari nin i taxata alu ti kiititegedula, alu xana hanme alu la xuma foḡa walla alu la xuma fotalu la. Alu xa xan xa men fo, wo si dun alu da wo tumo fan. ²⁰ Bawo wo xumolu nte bola alu to, bari alu Fa fan ne be wo xumo dunna alu da a Niyo la. ²¹ Moxo dolu s'í badinḡolu dun bulo to, i xa faxa; fa do dulu si wo noxon ke i dinḡolu la. Dinḡo dolu si wuli i wulubaxolu xanma, x'e dun bulo to, i xa faxa. ²² Moxo bee si alu jaxuya nte toxo nofe. Bari moxo men je wo toorolu muḡa lan-naya to, fo labanḡo xa si, wo si kisi. ²³ Nin i x'alu tooro gallo do to, alu i bori xa taxa gallu xote to. Tonḡa la, ḡ b'a fola alu nen xo: Alu me Banisirayila gallolu bee taxama x'e ban, x'a tara Moxo Dinxe man na. ²⁴ «xarandinḡo man bun a karanmoxo ti, jonḡo du man bun a marigi ti. ²⁵ Xarandinḡo danḡo mu le a xa ke í xo a karanmoxo, jonḡo du danḡo mu le a xa ke í xo a marigi. Nin i xa lutigo kili xo Bilisa, toxo men je la luxonomoxolu la, wo me jaxuya lutigo ta ti ba?» ²⁶ «Wo xanma, alu xana sila moxolu ḡa! Fusi nte dugunin nin a me bo keno la. Fusi nte gullo to nin a me lon. ²⁷ ḡ be men fola alu nen diboto, alu wo fo keneya la. Men je kondikondi alu nen, alu wo gangu bunḡolu sanḡo to. ²⁸ Mennu si moxo faxa no, bari i me ku tija a niyo ma no, alu xana sila wolu ḡa. Men si a no xa moxo balo nin a niyo halagi jahanaba xono, alu xa xan xa sila wo le ḡa. ²⁹ Titine fula nte fiirila kuseeti kilin na ba? Bari wo bee nin a ta, haali kilin me butun dugo ma x'a tara alu Fa Ala man son. ³⁰ Haali atelu kunsinolu, i bee jaateninḡo le mu. ³¹ Wo to, alu xana sila. Alu xa fisa titinolu bee ti.» ³² «Moxo men je a yita xo a mu nte ta ti moxolu ḡala, nte du s'a yita ḡ Fa ḡala, men be sanḡo to, xo wo tigo mu nte ta le ti. ³³ Bari moxo wo moxo je bo nte la, moxolu ḡala, nte du si ḡ bo wo tigo la ḡ Fa ḡala, men be sanḡo to.» ³⁴ «A xana ke alu ḡala xo ḡ na-ta benḡo le ti duguxulo xan. Ayi, ḡ man na benḡo ti, ḡ nata kelo le ti. ³⁵ ḡ nata le xa dinxe nin a fa tala, xa din-muso nin a na tala, xa bitanmusundinḡo nin bitan-musuba tala. ³⁶ Moxo badinḡolu si ke a jaxolu ti. ³⁷ Moxo wo moxo be a fa walla a na fe xa tanbi nte xan, wo tigo nin nte man xan. Moxo wo moxo be a dinxe

walla a dinmuso fe xa tanbi nte xan, wo tigo nin nte man xan. ³⁸ Moxo wo moxo nte a fan gengenyiro tala, x'a lo nte nofe, wo tigo nin nte man xan. ³⁹ Moxo men b'a fe x'a niyo kisi, wo si bono a niyo to, bari moxo men je bono a niyo to nte la kuwo xanma, wo niyo si kisi.» ⁴⁰ «Moxo wo moxo je alu jigiyi, wo xa nte le jigiyi. Men du xa nte jigiyi, wo xa ḡ kibaxo le jigiyi. ⁴¹ Moxo wo moxo je kila do jigiyi a la kilaya xanma, kila be baraajo men sotola, wo tigo si wo noxon soto. Moxo men du je Alapasilanḡabaxo do jigiyi a la Alapasilanḡa xanma, Alapasilanḡabaxo be baraajo men sotola, wo tigo si wo noxon soto. ⁴² Moxo wo moxo je haali jitafe ḡa kilin jisuma di nin dindin innu do ma, x'a la a xan xo nte la xarandinḡo le mu, tonḡa la, ḡ b'a fola alu nen xo wo tigo me bono a la baraajo to.»

11 Isa x'é soto a la xarandin tan nin fulo laxaranna wo kuwolu la tumo men, a bota non xa taxa jamaño gallubalu to, xa moxolu laxaran, x'e waaju. ² Xa Batiselila Yaya tu kaso la, a xa Kirisita la kebaarolu xibaro me. Wo tumo, a x'a la xarandinḡo dolu ki Isa ma xo: ³ «Men xa xan xa na, ite le mu wo ti ba, walla n xa xan xa do xote le laxono?» ⁴ Isa x'e jaabi xo: «Alu be men mela anin alu be men jela, alu taxa wo fo Yaya nen: ⁵ «Fiyontolu be ma xa dula je, sin kilinḡolu b'e taxamaxan, bagitolu be senuyaxan, tuluxutiyolu be ma xa melo ke, furelu be kunixan, xibaru Dimanḡo be fola fangantanḡolu nen.» ⁶ Moxo men man bo lanin nte la, heero be wo tigo nen.» ⁷ Yaya la kiladinḡolu taxaninma, Isa x'a damuta xa xuma jama nen Yaya la kuwo to. A xo i nen xo: «Alu taxata mun fen mafele wulo xono? Alu taxata badoxala gansanḡo le mafele ba, foḡo be men namaxala? ⁸ Alu dunnu taxata mun fen mafele? Faanubetetigo ba? Bari faanubetedunnalu be mansaxe lelu la luwolu xono. ⁹ Alu dunnu taxata mun ne mafele? Kila do le mu ba? Iyo, kila do le mu. Nte b'a fola alu nen xo Yaya xa bun kila ti. ¹⁰ A be safenin Kitaabo to ate le xan: «Ala xo: ḡ fele ḡ na kiladinḡo kila í ḡa, xa í la silo toben í nen.» ¹¹ Tonḡa la, nte b'a fola alu nen xo: Din man nala dinnalaranḡo to, men xa bun Batiselila Yaya ti. Bari, wo bee nin a ta, Ala la Mansaya xono, moxolu bee to doxomandinḡo xa bun Yaya ti. ¹² Kabirin Batiselila Yaya la waxato fo bi, Ala la Mansaya be ḡninna barako le la, baraketigo lelu b'e balanna x'a soto. ¹³ Kilalu bee anin kila Musa la sariya xumata Ala la Mansaya xan, fo xa na si Batiselila Yaya la waxato ma. ¹⁴ Nin alu si son xa la ḡin na: Yaya le mu wo Eli ti, kila men tun na nalixumo fota. ¹⁵ Tulo be men ma xa lamelo ke, wo xa lamelo ke! ¹⁶ «ḡ si bi moxolu xaapan jon ma? I be le í xo dindinḡolu be siginin be-ralu to x'e noxo kili xo: ¹⁷ «N xa fule fo alu ma, alu man i don. N xa sanḡabundala donkilo do la, alu man xasi.» ¹⁸ Bawo Yaya nata, a tun nte domoli kela, a nte minfen minna. Bari a fota a ma xo ma xo: «Jinno le b'a to». ¹⁹ Moxo Dinxe nata, a be domolo kela, x'é min, i xo:

“Nin xe in mu nuxuma nin dolominna le ti. A xanunte mu sagallemutalalu nin junubekela lelu ti.” Bari tonja dita Ala la hakilitigiya ma a la kebaarolu fe.»²⁰ Wo tumo, Isa x’a la kawakuwolu kiika ke gallo mennu to, a x’a damuta xa wolu jalagi; bawo wo gallo moxolu man son x’e xodi i la junubolu la.²¹ A xo: «Korasin gallo moxolu, bone be alu jen! Betesayida gallo moxolu, bone be alu jen! Bawo kawakuwo mennu keta alu bata, nin wo tunnu keta Tire nin Sidon, biyan x’a tara non moxolu xa faanu kurunḡolu dun, xa bugutixoyo ke i kunḡo la, walasa x’a yita xo i tuubita.²² Wo le x’a tu, ḡ b’a fola alu jen xo kiito lunḡo, alu la tooro si bunja xa tanbi Tire nin Sidon ta xan.²³ Ite dun Kaperenahun, í la miiro la xo í si xotota ba fo sanxulo ma? Ayi de! Í be majigila le fo lahara. Bawo kawakuwo mennu keta í bata, nin wo tunnu keta Sodome gallo xono, wo gallo tun si tu je fo bi.²⁴ Wo le x’a tu, ḡ b’a fola alu jen xo kiito lunḡo, í la tooro si bunja xa tanbi Sodome ta xan.»²⁵ Wo waxato, Isa xa xumo ta xo: «ḡ Fa, sanxulo nin duguxulo Marigi, ḡ be barako bulala í jen; bawo í xa nin ku innu dugu hakilitigolu nin moxo xaranninḡolu ma, x’e yita dindinḡolu la.²⁶ ḡ Fa, a keta ten; bawo wo le diyata í jen.²⁷ «ḡ Fa xa kuwo bee dun ḡ bulu. Moxo si man Dinxe lon, fo Fa kilinpe. Moxo si du man Fa lon nin Dinxe kilinpe nte, anin a xa di Dinxe jen x’a yita mennu la.²⁸ «Alu na nte ma, atelu mennu bee be segenin alu la dono xoto, nte si lafiya di alu ma.²⁹ Alu ḡ na suwo ta, ḡ be men lala alu xanḡo la, x’a tu ḡ x’alu laxaran; bawo ḡ be sabarinin, ḡ be majiginin. Wo ja ma, alu si lafiya soto.³⁰ ḡ be alu bulala suwo men tala, wo ta man xole; ḡ na dono xa fe.»

12 Wo tumo, Isa xa alixaamafuuto dolu tofara tofopolunḡo. Xonxo tun b’a la xarandinḡolu la, i woman innu xa kunḡo dolu tege, x’e keso pimi.² Farisiyalu xa wo je tumo men, i xo Isa jen xo: «A fele, men nte dagenin tofopolunḡo, í la xarandinḡolu be wo kela.»³ Isa x’e jaabi xo: «Wo tumo Dawuda xa men ke, alu man wo xaran ba, tumo men xonxo x’a nin a nofemoxolu muta?⁴ Buurolu mennu be dila Ala ma sadaxo ti, a dunta Ala la bunḡo xono xa wolu ta, x’e domo. Wolu domo tun nte dagenin ate nin a nofemoxolu ma. I domo tun be dagenin sadaxalasi-baxolu doron nelu ma.⁵ Alu man a xaran sariya to ba xo sadaxalasi-baxolu be tofopolunḡo sariya tipala Alabatusuba baaro la, tofopolun wo tofopolun, x’a tara i nte jalagila? ⁶ ḡ b’a fola alu jen xo do be jan, men xa bun Alabatusuba ti.⁷ Nin alu tun xa Kitaabo la nin xuma innu xoto lon xo: “Men xa di ḡ jen, wo mu hinno le ti, marafen sadaxa nte”, alu tunnu me jalagibalolu jalagi.⁸ Bawo tofopolunḡo tigo mu Moxo Dinxe le ti.»⁹ Isa bota non xa taxa dun i la Alabatusuwo xono.¹⁰ Xe bulu saninḡo do tun be je. Farisiya dolu xa Isa ḡninxa xo: «A be dagenin tofopolunḡo xa moxo kendeya ba?» I xa wo fo, walasa x’a jalagi.¹¹ Isa xo i jen xo: «Moxo joman be alu

to nin saaxa kilin doron b’a bulu, wo saaxo xa bula dinxo xono tofopolunḡo, nin a me a saba x’a labo.¹² Moxo man xole bete saaxo ti ba? Awa, a be dagenin xa puma ke tofopolunḡo.»¹³ Isa woman in xo xe jen xo: «Í bulo tosaba!» A x’a bulo tosaba. A woman in bulo kendeyata xa ke í xo a bulu do.¹⁴ Farisiyalu bota xa taxa i noxo je Isa faxana xan.¹⁵ Isa xa wo lon tumo men, a bota non. Jamaba x’a lo a nofe, a xa wolu bee kendeya.¹⁶ Bari a x’a xoleya bete i ma, xo i xana a tu moxolu xa ate lon.¹⁷ Wo ja ma, Ala xa xumo men dun kila Esayi da, wo keta xo: ¹⁸ «ḡ na baaradinḡo fele, ḡ xa men sugandi, ḡ na baato, men na kuwo xa di ḡ jen haali. ḡ be ḡ Niyo lajigila a xan. A si tonja silo yita siyalu la.¹⁹ A me soosoli ke, a me feten. Moxo si me a fetenxanḡo me bedolu to.²⁰ A me badoxala laninḡo xati, a me lanpa sato faxesa, fo tilininḡa xa sigi dula bee.²¹ Siyalu bee s’i gigo la a xan.»²² Wo to, moxolu nin xe jinneto do nata Isa bata, men tun mu fiyonto nin muumuwo ti. Isa xa wo kendeya. A x’a damuta xa xuma. A ja dula yeleta.²³ Jama bee dabaro banta. I xo: «Nin mu Dawuda Mamarinḡo le ti ba?»²⁴ Farisiyalu xa wo me tumo men, i xo: «Nin xe in be jinnolu xoyila xa bo moxolu to jinnolu la kuntigo Bilisa le barako la.»²⁵ Isa tun x’e xonokuwo lon; wo to, a xo i jen xo: «Mansaya wo mansaya nin a boxo kilinḡo wulita a boxo do xanma, wo mansaya si te. Gallu wo gallu, walla lu wo lu nin a boxo kilinḡo wulita a boxo do xanma, wo gallo walla wo luwo si te.²⁶ Nin Sentane be a fan ta do xoyila, a wulita a fan ne xanma. Awa, a la mansaya si tu siginin ja di? ²⁷ Nin nte be jinnolu xoyila xa bo moxolu to Bilisa le barako la, ate dunnu la moxolu be jinnolu xoyila jontigi barako la? Wo le x’a tu, itelu fan nelu be a yitala xo boloxo nte alu kun.²⁸ Bari nin nte be jinnolu xoyila Ala Niyo le barako la, wo b’a yitala xo Ala la Mansaya sita alu ma.²⁹ «Moxo joman si dun no xe barakema la luwo xono x’a bulufenḡolu ta, x’a tara a man wo xe barakema siti folo? Nin a xa wo ke le mu, a si a la luwo te.³⁰ Moxo men nte ḡ jin ti, wo tigo mu ḡ jaxo le ti. Moxo men nte ḡ deemala xa kamarilo ke, wo be jenjenno le kela.³¹ Wo le x’a tu, ḡ b’a fola alu jen xo: Junubo pasifa bee, anin Ala toxotinakuwolu bee si yaafa moxolu ma, bari Ni Senunḡo toxo tipalo me yaafa muume.³² Moxo men je xuma jaxo fo Moxo Dinxe ma, yaafa si ke wo tigo ma, bari moxo men je xuma jaxo fo Ni Senunḡo ma, wo tigo me yaafa soto jin duniya in to, a me a soto lahara du.»³³ Isa xo i jen xo: «A xa ke xo yiro do xa jin, a dinḡo du si jan, walla yiro do man jin, a dinḡo du me jan; bawo yiro be lonna a dinḡo le ma.³⁴ Fofoonedinḡolu, ate mennu xa jaxu, alu si xuma puma fo no ja di? Bawo moxo sondonmo be fanin men na, a da be wo le fola.³⁵ Moxo puma si ku puma labo a sondonme puma la. Moxo jaxo si ku jaxo labo a sondonme jaxo la.³⁶ ḡ b’a fola alu jen xo: Moxolu je xuma kuntanḡo fen wo fen fo, i

si njinxa wolu la kiito lunjo. ³⁷ Í la tilinninga soto be bola í la xuma fota lelu to, í la jalago du be bola í la xuma fota lelu to.» ³⁸ Wo ña in, sariya karanmoxo dolu nin Farisiyalu xo Isa ñen xo: «Karanmoxo, n b'a fe í xa taagumansedo do yita n na.» ³⁹ Isa x'e jaabi xo: «Bi moxo jaxu innu anin moxo banninñolu be taagumansedo do njinna, bari taagumansede si me yita i la nin kila Yunusi ta nte. ⁴⁰ Kila Yunusi xa tili saba nin su saba ke pegeba xono ña men, wo ña ma, Moxo Dinxe du be nala tili saba nin su saba kela duguxulo xoto. ⁴¹ Kiito lunjo, Niniwengolu si wuli xa bi moxolu jalagi, bawo Niniwengolu nimisita i la junubolu la Yunusi la waajulo koso. Men dun fele, wo xa bun kila Yunusi ti. ⁴² Kiito lunjo, Worodugu mansamusu si wuli xa bi moxolu jalagi; bawo ate nata xa bo duguxulo danjo ma, walasa xa mansaxe Sulemani la hakilitigiya xumolu lame. Men dun fele, wo xa bun Sulemani ti. ⁴³ «Nin jinno bota moxo do to, a si wula jarolu tobori, tofopodula njinno la. Bari a me dula soto. ⁴⁴ Wo to, a s'a fo a fan ñen xo: "Ñ be ñ koppala ñ na bunjo ma, ñ bota jan men." A koppaninjo si a tara xo wo bunjo be toxulunñanin, a be fitanin, a be tobennin. ⁴⁵ Wo to, a si taxa, xa na jinna woorowula xotelu ti, mennu xa jaxu xa tanbi ate xan. A nin wolu si dun x'e sigi je. Wo moxo labanña si jaxuya xa tanbi folo xan. Bi moxo jaxolu ta be nala kela ten ne.» ⁴⁶ Xa Isa tu xumala jama ñen, a na nin a badinxelu tunnu be lonin banto to, i tunnu b'a fe x'a xumapoxoya. ⁴⁷ Moxo do xo a ñen xo: «Í na nin í badinxelu be lonin banto to, i b'a fe x'e xumapoxoya.» ⁴⁸ Isa x'a jaabi xo: «Jon nin jon mu nte na nin ñ badinxelu ti?» ⁴⁹ A x'a la xarandinñolu ñoomi xo: «Nte na nin ñ badinxelu lelu fele. ⁵⁰ Moxo men be ñ Fa men be sanjo to sago kela, wo le mu nte badinxelu nin ñ badinmuso nin ñ na ti.»

13 Wo lunjo, Isa bota luwo ma xa taxa í sigi dalaba da la. ² Jamaba kamarita je, fo Isa dunta xulunjo do le xono, x'é sigi. Jama bee tun be lonin dalaba da la. ³ A tun be fen kiika fola i ñen taliyolu to, a xo: «Senekela do bota xa taxa sarilo ke. ⁴ X'a tu sarilo la, keso dolu butunta silasenbo fe. Xonolu nata wolu sokki. ⁵ Keso do xotelu butunta kurumadulalu, banxubante dula mennu. Wolu falinta tariya, katugala i man bula banxuba to. ⁶ Tilo xuniyata tumo men, wolu fasanfasanta, xa ja lillintanña bulu. ⁷ Keso dolu butunta ñaninñolu to, ñaninñolu bunñata xa wolu muta. ⁸ Do xotelu butunta duguxulu beto to. Wolu falinta, xa wulu. Kunjo dolu xa kese keme ke, dolu tan wooro, dolu tan saba. ⁹ Tulo be men ma, wo xa lamelo ke!» ¹⁰ xarandinñolu x'e sodun Isa la x'a njinxa xo: «Mun na í be xumala i ñen taliyolu to?» ¹¹ Isa x'e jaabi xo: «Lonjo dita ate lelu ma xa Ala la Mansaya gullolu soto, bari a man di wolu ma. ¹² Bawo fen be men bulu, do si di wo ma x'a siyaya, bari fen nte men bulu, haali dondindingo men b'a bulu, wo si muta a la. ¹³ Wo le x'a tu, ñ be

xumala i ñen taliyo to; bawo i si felelo ke, i nte jeli kela; i s'i tulolu lo, i nte meli kela, i nte faamuyali kela. ¹⁴ Kila Esayi tun xa kilaya xumo men fo, wo keta ñinnu la kuwo to xo: Ala xo: "Alu si melo ke ña wo ña, bari alu me faamuyali ke. Alu si felelo ke ña wo ña, bari alu me jeli ke. ¹⁵ Bawo ñin siya in jusukunjo xoleyata, i x'e tulolu sukki x'e ñalu taxun, walasa i ñalu xana jeli ke, i tulolu xana meli ke, i xana faamuyali ke i hakilolu la, i xana taxa i yelema nte Ala ma, nin nte si i kendeya." ¹⁶ «Bari atelu kennu, heero be alu ñen; bawo alu ñalu be jelo kela, alu tulo dulu be melo kela. ¹⁷ Tonña la, nte b'a fola alu ñen xo, kila kiika anin Alapasilanñabaxo kiika tunnu b'a fe x'alu la ku jetalu je, bari i man i je; x'alu la xuma metalu me, bari i man i me.» ¹⁸ «Awa, alu i tulo lo senekela la taliyo xoto la. ¹⁹ Keso mennu butunta silasenbo fe, wo xoto mu le: Moxo mennu xa Ala la Mansaya xumo lame, nin i man a faamu, Sentane si na xa xumo bo wolu xono. ²⁰ Keso mennu butunta kurumadulalu, wo mu moxo lelu ti, mennu be Ala la xumo lamela, wo no bee to, i s'a muta, xa ñaña a la. ²¹ Bari lilli nte i xoto, i la lannaya mu waxatindin ne ti. Nin xoleya nata i ma, walla nin i xa tooro soto Ala la xumo nofe doron, i si lannaya bula. ²² Keso mennu butunta ñaninñolu to, wolu mu moxo do lelu ti, mennu be Ala la xumo lamela, bari duniya to hanmekuwolu anin naafulo jarabo si i soto. Wo si ke sabaabu ti xa Ala la xumo naxasi, fo a me nafa dun. ²³ Keso mennu butunta duguxulu beto to, wolu mu moxo do lelu ti, mennu be Ala la xumo lamela, x'a faamu. Wolu be í xo lanfenjo, mennu xa dinjo ke. Kunjo dolu xa kese keme ke, dolu tan wooro, dolu tan saba.» ²⁴ Isa xa tali xote fo i ñen xo: «Ala la Mansaya be le í xo moxo do, men xa si puma sari a la fuuto to. ²⁵ Lun do suwo to, moxolu sinxoninma, a jaxo do nata bin jaxo sari a la alixaamo ñala, xa taxa a fan ñen. ²⁶ Lannifenjo boninma, xa wulu, xa keso ta, bin jaxu in du funtita. ²⁷ Fuututigo la jonñolu nata a fo a ñen xo: "Marigi, í man si puma le sari í la fuuto to ba? Nin bin jaxu in dun bota min?" ²⁸ A x'e jaabi xo: "Jaxo do le taxata a sari je." A la jonñolu xo a ñen xo: "Í b'a fe ba n xa taxa bin jaxo bo je?" ²⁹ A xo: "Ayi, alu xana bin jaxu in bo, alu xana taxa alixaamajuwolu wutu a fe. ³⁰ Alu i tu je, i xa bunña i ñoxo fe fo tegelitumo. Wo lunjo, ñ s'a fo tegelilalu ñen xo: Alu soxo bin jaxo ma, x'a siti, x'a jani. Wo xo, alu si alixaamo kamari x'a ke ñ na buntunjo xono."» ³¹ Isa xa taliyo do xote la i ñen xo: «Ala la Mansaya be le í xo mutaradekeso. Moxo do xa wo lan a la fuuto to. ³² A le kesolu xa doxo lannifenñolu bee ti. Bari nin a falinta, a si bunña xa tanbi naaxoxonofenñolu bee xan. A si ke yirijuwo ti, fo xonolu si ñaxanñolu la a bulolu la.» ³³ Isa xa taliyo do xote la i ñen xo: «Ala la Mansaya be le í xo farinfunulannjo. Muso do x'a ta x'a nin farinjo kilo muxan nin luulu ñaxami, fo farinjo bee fuunuta.» ³⁴ Isa xa wo xumolu bee fo moxolu ñen taliyo lelu to. A

tun me fusi fo i nen nin taliyolu to nte. ³⁵ Wo na ma, ki-la xa xumo men fo, wo keta xo: «Nte si xuma i nen taliyolu to. Kuwo men tunnu be dugunin kabirin duniya da tumo, n si wolu fo i nen.» ³⁶ Wo to, Isa bota jama to xa taxa dun bunjo xono. A la xarandinjolu x'e sodun a la x'a njinxa xo: «Taliyo men lata bin jaxo xan, wo xoto fo n nen.» ³⁷ Isa x'e jaabi xo: «Men be si numa sarila, wo mu Moxo Dinxe le ti. ³⁸ Fuuto, wo mu duniya le ti. Si puma, wo mu mennu sonta Ala la Mansaya ma lelu ti. Bin jaxo, wo mu Sentane dinjolu ti. ³⁹ Jaxo men xa bin jaxo sari fuuto to, wo mu Sentane le ti. Tegelitu-mo, wo mu duniya labanjo ti. Tegelilalu, wolu mu mekiyolu ti. ⁴⁰ Bin jaxo be wutula xa fili ta to, x'a jani na men, a be kela wo na kilin in ne ma duniya laban tumo. ⁴¹ Moxo Dinxe si a la mekiyolu ki. Moxo mennu be i topoxolu suyila xa junubo ke, anin mennu be ku jaxo kela, mekiyolu si na wolu bee labo Ala la Mansaya xono, ⁴² x'e fili takenbuba to, xaso nin dafatakinjo be kela jan men. ⁴³ Wo tumo, moxo tilin-ninjolu si njelenxu i Fa Ala la Mansaya xono i xo tilo. Nin tulu be men ma xa lamelo ke, wo xa lamelo ke! ⁴⁴ «Ala la Mansaya be le i xo naafuluba men be dugunin fuuto to. Xe do x'a je, a x'a todugu. Najo bulu, a taxata a kunfenjo bee fiiri, xa wo fuuto san. ⁴⁵ «Ala la Mansaya be le i xo jaagukela do, men be xononkese betemanjolu njinna. ⁴⁶ A xa xononkese daxolenjo do je tumo men, a taxata a bulufenjo bee fiiri, xa wo xononkeso san. ⁴⁷ «Ala la Mansaya be le i xo negemutajala, moxolu be men filila xooxojiyo to xa pege pasifa bee muta. ⁴⁸ Nin jala fata tumo men, pege-mutalalu si a saba x'e sigi xanxunda la, xa pegolu to-tonbon. Mennu xa nin, i si wolu bula sinsolu xono; mennu man nin, i si wolu fili. ⁴⁹ Duniya laban tumo, a be kela wo na kilin in ne ma. Mekiyolu si na xa moxo tilin-ninjolu nin moxo jaxolu bo i noxo to, ⁵⁰ xa moxo jaxolu fili takenbuba to, xaso nin dafatakinjo be kela jan men.» ⁵¹ Isa x'a la xarandinjolu njinxa xo: «Alu xa nin xuma innu bee faamu ba?» I x'a jaabi xo: «Iyo.» ⁵² Isa xo i nen xo: «Wo le x'a tu, sariya karanmoxo fen wo fen xaranta Ala la Mansaya la, wo be le i xo lutigo, men be fen kuto nin fen xoto bola a la naafulu maradula.» ⁵³ Isa x'e soto wo taliyolu lala tumo men, a bota non. ⁵⁴ A taxaninma a fasuwo la, a tun be moxolu laxaranna i la Alabatusuwo xono, fo i dabaro bee banta, i xo: «A xa nin hakilitigiya in soto min? A si nin kawaku innu ke no na di? ⁵⁵ A fo yirileesula dinxe le nte nin ti? Mariyama le nte a na ti ba? A badinxelu nte Yaxuba nin Yusufu nin Simon anin Yude lelu ti ba? ⁵⁶ A badinmusolu bee nte siginin n kun jan ba? A dun xa nin sintigiya in bee soto minto?» ⁵⁷ Wo kuwolu sabaabo la, i man la a la. Isa xo i nen xo: «Kila me doxoya dula, nin a fasuwo la nte, anin a la luwo ma.» ⁵⁸ Isa man kawaku kiika ke non, moxolu la lannayabaliya koso.

14 Wo tumo, mansaxe Herode xa Isa toxo me. ² A xo a la baaradinjolu nen xo: «Nin mu Batiselila Yaya le ti. A kunita xa bo furelu to. Wo le x'a tu, a si kawakuwolu ke no.» ³ Awa, mansaxe Herode tun x'a latege xo Yaya xa muta xa siti, x'a bula kaso la. Wo keta Herodiya le koso, nin wo mu a badinxe Filipe musu ti. ⁴ Yaya tun x'a fo Herode nen xo: «A nte dagenin i xa i badinxe musu ta x'a nilama tu.» ⁵ Herode tun b'a fe xa Yaya faxesa, bari a silata jama na; bawo wolu tunnu be Yaya jaatenin kila le ti. ⁶ Herode bange lunjo sanyelema tulunjo do to, Herodiya dinmuso x'e don moxo kilininjolu na xoto. Wo diyata Herode nen ⁷ fo a x'e xali xarafandin in nen, xo a je fen wo fen njin a la, x'a si wo di a ma. ⁸ Wo to, a na x'a xonotosuruxu, a xo: «Batiselila Yaya kunxulo di n ma jan, miranjo do la.» ⁹ Mansaxe nitokuwata, bari a la xalixanjo nin a domolijoxolu koso, a xa yanmaruya di xo Yaya kunxulo xa di a ma. ¹⁰ A xa moxo do ki xa taxa Yaya kunxulo tege kasobunjo xono. ¹¹ A kunxulo dita xarafandinjo ma, miranjo do la. Wo du taxata a di a na ma. ¹² Yaya la xarandinjolu nata a fure ta, x'a lasi. Wo xo, i taxata wo xibaro fo Isa nen. ¹³ Isa xa wo me tumo men, a dunta xulunjo xono, xa bo non xa taxa wulo xono, a danna. Jama xa wo lon tumo men, i bota gallolu to x'a lo Isa nofe i sinjo la. ¹⁴ Isa bota xulunjo xono tumo men, a xa jamaba je. I hinno x'a muta. Jangaruto men tunnu be i to, a xa wolu kendeya. ¹⁵ Wura la, a la xarandinjolu x'e sodun a la x'a fo a nen xo: «N be wulo le xono jan, suwo dun be njin xa ku. Jama labula i xa taxa senbetogallolu to, nin i si domolo san i fannu nen.» ¹⁶ Bari Isa x'e jaabi xo: «I taxakun nte dula to, alu fannu xa domolo di i ma!» ¹⁷ Xarandinjolu x'a jaabi xo: «Fen xote nte n bulu jan nin buurukun luulu anin pegexala fula nte.» ¹⁸ Isa xo: «Alu na wolu di n ma jan.» ¹⁹ A xa yanmaro di jama ma xo i x'e sigi binjo to. A xa buurukun luulu anin pegexala fula ta, x'a na xotota sanjo to, xa barako bula Ala nen. Wo xo, a xa buurulu tokutun, x'e di a la xarandinjolu ma, xo i x'e tala jama te. ²⁰ I bee xa domolo ke x'e fa. Xarandinjolu xa sinsitan nin fula fa tokutunjolu la. ²¹ Moxo haxxo men tun xa wo domolo ke, wo be taxala i lola xeba wulu luulu noxon ma, musolu nin dandinjolu sin nte wo la. ²² Wo no bee to, Isa x'a la xarandinjolu diyakuwa xo i xa dun xulunjo xono, xa bula a na, xa taxa dalaba boxo do, jannin a be jama labulala. ²³ A xa jama labula tumo men, a yeleta kuro to, xa Ala matara a danna. Suwo kuta x'a kilin tu je. ²⁴ Xulunjo nin dandanjo te janfayata. Fanfe tun be xulunjo tinlaxula; bawo i nin fojo tun be benna. ²⁵ Saxuyelenda la, Isa tun be i taxamala dalaba xan, taxanin a la xarandinjolu ma. ²⁶ I xa Isa je i taxamala dalaba xan tumo men, i ja wulita, i xo: «Fure do le x'e yita n na.» I silaninjo keta a ma xa xuure. ²⁷ Wo no bee to, Isa xo i nen xo: «Alu i ja sigi, nte le mu. Alu xana sila!» ²⁸ Wo keninma, Piyere xo a nen xo: «Ma-

rigi, nin í le mu, a yanmaru nte xa n taxama jiyo xan xa taxa í bata.»²⁹ Isa xo: «Na!» Piyere bota xulunjo xono x'é taxama jiyo xan taxanin Isa ma.³⁰ Bari a x'a je tumo men xo fojo barako xa bun, a silata. A tun boyita dunna, a woman in xuureta xo: «Marigi, n kisi!»³¹ Wo no bee to, Isa x'a bulo tosaba a ma, x'a muta. A xo a pen xo: «Í la lannaya xa doxo, mun na í sikkata?»³² I dunta xulunjo xono doron, fojo lota.³³ Men tunnu be xulunjo xono, wolu x'e pongi Isa xoto, i xo: «Tonja la, í mu Ala Dinxe le ti.»³⁴ Isa nin a la xarandinjolu xa dalaba tege, xa si tinto la, Genesareti jamano to.³⁵ Wo dula moxolu xa Isa mategeninjo lon, i xa jamano bee lalon a la. I nata jangarutolu bee ti a bata.³⁶ Moxolu xa Isa matara xo a x'é lo i x'e maxa a la dorokebulo doron na. Moxo wo moxo x'é maxa a la, wolu bee kendeyata.

15 Farisiya dolu nin sariya karanmoxo dolu bota Yerusaleme xa na Isa bata. I x'a njinxaxo:
² «Mun na í la xarandinjolu be n na moxobalu la laadolu soosola? Bawo, i nte i bulolu kula jannin i xa domolo ke.»³ Isa x'e jaabi xo: «Mun na ate dulu be Ala la sariya soosola alu la laadolu pen?»⁴ Bawo Ala xo: «Í na nin í fa bunja.» A xo du xo: «Moxo wo moxo je xuma jaxo fo a fa walla a na ma, wo tigo xa xan xa faxa.»⁵ Bari atelu xo xo nin do x'a fo a fa walla a na pen xo: «Nte tun xa xan xa í deema naafulo men na, wo dita Ala ma,»⁶ wo tumo, waajibibi nte wo tigo x'a fa deema tugun. Wo na ma, alu xa Ala la xumo ke fuwo ti, x'alu fannu la laadolu latimme.⁷ Fulankafu innu! Kila Esayi xa men fo alu ma, wo benta le fan. Ala x'a bula a fola xo:⁸ «Nin moxo innu be nte bunjala i da le to gansan, bari i jusukunjo nin nte xa jan i noxo la.»⁹ I be n batula fu le; katugala i be moxolu laxaranna hadamandinjolu la sariya daraninjo lelu ma.»¹⁰ Isa xa jama kili x'a fo i pen xo: «Al'alu tulolu lo xa faamuyalo ke.»¹¹ Fenjo men be dunna moxo da, wo nte a noxola, bari fenjo men be bola moxo da xono, wo le b'a noxola.»¹² Isa la xarandinjolu x'e sodun a la x'a fo a pen xo: «Í x'a lon xo í la xumo digita Farisiyalu la ba?»¹³ A x'e jaabi xo: «Nte Fa men be sanjo to man yiri wo yiri tutu, wo si wutu xa bo je.»¹⁴ Alu i tu je, i be i fiyonto noxo lelu la guma sabala. Nin fiyonto x'a fiyonto noxo la guma saba, i fulo bee si boyi dinxo xono.»¹⁵ Piyere xo a pen xo: «Nin tali in xoto fo n pen.»¹⁶ Isa xo: «Ate dulu, alu man faamuyali ke ba?»¹⁷ Alu man a lon ba xo fen wo fen be dunna moxo da, wo be taxala a xono le to, wo xo a si bo?»¹⁸ Bari men be bola moxo da, wo be bola a jusukunjo le la, wo le be moxo noxola Ala na xoto.¹⁹ Kuwo mennu be bola moxo jusukunjo la, wolu mu miiriya jaxo lelu ti: Moxofaxo, fuyanja, malibaliya kuwolu, suupalo, faniya anin toxotipaxumolu.²⁰ Wo kuwo lelu be moxo noxola, bari xa domolo ke í bulukubalo la, wo nte moxo noxola.»²¹ Isa bota non xa taxa Tire nin Sidon jamano to.²² Kanangamusu do tun be signinin non, wo nata Isa ma xa feten xo: «Marigi, Dawuda

Mamarinjo, hinna n na! Jinno be n dinmuso degunin kujaxu.»²³ Bari a man sege fili a to. Isa la xarandinjolu x'e sodun a la x'a fo a pen xo: «Musu in xoyi a xa taxa; bawo a be fetenna n nofe.»²⁴ Isa x'e jaabi xo: «Nte man ki moxo si ma fo Banisirayila moxolu, wolu mennu be í xo saaxa sankoninjolu.»²⁵ Bari wo muso nata í pongi Isa xoto x'a matara xo: «Marigi, n deema!»²⁶ Isa x'a jaabi xo: «A man nin xa dindinjolu la domolo ta i xoto, x'a fili wulundinjolu xoto.»²⁷ Musu in xo: «Marigi, wo mu tonja le ti. Bari domolo mennu be butunna wulundinjolu marigilu xoto, i si wolu domo.»²⁸ Wo to, Isa x'a jaabi xo: «Musu, í la lannaya xa bun, í diyanjo mu men ti, wo xa ke í pen.» Wo waxato fan, a dinmuso kendeyata.²⁹ Isa bota non xa taxa Galile dalaba da la. A yeleta kuro to x'é sigi je.³⁰ Jamaba x'é sodun a la, i nin sinkilinjolu nin fiyontolu nin muruxuntelu nin muumuwole anin jangaruto kiika. I x'e bula a xoto, a x'e kendeya.³¹ Jama dabaro banta, bawo i x'a je muumuwole be xumaxan, muruxuntelu be kendeyaxan, sinkilinjolu b'e taxamaxan, fiyontolu be jelo kexan. Wo to, jama xa Banisirayila la Ala tantu.³² Isa x'a la xarandinjolu kili x'a fo i pen xo: «Nin jama in mapumo be nte la; bawo i tili sabo le je i be nte bata, domolifen dun nte i bulu. N nte a fe xa i xonxoto bula xa taxa, i barako xana taxa ban silo to.»³³ Xarandinjolu xo a pen xo: «Ntelu si domolo soto minto wula in xono jan, xa nin noxon jamaba danjinin?»³⁴ Isa xo i pen xo: «Buurukun jelu be alu bulu?» I x'a jaabi xo: «Woorowula anin pege mesenjo dolu.»³⁵ A xa yanmaro di jama ma xa sigi dugo ma.³⁶ A xa buurukun woorowula innu anin pege mese innu ta, xa barako bula Ala pen, x'e tokutun kutun x'e di a la xarandinjolu ma. Wolu x'e di jama ma.³⁷ I bee xa domolo ke, x'e fa. Xarandinjolu xa sinsi woorowula fa domoli to la.³⁸ Mennu xa domolo ke, wo tunnu mu wulu naani xebe le ti, musolu nin dindinjolu sin nte wo la.³⁹ Isa xa jama labula, wo xo, a dunta xulunjo xono, xa taxa Magadan jamano to.

16 Farisiya dolu nin Sadusenjo dolu x'e sodun Isa la xo i be a xotobola. I xo a pen xo a xa taagumanseedo do ke i pala, men s'a yita xo a be bola Ala bata.² Isa x'e jaabi xo: «Nin wura sita, nin alu xa sanxulo je wuleyanin, alu s'a fo xo sanji nte nala bi.»³ Saxo ma, nin sanjiyo x'a fin, alu s'a fo xo sanjiyo be nala bi. Nin alu si sanxulo kepalu bo no i noxo to, mun na alu be korila waxatolu taagumanseedolu lonna?»⁴ Bi moxo jaxu moxo banninjolu be taagumanseedo do njinna, bari taagumanseede si me yita i la nin kila Yunusi ta nte.» Wo xo, a x'e tu je xa taxa.⁵ Isa nin a la xarandinjolu taxata dalaba boxo do tumo men, i tunnu njinata i man buuru ta.⁶ Isa xo i pen xo: «Alu na nte, alu i korosi Farisiyalu nin Sadusenjo la farinfuunulanjo ma.»⁷ Isa la xarandinjolu x'e miiri i xonoto xo: «A be nin fola x'a la a xan n man buuru men ne ta.»⁸ Bari Isa x'a lon i tunnu be men ma x'a fo, a xo: «Mun na alu b'a

miirila xo alu man buuru ta, xo wo le x'a tu nte be pin xuma innu fola? Alu la lannaya xa doxo! ⁹ Atelu man faamuyali soto haalibi ba? Nte xa buurukun luulu kutun kutun moxo wulu luulu te, atelu xa sinsi jaate men fa wo buurukun kutunjo la, alu hakilo bota wo kun ba? ¹⁰ Nte xa buurukun woorowula kutun kutun moxo wulu naani te, atelu xa sinsi jaate men fa wo to la, alu njinata le wo kun ba? ¹¹ Atelu me a faamu no gani xo n nte xumaxan alu jen buuru ku xan? Alu i korosi Farisiyalu nin Sadusenjolu la farinfunulanjo ma.» ¹² Wo to le, a la xarandinjolu x'a faamu xo a tun man a fo xo i x'e fannu korosi farinfunulanjo fan fan ma, bari xo i x'e korosi Farisiyalu nin Sadusenjolu la xarango ma. ¹³ Isa nin a la xarandinjolu taxata Sesare Filipe la jamano xan. I sininma non, a x'e njinixa xo: «Moxolu be mun fola Moxo Dinxe la kuwo to?» ¹⁴ I x'a jaabi xo: «Dolu xo, xo i mu Batiselila Yaya le ti, dolu xo kila Eli, do xotelu xo kila Yereji, walla kilalu to do.» ¹⁵ Isa xo i jen xo: «Ate dunnu b'a fola xo n mu jon ti?» ¹⁶ Simon Piyere x'a jaabi xo: «I mu Kirisita le ti, Ala nilama Dinxe.» ¹⁷ Wo to, Isa xo a jen xo: «Heero b'e jen Yunusi dinxe Simon; bawo hadamadin man pin ku in yita i la, bari n Fa men be sanjo to, wo le x'a yita i la. ¹⁸ Nte x'e toxola xo Piyere, wo xoto xo fataxulo. N si Ala la jama lo wo fataxulo xan. Saya me fusi tija no wo ma. ¹⁹ N si Ala la Mansaya xundinjolu d'i ma. I man son fen wo fen ma duguxulo xan, sonjo me ke wo ma sanjo to; i je son fen wo fen ma duguxulo xan, sonjo si ke wo ma sanjo to.» ²⁰ Wo xo, Isa x'a xoleya bete a la xarandinjolu ma, xo i xana a fo moxo si jen xo a mu Kirisita ti. ²¹ Kabirin wo tumo, Isa x'a damuta x'a yita a la xarandinjolu la xo waajibo le mu a xa taxa Yerusaleme, xo moxobalu nin sadaxalasibaxa kuntigolu anin sariya karanmoxolu si a tooro bete, x'a si faha. A sa tili sabo, a si kuni. ²² Piyere taxata a ti senbo to, x'a laxosi xo: «Marigi, Ala x'e kisi wo ma! Ayi, wo me ke i la abada!» ²³ Bari Isa x'e yeleva x'a fo Piyere jen xo: «Bo n nofe, Sentane! I mu takkinnafenjo le ti nte jen. Bawo i miiriyalu nte Ala la kuwolu xan, fo hadamadinjolu talu.» ²⁴ Wo xo, Isa xo a la xarandinjolu jen xo: «Nin moxo do b'a fe x'a lo nte nofe, wo x'e ban a fan to, x'a fan gengenyiro ta, x'a lo n nofe. ²⁵ Moxo men je a fo, xo a b'a fan niyo lakisila, wo si bono a niyo to. Bari moxo men je bono a niyo to nte la kuwo xanma, wo tigo si a niyo soto tugun. ²⁶ Duniya bee soto si mun pan moxo jen, nin a si na bono a niyo to le? Moxo si mun ke no x'a niyo kunbo? ²⁷ Nin Moxo Dinxe nin a la mekiyolu nata a Fa la nooro to lun men, a si bee sara i la kebaarolu la. ²⁸ Tonja la, nte b'a fola alu jen xo: Moxo dolu be jan, wolu me sa x'a tara i man Moxo Dinxe nin a la Mansaya nato je.»

17 Wo xo tili wooro, Isa taxata Piyere nin Yaxuba nin wo doxoxe Yaya ti i danna, kuru janba do sanjo to. ² Isa sawuro mayelemata i pala je. A pada

parata i xo tilo. A la faanolu xoyiyata i xo kotondibuna. ³ Nakun kilin, xarandinjolu xa kila Musa nin kila Eli je, i nin Isa be xumala. ⁴ Piyere xa xumo ta, a xo Isa jen xo: «Marigi, alan be jan, wo xa pin. Nin a xa di i jen, n si tillisi saba lo jan, ite ta mu kilin ti, kila Musa ta kilin, kila Eli ta kilin.» ⁵ Xa Piyere tu xumo la, xaba naraninjo do jigita i xan, x'e dugu. Xumaxanjo bota wo xabo to x'a fo xo: «Nin mu n Dinxe baato le ti, men na kuwo xa di bete nte jen. Alu a lame!» ⁶ Xarandinjolu xa wo xumaxanjo me tumo men, i silata fo xa danmatanbi, i x'e padalu buti dugo ma. ⁷ Isa x'e sodun i la, x'a bulo la i xan x'a fo i jen xo: «Alu xana sila, alu wuli!» ⁸ I x'e kunjo xotota tumo men, i man moxo xote je nin Isa kilin nte. ⁹ Xa i jigito tu xa bo kuro to, Isa x'a fo x'a xoleya i ma xo: «Alu xa men je, alu xana wo laxali moxo si jen, fo Moxo Dinxe xa kuni tumo men xa bo furelu to.» ¹⁰ Xarandinjolu xa Isa njinixa xo: «Mun na sariya karanmoxolu b'a fola xo kila Eli xa xan xa na folo?» ¹¹ Isa x'e jaabi xo: «Tonja le mu, Eli xa xan xa na folo, xa fenjo bee toben. ¹² Bari nte b'a fola alu jen xo Eli nata xa ban, moxolu korita a lonna. I xa i sago bee ke a la. Moxo Dinxe du be toorola i bulu wo na in ne.» ¹³ Xarandinjolu x'a faamu wo na in ne, xo a tun be xumaxan i jen Batiselila Yaya le la kuwo to. ¹⁴ Isa nin a la xarandinjolu be sila jama ma tumo men, xe do x'e sodun Isa la x'e pongi a xoto. ¹⁵ A x'a fo xo: «Marigi, hinna nte dinxe la; bawo ketujangaro le b'a la, a be tooronin kujaxu. Nin a x'a muta, tumo dolu a si boyi ta to, tumo dolu a si boyi jiyo to. ¹⁶ N nata a ti i la xarandinjolu barta, bari i korita a kendeyala.» ¹⁷ Isa xo: «Moxo lannayabalolu anin kukebalikelalu, nte si tu alu bata fo waxati joman? Nte si muja alu xoto fo waxati joman? Alu na a ti jan.» ¹⁸ Isa xa jinno madigaamu. Jinno bota dindinjo to, a kendeyata wo dulandin kilinjo bee. ¹⁹ Xarandinjolu x'e sodun Isa la xa taxa a ti i danna, x'a fo a jen xo: «Mun na ntelu korita pin jinna in xoyila?» ²⁰ Isa xo i jen xo: «Bawo alu la lannaya xa doxo kujaxu. Tonja la, nte b'a fola alu jen xo: Haali nin alu la lannaya tun xa bun i xo mutaradekeso, alu tunnu s'a fo pin kuru in jen xo: "Bo jan xa taxa je fen", a si taxa. Alu me kori fusi ma. [²¹ Bari pin jinne sifa in me xoyi no, nin Alamata nin sunjo kafuningjo nte.]» ²² Lun do, xa xarandinjolu tu kamarinin i joxo xan Galile, Isa xo i jen xo: «Moxo Dinxe be nala dunna moxolu bulu. ²³ I s'a faha, bari a sa tili sabo, a si kuni xa bo furelu to.» Wo xa xarandinjolu nitokuwa bete. ²⁴ Isa nin a la xarandinjolu sita Kaperenahun tumo men, Alabatusuba xalisi mutalalu x'e sodun Piyere la x'a njinixa xo: «Alu la karanmoxo nte Alabatusuba xaliso sarala ba?» ²⁵ Piyere x'e jaabi xo: «Iyo, a b'a sarala.» Piyere dunta bugo xono tumo men, Isa folo xa xumo ta xo: «Simon, ite hakililata mu mun ti? Jon xa xan xa sagallo nin sagallendingjo sara pin duniya in mansaxelu ma? Jamadinjolu walla luntanjolu?» ²⁶ Piyere x'a jaabi xo:

«Luntanᅇolu». Isa xo a pen xo: «Wo tuma, jamanad-inᅇolu man xan x'a sara. ²⁷ Wo bee nin a ta, n nte a fe xa nin moxo innu lajusu. Taxa dolinᅇo fili dalaba to; nege folo men j'í ta, wo muta. Nin í x'a muta, í s'a da yeke xa xaalisi gananᅇo tara je. Wo xaaliso ta xa taxa nte la sagallendingo nin í fan ta sara.»

18 xarandinᅇolu x'e sodun Isa la wo tumo, x'a njin-inxa xo: «Jon xa bun bee ti Ala la Mansaya xono?» ² Isa xa dindinᅇo do kili x'a lalo i temo to, ³ a xo: «Tonᅇa la, n b'a fola alu pen xo, nin alu man yeke xa ke í xo dindinᅇolu, alu me dun no Ala la Mansaya xono. ⁴ Men be í fan majigila xa ke í xo nin dindin in, wo le xa bun bee ti Ala la Mansaya xono. ⁵ Moxo men je nin dindin in noxon do mutakubete nte la kuwo la, wo xa nte fan ne mutakubete. ⁶ «Nin dindin in mennu xa lannaya ke nte la, moxo men je ke sabaabu ti, xa wolu to kilin na lannaya tija, a tun xa fisa wo tigo ma, xa kuru belebeleba siti a xanᅇo la x'a fili xooxojiyo dinoya to. ⁷ Bone be duniya pen bawo a be kela sabaabu ti xa moxolu bula junubo kela. A me ke nin moxolu man bula junubo kela, bari moxo men be kela a sabaabo ti, bone be wo pen. ⁸ Nin í bulo walla í sinᅇo le be junubo lasila í ma, a tege, x'a fili dulajan. Í bulu kilinma walla í sin kilinma xa dun arajanna xono, wo xa fisa don ti, í bulu fulama walla í sin fulama xa fili ta sabalo to. ⁹ Nin í jakeso le be junubo lasila í ma, a woloxoti x'a fili dulajan. Í ja kilinma xa dun arajanna xono, wo xa fisa don ti, í ja fulama xa fili jahanaba ta to.» ¹⁰ «Al'alu fannu korosi, alu xana nin dindin innu si jaate fuwo ti. Nte b'a fola alu pen xo i la mekiyolu be lonin nte Fa ja xoto tuma bee, men be sanᅇo to. [¹¹ Mennu be sankonin, Moxo Dinxe nata wo lelu kisi.] ¹² «Alu xo di? Nin saaxa keme be moxo do kun, kilin xa sanko wolu to, a me tan xononto nin xononto tu kuro to ba, xa taxa sankoninᅇo ninin folo? ¹³ Nin a x'a je, tonᅇa la, n b'a fola alu pen, a si naxali wo saaxa sankoninᅇo la xa tanbi to tan xononto nin xononto xan, wolu mennu man sanko. ¹⁴ Wo ja kilin in ma, alu Fa men be sanᅇo to sago nte nin dindin innu si kilin xa sanko.» ¹⁵ «Nin í badinᅇo x'é haxxo ta, taxa a ma, í xa a la filo yita a la, í kilin nin a kilin. Nin a x'é lame, í nin í badinᅇo keta i noxo pen moxo ti tugun. ¹⁶ Bari nin a man í lame, moxo kilin walla moxo fula la í fan xan, walasa kuwo bee xa jabo x'a la moxo fula walla saba la seedeya xan. ¹⁷ Nin a man son xa wo dulu lame, a kuwo lasi Ala la jama ma. Nin a man son xa Ala la jama lame, í x'a muta í xo Alalonbalo, walla sagallemutala. ¹⁸ «Tonᅇa la, nte b'a fola alu pen xo, nin alu man son ku wo ku ma duguxulo xan, son me ke wo ma sanᅇo to. Alu je son ku wo ku du ma duguxulo xan, sonᅇo si ke wo ma sanᅇo to. ¹⁹ «Tonᅇa la, n b'a fola alu pen du xo, nin alu moxo fula benta ku wo ku to duguxulo xan, xa Ala matara wo la, n Fa men be sanᅇo to si wo di alu ma. ²⁰ Bawo moxo fula walla moxo saba je kamari dula wo

dula nte toxo la, nte be wolu temo to.» ²¹ Wo to, Piyere x'é sodun a la x'a njininxa xo: «Marigi, nin nte badinᅇo tuta n haxxo tala, n xa xan xa yaafa a ma fo sinᅇa jelu? Fo sinᅇa woorowula ba?» ²² Isa x'a jaabi xo: «N man a fo í pen xo fo sinᅇa woorowula, bari í si yaafa a ma fo sinᅇa woorowula sigidulama tan woorowula. ²³ Wo le x'a tu, Ala la Mansaya si xaanan pin ma: A be le í xo mansaxe do nin a la jonᅇolu la jaatebo. ²⁴ A xa jaate damuta tumo men, i xa jonᅇo do lasi a ma, mansaxe la talan xaaliso wulu tan tun be wo la. ²⁵ Wo xaaliso sarana tun nte wo jonᅇo pen. A marigi x'a waajibiya xo a nin a musu nin a dinᅇolu nin a bulufenᅇolu bee xa fi-iri, x'e ke a la julusara ti. ²⁶ Wo jonᅇo x'é pongi a marigi xoto x'a matara xo: "Muᅇa n pen, n s'í la julo bee sara." ²⁷ Jon in hinno x'a marigi muta, a x'a la julo bula a pen, x'a bula xa taxa. ²⁸ Wo jonᅇo boninᅇo, a nin a jon noxo do benta, a la xalisindin tun be wo la. A xa wo muta a xanᅇo to x'a fo a pen xo: "N na julo sara!" ²⁹ A topoxo in x'é pongi a sinᅇo xoto x'a matara xo: "Muᅇa n pen, n s'í sara." ³⁰ Bari a man son wo ma. A taxata x'a bula kaso la fo a x'a la julo sara tumo men. ³¹ A topoxolu xa wo je tumo men, i diminta kujaxu. Men keta, i taxata wo laxali i marigi pen. ³² Wo to, wo marigo xa jon in kili, x'a fo a pen xo: "Jon jaxu in, n yaafata í la julo bee ma, bawo í tun xa n matara. ³³ Í du tun man xan ba xa hinna í topoxo la, í xo nte hinnata í la ja men?" ³⁴ A marigi diminbeteta, a taxata a bula kaso la x'a tooro, fo a x'a la julo bee sara tumo men. ³⁵ «Wo ja ma, nin alu dulu fen wo fen man yaafa alu badinᅇo ma alu jusukunᅇo bee la, nte Fa men be sanᅇo to du si alu ke wo ja in.»

19 Isa x'é soto wo xarannᅇo la tumo men, a bota Galile xa taxa Yude maro la, Yuruden ba boxo do. ² Jamaba x'a lo a nofe, a x'e to jangarutolu kendeya. ³ Farisiya dolu x'e sodun a la x'a xotobo. I x'a njininxa xo: «A be dagenin xebe pen ba, x'a musu futuwo sa sabaabo bee la?» ⁴ Isa x'e jaabi xo: «Alu man a xaran Kitaabo to ba, xo: "Folofolo, Dabaxo xa muso nin xe le da?" ⁵ A xo du xo: "Wo le x'a tu, xebe si a na nin a fa bula x'é noto a musu la. I fulo si ke kilin ti." ⁶ Wo ja ma, i nte fula ti tugun, i mu kilin ne ti. Ala xa mennu kafu, moxo xana wolu tala.» ⁷ Farisiyalu xa Isa njininxa xo: «Mun dun na Musa x'a waajibiya xo xebe xa futusakayito ke x'a di a musu ma, nin a b'a bulala?» ⁸ Isa xo i pen xo: «Alu la sondonme xoleya le x'a tu nin Musa sonta alu xa wo ke. Nin wo nte, folofolo, a tun nte ten. ⁹ N b'a fola alu pen xo: Moxo men je a musu bula, x'a tara a man fuyanᅇa ke, xa do xote futu, wo xa fuyanᅇa ke.» ¹⁰ Isa la xarandinᅇolu xo a pen xo: «Nin xebe la ja be wo ja in ne a musu ma, musufutubaliya le xa fisa mene.» ¹¹ Isa x'e jaabi xo: «Bee me pin xuma in faamu no, fo nin Ala xa wo sinᅇo di men ma. ¹² Sabaabo kiika le be je mennu be moxolu bulala futubaliya la: Dolu nin i ta be wulula la; dolu la futubaliya mu moxo lelu no ti, bawo i x'e xeya faya; do dulu nte sonna xa futu

ke Ala la Mansaya xanma. Men si nin xuma innu faamu no, wo x'e faamu!»¹³ Moxo dolu nin dindinjo dolu nata Isa bata nin a si a bulo la i xan, xa Ala matara i pen. Bari xarandinjolu xa wolu madigaamu.¹⁴ Isa xo: «Alu dindinjolu tu je i xa na n' bata, alu xana i bali, bawo Ala la Mansaya mu i noxon nelu ta ti.»¹⁵ A x'a bulo la wo dindinjolu xan, xa duwa i pen. Wo xo, a taxata xa bo je.¹⁶ Xe do x'e sodun Isa la x'a njinxaxo: «Karanmoxo, n' xa xan xa ku n'uma joman ke walasa n' xa nilamaya banbalo soto?»¹⁷ Isa xo a pen xo: «Mun na i be nte njinxala n'umaya kuwo la? Ala kilin doron ne mu n'uma ti. Nin i b'a fe xa nilamaya banbalo soto, Ala la sariyalu labatu.»¹⁸ Xe x'a njinxaxo: «Wo mu sariya joman innu ti?» Isa x'a jaabi xo: «I xana moxo faxesa, i xana jadoya ke, i xana suupali ke, i xana xaro la i moxoxo la.»¹⁹ I na nin i fa bunja, i xa i moxoxo xanu i xo i fan.»²⁰ Wo xamarindinjo xo: «Nte xa nin sariya innu bee labatu, mun xote be xo haalisa?»²¹ Isa xo a pen xo: «Nin i b'a fe xa ke moxo dafandinjo ti, taxa i bulufenjo bee fiiri, xa wo xalisso di segebaxantunjolu ma. Nin wo keta, naafuluba si ke i kun sanjo to. Wo xo, i si na a lo nte nofe.»²² Xamarindinjo xa wo xumolu me tumo men, a nitokuwaninba wulita xa taxa, bawo naafulo kiika tun b'a kun.²³ Isa xo a la xarandinjolu pen xo: «Tonja la, n' b'a fola alu pen xo naafulubatigo dunjo xa xole Ala la Mansaya xono.»²⁴ N' b'a fola alu pen du xo jogomo dunjo mesendiwuwo fe, wo xa newo xa tanbi naafulubatigo dunjo ti Ala la Mansaya xono.»²⁵ Xarandinjolu xa wo xumolu me tumo men, i dabaro banta kujaxu fo i xo: «Jon dun si kisi no?»²⁶ Isa x'e mafele x'a fo i pen xo: «Hadamandinjolu bulu, wo me ke no, bari Ala me kori ku ma.»²⁷ Wo to, Piyere xa xumo ta x'a fo xo: «A fele, ntelu buruta fenjo bee to, x'a lo i nofe. Mun ne be kela ntelu pen?»²⁸ Isa x'a fo i pen xo: «Tonja la, n' b'a fola alu pen xo nin Moxo Dinxe sigita a la mansasigilan nooroma xan duniya kuto to tumo men, atelu moxo tan nin fulu mennu x'a lo nte nofe, alu dulu si sigi mansasigilan tan nin fula xan, xa kiito tege Banisirayila bunda tan nin fulo xan.»²⁹ Moxo wo moxo je njina a la luwo xo, walla a badinxelu, walla a badinmusolu, walla a fa, walla a na, walla a dinjolu, walla a la fuutolu xo, nte toxo nofe, wo tigo si wo fenjolu bee noxon keme soto, xa saagi xa nilamaya banbalo soto.³⁰ Namoxo kiika si ke xomoxo ti, xomoxo kiika si ke namoxo ti.»

20 «A fele, Ala la Mansaya be le i xo fuututigo do, a bota saxo ma junna xa baarandinjo dolu ta x'e bula a la resenfuuto to.»² A nin i benta depe xalisso ganan kilin to tilo xono. A x'e bula taxanin a la resenfuuto to, xa taxa baaro la.³ Tilo wololafa, a bota tugun xa moxo dolu loninjo tara bera to, i tunnu nte fusi la.⁴ A xo wolu pen xo: «Alu dulu xa taxa baaro ke n' na resenfuuto to, alu nin sara men xa xan, n' si wo di alu ma.»⁵ Wo moxolu taxata resenfuuto to. Tilinkunte tu-

mo, fuututigo bota xa do xotelu ta baaro la. Wura la, a bota tugun xa wo noxon ke.⁶ Wurasuma la, a bota tugun xa moxo do xotelu tara lonin bera to, a xo wolu pen xo: «Mun na alu xa tilo muume bee ban jan, alu man baara ke?»⁷ I x'a jaabi xo: «Bawo moxo man n ta baaro la.» Fuututigo xo i pen xo: «Alu dulu xa taxa n' na resenfuuto to.»⁸ Fitiro ma, resenfuuto tigo x'a la kujabobaxo kili x'a fo a pen xo: «Baarandinjolu kili, i xa bee la sara di a ma. Mennu labanta tala baaro la, i xa wolu folo sara, xa laban fololu ma.»⁹ Mennu xa baaro damuta wurasuma la, wolu nata. I bee xa depe xalisso ganan kilin soto.¹⁰ Folo mennu xa baaro damuta dulu nata. Wolu tunnu pen x'e la xalisso si siya tolu ta ti. Bari i dulu xa depe xalisso ganan kilin ne soto.¹¹ Wo xalisso dita i ma tumo men, i xa fuututigo jalagi.¹² I xo: «Ninnu mennu nata laban in na, i xa waxatindin doron ne baara. Bari i xa wolu nin ntelu xaapan, ntelu mennu xa tilo muume ke baaro la, xa tili funtano nin sege muna.»¹³ Fuututigo xa wolu kilin jaabi xo: «N' terixe, n' man ku benbali ke i la. Alan man fata depe xalisso ganan kilin ne ma ba?»¹⁴ I la sara ta i xa taxa. Nin men man baaro damuta junna, n' b'a sara nin i ta xaapanna le!¹⁵ N' man xan ba xa n' na naafulo ke n' sago ti? Walla nte la n'umaya moxolu ma, wo le be diginin i la ba?»¹⁶ Wo xo, Isa xo tugun xo: «Wo ja kili in ma, xomoxolu si ke namoxolu ti, namoxolu si ke xomoxolu ti.»¹⁷ Isa tun be nala taxala Yerusaleme tumo men, a x'a la xarandin tan nin fulo kili i danna, x'a fo i pen xo: «Alan taxato fele Yerusaleme, Moxo Dinxe si dun sadaxalasibaxa kuntigolu nin sariya karanmoxolu bulu. I si a jalagi, x'a faxalo latege,¹⁹ x'a dun Alalonalolu bulu xa jele a ma. I si a buwo gajo la, x'a gengen yiro ma. A sa tili sabo, a si kuni xa bo furelu to.»²⁰ Wo to, Sebede musu nin a dinxe fulo x'e sodun Isa la. Wo muso x'e njongi Isa xoto x'a matara.²¹ Isa x'a njinxaxo: «I be mun fe?» Muso x'a jaabi xo: «Nte dinxe fula innu mennu felenti, a latege nin i sigita i la Mansaya la, do xa sigi i kininjo fe, do xa sigi i numanjo fe.»²² Isa x'e jaabi xo: «Alu be men njinna, alu man wo lon. Nte xa xan xa n' min tooro jitafe men na, alu s' i min no wo la ba?» I x'a jaabi xo: «N si wo no.»²³ Isa xo i pen xo: «Tonja le mu, nte xa xan xa n' min tooro jitafe men na, alu dulu si i min wo la. Bari xa sigi n' kininjo fe walla n' numanjo fe, nte nte wo lategela. Nte Fa xa wo dulalu toben mennu pen, i be dila wo lelu ma.»²⁴ To tanjo xa wo me tumo men, i diminta wo badinxe fulo xoto.²⁵ Bari Isa x'e kili x'a fo i pen xo: «Alu x'a lon xo jamanolu kuntigolu be i marala i la kuntigiya la, anin moxobalu be i la fango yitala i la.»²⁶ A man xan xa ke ten atelu tema. Bari nin men b'a fe xa ke moxoba ti alu to, wo tigo xa xan xa ke alu la baarandinjo ti.²⁷ Nin men b'a fe xa ke namoxo ti alu to, wo xa ke alu la jonjo ti:²⁸ Wo ja ma, Moxo Dinxe man na xo moxo xa baaro ke a pen; bari a nata le, xa baaro ke

moxolu nen, anin x'a niyo di, xa moxo kiika kunbo.»²⁹ I boto Yeriko, jamaba x'a lo Isa nofe.³⁰ Fiyonto fula tun be siginin silada la. Wolu x'a me tumo men xo Isa be tanbixan, i kuleta xo: «Marigi, Dawuda Mamarinjo, hinna n na!»³¹ Moxolu x'e madigaamu xo i x'e de. Bari wo bee xan, i xa do kafu kule ma, x'a fo xo: «Marigi, Dawuda Mamarinjo, hinna n na!»³² Isa lota. A x'e kili x'e njinxaxa xo: «Alu b'a fe n xa mun ke alu nen?»³³ I xo a nen xo: «Marigi, n b'a fe xa dula je!»³⁴ I hinno xa Isa muta, a x'e maxa i palu la. Wo no bee to, i xa dula je, i x'a lo Isa nofe.

21 Isa nin a la xarandinjolu sutiyani ma Yerusaleme la, fo xa si Oliwe kuro ma, Betefaje galluda la, a x'a la xarandin fula ki.² A xo i nen xo: «Alu taxa gallo to, men be alu nafe. Nin alu sita doron, alu si falimuso do tara sitinin je, a dinjo b'a senbo to. Alu s'i firin, xa na i di n ma.»³ Nin do xa fen fo alu nen, alu s'a jaabi xo: «Marigi le haajo b'e ma.» A woman in si i bula xa na wo no bee to.»⁴ Wo keta, walasa kila la nin xuma innu xa ke xo:⁵ «Alu a fo Siyon gallo nen xo: «A fele, i la mansaxe be nanin i bata, mansaxe sabarininjo, a be siginin falimuso xan, a be falindinjo xan, falimuso dinjo.» »⁶ Xarandinjolu taxata x'a ke i xo Isa x'a fo i nen na men.⁷ I nin falimuso nin a dinjo nata, i x'e la faanolu feene i xan. Isa sigita a xan.⁸ Moxo kiika x'e la faanolu feene silo to, dolu xa fitabulolu tege x'e feene silo xan.⁹ Jama men tun be Isa xo nin a na, wolu tunnu be fetenna xo: «Tanto be Dawuda Mamarinjo nen! Men nato fele Marigi toxo la, duwawo be wo fe! Tanto xa ke Ala nen sanjanbalu to!»¹⁰ Isa dunta Yerusaleme tumo men, gallo bee gidita xa bo. I tunnu be i son xo: «Nin mu jon ti?»¹¹ Jama xo: «Kila Isa le mu, Nasaretingo le mu xa bo Galile maro to.»¹² Isa dunta Alabatusuba xono. Moxo men tunnu bee be fiiri nin sanno la je, a xa wolu xoyi. A xa xalisifalinnalu la tabalolu anin jenetuban fiirilalu la sigilanjolu kundinmayelema.¹³ Isa xo i nen xo: «A be safenin Kitaabo to xo: «Nte la bunjo si kili xo Alamatarabunjo,» bari atelu kennu x'a ke boyinxannilalu dugudula ti.»¹⁴ Fiyonto dolu nin sin kilinjolu x'e tosodun Isa la Alabatusuba xono, a xa wolu kendeya.¹⁵ Dindinjo dolu tunnu be Alabatusuba xono, wolu fetenta xo: «Tanto be Dawuda Mamarinjo nen!» Sadaxalasibaxa kuntigolu nin sariya karanmoxolu xa Isa la kawaku keninjolu je tumo men, xa dindinjo fetenxanjo me, i diminta.¹⁶ I xo Isa nen xo: «I be men foxan, i tulo be wo la ba?» Isa x'e jaabi xo: «Iyo, alu man a xaran Kitaabo to ba xo: «Ala xa tantuli donkilo dun dindinjo nin deenanolu da.» »¹⁷ Wo xumolu foninjo, Isa x'e tu je xa bo gallo xono, xa taxa Betani, xa si non.¹⁸ Wo lun do saxo ma, Isa koppato xa taxa Yerusaleme gallo xono, xonxo x'a muta.¹⁹ A xa turojuwo do je silada la, a x'e sodun wo la, bari a man fusi tara a la, fo fito doron. A xo turojuwo nen xo: «I me din ke tugun fo abada!» Wo no bee to, turojuwo ja-

ta.²⁰ xarandinjolu xa wo je tumo men, i dabaro banta xo: «Nin turoju in jata na di na kun kilin ma?»²¹ Isa x'e jaabi xo: «Tonja la, n b'a fola alu nen xo: Nin lannaya be alu la, nin alu nte sikkala muume, nte xa men ke turojuwo la, alu me dan wo joxon ma. Haali nin alu x'a fo pin kuru in nen xo: «Wutu jan i xa taxa i fili xooxojiyo to,» wo si ke.²² Alu je fen wo fen tara Ala la, lannaya to, alu si wo soto.»²³ Isa dunta Alabatusuba xono. X'a tu moxolu laxaranna, sadaxalasibaxa kuntigolu nin jamano moxobalu nata a bata x'a njinxaxa xo: «Fanga joman x'e bula pin ku innu kela? Jon x'e yanmaru xa fiirilalu xoyi jan?»²⁴ Isa x'e jaabi xo: «Nte du be nala alu njinxala ku kilin ne la. Nin alu xa nte jaabi, wo tumo, men xa fango di n ma xa pin ku innu ke, n du si wo fo alu nen.²⁵ Jon xa Yaya bula batiselo la, Ala ba, fo moxolu?» I xo i joxo nen xo: «Nin n xo: «Ala le x'a ki, a s'a fo xo: «Mun dun na alu man la a la?»²⁶ Nin n dunnu xo: «Moxo lelu x'a ki, n xa xan xa sila jama na, katugala moxolu bee be Yaya mutanin kila do le ti.»²⁷ Wo to, i xa Isa jaabi xo: «Ntelu man wo lon.» Isa du xo i nen xo: «Awa, men xa fango di nte ma xa pin ku innu ke, nte du nte wo fola alu nen.»²⁸ Isa xo: «Atelu xo di pin ku in to? Xe do le, dinxe fula b'a kun. A xo dinxe folo nen xo: «N dinxe, taxa baaro ke n na resenfuuto to bi.»²⁹ Wo x'a jaabi xo: «Nte me taxa no.» Bari wo xo, a x'e miiri, a taxata.³⁰ Fa xa wo baaro fo dinxe fulanango du nen. Wo x'a jaabi xo: «Baaba, n si taxa.» Bari a man taxa.³¹ Wolu din fulo to, joman ne xa fa sago ke?» I x'a jaabi xo: «Folo.» Wo na in, Isa xo i nen xo: «Tonja la, nte b'a fola alu nen xo, sagallemutalalu nin jadamusolu si dun alu na Ala la Mansaya xono.³² Bawo Batiselila Yaya nata alu ma, xa sila tilinninjo le yita alu la; alu man son xa la a la. Bari sagallemutalalu nin jadamusolu lata a la. Haali alu xa wo je, wo bee nin a ta, alu man tuubi xa la a la.»³³ «Alu tali xote lame. Xe do le, a xa resenfuuto bo, x'a sansan. A xa resenjibodinjo jaga a xono, xa kantalibento lo. Wo xo, a xa resenfuuto xarifa senekela dolu ma, xa taxama.³⁴ Resenmo waxato sita tumo men, fuututigo x'a la jonjo dolu ki resenfuuto senebaxolu ma, xo i x'a la resenmo di a ma.³⁵ Bari resenfuuto senebaxolu x'a la jonjolu muta, xa do buwo, xa do faxa, xa do bun kurolo la.³⁶ Fuututigo xa jonjo do xotelu ki, mennu xa sa fololu ti. Resenfuuto senebaxolu xa wo dulu muta i xo fololu.³⁷ A labanjo la, a x'a dinxe ki i ma. A xo: «I si n dinxe ken bunja.»³⁸ Bari kabirin resenfuuto senebaxolu x'a dinxe je, i xo i joxo nen xo: «A ketabaxo fele. Alu na, alan x'a faxa. A ke si ke alan ta ti.»³⁹ I x'a muta x'a fili resenfuuto xo ma, x'a faxa.⁴⁰ «Awa, nin resenfuututigo nata, a si mun ke resenfuuto senebaxolu la?»⁴¹ I x'a jaabi xo: «A si wo moxo jaxolu faxa, fo faxana jaxu, xa resenfuuto xarifa moxo xotelu ma, mennu si a la resenmo di a ma a waxato.»⁴² Wo xo, Isa xo i nen xo: «Alu man pin xaran Kitaabo to ba? «Kurubunlolalu x'e ban kuro men to, wo

keta bunjo jusigikuro ti. Marigi le xa wo ke. Kawaku-wo le mu ntelu bulu!"⁴³ «Wo le x'a tu, nte b'a fola alu nen xo Ala la Mansaya si muta alu la x'a di siya xote ma, men be nala a silo taxamala, xa Ala sago ke. [⁴⁴ Moxo men je boyi wo kuro to, wo tigo si tote. A je boyi men to, a si wo tigo nooni.]»⁴⁵ Sadaxalasibaxa kuntigolu nin Farisiyalu xa Isa la taliyo me tumo men, wolu x'a faamu xo a be ite lelu ma. ⁴⁶ I tunnu be feere njininna x'a muta, bari i silata jama na. Bawo bee tun be Isa jaatenin kila do le ti.

22 Isa xa taliyo do xote la i nen xo: ² «Ala la Mansaya be le í xo mansaxe do, men xa maanya domolo toben a dinxe nen. ³ A x'a la jonjolu ki xo i xa taxa moxo kilininjolu nofe, i xa na maanya domolo ke. Bari wolu man son xa na. ⁴ Mansaxe xa jonjo do xotelu ki i ma xo: "Alu taxa a fo moxo kilininjolu nen xo domolo banta saasa. Nte xa n na tuuralu anin n na marafen toloninjolu kiika faxesa. Fenjo bee tobenta, alu na maanya domolo la." ⁵ Bari moxo kilininjolu man wo si jaate, i taxata i haajolu la. Do taxata a la fuuto to, do taxata a la jaago la. ⁶ Tolu xa mansaxe la jonjolu muta x'e tooro fo x'e faxesa. ⁷ Wo keninjo, mansaxe diminta. A x'a la sorodasolu bula xa taxa wo moxofaxalalu faxesa, x'e la gallo jani. ⁸ Wo xo, a xo a la jonjolu nen xo: "Maanya domololu mota, bari moxo kilininjolu nin i man xan. ⁹ Alu taxa bedolu to, alu je moxo wo moxo je, alu si i kili xa na." ¹⁰ Jonjolu wulita xa taxa bedolu to, i xa moxo wo moxo tara je, moxo bete mu ba, moxo jaxu mu ba, i xa wolu bee kili xa na, fo maanyobunjo fata domolila la. ¹¹ Mansaxe dunta xa wo moxolu mafele tumo men, a xa moxo do tara je, faanu numa nte a xanna men si dun maanya to. ¹² A xo wo tigi nen xo: "N terixe, í dunta jan na di, x'a tara faanu numa nte í xanna men si dun maanya to?" Wo xe man sege fili a to. ¹³ Mansaxe xo baaradinjolu nen xo: "Alu a sinjo nin a bulolu siti x'a fili banto to, dibo to, xaso nin dafatakinjo be kela jan men." ¹⁴ Isa xo: "Moxo kiika be kilinin, bari sugandininjo man sa".» ¹⁵ Wo to, Farisiyalu taxata i noxo je, xa feere dara i si Isa muta a fan datoxanjolu ma na men. ¹⁶ I x'e la xarandinjo dolu nin Herode la moxo dolu ki, x'a fo Isa nen xo: «Karanmoxo, n x'a lon xo í mu tonpatigo le ti. Í be moxolu laxaranna Alasilo ma x'a xoyiya. Í nte silala moxo si na; bawo moxolu bee xa xan í nen. ¹⁷ Ite bulu, a be dagenin ba ntelu xa sagallo sara Rome mansaxe ma, walla a nte dagenin?» ¹⁸ Bari Isa xa i la korojugaya lon, a xo i nen xo: «Fulankafu innu, mun na alu be nte xotobola? ¹⁹ Alu be xaaliso men kela xa sagallo sara, alu wo do yita n na.» I xa depe xaalisi ganan kilin yita a la. ²⁰ Isa x'e njininxo xo: «Jon kunxulo nin jon toxo be safenin xaalisi in xan?» ²¹ I x'a jaabi xo: «Rome mansaxe le mu». Wo to, Isa xo i nen xo: «Awa, mansaxe ta mu men ti, alu wo di a ma, xa Ala ta di Ala ma.» ²² I xa wo jaabo me tumo men, i dabaro banta. I

x'e soobo Isa la xa taxa. ²³ Wo lunjo fan, Sadusen diino moxo dolu nata Isa bata. Wo lelu xo, xo furelu nte kunila. I x'a njininxo xo: ²⁴ «Karanmoxo, kila Musa x'a fo xo, nin xe do sata, x'a tara a musu man din soto, a badinxe xa xan xa wo muso ta, xa dinjo do soto a ma, a badinxe saninjo nen. ²⁵ Awa, ntelu to, badinxe woorowula keta je. Folo xa muso futu, wo sata, x'a tara a man din soto. A doxo du xa musu in ta. ²⁶ Badinxe fulananjo nin sabananjo ta keta wo na kilin in ma, fo xa si woorowulanango ma. ²⁷ I bee saninjo xo, muso du sata. ²⁸ Furekuniyo lunjo, jontigi kilin ta be kela musu in ti; katugala i woorowulo bee kilin wo kilin x'a ta muso ti?» ²⁹ Isa x'e jaabi xo: «Alu be filo xono, bawo alu man Kitaabo xumolu lon, alu man Ala la sintigiya du lon. ³⁰ Furekuniyo xo, xe nte musu futula, musu du nte sigila xe kun, bari i be kela le í xo melekoyolu be na men sanjo to. ³¹ Men mu furekuniyo kuwo ti, Ala xa men fo alu nen, alu man wo xaran ba? A xo: ³² "Nte mu Burehima la Ala le ti, Nsiyaxa la Ala, anin Yaxuba la Ala." Ala nte furelu la Ala ti, nilamalu la Ala le mu.» ³³ Jama xa wo xumo me tumo men, i dabaro banta a la xarango ma. ³⁴ Farisiyalu x'a me tumo men xo Isa xa Sadusenjolu xumada xati, i x'e noxo lakamari. ³⁵ Sariya karanmoxo do tun be i to, wo x'a mafele xo a be Isa xotobola. A xa Isa njininxo xo: ³⁶ «Karanmoxo, Ala la sariyalu bee to, joman xa bun?» ³⁷ Isa x'a jaabi xo: «Í si Marigi í la Ala xanu í jusukunjo bee la, í niyo bee la, í miiro bee la. ³⁸ Wo le xa bun sariyalu to anin wo le mu i to folo ti. ³⁹ Fulanan men be wo ma, nin a nin wo xa xan, wo fele xo: "Í xa í moxono xanu í xo í fan." ⁴⁰ Musa la sariya bee anin kilalu la xumolu bee be wo sariya fula in ne xono.» ⁴¹ Xa Farisiyalu kamarininjo tu i noxo xan, Isa x'e njininxo xo: ⁴² «Alu be mun fola Kirisita la kuwo to? Jon mamarinjo mu?» I x'a jaabi xo: «Dawuda le mamarinjo mu.» ⁴³ Isa xo i nen xo: «Mun dun na Dawuda x'a kili Ni Senunjo barako to xo Marigi? Bawo Dawuda xo: ⁴⁴ "Marigi x'a fo nte Marigi nen xo: Í sigi n kininjo xoto, fo nte xa í jaxolu ke í sinxotofenjo ti." ⁴⁵ Nin Dawuda be a kilila xo Marigi, a dun si ke a mamarinjo ti na di?» ⁴⁶ Moxo si man sin xa Isa jaabi haali xuma kilin na. X'a bo wo lunjo ma, moxo si man fatiya x'a njininxo tugun.

23 Wo xo, Isa xumata jama nin a la xarandinjolu nen. ² A xo: «Xa moxolu laxaran Musa la sariya la, wo mu sariya karanmoxolu nin Farisiya lelu la baaro ti. ³ I je fen wo fen fo alu nen, alu wolu bee mara x'e ke. Bari alu xana i la ku ketalu ladigi, bawo i be men fola, i nte wo kela. ⁴ I si doni xulinjolu siti x'e la moxolu kun, bari i me son x'e buluxonondin kilin ke xa wolu deema x'e la donolu ta. ⁵ I be i la kuwolu bee kela, walasa moxolu x'e je x'e lasaxa. Wo le x'a tu, i b'e fodalasafelu nin i buluxan na safelu kela belebeleba ti, x'e la doroke bunsanjolu janja. ⁶ Domoliba dulalu, nafesigidulalu xa di i nen. Alabatusuwo xono, nafesigilanjolu xa di i

nen. ⁷ Don du xa di i nen moxolu x'e xonton bete be-ralu to anin x'e kili xo "Karanmoxo." ⁸ Bari atelu xana son moxo si x'alu kili xo "Karanmoxo"; bawo Karanmoxo kilin doron ne be alu ma. Alu bee mu badinma lelu ti alu nin i joxo te. ⁹ Alu xana moxo si kili duguxulu in xan xo alu "Fa"; bawo Fa kilinpe le be alu kun, men be sanjo to. ¹⁰ Alu xana son du alu xa kili xo "Kuntigo"; bawo Kuntigi kilinpe le be alu ma, nin wo mu Kirisita ti. ¹¹ Alu bee to moxoba le be kela alu la baaradinjo ti. ¹² Moxo wo moxo je a fan xotota, wo si majigi; moxo wo moxo je a fan majigi, wo si xotota.» ¹³ Isa xo: «Bone be alu sariya karanmoxolu anin Farisiyalu jen! Fulankafu innu! Alu be Ala la Mansaya dataxunna moxolu ja; alu fannu nte dunna anin mennu b'a fe xa dun, alu be wolubalila xa dun. [¹⁴ «Sariya karanmoxolu anin Farisiyalu, bone be alu jen! Fulankafu innu! Alu be musujaxelu bulufenjolu bee mutala i la, wo xo, xa taxa Alamataraja jannjolu ke, x'alu fannu yita. Wo le x'a tu, alu la kiito si xoleya bete.] ¹⁵ «Sariya karanmoxolu anin Farisiyalu, bone be alu jen! Fulankafu innu! Alu be taxama jannjo kela duguxulu nin jiyo xan, xa moxo kilin njinin x'a ladun alu la diino to. Bari nin wo moxo dunta, alu fannu si a yeleva x'a ke jahanaba dunke ti, x'a laxaxuya fo sinja fula xa tanbi alu fannu xan. ¹⁶ «Namoxo fiyontolu, bone be alu jen! Ate mennu b'a foxan xo nin moxo wo moxondin je i xali Alabatusuba toxo la, wo xalilo me wo tigi muta; bari xo nin moxo wo moxondin je i xali Alabatusuba xono sano la, wo xalilo si wo tigo muta. ¹⁷ Hakilintan innu! Fiyonto innu! Joman xa bun? Sano ba, walla Alabatusuba men be sano kela fen senunjo ti? ¹⁸ Alu xo du xo moxo wo moxo je i xali sadaxajanidula toxo la, wo xalilo me wo tigo muta. Bari sadaxo men be sadaxajanidula, moxo wo moxo je i xali wo la, wo xalilo si wo tigo muta. ¹⁹ Fiyonto innu! Joman xa bun? Sadaxo ba, walla sadaxajanidula, men be sadaxo kela fen senunjo ti? ²⁰ Awa, moxo wo moxo je i xali sadaxajanidula toxo la, fen wo fen b'a xan, a x'e xali wo bee le la. ²¹ Moxo wo moxo be i xalila Alabatusuba la, wo be i xalila Alabatusuba nin Ala le la, wo men be siginin a xono. ²² Moxo wo moxo be i xalila sanxulo la, wo tigi be i xalila Ala la mansasigilanjo la anin a xansigibaxo. ²³ «Sariya karanmoxolu anin Farisiyalu, bone be alu jen! Fulankafu innu! Alu be naaxoxono fen mesenjolu jakko bola: Nanaye, fenele, anin kumen. Bari alu be sariyalu bee la bunbumabalu tula je, nin wo mu tilinninja, nin hinno, anin xantigiya ti. Alu tunnu xa xan xa wo lelu ke, xa wo fen mesenjo dulu kafu a ma. ²⁴ Namoxo fiyontolu. Alu be alu minjiyo sensenna xa fen mesenjolu bo a to, x'a tara fenjo mennu be tanbila xa taxa alu xono, wolu si jogomo bo bunja to. ²⁵ «Sariya karanmoxolu anin Farisiyalu, bone be alu jen! Fulankafu innu! Alu be jita felu nin tasolu xomala lelu kula x'e senuya, x'a tara i xonolu to be fanin alu la suupalifenjolu nin alu nege

jaxolu la. ²⁶ Farisiya fiyonto! Jitafe xono ku folo, wo to, a xomala du si senuya. ²⁷ «Sariya karanmoxolu anin Farisiyalu, bone be alu jen! Fulankafu innu! Alu be le i xo xaburo mennu laxuuruta; i xa bete ja la, bari i xonolalu be fanin fure xulu gansanjo la, anin fen noxonin kiika. ²⁸ Alu dulu be ten. Alu be alu fannu kela moxo tilinninjo ti moxolu ja xoto, bari alu jusukunjo be fanin fulankafuya nin jaxuya la. ²⁹ «Sariya karanmoxolu anin Farisiyalu, bone be alu jen! Fulankafu innu! Alu be xaburu betolu darala kilalu jen, xa moxo tilinninjolu la xaburolu jangu, x'a fo xo: ³⁰ «Nin n tunnu be balunin n benbalu la waxato, n me i deema xa kilalu faxa.» ³¹ Wo ja ma, alu b'a yitala xo alu mu kilalu faxabaxolu mamarinjo ti. ³² Awa, alu taxa ja, alu benbalu xa baara jaxo men damuta, alu wo dafa. ³³ Sa innu! Foonedinnu! Atelu si kisi jahanaba tooro ma ja di? ³⁴ Wo le x'a tu, nte be kilalu nin moxo hakilitigolu nin sariya karanmoxo soobe dolu kila alu ma. Alu si dolu faxa, xa dolu gengen yiro ma, xa dolu buwo gapo la alu la Alabatusuwolu xono, x'a lo i nofe, x'e tooro gallolu to taxanin. ³⁵ Wo ja ma, moxo tilinninjo fen wo fen jelo bonta duguxulu in xan, wo bee haxxo si den alu la, x'e ta moxo tilinnin Abila jelo ma, fo xa taxa a bula Barasi dinxe Sakariya jelo ma, alu xa wo men faxa Alabatusuba nin sadaxajanidula te. ³⁶ Tonja la, n b'a fola alu jen xo: Wo moxo mennu faxata ten, wo bee haxxo si den bi moxolu la.» ³⁷ «Yerusalem, Yerusalem, ite men be kilalu faxala, xa Ala la kiladinjolu bun kuro la x'e faxa! Sinja kiika ti, nte keta a fe x'e la moxolu kamari i xo sisejibo be a dinjolu kamari la a danfatanjolu xoto ja men. Bari alu man son. ³⁸ A fele, alu la luwo toxulunjo si tu alu bulu. ³⁹ Bawo nte b'a fola alu jen xo, alu me nte je bitugun, fo alu x'a fo lunjo men xo: "Men nato fele Marigi toxo la, duwawo be wo fe!" »

24 Isa bota Alabatusuba xono. A taxato, a la xarandinjolu x'e sodun a la xa Alabatusuba loja yita a la. ² A x'a fo i jen xo: «Alu ja be pin bee la de, xodi? Tonja la, nte b'a fola alu jen xo kuru si me tu kuru xan jan, i bee si boyi.» ³ Isa taxata i sigi Oliwe kuro to. A la xarandinjolu x'e sodun a la i danna, x'a njinxo xo: «Wo kewaxato fo n jen, anin i la na nin duniya banjo taagumansedo si ke mun ti.» ⁴ Isa x'e jaabi xo: «Alu i korosi, moxo si xana alu lafili. ⁵ Moxo kiika si na nte toxo la, x'a fo xo ite lelu mu Kirisita ti. I si moxo kiika lafili. ⁶ Alu si kele xibarolu me, xa kele nuununuunxanjo me. Bari, alu xana sila. Waajibo le mu wolu xa ke bari wo kuwolu nte duniya wulo ti folo. ⁷ Siya do si wuli siya do xanma, mansaya do du si wuli mansaya do xanma. Xonxobalu nin duguxulu jarajarolu si ke du la kiika. ⁸ Wo kuwolu bee mu toorokuwolu damuto le ti, i xo muso la tinjo wulito. ⁹ «Wo to, moxolu si alu dun bulo to, x'alu tooro, x'alu faxa. Siyalu bee si alu jaxuya nte toxo nofe. ¹⁰ Wo tumo, moxo kiika si lannaya

bula, i si i noxo janfa, x'e noxo jaxuya. ¹¹ Kila fano kiika si wuli, i si moxo kiika bula filo xono. ¹² Jaxuya si siya, fo xanuya si doxoya moxo kiika jusukunjo la. ¹³ Bari moxo men je muja fo xa si labanjo ma, wo si kisi. ¹⁴ Ala la Mansaya xibaru Dimanjo si jenjen duniya fanjo bee, walasa siyalu bee xa wo seedeja me. Wo xo, duniya bantum si si.» ¹⁵ «Fen haramuninjo men, nin kila Daniyeli x'a la xumo fo, alu si wo loninjo je du-la Senumanjo. Men je jin xaran, wo x'a faamu! ¹⁶ Wo je moxo mennu tara Yude maro xono, wolu x'e bori xa taxa kurolo to. ¹⁷ Wo je men tara a la bilo sanjo to, wo xana jigi xa taxa a la buguxono fenjo ta. ¹⁸ A je men tara a la fuuto to, wo xana í koppa xa taxa a la doroko ta. ¹⁹ Musu xonomalu, anin dinjo be mennu sunjiyo la, wolu si tooro bete wo lunjolu. ²⁰ Alu Ala matara, walasa alu la boro xana ben neno waxato ma, a xana ben tofojolunjo du ma. ²¹ Bawo tooroba si ke wo lunjolu, men noxon man dali xa ke, kabirin duniya dantum, fo xa na a bula bi la. A noxon du nte kela tugun. ²² Nin Marigi tun man do bo wo lunjolu la, moxo si tun me kisi. Bari a la moxo sugandininjo koso, do bota wo lunjolu la. ²³ Wo to, nin do xo alu pen xo: "Kirisita be jan!" walla: "A be non," alu xana la wo la. ²⁴ Bawo kirisita fanolu anin kila fanolu si wuli. I si taagumanseede balu nin kawakuwolu ke, walasa xa moxolu lafili. Nin i tunnu si haali Ala la sugandininjo lafili no, i tunnu si wo ke. ²⁵ A fele, n janxa alu lasobi. ²⁶ «Wo to, nin a fota alu pen xo: "A fele, a be wulo xono," alu xana taxa je. Walla: "A felenti bugo xono," alu xana la wo la. ²⁷ Awa, sanjimepenxo be bola koton ja men, xa keneya bo fo tiliboyi, Moxo Dinxe du la na si ke ten. ²⁸ Fen fure banna kela dula wo dula, dugolu si jigi non.» ²⁹ «Wo lunjolu tooro tanbo xo, tilo si dibi, xaro me xoyi tugun, loololu si tege xa bo sanxulo ma, sanxulo sintigiyalu si jarajara. ³⁰ Wo to, Moxo Dinxe la taagumansedo si je sanjo to. Duniya siyalu bee si xasi. I si Moxo Dinxe nato je sanxulo xabolu xan, sintigiyaba nin nooroba xono. ³¹ Buutuba si fo. A si a la melekoyolu bula xa taxa duniya tonxon naano to, xa Ala la moxo sugandininjo kamari, x'a damuta duniya kun do ma, fo xa taxa a bula a kun do la.» ³² «Turojuwo be payitalo men dila, alu wo faamu: Nin a bulolu nunguta, xa nerun, alu si a lon xo sama sutiyata. ³³ Wo ja ma, nin alu xa wo kuwolu bee je, alu a lon xo Moxo Dinxe nawaxato sutiyata, a be da la fan. ³⁴ Tonja la, n b'a fola alu pen xo bi moxolu bee me sa, x'a tara jin ku innu bee man ke. ³⁵ Sanxulo nin duguxulo si sanko, bari nte la xumaxanjo me sanko abada.» ³⁶ «Moxo si man duniya banlunjo nin a waxato lon. Melekiyo mennu be sanjo to, wolu man a lon, Ala Dinxe du man a lon. Fa Ala kilinpe le x'a lunjo lon. ³⁷ Kuwo mennu ke ta Nuhun tilo, wolu noxonnu si ke Moxo Dinxe du nalunjo. ³⁸ Bawo wo waxato, jannin waameba xa na, moxolu tunnu be domolo kela, x'e min, xa futuwo ke,

x'e dinjolu di futuwo la, fo Nuhun dunta xulunba xono lunjo men. ³⁹ I tunnu nte sikkannin fusi to, fo waameba nata lunjo men, xa taxa i bee ti. A si ke ten Moxo Dinxe du nalunjo. ⁴⁰ Wo tumo, xebe fula si tara fuuto to, do si ta xa do tu je. ⁴¹ Musu fula si tara jurilo la, do si ta xa do tu je. ⁴² Wo to, alu hakili soto, bawo alu man alu Marigi nalunjo lon. ⁴³ Alu x'a lon xo nin lutigo tun xa sunjo nawaxato lon suwo to, a tun si tu a jala, walasa a xana dun a la luwo xono. ⁴⁴ Wo le x'a tu, alu dulu tobenninjo xa tu, bawo alu hakili nte waxato men ma, Moxo Dinxe be nala wo waxato fan ne.» ⁴⁵ «Jon mu jon xantigo nin hakilima ti, men marigi x'a lasigi a la luwo kunna, xo a xa jon tolu la domolo di i ma a tumo to? ⁴⁶ Nin a marigi nata wo jonjo tara wo baaro la, heero b'a pen. ⁴⁷ Tonja la, n b'a fola alu pen xo a marigi si a lasigi a bulufenjo bee kunna. ⁴⁸ Bari nin wo jon in xa jaxu, a si í miiri x'a fo a xonoto xo: "N marigi meta a man na." ⁴⁹ A si a damuta x'a jon toponolu buwo, xa domolo nin minno ke, a nin minnikelalu xa kafu x'e fa dolo la. ⁵⁰ Wo jonjo marigi si na lunjo do, a hakili nte lunjo men ma, anin waxato do, a man men lon. ⁵¹ A si wo jonjo xoyi, x'a nin fulankafolu sara ke kilin ti, x'a bula dula do, xaso nin dafatakinjo si ke jan men.»

25 «Ala la Mansaya be le í xo xarafa tan na kuwo, men tunnu kilita maajoya la. I x'e la lanpolu ta, x'e be taxala maapoxe kunbenna. ² Luulu tunnu mu hakilintanjo ti, luulu dolu mu hakilimalu ti. ³ Hakilintanjo x'e la lanpolu ta taxanin, bari i man tulu ta i bulu. ⁴ Hakilimalu x'e la lanpolu nin i la tulufelu ta taxanin. ⁵ Maapoxe meta a man na. I bee gingonta, wo xo i sinnoxota. ⁶ «Dugutala ma, xuurexanjo bota xo: "Maapoxe fele, alu bo x'a kunben." ⁷ Wo xarafalu bee wulita x'e la lanpolu toben. ⁸ Hakilintanjo xo hakilimalu pen xo: "Alu tulo dondin di n ma, n na lanpolu be njin xa sa." ⁹ Hakilimalu x'e jaabi xo: "Ayi, tulu nte ntelu kun, men si n bee bo. Alu me taxa fiirilalu bata, xa tulo do san alu fannu pen." ¹⁰ I taxaninma tulu san dula, maapoxe nata fo i xo. Luulo men tunnu be tobennin, a nin wolu dunta maajoya bunba xono. I dunjo xo, da taxunta. ¹¹ Wo xo, xarafa tolu nata xa feten xo: "Marigi, marigi, da ye le n ja!" ¹² Bari a x'e jaabi xo: "Tonja la, n b'a fola alu pen xo n man alu lon." ¹³ Isa xo: "Wo to, alu hakili soto, bawo alu man wo lunjo nin a waxato lon".» ¹⁴ «A si ke í xo xe do, men tun xa xan xa taxama. A taxato x'a la jonjolu kili, x'a la naafulu xarifa i ma. ¹⁵ A xa talan xalisoro donme luulu xarifa do ma, xa fula xarifa do ma, xa kilin xarifa do ma. A xa bee ta xarifa i ma, x'a la bee la sinjo xan. Wo keninma, a taxata a la taxamo la. ¹⁶ Wo no bee to, men xa luulo soto, a taxata jaago ke wo la, xa luulu xote soto x'a kafu wo ma. ¹⁷ Wo ja ma, fula sotobaxo du xa jaago ke a ta la, xa fula kafu a la fulo ma. ¹⁸ Bari men xa kilin soto, wo taxata dinxo jaga, x'a marigi la xalisoro

dugu je. ¹⁹ «A meta, wo xo, jon innu marigi nata. A nin jonḡolu xa jaate bo. ²⁰ Talanluulutigo nin a la talanḡolu x'é sodun a la, a xo: "N' marigi, í xa talan luulu le xarifa n' ma; a fele n' xa talan luulu xote soto x'a kafu wo ma." ²¹ A marigi xo a pen xo: "Wo benta, í keta jon beto nin lannayamoxo ti. Í keta lannayamoxo ti kundinḡolu to, n' si kubalu xarifa í ma. Na, n xa paxali i noxo fe." ²² Talanfulatigo du x'é sodun a la x'a fo a pen xo: "N' marigi, í xa talan fula le xarifa n' ma; fula xote felenti, n' xa mennu soto." ²³ A marigi xo a pen xo: "Wo benta, í keta jon beto nin lannayamoxo ti. Í keta lannayamoxo ti kundinḡolu to, n' si kubalu xarifa í ma. Na, n xa paxali i noxo fe." ²⁴ Wo xo, talankilintigo x'é sodun a la x'a fo xo: "N' marigi, nte tun x'a lon xo í la kuwo xa xole. Í man lanni ke jan men, í si tegelo ke non. Í man sarili ke jan men, í si xalo ke non. ²⁵ Nte silata, n' taxata í la xaaliso dugu duguxulo xoto. Í la xaaliso fele." ²⁶ A marigi x'a jaabi xo: "Jon jaxu in, salabaxantun in! Í tun x'a lon xo n' man lanni ke jan men, n' si tegelo ke non, n' man sarili ke jan men, n' si xalo ke non. ²⁷ Í tun xa xan xa n' na xaaliso bula bangi la, walasa n' koppaninḡo xa n' na xaaliso nin a tono ta. ²⁸ Alu talan kilin in muta a la. Tanḡo be men bulu, alu a di wo ma." ²⁹ Fen be men bulu, do si di wo ma, kiika si ke a kun; bari fen nte men bulu, haali dondinḡo men b'a bulu, wo si muta a la. ³⁰ Alu pin jon nafantan in fili banto to, dibo to. Xaso nin dafatakinḡo si ke non.» ³¹ «Nin Moxo Dinxe be nala a la nooro xono lunḡo men, anin a la melekoyolu bee, a s'í sigi a la nooro mansasigilanḡo xan. ³² Siyalu bee si kamari a pa xoto. A s'í bo i noxo to í xo negaanila si saaxolu nin balu bo i noxo to pa men. ³³ A si saaxolu ke a kininbulo xoto, xa balu ke a numanbulo xoto. ³⁴ Mansaxe woman in si a fo a kininbulu xoto talu pen xo: "Alu na, ate mennu xa n' Fa la duwawo soto. Ala la Mansaya fele, men tobenta alu pen kabirin duniya da tumo, alu a ta. ³⁵ Bawo xonxo tun be n' na, alu xa domolo di n' ma; mindoxo tun be n' na, alu xa jiyo di n' ma. N' tun be luntanpa la, alu xa n' jigiya. ³⁶ Feeto tun be n' na, alu xa n' feetofata. N' tun man kende, alu taxata n' dulakulon. N' tun be kaso la, alu taxata n' je. ³⁷ Moxo tilinninḡolu woman innu si a jaabi xo: "Marigi, n x'é xonxoto je min, walla í mindoxoto, nin n xa domolo di í ma, xa jiyo di í ma? ³⁸ N x'é luntanma je tuma joman nin n x'é jigiya? N x'é feetoto je tuma joman nin n x'é feetofata? ³⁹ N x'é jangaruto je tuma joman, walla x'é je kaso la nin n taxata í je?" ⁴⁰ Mansaxe s'í jaabi xo: "Tonpa la, n' b'a fola alu pen xo sinpa wo sinpa, nin alu xa wo kuwolu ke nte badinḡolu to doxomandin kilin pen, alu x'a ke nte le pen." ⁴¹ «Wo xo, mennu b'a numanbulo xoto, a si a fo wolu pen xo: "Alu i soobo n' na, dangato innu. Alu taxa ta sabalo to, men tobenta Sentane nin a la melekoyolu xanma. ⁴² Bawo xonxo tun be n' na, alu man domoli di n' ma; mindoxo tun be n' na, alu man ji di n' ma. ⁴³ N' tun luntanḡo mu, alu man n'

jigiya. Feeto tun be n' na, alu man n' feetofata. N' tun man kende, n' tun be kaso la, alu man na n' je." ⁴⁴ Wo dulu si a jaabi xo: "Marigi, n x'é xonxoto je min, walla í mindoxoto, walla í luntanma, walla í feetoto, walla í jangaruto, walla í be kaso la, nin n man í deema?" ⁴⁵ A s'í jaabi xo: "Tonpa la, n' b'a fola alu pen xo, tuma wo tuma, nin alu man wo kuwolu ke pin doxomandin innu to kilin pen, a be í xo alu man a ke nte le pen." ⁴⁶ Wolu si taxa paani banbalo to, bari moxo tilinninḡolu si taxa nilamaya banbalo to.»

26 Isa x'é soto wo xumolu bee la tumo men, a xo a la xarandinḡolu pen xo: ² «Alu x'a lon xo tili fula be n' nin Tanbinxansallo te. Wo tumo, Moxo Dinxe si dun bulo to, xa gengen yiro ma.» ³ Wo to, sadaxalasi-baxa kuntigolu nin jamano moxobalu x'é noxo lakamari sadaxalasibaxa kuntigiba Kayife la luwo ma. ⁴ I benta a to xo i si Isa muta xalixaliya la, x'a faxa. ⁵ I tunnu b'e son xo: «A xana ke sallo to, nin wo nte, jama si muruti.» ⁶ Xa Isa tu bagitoxe Simon na luwo xono Betani, ⁷ muso do nin kurudaxandin daxolenḡo do x'é sodun a la. Wo tun be fanin tulu sumadiman daxolenḡo le la. A xa wo tulo bon Isa kunḡo xan x'a tu domolo la. ⁸ xarandinḡolu xa wo je tumo men, i diminta. I xo: «Nin tinpali in dun kunḡo mu mun ti? ⁹ Wo tulu daxolenḡo tun si fiiri no xaalisiba la xa wo di segebaxantunḡolu ma.» ¹⁰ Isa xa wo lon tumo men, a xo: «Mun na alu be pin musu in toorola? A xa ku puma le ke nte pen. ¹¹ Alu nin segebaxantunḡolu b'e noxo xan tuma bee. Bari alu nin nte nte tula kadawu. ¹² Nin musu in xa tulu sumadimanḡo bon nte xan, x'a ke nte kasanke pasigilanḡo le ti. ¹³ Tonpa la, nte b'a fola alu pen xo: Nin xibaru Diman in je fo duniya jan wo jan, musu in na pin kebaara in si laxali je, xa moxolu hakilo lajigi a kun.» ¹⁴ Isa la xarandin tan nin fulo to kilin, men toxo xo Yudasí Isikariyoti, wo taxata sadaxalasibaxa kuntigolu bata, x'a fo i pen xo: ¹⁵ «Alu si mun di n' ma, nin n' xa Isa dun alu bulu?» I xa xaalixoyi tan saba jaate xa wo di a ma. ¹⁶ Kabirin wo tumo, Yudasí tun be waxati puma nininna nin a si Isa dun i bulu. ¹⁷ Buuru-fuunulantan sallo lun folo, Isa la xarandinḡolu x'é sodun a la, x'a nininxa xo: «Í b'a fe n' xa Tanbinxansallo domolo toben í pen min?» ¹⁸ A x'e jaabi xo: «Alu taxa gallo xono, xe bata, n' xa men toxo fo alu pen xo: "Karanmoxo xo, xo ate la waxato sita, xo a nin a la xarandinḡolu be nala Tanbinxansallo kela í bata." » ¹⁹ Isa x'a fo pa men, xarandinḡolu x'a ke wo pa ma. I xa Tanbinxansallo domolo toben je. ²⁰ Suwo kuta tumo men, Isa nin a la xarandin tan nin fulo x'e sigi domolo la. ²¹ X'e tu domolo la, Isa x'a fo i pen xo: «Tonpa la, n' b'a fola alu pen xo, alu do be nala n' dunna bulo to.» ²² Xarandinḡolu juso xasibeteta. I bee kilin kilin keta a ma xa Isa nininxa xo: «Marigi, nte le mu ba?» ²³ Isa x'e jaabi xo: «Nte nin men x'a bulo lajigi domolo to i noxo la, wo tigo le be nala n' dunna bulo to. ²⁴ Moxo Dinxe si

sa, í xo a be safenin a la kuwo to ja men. Bari moxo men be nala Moxo Dinxe dunna bulo to, bone be wo tigo pen. A tun xa fisa wo tigo ma, a xana haali bo duniya to.»²⁵ Yudasi men tun b'a dunna bulo to, wo x'e xantu xo: «Karanmoxo, nte le mu ba?» Isa x'a jaabi xo: «Í fan ne x'a fo.»²⁶ X'e tu domolo la, Isa xa buuro ta, xa barako bula Ala pen. Wo xo, a x'a tokutun, x'a di a la xarandinjolu ma, x'a fo xo: «Alu hun, alu x'a domo. Nin mu n balo le ti.»²⁷ Wo xo, a xa minfen jipoto ta, xa barako bula Ala pen, x'a di i ma, x'a fo xo: «Alu bee xa do min.»²⁸ Nin mu n jelo le ti, Ala la Kafuxanjo jelo, men bonta moxo kiika pen, junubeyaafu xanma.²⁹ Nte b'a fola alu pen xo, n me nin resen in jiyo min bitugun, fo lunjo men, nin n nin alu be nala a kuto minna n Fa la Mansaya xono.»³⁰ I xa Alatantu donkilolu la tumo men, i bota xa taxa Oliwe kuro to.³¹ Wo to, Isa xo a la xarandinjolu pen xo: «Bi su in to fan, alu bee si i bori xa n kilin tu, bawo a be safenin Kitaabo to xo: "N si negaanila faxesa, saaxolu si jenjen."»³² Bari nin n kunita xa bo furelu to, nte si bula alu ja xa taxa Galile maro la.»³³ Piyere xa xumo ta x'a fo a pen xo: «Haali nin bee x'e bori í ma, nte ken me n bori í ma abada!»³⁴ Isa xo a pen xo: «Tonja la, n b'a fola í pen xo, bi su in to fan, jannin duntunjo xa kokori, í si í xaro í xo sinja saba, xo í man nte lon.»³⁵ Piyere xo a pen xo: «Haali nin nte nin í be sala le, nte me n xaro a la, xo n man í lon.» Xarandin to dulu bee xo ten.³⁶ Wo to, Isa nin a la xarandinjolu taxata yirifuuto do to, xo Jetisemane. A xo i pen xo: «Alu tu jan, n be taxala Ala matarala non.»³⁷ Isa nin Piyere nin Sebede dinxe fulo taxata i joxo la. Jusuxaso nin silanpaba boyita a mutala.³⁸ Wo to, a xo i pen xo: «N juso be xasinin, fo n be njinin xa sa. Alu tu jan, n xa tu i pala i joxo fe.»³⁹ A taxata ja dondin x'e boyi dugo ma, xa Ala matara ten xo: «N Fa, nin a si ke no, nin tooro jipoti in soobo nte la. Bari, nte sago xana ke, ite ta le xa ke!»⁴⁰ Isa x'e koppa a la xarandin sabo dula, a x'e tara sinnoxonin. A xo Piyere pen xo: «Alu korita tula i pala, alu nin nte, haali leere kilin xono ba?»⁴¹ Alu tu i pala xa Ala matara, walasa alu xana xotobo. Jusukunjo be sonnin, bari balasubo barako xa doxo.»⁴² Isa x'e soobo i la sinja fulanango xa taxa Ala matara tugun xo: «N Fa, nin tooro in men be nanin nte ma, nin nte me kisi no wo ma, wo tumo í sago xa ke.»⁴³ Wo xo, a nata tugun x'e tara sinnoxola, bawo sinnoxo tun be i ja to kujaxu.⁴⁴ Isa x'e tu je xa taxa tugun, xa Ala matara sinja sabanango to, xa ate xuma kilin innu fo.⁴⁵ Wo xo, a nata a la xarandinjolu bata, x'a fo i pen xo: «Haalibi, alu be sinnoxola, x'e tofono! Waxato sita. Saasa, Moxo Dinxe be nala dunna junubekelalu bulu.»⁴⁶ Alu wuli, n xa taxa! Moxo men be n dunna bulo to, wo nato fele.»⁴⁷ Xa Isa tu xumo la, Yudasi, nin wo mu a la xarandin tan nin fulo to do ti, wo nata, a nin jamba. Fanjolu nin gumalu tunnu be i bulu. Sadaxalasi-baxa kuntigolu nin jamano moxoba le tunnu x'e ki.

⁴⁸ Yudasi men be nala Isa dunna bulo to, wo tun xa taagumanseedo do di a mutabaxolu ma. A xo: «N je men baataya xonton, wo le mu. Alu si wo muta!»⁴⁹ Wo no bee to, Yudasi x'e sodun Isa la, x'a fo a pen xo: «Karanmoxo, í nin sege!» Wo xo, a x'a baataya xonton.⁵⁰ Isa x'a jaabi xo: «N xanunte, í nata men xanma, wo ke.» Wo to, i x'e sodun Isa la, x'a muta.⁵¹ Isa nofemoxo do x'a la fanjo boosi, xa sadaxalasibaxa kuntigiba la jonxe tulu kilinjo carun.⁵² Isa xo a la xarandinjo pen xo: «Í la fanjo bula a la xono; bawo moxo mennu be fanjo tala, wolu si faxesa fanjo la.»⁵³ Í man a lon ba xo nte si a no xa n Fa matara, wo no bee to, a si melekiyo kebulu tan nin fula di n ma saasa?⁵⁴ Bari nin wo keta, Kitaabu xumolu si ke no ja di? Wo mennu x'a yita xo waajibo le mu nin ku innu xa ke ten.»⁵⁵ Wo xo, Isa xo jama pen xo: «Alu nin fanjolu nin gumalu nata xa nte muta, a be í xo nin nte mu boyinxanila le ti. Nte tun nin alu be i joxo xan lun wo lun Alabatusuba xono, xa moxolu laxaran. Alu dunnu man nte muta non de.»⁵⁶ Bari jinnu bee be kela le, walasa kilalu xa men safe Kitaabo to, wo bee xa ke.» Wo to, xarandinjolu bee x'e bori, x'a tu je.⁵⁷ Men tunnu xa Isa muta, wolu nin a taxata sadaxalasibaxa kuntigiba Kayife bata. Sariya karanmoxolu nin moxobalu tunnu be kamarinin non.⁵⁸ Piyere x'e tu dulajan, x'a lo Isa nofe, fo xa si sadaxalasibaxa kuntigiba la luwo ma. A dunta luwo ma, x'e sigi garadolu bata, xa kuwolu labanjo laxono.⁵⁹ Sadaxalasibaxa kuntigolu nin Yahudiyalu la Kitegekafo bee tun be seede jaxolu njinna, xa Isa jalagi i si a faxesa ja men.⁶⁰ Seede jaxo kiika bota, bari wolu si man sila soto. Labanjo la, seede fula nata.⁶¹ I xo: «Nin xe in x'a fo xo: "Nte si sin no xa Alabatusuba te, x'a tolo tili saba xono".»⁶² Sadaxalasibaxa kuntigiba wulita x'e lo, x'a fo Isa pen xo: «Nin moxo innu be men fola í ma, í nte wolu jaabila ba?»⁶³ Isa man xuma. Sadaxalasibaxa kuntigiba xo: «Í xali Ala nilama toxo la, nin í le mu Kirisita ti, Ala Dinxe, wo fo n pen.»⁶⁴ Isa x'a jaabi xo: «N mu men ti, í fan da janxa wo le fo. Bari n b'a fola alu pen xo bi tanbininjo xo, alu si Moxo Dinxe sigininjo je, Ala, Sinjobeetigo kininjo xoto, x'a nato je xabolu xan, xa bo sanjo to.»⁶⁵ Wo to, sadaxalasibaxa kuntigiba diminta fo x'a fan na doroko tofara. A xo: «A xa Ala toxo tija! N maakuwo be seede jomannu la tugun? Alu fannu birin a la Ala toxotijaxumo mela.»⁶⁶ Alu xo di?» I xo: «A xa xan ne xa faxesa.»⁶⁷ Wo xo, i xa dajiyo tuppú Isa ja to, x'a juri, dolu x'a fenta.⁶⁸ I tunnu b'a fola a pen xo: «Kirisita, kilaya ke. Í lippabaxo fo n pen!»⁶⁹ Piyere tun be siginin banto to, lukeno ma. Baaradinmuso do x'e sodun a la, x'a fo a pen xo: «Ite du tun nin Galilenga Isa be le i joxo fe!»⁷⁰ Bari Piyere x'e xaro a la moxolu bee pala, a xo: «Nte man a lon, ite b'a fe xa men fo.»⁷¹ A bota non x'e patilin da mafanjo la, baaradinmuso do xote x'a je. Wo x'a fo non moxolu pen xo: «Nin du tun nin Nasaretinga Isa be le i joxo

fe.»⁷² Piyere x'é xaro a la tugun, x'é xali xo: «Nte man nin xe in lon.»⁷³ Wo xo dondin, moxo men tunnu be non, wolu x'e sodun Piyere la, x'a fo a pen xo: «Sikka nt'a to, í du mu moxo innu do le ti! Í xumapa be wo yitanin.»⁷⁴ Bari Piyere x'é xali, x'a fan danga xo: «Nte man nin xe in lon.» Wo no bee to, duntunjo do kokorita.⁷⁵ Piyere hakilo jigita Isa la xumo la xo: «Jannin duntunjo xa kokori, í sí xaro nte la í xo sinja saba.» Wo to, Piyere bota banto to, xa taxa xasi bete.

27 Saxo yeleninma, sadaxalasibaxa kuntigolu nin jamano moxobalu bee x'e noxo tara Isa faxo latego xanma.² I x'a siti xa taxa a dun Goferenere Pilate bulu.³ Yudasi men tun xa Isa dun bulo to, wo x'a lon tumo men xo Isa faxalo lategeta, a nimisita. Sadaxalasibaxa kuntigolu nin jamano moxobalu tunnu xa xaalixoyi tan sabo men di a ma, a xa wolu lasaagi i ma.⁴ A xo i pen xo: «N' xa junubo ke; xa moxo jalagibalo dun bulo to faxalo xanma.» Wolu x'a jaabi xo: «Ntelu la mun be wo to? Wo mu í kunku ti je.»⁵ Yudasi xa xaalisi innu fili Alabatusuba xono, xa bo non xa taxa a fan den julu xutuntanjo la, x'a fan faxesa.⁶ Sadaxalasibaxa kuntigolu xa xaalisi in tonbon, i xo: «A nte dagenin jin xaalisi in xa bula Alabatusuba xaalisimaradula, bawo jelu xaaliso le mu.»⁷ I benta a to, xa wo xaaliso ke xa daxadala la fuuto san, xa non ke luntan furelasidula ti.⁸ Wo le x'a tu, wo fuuto be kilila xo «Jelu fuuto» fo xa na a bula bi la.⁹ Kila Yeremi tun xa xumo men fo, wo keta ten xo: «I xa wo xaalixoyi tan sabo muta, Banisirayila dinjolu xa wo jaate a sonjo ti; ¹⁰ xa wo ke xa daxadala la fuuto san, í xo Marigi tun x'a fo n' pen na men.»¹¹ I xa Isa lalo Goferenere Pilate na xoto, wo x'a njinxaxo: «Í mu Yahudiyalu la mansaxe le ti ba?» Isa x'a jaabi xo: «Nte mu wo le ti, a be í xo í x'a fo na men.»¹² Sadaxalasibaxa kuntigolu nin jamano moxobalu xa Isa jalagi fen wo fen to, a man wolu si jaabi.¹³ Wo to, Pilate x'a njinxaxo: «I be í jalagila kuwo mennu bee to, í tulu nte wolu la ba?»¹⁴ Bari Isa man Pilate jaabi fen si la. Wo xa Pilate dabaro ban bete.¹⁵ San wo san, Tanbinxansallo to, Goferenere Pilate tun si kasolamoxo kilin bula. Jama je men njin a la, a si wo bula.¹⁶ Wo tumo, xe do tun be kaso la, a toxo xo Barabasi. Bee tun x'a lon a la kujaxuko fe.¹⁷ X'e kamarinjo tu, Pilate xa jama njinxaxo: «Alu b'a fe n' xa jon kilin ne bula, Barabasi ba, walla Isa, men be kilila xo Kirisita?»¹⁸ Pilate x'a lon xo Isa la kuwo kiiliya le x'a tu, i x'a dun bulo to.¹⁹ Xa Pilate tu siginin kiititegedula, a musu xa kila bula a ma xo: «Fusi xana dun í nin jin moxo tilinnin in te, bawo suwo to, nte toorota siibo to kujaxu a la kuwo to.»²⁰ Sadaxalasibaxa kuntigolu nin moxobalu xa jama xonotosuruxu, xo i x'a fo Pilate pen xo a xa Barabasi le bula, xa Isa faxesa.²¹ Goferenere x'e njinxaxo: «Ninnu fulo to, alu b'a fe n' xa jon kilin bula?» I x'a jaabi xo: «Barabasi.»²² Pilate x'e njinxaxo: «N' dun si mun ke Isa la, men be kilila xo Kirisita?» I bee x'a jaabi xo:

«A gengen yiro ma!»²³ Pilate xo: «A xa mun kujaxu le ke?» I fetenbeteta xo: «A gengen yiro ma!»²⁴ Pilate x'a je tumo men xo ate me fusi ta no ku in to, xo murutilo be ma xa jaxuya, a xa jiyo ta x'a bulolu ku jama pala. A xo: «Nte sin nte jin moxo tilinnin in faxalo to de, wo be alu fannu ma je.»²⁵ Jama bee x'a jaabi xo: «A la saya xa den ntelu nin n dinjolu la.»²⁶ Wo to, Pilate xa Barabasi bula, a x'a tu Isa xa buwo gajo la, wo xo, x'a dun i bulu, a xa gengen yiro ma.²⁷ Goferenere Pilate la sorodasolu nin Isa taxata goferenere la xube la, x'e topxolu bee kamari a ma.²⁸ I xa Isa la faanolu bo a ma, xa dorokeba wulenjo do dun a xanna.²⁹ I xa mansakufuno dara njaninjo la, x'a ke a kunjolu la, xa guma dun a kininbulo to. Wo xo, i x'e pongi a xoto, xa jele a ma, i xo: «Yahudiyalu la mansaxe, í nin sege!»³⁰ I xa dajiyo tuppua ma, x'a lippa a kunjolu to guma la.³¹ I x'e soto jelela a ma tumo men, i xa dorokeba bo a xanna, x'a fan na faanolu dun a la. Wo xo, i taxata a ti, x'a gengen yiro ma.³² X'e taxato tu, i nin Sireningo do benta xo Simon. Sorodasolu xa wo diyakuwa, x'a bula Isa gengen yiro tala.³³ I sininjo dula do xo Goligota, wo xoto: «Kunxuludula»,³⁴ i xa dolo nin fen xunimanjo do naxamininjo di a ma. A x'a nene tumo men, a man son x'a min.³⁵ I xa Isa gengen yiro ma tumo men, i xa dokkolo ke, x'a la faanolu tala i noxo te.³⁶ Wo xo, i x'e sigi x'a lakorosi.³⁷ Isa jalagikunjo safeta yiro ma a kunnamoto xo: «Nin mu Isa le ti, Yahudiyalu la mansaxe.»³⁸ I xa boyinxannila fula gengen a senbo to. Kilin b'a kininjo, do b'a numanjo.³⁹ Tanbibaxolu tunnu si a nani, x'e kunjolu todon xo: ⁴⁰ «Ite men be Alabatusuba tela, x'a tolo tili saba xono, í fan kisi xo. Nin í mu Ala Dinxe le ti, jigi xa bo gengen yiro xan!»⁴¹ Sadaxalasibaxa kuntigolu nin sariya karanmoxolu anin moxobalu du tunnu be jelela Isa ma xo: ⁴² «A xa dolo kisi, bari a korita a fan kisila. Ate le nte Banisirayila mansaxe ti ba? A xa jigi xa bo gengen yiro xan, n si la a la!»⁴³ A x'a gigo la Ala xan, x'a fo xo: «N' mu Ala Dinxe le ti!» Nin Ala b'a xanunin, a dun me a bo bulo to!»⁴⁴ Haali a nin boyinxannila mennu gengenta yiro ma i noxo fe, wo du tunnu b'a nanila ten.⁴⁵ Kabirin tilinkunte, dibo dunta jamano bee xono, fo xa si wurama.⁴⁶ Wo tumo, Isa fetenbeteta xo: «Eli, Eli, lama sabaxxatani?» Wo xoto xo: «N' na Ala, n' na Ala, mun na í xa n' bula?»⁴⁷ Moxo men tunnu be lonin je, wolu dolo xa wo me tumo men, i xo: «A be kila Eli kilila!»⁴⁸ Do woman in x'é bori xa taxa fuulanjo bula binegaroto, x'a den guma la, x'a di Isa ma, nin a s'a suusu.⁴⁹ Tolu xo: «Alu i lo, alan x'a mafele nin kila Eli si na a kisi.»⁵⁰ Isa fetenbeteta tugun, wo xo, a niyo bota.⁵¹ Wo no bee to, faanuba men tun be Alabatusuba xonotogenin, wo farata fula ti, x'a ta santo ma fo xoto. Duguxulo jarajarata, kurolu fetenta.⁵² Xaburolo dayeleta, Ala la moxo men tunnu sata, wolu kiika kunita.⁵³ I bota xaburolo xono. Isa kuninma, i dunta Yerusaleme,

dugu senumanjo xono, x'e fannu yita moxo kiika la. ⁵⁴ Sorodasi jalatigiba nin sorodasi to men tunnu be Isa lakorosixan, wolu xa duguxulu jarajaro nin ku ken-inŋolu je tumo men, i silabeteta. I xo: «Tonja la, nin xe in tun mu Ala Dinxe le ti!» ⁵⁵ Musu kiika tunnu be lonin dulajan, x'a mafele. Wo tunnu x'a lo Isa nofe kabirin Galile, x'a haajolu nina. ⁵⁶ Magidala Mariyama, Yaxuba nin Yusufu na Mariyama, anin Sebede musu tunnu be wolu to. ⁵⁷ Wura sita tumo men, Arimate naafultigo do nata. A toxo xo Yusufu, a du tun mu Isa la xarandinjo do le ti. ⁵⁸ A taxata Pilate bata, xa Isa fure njin a la. Pilate x'a yanmaru xo a xa di a ma. ⁵⁹ Yusufu xa fure ta, xa lenfaanu kuto ke x'a kasanke, ⁶⁰ xa taxa a lasi xaburu kuto xono, a tun xa men jaga kuro to a fan xanma. Wo xo, a xa kuru belebeleba do birigintin, xa xaburo dataxun wo la, xa taxa. ⁶¹ Magidala Mariyama nin Mariyama do tunnu be siginin x'e natilin xaburo ma. ⁶² Wo lun do, nin wo tun mu tofopolunjo tobenlunjo lun do ti, sadaxalasibaxa kuntigolu nin Farisiyalu x'e noxo tara Pilate bata. ⁶³ I x'a fo a nen xo: «Kuntigo, n hakilo b'a la xo xa moxolafilila in tu í nila, a xo xo a saya tili sabo, a si kuni xa bo furelu to. ⁶⁴ Wo le x'a tu, n b'a fe í xa yanmaruya di xa xaburo korosi fo tili sabanango, walasa a la xarandinjolu xana na a fure ta, x'a fo moxolu nen xo a kunita xa bo furelu to. Wo lafililo si jaxuya xa tanbi folo xan.» ⁶⁵ Pilate xo i nen xo: «Garadolu fele, alu taxa xaburo korosi, í xo a xa di alu nen na men.» ⁶⁶ I taxata xa xaburo korosilikuwo nalabo, xa taagumansedo do ke kuru belebeleba xan, men tun b'a dataxunnin, nin moxo me a dayele, xa sorodasolu bula je x'a korosi.

28 Yahudiyalu la tofopolunjo tanbo xo, loxokunjo tili folo, nin wo mu alahado ti, Magidala Mariyama nin Mariyama do taxata xaburo mafele saxo ma junna. ² Nakun kilin, duguxulu jarajaraba keta. Marigi la melekiyo do bota sanjo to, xa na kuro birigintin, x'a bo xaburo da la, x'é sigi a xan. ³ A nada tun be í xo san-

jimepenxo, a la faanolu xa xoyi í xo kotondibuna.

⁴ Garadolu silata fo i si jarajara, anin i keta í xo furelu.

⁵ Melekiyo xa xumo ta. A xo musolu nen xo: «Alu xana sila! N' x'a lon xo alu be Isa le njinna, men gengenta yiro ma. ⁶ A nte jan, a kunita xa bo furelu to, í xo a tun x'a fo na men. Alu na a mafele, a tun be lanin dula men! ⁷ Alu i tariya xa taxa a fo a la xarandinjolu nen xo: "A kunita xa bo furelu to, a be alu na Galile, alu b'a jela non ne." Men tun be nte ma x'a fo alu nen, wo mu pin ne ti.» ⁸ Musolu x'e tariya xa bo xaburuda la. I silaninjo napaninba x'e bori xa taxa xibaro fo xarandinjolu nen. ⁹ Wo na in, Isa x'e kunben, x'e xonton xo: «Alu nin sege.» Musolu x'e sodun Isa la, x'e pongi a xoto x'a sinjolu muta x'a batu. ¹⁰ Isa xo i nen xo: «Alu xana sila! Alu taxa a fo n' badinjolu nen xo i xa taxa Galile, i si nte je non.» ¹¹ Xa musolu tu silo to, sorodaso dolu, men tunnu be xaburo korosila, wolu wulita xa dun gallo xono. I xa fen wo fen je, i taxata a bee fo sadaxalasibaxa kuntigolu nen. ¹² Sadaxalasibaxa kuntigolu nin jamano moxobalu taxata i noxo je wo kuwo to. I benta a to xa xalisiba di sorodasolu ma. ¹³ I xo: «Alu taxa a fo moxolu nen xo Isa la xarandinjo lelu nata suwo to x'a fure suuna, x'alu tu sinnoxo la. ¹⁴ Haali nin goferenero xa wo me, ntelu si a lafaamu walasa ku xana ke atelu la.» ¹⁵ Sorodasolu xa xalisi in muta, x'a ke í xo a fota i nen na men. Wo xibaro jennenta Yahudiyalu bata fo xa na a bula bi la. ¹⁶ xarandin tan nin kilinjo taxata Galile, xa yeke kuro to, Isa tun xa men na xumo fo i nen. ¹⁷ I xa Isa je tumo men, i x'e pongi a xoto, x'a batu, bari dolu sikkata. ¹⁸ Isa x'é sodun i la x'a fo i nen xo: «Sinjo bee dita nte ma sanjo to anin duguxulo xan. ¹⁹ Wo le x'a tu, alu taxa siyalu bee ke n' na xarandinjolu ti, alu x'e batise Fa nin Dinxe anin Ni Senunjo toxo la. ²⁰ N' xa fen wo fen waajibiya alu ma, alu i laxaran xo i xa wolu bee labatu. A fele, nte nin alu mu lun wo lun, fo xa taxa duniya wuli.»

MARAKA

1 xibaru Dimanngo damuto fele, men be Ala Dinxe Isa Kirisita la kuwo fola. ² A be safenin kila Esayi la kitaabo xono Isa la kuwo to xo: Ala xo: «¹ fele n na kila ladingo kila í na, xa í la silo toben. ³ Moxo do fetenxanngo si bo wulo xono x'a fo xo: Alu Marigi la silo toben, x'a la sila mesenngolu latilin.» ⁴ Wo na ma, Batiselila Yaya x'é yita wulo xono. A tun be batiselo kela anin xa moxolu waaju xo i x'e xodi i la junubolu la, xa batisen, nin i la junubolu si yaafa. ⁵ Yude maro moxolu nin Yerusaleme gallo moxolu bee tunnu be nala a ma. I tunnu b'e loxan i la junubolu la. A tun be wolu batisela Yuruden bajiyi to. ⁶ Nogomati doroko le tun be Yaya xanna, a la tetositilango tun mu gulo le ti. A la domolo tun mu tonngo nin wulaxonoliyo le ti. ⁷ A la waajulixanngo tun mu pin ne ti xo: «Do be nanin nte xo, wo barako xa bun nte ti. Haali xa n jimi x'a la samatolu julo firin, nte nin wo man xan. ⁸ Nte x'alu batisen jiyi la; ate ken be alu batisela Ni Senunngo le la.» ⁹ Lun do, Isa nata xa bo Galile gallo do to xo Nasareti. Yaya x'a batisen Yuruden bajiyi to. ¹⁰ Isa yeletu bajiyi to, a xa sanxulo je dayelela, xa Ni Senunngo jigito je a xan í xo jenetubanngo. ¹¹ Xumaxanngo do bota sanngo to xo: «Í mu n Dinxe baato le ti; í la kuwo xa di bete nte pen.» ¹² Wo no bee to, Ni Senunngo xa Isa lataxa wulo xono. ¹³ A xa tan naani tili ke wulo xono. Wo waxato, Sentane x'a xotobo. A tun be wulaxonosubolu to. Melekiyo tunnu b'a maakuwolu pipala. ¹⁴ Yaya bulaninngo xo kaso la, Isa nata Galile xa Ala la xibaru Dimanngo waaju. ¹⁵ A tun b'a fola xo: «Waxato dafata; Ala la Mansaya x'é sutiya. Alu tuubi, xa la Xibaru Dimanngo la.» ¹⁶ Isa tun b'e taxamala Galile dalaba senbo fe; wo to, a xa Simon nin a doxoxe Andere je. I tunnu be jalafilo la dalaba to, bawo molila le tunnu mu. ¹⁷ Isa xo i pen xo: «Alu a lo n nofe; n si alu ke moxonjinnalu ti.» ¹⁸ Wo no bee to, i x'e la jalalu bula, x'a lo a nofe. ¹⁹ Isa taxata na dondin tumo men, a xa Yaxuba nin a doxoxe Yaya je. Sebede dinngo le mu wolu ti. I tunnu be siginin i la xulunngo xono, x'e la jalalu toben. ²⁰ Wo no bee to, Isa x'e kili. I x'e fa Sebede nin baaradinngolu tu xulunngo xono, x'a lo Isa nofe. ²¹ Isa nin a la xarandinngolu taxata Kaperenahun gallo to. Yahudiyalu la tofopolunngo, a dunta Alabatusuwo xono xa moxolu laxaran. ²² A la xaranngo x'e dabaro ban, bawo ate tun nte i laxaranna í xo sariya karanmoxolu; katugala barako tun be ate la xaranngo le to. ²³ Wo waxato fan, xe jinneto do tun be i la Alabatusuwo xono.

Wo fetenta xo: ²⁴ «Nasareti Isa, mun x'é si n ma? Í nata n halagi le ba? N x'a lon pere xo í mu Ala la Senunmanngo le ti.» ²⁵ Isa x'a madigaamu xo: «A sukki a la, í xa bo pin xe in to.» ²⁶ Jinno xa xe gijigiji, x'a gijigiji xa feten, wo xo, a woman in bota a to. ²⁷ Moxolu bee dabaro banta. I tunnu be i poxo njininxala xo: «Mun ku mu pin ti? Nin mu xaran kuta ti de! Barako b'a to! A be yanmaruya dila haali jinnolu ma, wolu si a xumaxanngo labatu.» ²⁸ Wo no bee to, Isa toxo bota Galile maro bee xono. ²⁹ Isa boninma Alabatusuwo xono, a nin Yaxuba nin Yaya taxata Simon nin Andere la luwo ma. ³⁰ Wo x'a tara Simon bitanmusu be lanin, xando b'a la. Isa nata doron, i x'a fo a pen. ³¹ A sita a ma, x'a muta a bulo ma, x'a lawuli. Xando fatata a ma. A wulita x'e la haajolu ke. ³² Suwo kuta tumo men, tilo boyo xo, i nata jangarutolu nin jinnetolu bee ti Isa bata. ³³ Gallo moxo bee kamarita a la da la. ³⁴ Isa xa moxo kiika kendeya, jangaru sifa kiika be mennu la. A xa jinne kiika xoyi. A man son jinnolu xa xuma; bawo wolu x'a lon a mu men ti. ³⁵ Wo lun do saxufolela ma, jannin keneya xa bo, Isa wulita xa taxa wulo xono, xa Ala matara. ³⁶ Simon nin a kafupoxolu taxata a njinin. ³⁷ I x'a je tumo men, i xo a pen xo: «Moxo bee be í njinna.» ³⁸ Isa xo i pen xo: «Alan xa taxa senbetogallo dulu to. N xa xan xa wo dulu waaju, bawo n nata wo le xanma.» ³⁹ A taxata Galile maro dula bee, xa waajulo ke i la Alabatusuwolu xono, xa jinnolu xoyi xa bo moxolu to. ⁴⁰ Bagito do x'é sodun Isa la, x'é pongi a xoto, x'é maxasi a pen. A xo: «Nin a xa di í pen, í si sin no xa nte kendeya, anin xa n senuya.» ⁴¹ A hinno xa Isa muta; a woman in x'a bulo tosaba, x'é maxa a la. A xo: «A diyata n pen, senuya!» ⁴² Wo no bee to, bago x'a bula, a senuyata. ⁴³ Wo xo, Isa x'a bula xa taxa, xa kankeri xolenngo la a pen. ⁴⁴ A xo: «Í xana fen fo moxo si pen, bari taxa í yita sadaxalasibaxo la. Kila Musa xa sadaxo men yanmaruya, wo bo, men s'a yita i la xo í senuyata.» ⁴⁵ Bari xe in taxata doron, a xa wo laxali. Wo xanma, Isa tun me dun no gallu to tugun, moxolu bee na x'a je. A tun be tula wulo xono. Moxolu si bo dula bee, xa taxa a tara non.

2 Tili dantalun bita. Wo xo, Isa taxata Kaperenahun tugun. Moxolu x'a me xo a be luwo ma. ² Jamaba kamarita je fo lodula korita sotola luda la. A woman in x'e waaju. ³ Dolu nin xe muruxunte do nata a bata, a be moxo naani bulu. ⁴ Bari i tunnu me a lasi no Isa ma jama kun. I woman innu yeleta bilo kun, x'a

kunte dula do wutu x'a ben Isa ma. I xa xe muruxunte nin a la laranjo lajigi wo dula fe. ⁵ Isa xa wo moxolu la lannaya je tumo men, a xo xe muruxunte nen xo: «N' din, í la junubolu yaafata.» ⁶ Sariya karanmoxo men tunnu sigininjo be non, wolu x'a fo i xonoto xo: ⁷ «Mun na pin xe in be xumala ten, xa Ala toxo tija? Jon si junubolu yaafa no nin Ala kilin nte?» ⁸ Isa x'e la miiriya lon wo no bee to, a woman in xo i pen xo: «Mun na alu be pin miiriya in tala alu jusukunjo la?» ⁹ X'a fo muruxunte nen xo: «Í la junubolu yaafata,» walla: «Wuli, í x'é la laranjo ta, x'é taxama.» Wo xuma fulo to joman fo xa di? ¹⁰ Bari n' b'a fe le alu x'a lon xo sinjo be Moxo Dinxe nen xa junubolu yaafa duguxulo xan». Wo to, a xo muruxunte nen xo: ¹¹ «N' x'é yanmaru, wuli, í x'é la laranjo ta, xa taxa í bata!» ¹² Wo no bee to, a wulita x'a la laranjo ta, xa bo bee pala. Wo xa moxo bee dabaro ban, x'e bula barako bulala Ala nen. I xo: «Ntelu man nin noxon je abada.» ¹³ Isa x'é koppa xa taxa dalaba da la tugun. Jamaba tunnu be nala a bata, a si wolu laxaran. ¹⁴ A tanbito xa Alife dinxe Lewi je siginin sagallemutadula. Isa xo a pen xo: «A lo n' nofe.» A wulita x'a lo a nofe. ¹⁵ Xa Isa tu domolo la Lewi bata, sagallemutala kiika nin kujaxukela xotelu nata kafu a nin a la xarandinjolu ma, xa domolo ke. Bawo wo moxo sifa tunnu xa sa a nofe. ¹⁶ Farisiyalu la sariya karanmoxo dolu xa Isa nin sagallemutalalu nin kujaxukelalu je domolo la tumo men, i xo Isa la xarandinjolu nen xo: «Mun na a be sonna a nin sagallemutalalu nin kujaxukelalu xa domolo ke i noxo fe?» ¹⁷ Isa xa wo me tumo men, a x'e jaabi xo: «Moxo kendolu maaku nte dogotooro la; jangaruto lelu maakuwo b'a la. Moxo mennu be i fannu jaatenin moxo tilinninjo ti, nte man na wolu kili, nte nata junubeto lelu kili, x'e kisi.» ¹⁸ Batiselila Yaya la xarandinjolu nin Farisiyalu tunnu be sunna. Moxo dolu nata Isa njinixa xo: «Batiselila Yaya la xarandinjolu nin Farisiyalu talu be sunna; mun na ite la xarandinjolu nte sunna?» ¹⁹ Isa x'e jaabi xo: «Maapoxe topxoxolu si sun no ba x'e nin maapoxe tu i noxo fe? Abada, wo me ke no. X'e tu i noxo fe, i me sun.» ²⁰ Bari lunjo si na, maapoxe si buusi i la; wo lunjo, i si sun.» ²¹ Isa xo du xo: «Moxo si me faanuxono kuto betere faanu xoto ma. Nin wo keta, wo kuto si xotomanjo saba, x'a fara fo faraja jaxu. ²² Moxo me dolo kuto ke sumalle xotolu to. Nin wo keta, dolo kumuto si sumallolu te; bono si ke dolo nin sumallolu bee to. Dolo kuto kedula mu sumalle kuto lelu ti.» ²³ Tofopolunjo do, Isa xa alixaamafuuto dolu tofara. A la xarandinjolu xa silasenbetokunjo dolu tege. ²⁴ Wo to, Farisiyalu xo Isa nen xo: «A fele, men nte dagenin tofopolunjo, mun na i be wo kela?» ²⁵ Isa x'e jaabi xo: «Wo tumo, Dawuda xa men ke folofolo, alu bada man wo xaran ba, tumo men, xonxo x'a nin a nofemoxolu muta, x'a tara domolifen tun nte i bulu? ²⁶ Xonxo x'a nin a nofemoxolu muta tumo men, a dun-

ta Ala la bunjo xono, sadaxalasibaxa kuntigiba Abiyatari tilo. Buuro mennu be dila Ala ma sadaxo ti, a xa wolu do domo, xa do di a nofemoxo dulu ma. Wolu domo be dagenin sadaxalasibaxolu doron nelu ma.» ²⁷ Wo xo, a xo i pen xo: «Tofopolunjo keta moxo le nen; bari moxo man ke tofopolunjo nen. ²⁸ Wo xanma, tofopolunjo fan tigo mu Moxo Dinxe le ti.»

3 Lun do, Isa dunta Alabatusuwo xono tugun. Xe do tun be je, a bulo be sanin. ² Moxo mennu be je, wolu tunnu be Isa korosinin. Nin a xa wo xe kendeya tofopolunjo, i si a jalagi. ³ Isa xo xe bulu saninjo nen xo: «Wuli, í x'é lo jama temo to.» ⁴ A xo a korosibaxolu nen xo: «A be dagenin tofopolunjo xa numa le ke ba, walla jaxumanjo? Xa moxo kisi walla x'a faja?» Bari moxo man soto x'a jaabi. ⁵ Isa natosiisininjo i la sondonmexoleya bulu, a diminta, x'a na laxalan i to. A xo xe nen xo: «Í bulo tosaba!» A x'a bulo tosaba. A woman in bulo kendeyata. ⁶ Wo keninma, Farisiyalu bota Alabatusuwo xono. Wo no bee to, i nin Herode la moxolu x'e noxo je Isa faxana xan. ⁷ Isa nin a la xarandinjolu bota non, xa taxa Galile dalaba da la. Jamaba x'a lo a nofe, xa bo Galile nin Yude marolu to, ⁸ anin Yerusaleme nin Idume nin jamano mennu be Yuruden ba xofe, nin Tire nin Sidon gallolu lamininjo to. Wo moxo bee nata Isa ma, bawo i x'a la kawakuwolu xibaro me. ⁹ Isa xo a la xarandinjolu nen xo i xa xulunjo do bula a pen, walasa jama xana a degu. ¹⁰ Jangarutolu bee gidita a xan, xo i b'e maxala a la; katugala a tun be moxo kiika kendeyala. ¹¹ Nin jinnetolu x'a je, i s'i boyi a xoto, xa feten xo: «Í mu Ala Dinxe le ti.» ¹² Bari a x'a xoleya bete i ma, xo i xana a tu, moxolu xa ate lon. ¹³ Wo xo, Isa yeleta kuro to, x'a sagolamoxolu kili. Wolu yeleta a bata je. ¹⁴ A xa tan nin fula sugandi i to, mennu si tu a nofe, anin xa taxa waajulo ke. ¹⁵ A xa sinjo di i ma, xa jinnolu xoyi, xa bo moxolu to. ¹⁶ A xa tan nin fulo mennu sugandi, wolu fele: Simon, a xa wo kili xo Piyere. ¹⁷ Sebede dinxelu: Yaxuba nin a doxoxe Yaya. A xa wolu kili xo Bowaneregesi. Wo xoto xo: I ju-so xa fati í xo sanjifetenjo. ¹⁸ Andere, Filipe, Baratelemi, Macu, Tomasi, Alife dinxe Yaxuba, Tade, Simon Seloti, ¹⁹ anin Yudasí Isikariyoti, men xa Isa janfa. ²⁰ Isa nata luwo ma; jamaba kamarita a ma tugun, fo a nin a la xarandinjolu korita domoli nasotola. ²¹ A la lumamoxolu xa wo me tumo men, wolu nata xo i b'a mutala. Katugala i xo xo a hakilo bota a no to. ²² Sariya karanmoxo mennu bota Yerusaleme, wolu x'a fo Isa nen xo Bilisa b'a to, xo a be jinnolu xoyila xa bo moxolu to jinnolu la kuntigo le barako la. ²³ Isa xa wolu kili xa taliyo la i pen, a xo: «Sentane si Sentane xoyi na di? ²⁴ Nin mansaya do boxo kilinjo wulita a boxo do xanma, wo mansaya si te. ²⁵ Nin luwo do boxo kilinjo wulita a boxo do xanma, wo luwo si te. ²⁶ Nin Sentane be a fan kelela, anin nin a wulita a fan xanma, a la mansaya me tu siginin, bari a si ban. ²⁷ «Moxo si me a no xa dun

xe barakema la luwo xono, x'a bulufenjolu bee ko, x'a tara a man wo xe barakema siti folo. Nin a xa wo ke le mu, a si a la luwo te. ²⁸ Tonja la, n' b'a fola alu pen xo moxolu la junubolu nin i la Ala toxotipakuwolu bee si yaafa. ²⁹ Bari moxo men je Ni Senunjo toxo tjna, Ala me yaafa wo ma abada. Wo junubo si tu a tigo xan kadawu.» ³⁰ Isa xa wo xumo fo, bawo i xo le xo jinno b'a to. ³¹ Isa na nin a badinxelu nata x'e lo banto to, xa moxo bula xa taxa Isa kili. ³² Jama tun be siginin, x'a laminin. A fota a pen xo a na nin a badinxelu b'a manjinxala banto to. ³³ Isa x'e jaabi, a xo: «Jon mu nte na ti; jon nin jon mu nte badinxelu ti?» ³⁴ Wo xo, a x'a lamininjo moxolu mafele, a xo: «Nte na nin n' badinxelu lelu fele. ³⁵ Moxo men be Ala sago kela, wo le mu nte badinxelu nin n' badinmuso nin n' na ti.»

4 Isa x'a damuta xa moxolu laxaran dalaba da la tungan. Jamaba kamarita je fo a dunta xulunjo do xono x'e sigi. Xulunjo tun be jiyo xan, jama tun be dalaba da la. ² A x'e laxaran fen kiika la taliyolu to. A la laxaranno xono a x'a fo i pen xo: ³ «Alu n' name: Senekela do bota xa taxa sarilo ke. ⁴ X'a tu sarilo la, keso dolu butunta silasenbo fe. Xonolu nata wolu sokki. ⁵ Dolu butunta kurumadulalu, banxuba nte dula men-nu. Wolu falinta tariya, katugala i man bula banxuba to. ⁶ Tilo xuniyata tumo men, wolu fasanfasanta, xa ja lillintanja bulu. ⁷ Keso dolu butunta njaninjo to, njaninjo bunjata xa wolu muta, fo i korita wulula. ⁸ Keso dolu butunta duguxulu beto to; wolu falinta, xa janja, xa wulu. Kunjo dolu xa tan saba kese ke, dolu xa tan wooro ke, dolu xa keme ke.» ⁹ Wo xo, Isa xo: «Tulo be men ma xa lamelo ke, wo xa lamelo ke!» ¹⁰ Isa x'e soobo jama la waxato men, a senbetomoxolu nin a la xarandin tan nin fulo x'a njinxa taliyolu xoto la. ¹¹ A x'e jaabi xo: «Lonjo dita ate lelu ma, xa Ala la Mansaya gullo soto. Bari moxo tolu, fen bee be fola wolu pen taliyo le to, ¹² walasa: "i felelito xana jeli ke, i lamelito xana fen faamu; i xana taxa tuubi, xa Ala la yaafo soto." » ¹³ Wo xo, Isa xo i pen xo: «Alu man nin tali in xoto lon ba? Alu dunnu si tali tolu xoto lon na di?» ¹⁴ A xo: «Senekela, wo be le i xo moxo men be Ala la xumo sarila. ¹⁵ Keso mennu butunta silasenbo fe, wo xoto fele: Moxo do lelu mu, mennu xa Ala la xumo lame, bari wo no bee to Sentane si na wolu ma, xa xumo bo i xono. ¹⁶ Wo na ma, kurumadulalu keta moxo do lelu ti, nin wolu xa Ala la xumo lame, wo no bee to, i s'a muta, xa nana a la. ¹⁷ Bari wo xumo me me i xono, bawo lilli nte i xoto. I la lannaya mu waxatindin ne ti. Nin xoleya nata i ma, walla nin i xa tooro soto Ala la xumo nofe doron, i si lannaya bula. ¹⁸ Njanintotalu, wolu mu moxo do lelu ti, mennu xa Ala la xumo lame, ¹⁹ bari duniya to hanmekuwolu anin naafulo jarabo si i soto. Fenjo bee loxo s'i muta. Wo si ke sabaabu ti, xa Ala la xumo naxasi, fo a me nafa dun. ²⁰ Bari keso mennu butunta duguxulu beto to, wolu mu moxo do lelu ti, mennu be

Ala la xumo lamela, x'a muta, xa dinjo ke i xo lannenjo. Kunjo dolu xa kese tan saba ke, dolu tan wooro, dolu keme.» ²¹ Wo xo, Isa xo i pen tugun xo: «Jon si lanpo lamana xa miranjo do labuti a kunna, walla x'a sigi bariyo xoto? I me a sigi a sigilanno le xan ba? ²² Bawo fusi nte gullo to nin a me wunjan. Fusi nte dugunin nin a me bo keno xan. ²³ Tulu be men ma xa lamelo ke, wo xa lamelo ke.» ²⁴ Isa xo i pen tugun xo: «Alu be men mela, alu i hakilo tu wo la. Alu be tolu ta sumanna sumannilanno men na, alu ta si suman wo la, anin, do si kafu alu ta ma. ²⁵ Bawo fen be men bulu, do si di wo ma; bari fen nte men bulu, haali dondinjo men b'a bulu, wo si muta a la.» ²⁶ Isa xo tugun xo: «Ala la Mansaya be le i xo xe do, men xa lannifenjo do bula duguxulu xoto. ²⁷ A be sinnoxola, xa wuli: Su fara tili xan, wo lannifenjo si falin, xa bunja, x'a tara ate man wo na lon. ²⁸ Duguxulu fan folo si lannifenjo lafalin, wo xo, a si kunjo wulu, kunjo si kese, xa mo. ²⁹ Nin a mota, senekela si woroto ta, x'a xa, katugala senefenadara sita.» ³⁰ Isa xo tugun xo: «Alan si Ala la Mansaya la mun ma? N si a na fo tali joman to? ³¹ A be le i xo mutaradekeso. Nin i be a lanna, a le xa doxo duniya lannifenjolu bee ti. ³² Bari a lanjo xo, a si bo, xa bunja xa tanbi naaxoxonofenjolu bee xan. A bulolu si bunja, fo xonolu si naxanjo la a bulolu dubenjo la.» ³³ Isa xa moxolu laxaran wo noxon tali kiika to. A x'e laxaran taliyolu to, i si mennu faamu. ³⁴ A tun me fusi fo i pen nin taliyolu to nte. Bari nin a nin a la xarandinjo fereta, a si wo taliyolu xoto fo wolu pen. ³⁵ Wo lunjo wura la, Isa xo a la xarandinjo pen xo: «Alan xa taxa dalaba boxo do.» ³⁶ Xarandinjo bota jama to; Isa tun be xulunjo men xono, i nin a taxata wo xulunjo xono. I nin xulunjo do xotelu taxata i noxo la. ³⁷ I taxato, fonoba wulita, fanfe xa jiyo ke xulunjo xono, fo a taran si dun. ³⁸ Wo x'a tara Isa be kunxotodunnin xulunjo xumafanjo la, a be sinnoxonin. I x'a lakuni, x'a fo a pen xo: «Karanmoxo, n je tu jiyo to de! I la ku nte wo to ba?» ³⁹ A wulita xa xuma xolen fonjo pen, x'a fo jiyo pen xo: «Sabari, i x'e mala.» Fonjo lota; jiyo x'e mala lep. ⁴⁰ Isa xo i pen xo: «Mun na alu be silala ten; haalibi alu man la nte la ba?» ⁴¹ I silata fo xa xotobo. I xo i noxo pen xo: «Nin xe in dun mu jon ti, nin haali fonjo nin jiyo b'a xumaxanjo labatula?»

5 Isa nin a la xarandinjo sita dalaba boxo do, Gadarangolu la jamano xan. ² A jigita xa bo xulunjo xono doron, xe jinneto do bota xaburufe to, x'a kunben. ³ Wo daaxadula tun mu xaburufe to le ti; moxo si tun me a siti no, haali nin a keta negejoloxo le ti. ⁴ Bawo nego tun keta a la xotonin; anin a tun sitita joloxolu la. Bari a xa wo joloxolu totege, xa nego tokutun. Moxo si tun me a masinsin no. ⁵ Su fara tili xan, a tun be xaburufe nin kuro lelu to, xa feten, x'a fan joogi kurolo la. ⁶ A xa Isa je dulajanno tumo men, a x'e bori, xa ben a ma, x'e pongi a xoto. ⁷ A kuleta xo: «Ala Xo-

totaninba Dinxe Isa, mun x'é si n ma? N b'é tarala, a ke Ala pen í xana n tooro.»⁸ A xa wo fo, bawo Isa tun xo: «Jinno, bo nin xe in to.»⁹ Isa x'a njinxa xo: «Í toxondi?» A x'a jaabi xo: «N toxo xo Jamaba; bawo n kiika le mu.»¹⁰ A xa Isa matara na bee do ma, xo a xana jinnolu xoyi x'e labo wo jamano xono.¹¹ Wo x'a tara legooreba tun be domolo la kuru senbo to non.¹² Jinnolu xa Isa matara, xo a x'e bula i xa dun wo lelu to.¹³ Isa x'e yanmaru wo kela. Wo keninma, jinnolu bota xe to, xa dun legoore in to. Legoore bee gidita x'e parati kurumalanjo la, xa jigi dalaba to. Le in tunnu si wulu fula bo; i bee tuta dalaba to.¹⁴ Lenegaanilalu x'e bori, xa taxa. Men keta, i xa wo laxali gallo nin senesuwolu la. Moxolu bota, xa taxa wo kuwo mafele.¹⁵ I nata Isa bata, xa xe je, jinne kiika tun be men to, a be siginin, faanolu b'a ma, a hakilo dafaninjo. Wo to, moxolu silata.¹⁶ Mennu xa wo kuwolu bee je, wolu taxata wo laxali moxolu pen: Jinnolu bota xe to na men, anin i taxata dun lelu to na men.¹⁷ Moxolu xa wo xumo me tumo men, i xa Isa matara xo a xa bo i la jamano xono.¹⁸ Isa dunto xulunjo xono, jinneto xoto x'a matara nin a si tu a bata.¹⁹ Isa man son wo ma, bari a xo a pen xo: «Taxa í bata. Marigi xa men ke í pen, anin a hinnata í la na men, í xa wo palu fo í la moxolu pen.»²⁰ Wo to, xe taxata. Isa xa fen wo fen ke a pen, a xa wo laxali Dekapole maro xono. Moxo wo moxo x'a lame, wolu bee dabaro banta.²¹ Isa xa dalaba tege tugun. A sita danjo la tumo men, jamaba kamarita a ma je.²² X'a tu non, Alabatusuwo kuntigo do nata. A toxo xo Jarusi. A xa Isa je tumo men, a x'é boyi a xoto,²³ x'a matara na bee do ma xo: «Nte dinmusundinjo be njinin xa sa. Í me na í bulo la a xan ba, nin a si kisi, xa nilamaya?»²⁴ Isa nin a taxata. Jamaba x'a lo a nofe fo i si a digi taxanin.²⁵ Wo x'a tara muso do be je, laada banbalo tun be wo la, kabirin san tan nin fula.²⁶ A toorota jaaralikela kiika bulu; a bota a kunfenjo bee ti, bari a man fisiya. A la jangaro fan tun be jaxuyala le xa taxa a fe.²⁷ A xa Isa toxome tumo men, a nata dun a xo ma jama to, x'é maxa Isa la doroko la.²⁸ Bawo a tun be í son a xonoto xo: «Nin haali n maxata a la doroko la, n si kendeya.»²⁹ Wo no bee to, a la jelo lota. A x'a lon a balo to du, xo a la jangaro kendeyata.³⁰ Wo dula bee, Isa x'a lon a fan ma xo sinjo do bota a to. A woman in x'é yeleva jama to, x'a fo xo: «Jon x'é maxa nte la doroko la?»³¹ A la xarandinjolu xo: «Í na be jama la í digila boxo bee! Í dun si a fo na di xo jon maxata í la?»³² Bari a tun be a senbo mafelela fo a si wo tigo je.³³ Muso silata fo a si jarajara; kuwo men keta a pen, a xa wo lon. A woman in nata í boyi Isa xoto xa tonpa bee fo a pen.³⁴ Isa xo a pen xo: «N dinmusu, í la lannaya x'é kisi. Taxa heero to; í nin kendeya xa taxa.»³⁵ Xa Isa tu wo xumo la, moxo dolu nata xa bo Alabatusuwo kuntigo bata. I xo a pen xo: «Í dinmuso sata. Mun na í be karanmoxo segela tugun?»³⁶ Bari Isa man wo xumolu

jaate; wo to, a xo Alabatusuwo kuntigo pen xo: «Í xana sila! Lannaya ke doron!»³⁷ A man son moxo xotelu x'a dandan non, fo Piyere nin Yaxuba anin Yaxuba doxoxe Yaya.³⁸ I sita Alabatusuwo kuntigo la luwo ma tumo men, Isa x'a je xo jama be sonxola. Kiika tun be xasila, xa xuure.³⁹ Isa dunta, a xo i pen xo: «Mun na alu be sonxola, xa xasi? Dindingjo man sa. A be sinnoxonin ne.»⁴⁰ Bari, i jeleta a ma. Wo to, a x'e bee labo banto to, fo dindingjo na nin a fa, anin a dandanpoxolu. A dunta dindingjo kunma.⁴¹ A x'a muta a bulo ma, x'a fo a pen i la xanjo to xo: «Talita kume». Wo xoto xo: «Dindingjo, n b'a fola í pen xo: Wuli!»⁴² Wo no bee to, dindingjo wulita, x'é taxama. Wo x'a tara a siyo tun be san tan nin fula la. Wo x'e dabaro ban bete.⁴³ Isa x'a fo, x'a xoleya bete i ma, xo i xana wo fo moxo pen. Wo xo, a xo i pen xo i xa domolo di xarafandin in ma.

6 Wo xo, Isa bota non, a nin a la xarandinjolu taxata a fasuwo la.² Tofopolunjo, Isa x'a damuta xa moxolu laxaran Alabatusuwo xono. A lamebaxolu kiika dabaro banta. Wolu tunnu be i son xo: «A xa nin ku innu bo dula joman? Mun hakilitigiya dita a ma nin ti? A be nin kawaku innu kela na di?»³ Mariyama dinxe yirileesula nte nin ti ba? A badinxelu nte Yaxuba nin Sose nin Yude anin Simon ne ti ba? A badinmusolu nte n kun jan ba?» Wo kuwolu keta sabaabu ti i man la a la.⁴ Isa xo i pen xo: «Kila me doxoya dula, nin a fasuwo la nte, anin a badinjolu to, anin a la luwo ma.»⁵ A man sin no xa kawaku xote ke non fo don doron, x'a bulolu la jangaruto dantalu xan, x'e kendeya.⁶ I la lannayabaliya x'a dabaro ban. Isa taxata senbefegallolu bee to, xa moxolu laxaran.⁷ Wo to, a x'a la xarandin tan nin fulo kili. A x'a damuta x'e fula fula ki, xa sinjo di i ma jinnolu xan x'e xoyi.⁸ A xa nin yanmaru innu di i ma xo: «Alu xana fusi ta taxamo xanma, fo guma kilin doron. Alu xana domolifen ta, walla fudo. Alu xana xalisi bu-la i kun.⁹ Alu samatolu dun, bari alu xana doroke fula ta.»¹⁰ Isa xo i pen du xo: «Alu je jigi lu wo lu xono, alu tu non fo alu taxatumo xa si.¹¹ Nin dula do moxolu man alu jigiyi, anin nin i man alu lame, alu bo non, x'alu sinnabanxo konkon je. Wo si ke lasobili ti i pen.»¹² Wo xo, xarandinjolu taxata, xa waajulo ke xo moxo bee xa xan xa tuubi.¹³ I xa jinnolu xoyi xa bo moxo kika to, xa tulo mu jangaruto kiika ma, xa Ala matara i pen, x'e lakendeya.¹⁴ Mansaxe Herode xa Isa toxo me, katugu a toxo bota dula bee. Dolu tunnu b'a fola xo: «Batiselila Yaya kunita xa bo furelu to. Wo le x'a tu, a si kawakuwolu ke no.»¹⁵ Dolu xo: «Kila Eli le mu.» Do xote tunnu b'a fola xo: «Kila do le mu, men be í xo folo kilalu to kilin.»¹⁶ Herode xa wo me tumo men, a xo: «Nte xa Yaya men kunjo tege, wo le mu. A kunita xa bo furelu to.»¹⁷ Awa, mansaxe Herode tun x'a latege xo Yaya xa muta, x'a siti, x'a bula kaso la. A xa wo ke Herodiya la kuwo le xanma. Herode tun x'a badinxe Filipe musu Herodiya muta a la.¹⁸ Yaya tun x'a fo a pen

xo: «A nte dagenin í ma, xa í badinxé musu ta x'a nilama tu.»¹⁹ Wo xumo nofe, Herodiya diminta Yaya xanma; a tun b'a fe x'a faxa.²⁰ Bari a tun me wo no, katugu Herode tun be silala Yaya ꞓa. A x'a lon xo Yaya mu moxo tilinningo nin moxo senunjo le ti. A x'a lakanta. Nin a xa Yaya lame, tuma dolu, a hakilo si ꞓaxami; haali wo, a lamelo tun xa di a ꞓen.²¹ Bari, lun benningo do nata Herodiya ꞓen. Herode bangelunjo sanyelema do ma, a xa tulunba toben a la maro ꞓamoxolu nin a la sorodasi kuntigolu nin Galile moxobalu ꞓen.²² I tunnu be bunjo men xono, Herodiya dinmuso dunta non, x'é don. A la kuwo diyata Herode nin a domolijoxolu ꞓen. Mansaxe xo xarafandinjo ꞓen xo: «Í be men fe, wo fo, n' si wo di í ma.»²³ A x'é xali xo: «Í be fen wo fen fe, wo fo, n' si wo di í ma; haali nin n' na mansaya boxo kilinjo le mu.»²⁴ Xarafandin in bota, xa taxa a fo a na ꞓen xo: «N' xa mun fo?» A na x'a jaabi xo: «A fo xo í be Batiselila Yaya kunxulo le fe.»²⁵ A x'é koppa tariya xa dun mansaxe bata, x'a fo a ꞓen xo: «N' b'a fe í xa Batiselila Yaya kunxulo di n' ma miranjo do la saasa.»²⁶ Mansaxe nitokuwata, bari a la xalixanjo nin a domolijoxolu koso, a man son x'é ban wo ma.²⁷ Wo dula bee, a xa garado do ki, xo a xa na Batiselila Yaya kunxulo ti. Garado taxata Yaya kunxulo tege kasobunjo xono.²⁸ A nata kunxulo di xarafandinjo ma miranjo do la. Wo du taxata a di a na ma.²⁹ Yaya la xarandinjolu xa wo me tumo men, i nata a fure ta, x'a lasi.³⁰ Kiladinjolu kamari ta Isa ma tugun. I xa fen fen ke, anin i xa xaranjo mennu ke, i xa wolu bee ꞓa fo Isa ꞓen.³¹ Nabaxo nin taxabaxo tun xa sa, fo a nin a la xarandinjolu korita domolo kela. Wo to, Isa xo i ꞓen xo: «Alu na, alan doronnu xa taxa i danna wulo xono, walasa alu x'e tofojo.»³² I dunta xulunjo xono, xa taxa wulo xono, i danna.³³ Moxo kiika x'e taxato je, x'a lon xo i lelu mu. Moxolu bota i sinjo la gallolu bee to, x'e saawa i taxadula.³⁴ Isa bota xulunjo xono tumo men, a xa jamaba je. I hinno x'a muta, bawo i tunnu be í xo negaanila nte saaxo mennu ma. Wo to, a x'e laxaran fen kiika la.³⁵ Tilo jiginiima, a la xarandinjolu x'e sodun a la, i xo a ꞓen xo: «N be wulo le xono, tilo dun jigita.»³⁶ Jama labula walasa i xa taxa senesuwolu nin senbetogallolu to, nin i si domolifenjo do san, x'a domo.»³⁷ Bari Isa x'e jaabi xo: «Alu fannu xa domolo di i ma!» I xo a ꞓen xo: «Ntelu xa taxa depe xaaliso keme fula le san buuro la ba, xa wo di i ma i x'a domo?»³⁸ A x'e njinxo xo buurukun jelu b'e bulu, xo i xa taxa a mafele. I xa je mafele tumo men, i xo: «Buurukun luulu anin negexala fula.»³⁹ Isa xa yanmaro di i ma xo i xa jama tala tala, x'e lasigi bin keranjo to.⁴⁰ I x'e sigi keme keme, tan luulu luulu.⁴¹ Isa xa buurukun luulo anin negexala fulo ta, x'a ꞓa xotota sanjo to, xa barako bu la Ala ꞓen, xa buurolo tokutun. Wo xo, a x'e di xarandinjolu ma xo i x'e tala jama te. I xa negexala fulo du ta-

la jama bee te.⁴² I bee xa domolo ke x'e fa.⁴³ Xarandinjolu xa sinsi tan nin fula fa buuro tokutunjo nin negetolu la.⁴⁴ Moxo haxxo men tun xa wo buurolo domo, wo mu wulu luulu xeba le ti.⁴⁵ Wo no bee to, Isa x'a la xarandinjolu diyakuwa xo i xa dun xulunjo xono, xa bula a ꞓa, xa taxa dalaba boxo do, Betesayida gallo mafan, jannin a be jama labulala.⁴⁶ A nin i talata tumo men, a taxata kuro to, xa Ala matara.⁴⁷ Suwo kuta, x'a tara xulunjo be dalaba temo to. Wo x'a tara Isa tun kilin be tinto la.⁴⁸ A x'a je xo jaxalo tun xa xole xarandinjolu bulu, bawo i nin fojo tun be benna. Saxuyelenda la, Isa tun be í taxamala dalaba xan, taxanin a la xarandinjolu ma. A tun be njin xa tanbi i la.⁴⁹ Xarandinjolu x'a je í taxamala dalaba xan tumo men, a keta i ꞓen xo fure do le x'é yita i la. I xuureta,⁵⁰ bawo i bee ꞓa x'a je; i silata fo xa danmatanbi. Bari wo no bee to, Isa xumata i ꞓen xo: «Alu i ja sigi, nte le mu. Alu xana sila!»⁵¹ A dunta i kun xulunjo xono; wo xo, fojo lota. Xarandinjolu feero nin i dabaro bee banta.⁵² I tunnu man a lon haalibi, Isa mu moxo men ti. A xa kawakuwo men ke buuro kuwo to, i tunnu man wo faamu folo; bawo i jusukunjo tun xa xole.⁵³ Isa nin a la xarandinjolu xa dalaba tege, xa si tinto la, Gensareti jamano to, xa i la xulunjo lo non.⁵⁴ Kabirin i bota xulunjo xono, moxolu xa Isa mategeninjo lon.⁵⁵ Moxolu xa jamano bee bori, xa ke a ma xa na jangarutolu nin i la laranjolu ti, i je a toxome dula wo dula.⁵⁶ A taxata jan wo jan, gallundin nin galluba anin senesu, i xa jangarutolu lala beralu to. I x'a matara xo a x'é lo, wolu x'e maxa a la dorokebulo doron na. Moxo wo moxo x'é maxa a la, wolu bee kendeyata.

7 Sariya karanmoxo dolu bota Yerusaleme, i nin Farisiyalu x'e ꞓoxo kamari Isa bata.² I x'a korosi, xo Isa la xarandinjo dolu be domolo kela, x'a tara, i bulolu be noxonin, wo xoto, xo i man i bulolu ku í xo Yahudiyalu la laado x'a fo ꞓa men.³ Farisiyalu nin Yahudiyalu bee tunnu me domolo ke nin i man i bulolu ku bete, í xo i la moxobalu la laado x'a fo ꞓa men.⁴ Nin i bota saxa to, i me domolo ke, fo i x'e maku folo. Laada kiika xote tunnu b'e bulu i be mennu kela: Jitafe tokuwolu nin daxa tokuwolu nin mirantokuwolu, mennu be daranin silo la, anin xaraxa kuwolu.⁵ Farisiyalu nin sariya karanmoxolu xa Isa njinxo xo: «Mun na í la xarandinjolu nte moxobalu la laadolu latimmela? Mun na i bulolu noxoninjo be domolo kela?»⁶ Isa x'e jaabi xo: «Kila Esayi xa kilaya men ke alu la kuwo to, xo alu mu fulankafo lelu ti, wo mu tonja le ti. A x'a safe xo Ala xo: "Nin moxo innu be nte bunpala i da le to gansan, bari i jusukunjo nin nte xa jan i ꞓoxo la." I be n' batula fu le. Katugu i be moxolu xaranna hadamandinjolu la sariya daraninjo lelu la.»⁸ Alu xa Ala la sariya bula xa hadamandinjolu la laadolu labatu.»⁹ A xo i ꞓen du xo: «Alu xa feere ke x'é ban Ala la sariya to, alu la laadolu ꞓen.¹⁰ Musa x'a fo xo: "Í na nin í fa bunja." A

xo du xo: "Moxo wo moxo je xuma jaxo fo a fa walla a na ma, wo tigo xa xan xa faxa." ¹¹ Bari atelu xo, xo nin men xo a fa pen walla a na pen xo: "Ní tun xa xan xa naafulo men di alu ma, wo keta koroban ti. Wo xoto: Ní x'a di Ala ma." Alu xo, haali nin wo tigi man fusi di a fa ma, walla a na ma tugun, wo nte baasi ti. ¹² Wo to, alu keta sabaabu ti, fo wo tigi me a fa walla a na deema tugun. ¹³ Wo na ma, alu xa Ala la xumo ke fuwo ti alu la laadolu pen. Alu be wo kuwo noxon kiika kela.» ¹⁴ Wo xo, Isa xa jama kamari a bata tugun. A xo: «Alu bee xa ní name, xa faamuyalo ke. ¹⁵ Moxo be fen wo fen domola, wo nte a noxola, bari men be bola moxo jusukunḡo la, wo le b'a noxola. [¹⁶ Nin tulo be moxo men ma xa lamelo ke, wo xa lamelo ke!]» ¹⁷ Isa bota jama to tumo men, xa dun luwo xono, a la xarandinḡolu x'a ḡninxa wo xumo xoto la. ¹⁸ A xo i pen xo: «Ate dulu, hakili nte alu la ba? Alu man a lon ba, xo fen wo fen be dunna moxo xono, xo wo nte a noxola? ¹⁹ Katugu men be dunna a xono, wo nte dunna a jusukunḡo la; a be taxala a xono le to, wo xo, a si bo a xofe.» Wo xumo xono, Isa x'a yita, xo domolifenḡo bee xa senu. ²⁰ A xo: «Men be bola moxo xono, wo le b'a noxola. ²¹ Katugu moxo xono, a jusukunḡo la, miiriya jaxolu be je: Kunoxoninko, suḡpalo, moxofaxo, ²² fuyarḡa, wasabaliya, jaxuya, nanbaranteya, kuharamuninko, ḡangoya, toxotinalo, fanbunḡa, hakilintarḡa. ²³ Nin fen laxasa innu bee le be bola moxo xono, x'a noxo.» ²⁴ Isa bota non, xa taxa Tire lamininḡo to. A dunta luwo do ma; a tun nte a fe moxo x'a lon xo a be non. Bari a korita tula dugunin. ²⁵ Muso do tun be non, jinne jangaro be a dinmuso la. A xa Isa toxo me tumo men, a nata í boyi a xoto. ²⁶ Wo muso tun nte Yahudiya ti; a wuluta Sirofenisi jamano xan. A xa Isa matara xo a xa jinno xoyi, x'a labo a dinmuso to. ²⁷ Isa xa pin sanda in fo a pen xo: «A tu folo, dindinḡolu xa domolo ke x'e fa; bawo a man pin xa dindinḡolu la domolo ta, x'a la wulundinḡolu xoto.» ²⁸ Muso xo: «Marigi, wo mu tonḡa le ti, bari mennu be butunna dindinḡolu xoto, wulundinḡolu si wolu domo.» ²⁹ Isa x'a jaabi xo: «Í la pin xuma in xanma, taxa: Jinno bota í dinmuso to.» ³⁰ Muso x'é koppa a bata ma, x'a dinḡo tara lanin bariyo to: Wo x'a tara jinno bota a to. ³¹ Isa bota Tire jamano xan, xa tanbi Sidon gallo fe, xa Dekapole maro tokutun, xa na Galile dalaba da la. ³² I nata tuluxutiyo do ti a bata; a nenḡo du tun nte tofirinnin xumo to. I xa Isa matara xo nin a si a bulolu la a xan. ³³ Isa x'a muta, a nin a xa taxa i danna, x'e tosoobo bete jama la, x'a buluxonondinḡolu sukki a tulolu la. A xa dajiyo maxa a nenḡo la, ³⁴ wo xo, a x'a palu xotota sanḡo to, xa nilakili kunba ke. A xo: «Efata.» Wo xoto xo: «Alu dayele.» ³⁵ Wo no bee to, a tulolu dayeleta; a nenḡo tofirinta, a xumata a ḡa ma. ³⁶ Isa x'a fo, x'a xoleya bete i ma, xo i xana wo fo moxo si pen. Bari wo bee xan, i x'a junjun dula bee to. ³⁷ I tunnu dabaro banta fo xa danmatanbi. I xo: «A la

ku keta bee xa bete; haali a be tuluxutiyo dulu tulolu dayelela, xa muumuwolu laxuma.»

8 Wo waxati kilinḡo, jamaba kamarita tugun. Domolifen tun nte i bulu. Wo to, Isa x'a la xarandinḡolu kili, a xo i pen xo: ² «Nin moxo innu hinno be nte la. I tili sabo le mu bi ti, i be nte nofe, i man domolike. ³ Nin ní x'e domolibalo bula i xa taxa i bata, i si dasa silo to, bawo dolu bodula xa jan.» ⁴ A la xarandinḡolu x'a jaabi xo: «Alan si domolo bo min pin wula in xono, men si pinnu fa?» ⁵ Isa x'e ḡninxa xo: «Buurukun jelu be alu bulu?» I xo: «Woorowula.» ⁶ Wo keninma, a xa jama lasigi dugo ma. Wo xo, a xa buurukun woorowulo ta, xa barako bula Ala pen, xa buurolo kutun kutun, x'e di a la xarandinḡolu ma, x'e xa i tala jama te. Xarandinḡolu x'a ke ten. ⁷ Nege mesenḡolu do dulu tunnu b'e kun; Isa duwata wolu ma, wo xo, a xa wo dulu di, xarandinḡolu x'e tala jama te. ⁸ I xa domolo ke fo x'e fa. Xarandinḡolu xa sinsi woorowula fa a to la, i nin a xa taxa. ⁹ I moxo jaate tun be taxala wulu naani noxon ma. Wo xo, Isa x'e labula. ¹⁰ Wo no bee to, a nin a la xarandinḡolu dunta xulunḡo xono, xa taxa Dalamanta maro xan. ¹¹ Lun do, Farisiyalu nata, i nin Isa xa noxomasooso damuta. I tunnu b'a fe x'a xotobo. I xo a pen xo a xa taagumanseedo do di, men s'a yita xo a be bola Ala bata. ¹² Isa xa nilakili kunba ke, a xo: «Mun na bi moxolu be taagumanseedo do ḡninna? Tonḡa la, ní b'a fola alu pen xo taagumanseede si me yita pin tili in moxolu la.» ¹³ Wo xo, a bota i bata, xa dun xulunḡo xono tugun, xa taxa dalaba jefen. ¹⁴ Xarandinḡolu tunnu ḡnata i nin domolifen man dun xulunḡo xono, fo buurukun kilin doron. ¹⁵ Isa xa pin fo x'a xoleya bete i ma xo: «Alu i korosi Farisiyalu nin Herode la farinfu-unulanḡo ma.» ¹⁶ Xarandinḡolu tunnu be xumala i noxo te xo: «A xa wo fo le, bawo buuru nte n kun.» ¹⁷ Isa x'e la miiriya lon, a xo i pen xo: «Mun na alu be i miirila don ma xo buuru nte alu bulu? Haalibi, alu man hakili soto ba? Haalibi, alu man faamuyali ke ba? Alu jusukunḡo xa xole de! ¹⁸ Na nte alu ma ba? Tulu nte alu ma ba? Alu hakili nte a la ba, ¹⁹ ní xa buurukun luulu kutun kutun wulu luulu moxo te lunḡo men, alu xa sinsi jelu fa wolu to la?» I x'a jaabi xo tan nin fula. ²⁰ A xo du xo: «Ní xa buurukun woorowula kutun kutun wulu naani moxo te lunḡo men, alu xa sinsi jelu fa wolu to la?» I x'a jaabi xo woorowula. ²¹ A xo i pen xo: «Haalibi, alu man faamuyali ke ba?» ²² Wo xo, Isa nin a la xarandinḡolu taxata Betesayida; i sita non tumo men, moxolu nata fiyonto do ti Isa bata, x'a matara xo a x'é maxa a la. ²³ A xa fiyonto muta a bulo ma, xa taxa a ti gallo xo ma. Wo xo, a xa dajiyo mu a palu la, x'a bulolu buti a ḡa la. Wo xo, a x'e bo a la, x'a ḡninxa xo nin a ḡa be dula la. ²⁴ Fiyonto x'a palu yele, a xo: «Ní ḡa be moxolu la, bari i be le í xo yirolu b'e taxamala.» ²⁵ Isa x'a bulolu buti a ḡa la tugun; a ḡa yeleta weren. A kendeyata; a be fenḡo bee jela a ḡa ma. ²⁶ Isa x'a bula, a xa taxa a

bata, x'a fo a pen xo a xana saagi gallo xono. ²⁷ Isa nin a la xarandinɗolu taxata Sesare Filipe senbetogallolu to. X'e taxato tu, a xa xarandinɗolu njinxa xo: «Moxolu be mun fola n' na kuwo to?» ²⁸ I x'a jaabi xo: «Dolu xo x'é mu Batiselila Yaya le ti, dolu xo kila Eli, dolu xo kilalu to do.» ²⁹ A x'e njinxa xo: «Ate dunnu b'a fola xo n' mu jon ti?» Piyere x'a jaabi xo: «Í mu Kirisita le ti.» ³⁰ Isa x'a xoleya bete i ma xo i xana wo fo moxo si pen. ³¹ Wo to, Isa x'a damuta x'a la xarandinɗolu laxaran. A xo i pen xo: «Waajibbo le mu Moxo Dinxe xa tooro bete, anin xo moxobalu nin sadaxalasibaxa kuntigolu nin sariya karanmoxolu x'e ban a to. Anin du, xo a si faxa. Wo xo, tili saba, a si kuni.» ³² A xa wo xumo fo x'a laxoyiya i ma tumo men, Piyere taxata a ti senbo to, x'a laxosi. ³³ Wo keninɗo, Isa x'é yeleva x'a la xarandinɗolu mafele, xa Piyere madigaamu. A xo a pen xo: «Bo n' nofe, Sentane! Bawo í miiriyalu nte Ala la kuwolu xan, fo hadamandinɗolu talu.» ³⁴ Wo xo, Isa xa jama nin a la xarandinɗolu kili. A xo i pen xo: «Nin do b'a fe x'a lo nte nofe, wo x'é ban a fan to, x'a fan gengenyiro ta, x'a lo n' nofe. ³⁵ Moxo men je a fo, xo a b'a fan niyo lakisila, wo si bono a niyo to. Bari moxo men je bono a niyo to nte nin Xibaru Dimanɗo la kuwo xanma, wo tigo si a niyo lakisi. ³⁶ Duniya bee soto si mun nan moxo pen, nin a si na bono a niyo to le? ³⁷ Moxo si mun ke no x'a niyo kunbo? ³⁸ Nin nte nin n' na xumolu je ke maluyaku ti moxo wo moxo bulu, bi moxo bannin junubekelalu innu to, wo tigo du si ke maluyaku ti Moxo Dinxe bulu, a je na a Fa la nooro to lun men, a nin meleke senumanɗolu.»

9 Isa xo i pen du xo: «Tonɗa la, nte b'a fola alu pen xo moxo dolu be jan, wolu me sa x'a tara i man Ala la Mansaya nin barako nato je.» ² Wo xo tili wooro, Isa taxata Piyere nin Yaxuba nin Yaya ti i danna, kuru janba do sanɗo to. A sawuro mayelemata i pala je. ³ A la faanolu njelenxuta, xa xoyiya, moxo si nte duguxulo xan nin í si fen xoyiya no xa wo bo. ⁴ xarandinɗolu xa kila Eli nin kila Musa je. Wolu tunnu nin Isa be xumala. ⁵ Piyere xa xumo ta, a xo Isa pen xo: «Karanmoxo, alan be jan, wo xa nin. Alan xa tillisi saba lo, ite ta mu kilin ti, kila Musa ta kilin, kila Eli ta kilin.» ⁶ A tun man a lon a si men fo, bawo i tunnu silata fo xa danmatanbi. ⁷ Xabo do jigita i xan, x'e dugu. Xumaxanɗo do bota wo xabo to, x'a fo xo: «Nin mu n' Dinxe baato le ti. Alu a lame.» ⁸ Wo no bee to, xarandinɗolu x'e lamininɗo bee mafele, bari i man moxo xote je nin Isa kilin nte. ⁹ Xa i jigito tu kuro to, Isa x'a fo i pen, x'a xoleya bete i ma, xo i xa men je, i xana wo laxali moxo si pen, fo Moxo Dinxe xa kuni tumo men xa bo furelu to. ¹⁰ Xarandinɗolu xa wo xumo mara i xono, bari i tunnu be i noxo njinxala xo: «Xa kuni xa bo furelu to, wo xoto si ke mun ti?» ¹¹ I xa Isa njinxa xo: «Mun na sariya karanmoxolu b'a fola xo kila Eli xa xan xa na folo?» ¹² A xo: «Tonɗa le mu, Eli xa xan xa na folo, xa fenɗo bee to-

ben. Bari mun na Kitaabo x'a yita xo Moxo Dinxe si tooro bete, anin xo moxolu s'a doxoya? ¹³ Bari n' b'a fola alu pen xo: Eli nata xa ban, bari moxolu xa i sago bee ke a la, í xo Kitaabo x'a fo na men.» ¹⁴ Isa nin wo xarandin sabo be sila xarandin tolu ma tumo men, i xa jamaba tara wolu bata. I nin sariya karanmoxolu be i noxo soosola. ¹⁵ Jama xa Isa je tumo men, i dabaro banta, i xatita i noxo to, x'e bori xa taxa a xonton. ¹⁶ A x'e njinxa xo i be i noxo soosola mun ma. ¹⁷ Xe do x'é tu jama to x'a jaabi xo: «Karanmoxo, n' nata n' dinxe ti í bata. Jinno le b'a to, men b'a kela muumuwo ti. ¹⁸ Jinne in je wuli a la dula wo dula, a s'a ketu x'a fili dugo ma, xa fuuta labo a da la. A s'a bula datodomo la, x'a laja. N' x'é la xarandinɗolu bula xa jinne in xoyi, bari i korita.» ¹⁹ Isa xo i pen xo: «Moxo lannayabalolu, nte si tu alu bata fo waxati joman? Nte si muɗa alu xoto fo waxati joman? Alu nin dandinɗo xa na.» ²⁰ I nata a ti. Kabirin jinno xa Isa je, a xa dandinɗo gijigiji bete. Wo boyita dugo ma x'é birigintin, xa fuuta labo. ²¹ Isa xa dandinɗo fa njinxa xo: «Nin b'a la kabirin tuma joman?» A xo: «Kabirin a dandinɗo. ²² Tuma kiika, jinno s'a bula ta to, walla jiyo to, walasa a si sa na men. Bari nin í si sin ku la, hinna n' na, í xa n' deema.» ²³ Isa xo a pen xo: «Nin n' si sin! Nin moxo men xa lannaya ke, kuwo bee si ke wo pen.» ²⁴ Wo no bee to, dandinɗo fa xo: «N' xa lannaya ke. N' deema, xa do kafu n' na lannaya ma.» ²⁵ Isa xa jama je gidila nanin i ma doron, a xa jinno madigaamu. A xo: «Jinno, ite men xa nin dandin in ke tuluxutiyo anin muumuwo ti, nte b'a fola í pen xo: Bo a to, í xana dun a to bitugun!» ²⁶ Jinno xuureta xa dandinɗo lajarajara bete, wo xo, xa bo a to. Dandinɗo keta í xo moxo saninɗo. Moxo kiika tun xo x'a sata. ²⁷ Isa x'a muta a bulo ma, x'a lawuli. A wulita x'é lo. ²⁸ Isa taxata luwo ma tumo men, xarandinɗolu x'a njinxa i danna xo: «Mun na ntelu korita nin jinne in xoyila?» ²⁹ A xo i pen xo: «Nin jinne sifa in me xoyi no, nin Alamatara nte.» ³⁰ Isa nin a la xarandinɗolu bota non, xa Galile maro tofara. Isa tun nte a fe moxo xa bo wo xalama. ³¹ Bawo a tun be a la xarandinɗolu xaranna, xo Moxo Dinxe be nala dunna moxolu bulu. I s'a faxa. Bari a sa tili sabo, a si kuni xa bo furelu to. ³² Bari i man wo xumo faamu. I tunnu be silanin xa Isa njinxa. ³³ I sita Kaperenahun gallo to. I dunta bugo xono tumo men, Isa xa xarandinɗolu njinxa xo: «Alu tunnu be i noxo soosola mun ma silo to?» ³⁴ I bee x'e de, bawo x'e tu silo to, i tunnu be i noxo soosola xo jon xa bun i bee ti. ³⁵ Wo to, Isa x'é sigi, x'a la xarandin tan nin fulo kili, x'a fo i pen xo: «Nin do b'a fe xa ke namoxo ti alu to, wo tigo xa ke alu bee xomoxo nin alu bee la baarandinɗo ti.» ³⁶ Wo xo, a xa dandinɗo do muta, x'a lalo i temo to. A x'a ta x'a sexxu, x'a fo i pen xo: ³⁷ «Moxo men je nin dandin in noxon do mutakubete nte la kuwo la, wo xa nte fan ne mutakubete. Moxo men je nte mutakubete, wo man nte mutakubete, a xa n' Kibaxo le mutakubete.» ³⁸ Yaya xo Isa

nen xo: «Karanmoxo, n xa moxo do je, men tun be jin-nolu ma x'e xoyi í toxo la. Ntelu xo a nen xo a xana wo ke, bawo a tun nte n na kafo xono.»³⁹ Isa xo: «Alu xana a bali xa wo ke, bawo moxo si me kawakuwo ke nte toxo la, xa n toxojaxo fo wo no bee to.»⁴⁰ Katugala men nte n jaxu ti, wo mu n ninjo le ti.⁴¹ Moxo wo moxo je jitafe na kilin di alu ma, x'a la a xan xo alu mu Kirisita ta lelu ti, tonja la, n b'a fola alu nen xo wo tigo me bono a la baraja to.»⁴² Isa xo i nen tugun xo: «Nin dindin in mennu xa lannaya ke nte la, moxo men je ke sabaabu ti, xa wolu to kilin na lannaya tija, a tun xa fisa wo tigi ma, xa kuru belebeleba siti a xanjo la, x'a fili xooxojiyo to.»⁴³ Nin í bulo le be junubo lasila í ma, a tege; í bulu kilinma xa dun arajanna xono, wo xa fisa don ti, í nin í bulu fulo xa dun jahanaba ta sabalo to. [⁴⁴ Non "tunbo me sa, a ta du me sa."]⁴⁵ Nin í sinjo le be junubo lasila í ma, a tege; í sin kilinma xa dun arajanna xono, wo xa fisa don ti, í nin í sin fulo xa fili jahanaba xono. [⁴⁶ Non "tunbo me sa, a ta du me sa."]⁴⁷ Nin í nakeso le be junubo lasila í ma, a woloxoti; í na kilinma xa dun Ala la Mansaya xono, wo xa fisa don ti, í na fulama xa fili jahanaba xono.⁴⁸ Non "tunbo me sa, a ta du me sa." ⁴⁹ Bawo ta si ke moxo bee la, x'a senuya í xo xooxo tun be kela xa sadaxolu bee senuya na men.⁵⁰ «Xooxo mu fen puma le ti; bari nin xooxo diya bota a la, alu si mun ke x'a ladiya tugun? Alu xooxo ke alu fanu to, anin heero xa ke alu nin i joxo te.»

10 Isa nin a la xarandinjolu bota non xa taxa Yude maro xan, Yuruden ba boxo do. Jama kamarita a bata tugun; a x'e laxaran í xo a dalita a kela na men.² Farisiya dolu x'e sodun a la x'a xotobo. I x'a njinixa xo nin a be dagenin xeba nen, x'a musu futuwo sa.³ A x'e jaabi xo: «Kila Musa xa mun waajibiya alu ma wo kuwo to?»⁴ I xo: «Musa sonta xo xeba si futusakayito ke folo, wo xo, a si a musu bula.»⁵ Isa xo i nen xo: «Alu la son-donme xoleya le x'a tu Musa xa wo sariya safe x'a di alu ma.»⁶ Bari duniya datumo, Ala xa muso nin xe le da.⁷ Wo le x'a tu, xeba si a na nin a fa bula, x'é noto a musu la.⁸ I fulo si ke kilin ti. Wo na ma, i nte fula ti tu-gun, i mu kilin ne ti.⁹ Ala xa mennu kafu, moxo xana wolu tala.»¹⁰ I taxata luwo ma tumo men, xarand-injolu x'a njinixa wo kuwo la tugun.¹¹ Isa xo i nen xo: «Moxo men je a musu bula, xa do xote futu, wo xa fuyanpa ke, x'a musu folo haxxo ta.»¹² Muso men du je bo a xe kun, xa sigi xe xote kun, wo xa fuyanpa ke.»¹³ Moxo dolu nin dindinjo dolu nata Isa bata nin a si a bulo la i xan, xa duwa i nen. Bari xarandinjolu xa wolu madigaamu.¹⁴ Isa xa wo je tumo men, a diminta. A xo i nen xo: «Alu a tu dindinjolu xa na n bata! Alu xana i bali, bawo Ala la Mansaya mu i joxon nelu ta ti.»¹⁵ Tonja la, n b'a fola alu nen xo: Nin moxo wo moxo man Ala la Mansaya muta í xo dindinjo, wo me dun no a xono abada.»¹⁶ Wo xo, a xa dindinjolu ta, x'a bu-lo la i xan, xa duwa i nen.¹⁷ Isa bulata silo to tumo

men, xe do borito nata a ma, x'é jongi a xoto, x'a fo a nen xo: «Karanmoxo puma, nte xa xan xa mun ke walasa n xa nilamaya banbalo soto?»¹⁸ Isa xo a nen xo: «Mun na í be pumaya fola nte nen? Moxo si nte pu-ma ti nin Ala kilin nte.»¹⁹ Í xa sariyalu lon xo: «Í xana moxo faxa, í xana jadoya ke, í xana suupali ke, í xana xaro la í moxojoxo la, í xana moxo toojo, í na nin í fa bunja.»²⁰ Xe xo: «Karanmoxo, kabirin n dindin, nin n be nin sariya innu bee labatula.»²¹ Isa x'a mafele, x'a xanu. A xo a nen xo: «Ku kilin tuta í nen xo. Fen wo fen be í kun, taxa a bee fiiri, xa wo xaaliso di segebaxan-tunjolu ma. Wo to, naafuluba si ke í kun sanjo to. Wo xo, í si na a lo nte nofe.»²² Xe xa wo xumo me tumo men, a x'a na tosiisi. A nitokuwaninba bota je xa taxa, bawo naafulo kiika tun b'a kun.²³ xarandinjo men tun-nu be Isa senbo to, a xa wolu mafele, x'a fo i nen xo: «Naafulubatigo dunjo xa xole Ala la Mansaya xono!»²⁴ Wo xumo xa xarandinjolu xonotolafilu. Isa saagita a ma, x'a fo i nen tugun xo: «N na dindinjolu, a xa xole xa dun Ala la Mansaya xono!»²⁵ Nogomo dunjo mesendiwuwo fe, wo xa newo xa tanbi naafulubatigo dunjo ti Ala la Mansaya xono.»²⁶ Do kafuta xarand-injolu la dabaribanjo ma. I x'e joxo njinixa xo: «Jon dun si kisi no?»²⁷ Isa x'e mafele x'a fo i nen xo: «Hadamandinjolu bulu, wo me ke no, bari Ala bulu nte, bawo Ala me kori ku ma.»²⁸ Piyere xo a nen xo: «A fele, ntelu buruta fenjo bee to, x'a lo í nofe.»²⁹ Isa x'a jaabi xo: «Tonja la, n b'a fola alu nen xo moxo wo moxo je njipa a la luwo xo, walla a badinxelu, walla a badinmusolu, walla a fa, walla a na, walla a dinjolu, walla a la fuutolu xo, nte nin Xibaru Dimanjo xanma,³⁰ a si wo joxon luwolu, nin badinxelu nin badinmu-solu, nin nalu, nin dinjolu, anin fuutolu kemolu soto, xa tooro du soto nin duniya in xono. A si nilamaya banbalo soto sinin.³¹ Namoxo kiika si ke xomoxo ti, xomoxo kiika si ke namoxo ti.»³² I tunnu be silo fe tax-anin Yerusaleme. Isa tun be i nafa xa taxa. xarand-injolu tunnu be xonotolafilinin; i nofemoxolu tunnu be silanin. Isa taxata a la xarandin tan nin fulo ti i dan-na tugun. Kuwo men be nala sila a ma, a xa wo fo i nen.³³ A xo: «Alan taxato fele Yerusaleme, Moxo Dinxe si dun sadaxalasibaxa kuntigolu nin sariya karanmox-olu bulu. I s'a jalagi, x'a faxalo latege, x'a dun Alalon-balolu bulu.»³⁴ Wolu si jele a ma, xa dajiyo tuppua ma, x'a buwo gapo la. Wo xo, i s'a faxa. Bari a sa tili sabo, a si kuni xa bo furelu to.»³⁵ Sebede dinxelu, Yaxuba nin Yaya x'e sodun Isa la. I xo a nen xo: «Karanmoxo, n be nala kuwo do njinina í la, n b'a fe í xa wo ke n nen.»³⁶ A xo i nen xo: «Alu b'a fe n xa mun ke alu nen?»³⁷ I xo a nen xo: «A ke, nin í sigita í la Mansaya nooroma la, ntelu do xa sigi í kininjo fe, do xa sigi í numanjo fe.»³⁸ Bari Isa x'e jaabi xo: «Alu be men njinina, alu man wo lon. Nte xa xan xa n min tooro jitafe men na, alu s'i min no wo la ba? Walla nte xa xan xa batise

tooro men to, alu si batise no wo ja ma ba?»³⁹ I x'a jaabi xo: «N si wo no.» Isa x'e jaabi xo: «Tonja le mu, nte xa xan xa n min tooro jitafe men na, a dulu s'i min wo la. Nte xa xan xa batise tooro men na, a dulu si batise wo la.»⁴⁰ Bari xa sigi n kininjo fe walla n numanjo fe, nte nte wo lategela. Wo dulalu tobenta mennu pen, i si di wolu ma.»⁴¹ To tanjo xa wo me tumo men, i diminta Yaxuba nin Yaya xoto.⁴² Isa x'e kili x'a fo i pen xo: «Alu x'a lon xo mennu be jaatenin jamanolu kuntigolu ti, wolu be i marala i la kuntigiya la, moxobalu be i la fango yitala i la.»⁴³ Bari a man xan xa ke ten atelu to. Nin men b'a fe xa ke moxoba ti alu to, wo tigo xa xan xa ke alu la baaradinjo ti.⁴⁴ Nin men b'a fe xa ke namoxo ti alu to, wo xa ke alu bee la jonjo ti.⁴⁵ Bawo Moxo Dinxe man na xo moxo xa baara ke a pen; bari a nata le xa baaro ke moxolu pen, anin x'a niyo di xa moxo kiika kunbo.»⁴⁶ Wo xo, i sita gallo do to xo Yeriko. Isa nin a la xarandinjolu nin jamaba bota Yeriko tumo men, i xa fiyonto do tara siginin silada la, a be sadaxatara la. Time dinxe Baratime le tun mu.⁴⁷ A x'a me tumo men xo Nasareti Isa le mu, a kuleta xo: «Isa, Dawuda Mamarinjo, hinna n na!»⁴⁸ Moxo kiika x'a madigaamu, xo a x'e de. Bari wo bee xan, a xa do kafu kule ma, x'a fo xo: «Dawuda Mamarinjo, hinna n na!»⁴⁹ Isa lota; a xo x'e xa fiyonto kili. I xo fiyonto pen xo: «I hakilo lasigi, xa wuli, a b'e kilila.»⁵⁰ Fiyonto x'a la doroko fili, x'e ba x'e kuntilin Isa la.⁵¹ Isa xo a pen xo: «I b'a fe n xa mun ke i pen?» Fiyonto x'a jaabi xo: «Karanmoxo, n b'a fe n nalu xa ye!»⁵² Isa xo a pen xo: «Taxa; i la lannaya x'e kendeya.» Wo no bee to, a xa dula je, a x'a lo Isa nofe taxanin.

11 Isa nin a la xarandinjolu sutiyaninma Yerusaleme la, fo xa si Oliwe kuro ma, Betefaje nin Betani galludalu la, a x'a la xarandin fula ki.² A xo i pen xo: «Alu taxa gallo to, men be alu nafe. Nin alu sita doron, alu si falindingo tara sitinin je, moxo bada man ye men xan. Alu s'a firin xa na a ti.»³ Nin do xo alu pen xo: «Mun na alu be pin kela?», Alu s'a jaabi xo: «Marigi le haajo be a ma.» A woman in si a bula xa na wo no bee to.»⁴ Xarandinjolu taxata, xa falindingo tara sitinin banto to, bedo fe, luda la. I woman innu x'a firin.⁵ Moxo men tunnu be je, wolu dolu x'e njinxa xo: «Mun na alu be pin falindin in firinna?»⁶ Xarandinjolu xa wolu jaabi i xo Isa x'a fo i pen na men. Wo to, wo moxolu sonta i nin falindingo xa taxa.⁷ I nata falindingo di Isa ma, xa i la faanolu feene a xan. Isa sigita a xan.⁸ Moxo kiika x'e la faanolu feene silo to, dolu xa fitabulolu tege tuwo to, x'e feene silo xan.⁹ Moxo men tunnu be Isa xo nin a ja, wolu tunnu be fetenna xo: «Tanto be Ala pen! Men nato fele Marigi toxo la, duwa wo be wo fe!»¹⁰ Ntelu mamaxe Dawuda la mansaya men nato fele, wo xa jiidi! Tanto xa ke Ala pen sanjanbalu to!»¹¹ Isa dunta Yerusaleme, xa taxa Alabatusuba xono, x'a dula bee mafele. Wo xo, a nin a la xarandin

tan nin fulo bota, xa taxa Betani, bawo suwo tun kuta.¹² Wo lun do, i boninma Betani, xonxo xa Isa muta.¹³ A xa turojuwo do je dulajan, fitolu b'a la. A taxata a lafele fo a si din soto a la. Bari a sita a xoto tumo men, a man fusi tara a la, fo fito doron, bawo turodin waxati tun nte.¹⁴ Wo to, a xumata turojuwo ma, a xo: «Moxo xana i din domo tugun fo abada.» A la xarandinjolu xa wo xumo me.¹⁵ I sita Yerusaleme, Isa dunta Alabatusuba xono. Moxo men tunnu be fiiro nin sanno la je, a x'a damuta xa wolu xoyi. A xa xaalisifalinnalu la tabalolu anin jenetuban fiirilalu la sigilanjolu kundinmayelema.¹⁶ A man son mirantigi si xa tanbi Alabatusuba xono la.¹⁷ A xa wo moxolu laxaran xo: «A nte safenin Kitaabo to ba xo: «Nte la bunjo si kili xo siyalu bee la Alamatarabunjo?» Bari atelu kennu x'a ke boyinxannilalu dugudula ti.»¹⁸ Sadaxalasibaxa kuntigolu nin sariya karanmoxolu xa wo me; anin du, i x'a je xo a la xarango xa jama bee kunjo muta. Wo le x'a tu, i silata a ja, xa ja njinin, i si Isa faja ja men.¹⁹ Suwo kuta tumo men, Isa nin a la xarandinjolu bota gallo to.²⁰ Wo lun do saxo ma junna, Isa nin a la xarandinjolu tantito xa wo turojuwo janinjo je, fo xa taxa a bula a lillolu la.²¹ Piyere hakilo jigita Isa la xuma foninjo kun, a xo Isa pen xo: «Karanmoxo, a fele i xa turojuwo men danga, a jata fayan.»²² Isa xa xumo ta, a xo i pen xo: «Alu la Ala la.»²³ Tonja la, n b'a fola alu pen xo, nin do xo nin kuru in pen xo: «Wutu jan i xa taxa i fili xooxojiyo to,» nin a x'a tara a tigo man sikka a jusukunjo la, xa la a la, xo a xa men fo, wo si ke a pen, wo to, wo kuwo si ke a tigo pen.²⁴ Wo xanma, n b'a fola alu pen xo, alu je fen wo fen tara Ala la, alu xa la a la, xo alu xa wo fenjo soto; wo to, a fenjo si di alu ma.²⁵ «Nin alu wulita xo alu be Ala matarala, x'a tara ku be alu nin do te, alu yaafa wo tigo ma, walasa alu Fa men be sanjo to, x'alu dulu la haxxolu yaafa alu ma. [»²⁶ Bari nin alu nte yaafala tolu ma, alu Fa men be sanjo to me alu dulu la haxxolu yaafa alu ma.]»²⁷ Isa nin a la xarandinjolu nata Yerusaleme tugun. Isa tun be i yaalayaalaxan Alabatusuba xono. Sadaxalasibaxa kuntigolu nin sariya karanmoxolu nin moxobalu x'e sodun a la.²⁸ I xo a pen xo: «Fanga joman x'e bula nin ku innu kela? Jon x'e yanmaru xa fiirilalu xoyi jan?»²⁹ Isa x'e jaabi xo: «Nte du be nala alu njinxala ku kilin ne la. Nin alu xa nte jaabi, wo tumo, men xa fango di n ma xa pin ku innu ke, n du si wo fo alu pen.³⁰ Jon xa Yaya bula batiselo la, Ala ba, fo moxolu? Alu n jaabi!»³¹ I xo i noxo pen xo: «Nin n xo: «Ala le x'a ki», a s'a fo xo: «Mun dun na alu man la a la?»³² Alan s'a fo ba xo: «Moxo lelu x'a ki?»» Bari i tunnu be silanin jama ja, katugala moxolu bee be Yaya mutanin kila fan fan ne ti.³³ Wo to, i xa Isa jaabi xo: «Ntelu man wo lon.» Isa xo i pen xo: «Awa, men xa fango di nte ma xa pin ku innu ke, nte du nte wo fola alu pen.»

12 Wo xo, Isa boyita xumala i jen taliyolu to. A xo: «Xe do le, a xa resenfuuto bo, x'a sansan. A xa resenjobodinxo jaga, xa kantalibento lo. Wo xo, a xa resenfuuto xarifa senekela dolu ma, xa taxama. ² Resenmo tumo sita tumo men, a x'a la jonxe do ki a la resenfuuto senebaxolu ma, xo i x'a la resenmo di a ma. ³ Bari resenfuuto senebaxolu xa wo jonxe muta, x'a buwo, x'a bulutoxulunjo lakoppa. ⁴ A x'a la jonxe do xote ki i ma. I xa wo du muta, x'a tinba a kunjo to, x'a doxoya. ⁵ A xa do xote ki. I xa wo faxesa. Wo xo, a xa do xotelu ki. I xa wolu dolu buwo, xa dolu faxesa. ⁶ A to tuta a dinxe baato doron ma. A labanjo la, a xa wo ki i ma. A xo: "I si n' dinxe ken bunja." ⁷ Bari resenfuuto senebaxolu xa wo nato je doron, i xo i joxo jen xo: "A ketabaxo fele. Alu na, alan x'a faxesa. A ke si ke alan ta ti." ⁸ I x'a muta, x'a faxesa, x'a fili resenfuuto xo ma.» ⁹ Wo xo, Isa xo i jen xo: «Resenfuututigo si na mun ke wo to? A si na xa wo resenfuuto senebaxolu faxesa, x'a la resenfuuto xarifa moxo xotelu ma. ¹⁰ Alu man dali xa jin xuma in xaran Kitaabo xono ba xo: "Kurubunlolalu x'e ban kuro men to, wo keta bunjo jusigikuro ti. ¹¹ Marigi le xa wo ke. Kawakuwo le mu ntelu bulu!" » ¹² Diina namoxolu tunnu be feere njinina x'a muta, bawo i x'a lon x'a faamu, xo a la tali in be ite lelu xan. Bari i silata jama ja. I woman innu bota a bata xa taxa. ¹³ Farisiyalu nin Herode la moxo dolu kita Isa ma, walasa i x'a muta a fan datoxumolu ma. ¹⁴ I nata, i xo: «Karanmoxo, n x'a lon xo i mu tonpatigo le ti. I nte silala moxo si ja, bawo moxolu bee xa xan i jen. I be moxolu laxaranna Alasilo ma x'a xoyiya. N b'e njinxala, a be dagenin ba ntelu xa sagallo sara Rome mansaxe ma, walla a nte dagenin?» ¹⁵ Isa xa i la fulankafuya lon. Wo to, a xo i jen xo: «Mun na alu be nte xotobola? Alu na depe xalisi ganan kilin ti, n' x'a mafele.» ¹⁶ I nata do ti. A xo: «Jon kunxulo nin jon toxo be safenin xalisi in xan?» I xo: «Rome mansaxe le mu.» ¹⁷ Isa xo i jen xo: «Awa, Sesare ta mu men ti, alu wo di a ma, xa Ala ta di Ala ma.» I dabaro banta a la jaabo ma. ¹⁸ Sadusen diino moxo dolu nata Isa bata. Wo lelu xo, xo furelu nte kunila. I x'a njinixa ten xo: ¹⁹ «Karanmoxo, kila Musa x'a fo xo, nin xe do sata, x'a tara a musu man din soto, a badinxexa xan xa wo muso ta, xa dinjo do soto a ma, a badinxexa saninjo jen. ²⁰ Awa, badinxexa woorowula tun be je. Folo xa muso ta, xa sa, a man din tu. ²¹ Fulananjo x'a ta. Wo du sata, a man din tu. Sabananjo du ta keta ten. ²² I moxo woorowulo bee xa musu in ta, bari i si man din soto a ma. Wolu bee xo, muso du sata. ²³ Furekuniyo xo, musu in be kela jon kilin musu ti, bawo a tun keta i woorowulo bee musu ti?» ²⁴ Isa xo i jen xo: «Alu be filo xono. Mun na? Bawo alu man Kitaabo xumolu lon, alu man Ala la sintigiya du lon. ²⁵ Furekuniyo xo, xe nte musu futula, musu du nte sigila xe kun, bari i be kela le i xo melekoyolu be ja men sanjo to. ²⁶ Men mu

furekuniyo ti, n' si wo ja fo alu jen saasa. Alu man a xaran Musa la kitaabo to ba, Ala xa men fo a jen fi-taare mananinjo to? A xo a jen xo: "Nte mu Burehima la Ala le ti, Nsiyaxa la Ala, anin Yaxuba la Ala." ²⁷ Ala nte furelu la Ala ti, nilamalu la Ala le mu. Nin a be alu jen xo furelu nte kunila, alu be filiba le xono.» ²⁸ Sariya karanmoxo do tun xa Isa nin wo moxolu xumaxanjo lu lame. A x'a je xo Isa xa Sadusenjo lu jaabi a ja ma. Wo to, a x'e sodun xa Isa njinixa xo: «Ala la sariyalu bee to joman xa bun?» ²⁹ Isa x'a jaabi xo: «Sariya men be sariyalu bee ja, wo fele: "Banisirayila, lamelo ke! Marigi, n na Ala, wo kilin ne mu Marigi ti. ³⁰ I si Marigi i la Ala xanu i jusukunjo bee la, i niyo bee la, i miiro bee la anin i barako bee la." ³¹ Sariya men be wo xan, wo fele: "I xa i moxoxo xanu i xo i fan." Sariya si man bun xa tanbi jinnu fulo xan.» ³² Sariya karanmoxo xo a jen xo: «Karanmoxo, i xa men fo, wo benta. Ala ken mu kilin ne ti; fulanan nte a la. ³³ X'a xanu i jusukunjo nin i miiro nin i barako bee la, anin x'e moxoxo xanu i xo i fan, wo xa fisa sadaxa janitalu nin sadaxa sifa bee ti.» ³⁴ Isa x'a je tumo men, xo sariya karanmoxo x'a jaabi hakilimaya la, a xo a jen xo: «A tuta dondin, i si son Ala la Mansaya ma.» Wo xofe, moxo si man fatiya x'a njinixa tugun. ³⁵ Wo xo, Isa xa moxolu laxaran Alabatusuba xono. A x'e njinixa xo: «Mun na sariya karanmoxolu b'a fola xo Kirisita mu Dawuda Mamarinjo ti? ³⁶ Dawuda fan x'a fo Ni Senunjo barako to xo: "Marigi x'a fo nte Marigi jen xo: I sigi n' kininjo xoto, fo nte xa i jaxolu ke i sinxotofenjo ti." ³⁷ Dawuda fan be a kilila xo Marigi. Wo to, a dun si ke a mamarinjo ti ja di?» Jamaba tun be Isa lamela jajo to. ³⁸ Isa tun be moxo mennu laxaranna, a xo wolu jen xo: «Alu i korosi sariya karanmoxolu ma, a xa di wo mennu jen x'e yaala dorokebalu xono. Moxolu x'e xonton beralu to, wo xa di i jen. ³⁹ Alabatusuwo xono, nafesigidulalu xa di i jen. Domolibadulalu, nafesigidulalu xa di i jen. ⁴⁰ I si musujaxelu la naafulolu bee domo. I si Alamatara janjo lu ke, x'e fannu yita moxo beto ti wo ja ma. Wo le x'a tu, i la jangilo si jaxuya bete.» ⁴¹ Isa taxa-ta i sigi Alabatusuba xono, nilifenbulamiranjo senbo to. A xa moxolu xalisibulato lakorosi. Naafulubatigi kika xa xalisiba bula miranjo xono. ⁴² Musujaxe segebaxantunjo do nata, xa xalisi mesen fula bula a xono. Wo xalisi tun me tanbi kuseeti kilin na. ⁴³ Wo keninjo, Isa x'a la xarandinjo lu kili, a xo i jen xo: «Tonja la, n' b'a fola alu jen, xo jin musujaxe segebaxantun in xa men bula miranjo xono, moxo man a joxon bula a xono. ⁴⁴ Bawo wolu bee xa do ta men to x'a di, i man si wo ma folo, bari ate ken; a nin a la sege, fen wo fen be a kun, a maakuwo tun be men na xa balu, a xa wo bee le di.»

13 Isa bota Alabatusuba xono tumo men, a la xarandinjo do xo a jen xo: «Karanmoxo, ite xa jin kuruba innu nin jin su in loja mafele de!» ² Isa x'a

jaabi xo: «Í ña be ñin suba innu la de! Kuru si me tu kuru xan jan, i bee si boyi.»³ Isa taxata í sigi Oliwe kuro to, Alabatusuba kuntilinjo la. X'a tu non, Piyere nin Yaxuba nin Yaya anin Andere x'a ñininxa i danna.⁴ I xo: «Wo kewaxato fo n ñen, anin taagumanseedo, men si wo fenjolu bee bantumoyita.»⁵ Isa xa xumo ta, a xo: «Alu i korosi moxo si xana alu lafili.⁶ Moxo kiika si na nte toxo la, x'a fo xo: "Nte mu." I si moxo kiika lafili.⁷ Nin alu xa kele xibarolu me, xa kele ñuunñuunux-anjolu me, alu xana sila. Waajibo le mu wolu xa ke, bari wo kuwolu nte duniya wulo ti folo.⁸ Siya do si wuli siya do xanma, mansaya do du si wuli mansaya do xanma. Duguxulu jarajarolu si ke dula kiika. Xonxobalu si ke. Wo kuwolu mu toorokuwolu damuto le ti, í xo muso la tinjo wulito.⁹ «Atelu kennu x'e korosi; moxolu si alu dun kiititegelalu bulu. I si alu xosi gaño la Alabatusuwolu xono, x'alu dun goferenerolu nin mansaxelu bulu nte la kuwo koso. Wo si ke sabaabu ti, alu xa nte la kuwo seede ya i ñen.¹⁰ Waajibo le mu, xibaru Dimanjo xa fo siyalu bee ñen, jannin duniya labanjo xa si.¹¹ Nin i x'alu muta, x'alu dun kiititegelalu bulu, alu xana hanme folo alu la fota xanma. Xumo men je dun alu da wo tumo, alu xa wo fo, bawo atelu fannu nte xumala; Ni Senunjo le be xumala.¹² Moxo dolu s'i badinxelu dun bulo to, i xa faxa. Fa do dulu si wo ñoxon ke i dinjolu la. Dinjo do dulu si wuli i wulubaxolu xanma, walasa i xa jalagi, xa faxa.¹³ Moxo bee si alu jajuya nte toxo nofe. Bari moxo men je muña fo xa si labanjo ma, wo si kisi.»¹⁴ «Alu si fen haramuninjo je dula Senumanjo, a man xan jan men. Men je ñin xaran, wo x'a faamu! Wo je moxo mennu tara Yude maro xono, wolu x'e bori xa taxa kurolo to.¹⁵ Wo je men tara a la bilo sanjo to, wo xana jigi, wo xana dun a la bugo xono, x'a be fen do tala.¹⁶ A je men tara a la fuuto to, wo xana í koppa xa taxa a la doroko ta.¹⁷ Musu xonomalu, anin dinjo be mennu sunjiyo la, wolu si tooro bete wo lunjolu.¹⁸ Alu Ala matara, walasa wo kuwolu xana ben neno waxato ma.¹⁹ Bawo tooroba si ke wo lunjolu, men ñoxon man dali xa ke, kabirin Ala xa duniya da, fo saasa. A ñoxon du nte kela tugun.²⁰ Nin Marigi tun man do bo wo lunjolu la, moxo si tun me kisi. Bari a la moxo sugandininjo koso, a xa do bo wo lunjolu la.²¹ Wo to, nin do xo alu ñen xo: "A fele, Kirisita be jan! A fele, a be non", alu xana la wo la.²² Bawo kisibaxa fanolu anin kila fanolu si wuli. I si taagumanseadolu nin kawakuwolu ke, walasa xa moxolu lafili. Nin i tunnu si haali Ala la sugandininjo lafili no, i tunnu si wo ke.²³ Atelu kennu x'e korosi! Ñ janxa alu lasobi wo kuwolu bee la.»²⁴ «Bari wo lunjolu tooro tanbo xo, tilo si dibi, xaro me xoyi tugun,²⁵ loololu si ke a ma xa tege xa bo sanxulo ma, sanxulo sintigiyalu si jarajara.²⁶ Wo to, Moxo Dinxe nato si je xabolu to, sintigiyaba nin nooroba xono.²⁷ A si melekiyolu bula xa taxa duniya tonxon naano to, xa Ala la moxo sugan-

dininjolu kamari, x'a ta duguxulo kunjolu ma, fo xa taxa a bula sanxulo kunjolu ma.²⁸ «Alu ñin misaali in faamu turojuwo la kuwo to: Nin a bulolu nunguta, xa nerun, alu s'a lon xo sama sutiyata.²⁹ Wo ña ma, nin alu xa wo kuwolu keto je, alu a lon xo Moxo Dinxe nawaxato sutiyata, a be da la fan.³⁰ Tonja la, ñ b'a fola alu ñen, xo bi moxolu bee me sa, x'a tara ñin ku innu bee man ke.³¹ Sanxulo nin duguxulo si sanko, bari nte la xumaxanjolu me sanko abada.»³² «Moxo si man duniya banlunjo, walla a waxato lon. Melekiyo mennu be sanjo to, wolu man a lon, Ala Dinxe du man a lon. Fa Ala kilinpe le x'a lunjo lon.³³ Alu i korosi, xa hakili soto, bawo alu man wo waxato lon.³⁴ A si ke í xo xe do be taxamala. A taxato x'a la luwo kuwo bee tu a la jonjolu bulu, xa bee la baaro dun a bulu. A xa yanmaro di lukantala ma, xo a xa si a pala.³⁵ Wo to, alu hakili soto, bawo alu man lutigo nawaxato lon. A si na suwo damuto ba, a si na dugutala ma ba, a si na duntunxumo le ben ba, walla saxo ma, alu man wo lon.³⁶ Alu sila, a xana na alu ju, x'alu tara sinnoxo la.³⁷ Ñ xa men fo alu ñen, ñ be bee le ma: "Alu tu i pala." »

14 Tili fula tuta Tanbinxansallo nin Buurufuunulantan sallo la, sadaxalasibaxa kuntigolu nin sariya karanmoxolu xa feere ñinin, i si Isa muta xalixaliya la ña men, x'a faxa.² I xo: «A xana ke sallo to, nin wo nte, jama si muruti.»³ Isa tun be Betani, bagitoxe Simon na luwo ma. X'a tu domolo la, muso do nin kurudaxandin daxolenjo nata. Wo be fanin tulu sumadimanjo do la. Wo tulu sumadimanjo toxo xo nare. Wo tun mu tulu hooro le ti, men da xa xole. A xa daxandin in dayele, x'a tulo bon Isa kunjolu xan.⁴ Moxo dolu diminta x'a fo xo: «Ñin tulu sumadiman in tija kunjolu? »⁵ A tun si fiiri depe xaaliso keme saba nin do la, xa wo xaaliso di segebaxantunjolu ma.» I diminta wo muso xoto.⁶ Bari Isa xo: «Alu fata a ma, alu b'a toorola mun na? A xa ku ñuma le ke nte ñen.⁷ Alu nin segebaxantunjolu be i ñoxo xan tuma bee, a je diya alu ñen tumo men, alu si ñuma ke i ñen. Bari alu nin nte nte tula kadawu.⁸ Sinjo men b'a ñen, a xa wo le ke. Sumadiya men xa xan xa ke ñ fure ma, a janxa wo le ke ñ ma, x'a tara a man si.⁹ Tonja la, nte b'a fola alu ñen xo: xibaru Dimanjo je fo duniya jan wo jan, musu in na ñin kebaara in si laxali je, xa moxolu hakilo lajigi a kun.»¹⁰ Isa xa xarandin tan nin fulo men sugandi, wolu to kilin, a toxo xo Yudasi Isikariyoti, wo taxata sadaxalasibaxa kuntigolu bata, xo a si Isa dun i bulu.¹¹ Wolu xa wo me tumo men, i ñanata, xa lahido ta a ñen, xo i si xaaliso di a ma. Wo to, Yudasi xa waxati ñuma do ñinin, nin a si Isa dun i bulu.¹² Buurufuunulantan sallo lun folo, Yahudiyalu dalita xa Tanbinxansallo saaxandinjo sadaxa lun men, Isa la xarandinjolu x'a ñininxa xo: «Í b'a fe n xa taxa Tanbinxansallo domolo toben í ñen min?»¹³ A x'a la xarandin fula bula xa taxa, x'a fo wolu ñen xo: «Alu taxa gallo xono. Alu nin xe do si ben, ji-

daxo be siginin a kun, alu s'a lo a nofe. ¹⁴ A je dun luwo men ma, alu s'a fo wo lutigo nen xo: "Karanmoxo xo, xo a nin a la xarandinjolu be Tanbinxansallo domolo kela bunjo men xono, wo be min." ¹⁵ Wo si bunba to-benninjo yita alu la sankansuwo sanjo to, miranjolu b'a xono. Alu si n na domolo toben non.» ¹⁶ Xarandinjolu taxata, xa dun gallo xono. Isa x'a fo i pen na men, i x'a bee tara wo na ma. I xa Tanbinxansallo domolo toben je. ¹⁷ Suwo kuta tumo men, Isa nin a la xarandin tan nin fulo nata. ¹⁸ X'e tu domolo la, Isa xo: «Tonja la, n' b'a fola alu pen xo, n' nin atelu mennu fele domolo la, alu do be nala n' dunna bulo to.» ¹⁹ Xarandinjolu juso xasita. I bee kilin kilin keta a ma x'a njinxaxo: «Nte le mu ba?» ²⁰ A x'e jaabi xo: «Alu tan nin fulo to do le mu, nte nin men be a bulo lajigila domolo to i joxo la. ²¹ Moxo Dinxe si sa i xo a be safenin a la kuwo to na men. Bari moxo men be nala Moxo Dinxe dunna bulo to, bone be wo tigo pen. A tun xa fisa wo tigo ma, a xana haali bo duniya to.» ²² X'e tu domolo la, Isa xa buuro ta, xa barako bula Ala pen. Wo xo, a x'a tokutun x'a di a la xarandinjolu ma, a xo: «Alu hun! Nin mu n' balo le ti.» ²³ Wo xo, a xa minfen jipoto ta, xa barako bula Ala pen, x'a di i ma. I bee xa do min. ²⁴ A xo i pen xo: «Nin mu n' jelo le ti, Ala la Kafuxanjo jelo, men bonta moxo kiika pen. ²⁵ Tonja la, n' b'a fola alu pen xo, n' me resenjo jiyo min tugun, fo lunjo men, nin n' be nala a kuto minna Ala la Mansaya xono.» ²⁶ I xa Alatan-tu donkilolu la tumo men, i bota xa taxa Oliwe kuro to. ²⁷ Isa x'a fo a la xarandinjolu pen xo: «Alu bee si i bori xa n' kilin tu, bawo a be safenin Kitaabo to xo: "N' si negaanila faxesa, saaxolu si jenjen." ²⁸ Bari nin n' kunita xa bo furelu to, nte si bula alu na xa taxa Galile maro la.» ²⁹ Piyere xo a pen xo: «Haali nin bee x'e bori i ma, nte ken me n' bori i ma.» ³⁰ Isa xo a pen xo: «Tonja la, n' b'a fola i pen xo, bi su in to fan, jannin duntunjo xa kokori fulananjo ke, i si i xaro i xo sinja saba, xo i man nte lon.» ³¹ Bari Piyere x'a fo a pen tugun, x'a xoleya a ma xo: «Haali nin nte nin i be sala le, nte me n' xaro a la, xo n' man i lon.» Xarandin to dulu bee xo ten. ³² I nata yirifuuto do to, xo Jetisemane. Isa xo a la xarandinjolu pen xo: «Alu tu jan, n' be taxala Ala matarala.» ³³ A nin Piyere nin Yaxuba nin Yaya taxata. Jusutego nin silanpaba boyita a mutala. ³⁴ A xo i pen xo: «N' juso be xasinin, fo n' be njinin xa sa. Alu tu jan, xa tu i pala.» ³⁵ A taxata na dondin, x'e boyi dugo ma, xa Ala matara, xo nin a si ke no, a x'a kisi wo waxato tooro ma. ³⁶ A tun b'a fola xo: «Baaba, n' Fa, ite me kori ku ma. Nin tooro jipoti in soobo nte la! Bari nte sago xana ke, ite ta le xa ke!» ³⁷ Wo xo, a nata, xa xarandinjolu tara sinnoxonin. A xo Piyere pen xo: «Simon, i be sinnoxola ba? I korita tula i pala haali leere kilin xono ba? ³⁸ Alu tu i pala xa Ala matara, walasa alu xana xotobo. Jusukunjo be sonnin, bari balasubo barako xa doxo.» ³⁹ A x'e soobo i la tugun xa taxa Ala matara, xa saagi a la xumaxan

kilin innu ma. ⁴⁰ Wo xo, a nata tugun x'e tara sinnoxola, bawo sinnoxo tun be i na to kujaxu. I tunnu man a lon i s'a jaabi men na. ⁴¹ Sinja sabananjo to, a nata, a xo i pen xo: «Haalibi alu be sinnoxola, x'e tofojo. A waseta ten. Waxato sita. Saasa, Moxo Dinxe be nala dunna junubekelalu bulu. ⁴² Alu wuli, alan xa taxa. Moxo men be n' dunna bulo to, wo fele.» ⁴³ X'a tu xumo la, Yudasi, nin wo mu a la xarandin tan nin fulo to kilin ti, wo nata, a nin jamaba. Fanjolu nin gumalu tunnu be i bulu. Sadaxalasibaxa kuntigolu nin sariya karanmoxolu nin moxobalu tunnu xa wolu ki. ⁴⁴ Yudasi, men be nala Isa dunna bulo to, wo tun xa taagumansedo do di a mutabaxolu ma xo: «N' je men baataya xonton, wo le mu. Alu si wo muta, xa taxa a ti, x'a lakorosi bete.» ⁴⁵ Yudasi sita doron, a x'e sodun Isa la x'a fo a pen xo: «Karanmoxo!» Wo xo, a x'a baataya xonton. ⁴⁶ Wo to, i tolu xa Isa muta. ⁴⁷ Isa nofemoxo do x'a la fanjo boosi, xa sadaxalasibaxa kuntigiba la jonxe tulu kilinjo carun. ⁴⁸ Isa xa xumo ta x'a fo i pen xo: «Alu nin fanjolu nin gumalu nata xa nte muta, a be i xo nin nte mu boyinxannila le ti. ⁴⁹ Nte tun nin alu be i joxo xan lun wo lun Alabatusuba xono, xa moxolu laxaran. Alu dunnu man nte muta non de! Bari wo na ma, Kitaabo xa men fo nte la kuwo to, wo keta.» ⁵⁰ A la xarandinjolu bee x'e bori, x'a tu je. ⁵¹ Xamarindinjo do tun be Isa nofe; butiranjo doron ne tun b'a balo ma. I xa wo du muta. ⁵² Bari a x'a la butiranjo tu i bulu, a balamaxulunjo x'e bori xa taxa. ⁵³ Wo xo, i taxata Isa ti sadaxalasibaxa kuntigiba la luwo ma. Sadaxalasibaxa kuntigolu nin moxobalu nin sariya karanmoxolu bee x'e joxo lakamari non. ⁵⁴ Piyere x'e tu dulajan, x'a lo Isa nofe, fo xa si sadaxalasibaxa kuntigiba la luwo ma. A x'e sigi garadolu senbo to, x'e ja ta la. ⁵⁵ Sadaxalasibaxa kuntigolu nin Yahudiyalu la Kiititegekafo bee tun be seedolu njinna, xa Isa jalagi, i s'a faxesa na men. Bari i man jalagikun soto a ma. ⁵⁶ Moxo kiika xa seedejaxuya ke a xanma. Bari i la seedyalolu man ke kilin ti. ⁵⁷ Wo to, moxo dolu wulita xa Isa seedejaxuya. ⁵⁸ I xo: «N' x'a me a fola xo: "Nin Alabatusuba in men, nin moxo bulo x'a lo, nte si wo te, xa do xote lo tili saba xono. Moxo bulu me wo lo." » ⁵⁹ Wo bee nin a ta, i la seedyalolu man ke kilin ti. ⁶⁰ Wo to, sadaxalasibaxa kuntigiba wulita x'e lo jama to, xa Isa njinxaxo: «Nin moxo innu be men fola i ma, i nte wolu jaabila ba?» ⁶¹ Isa tuta denin, a man fusi fo. Sadaxalasibaxa kuntigiba x'a njinxaxo: «Ite le mu Kirisita ti ba, Duwawotigo Dinxe?» ⁶² Isa xo a pen xo: «Nte le mu. Alu si Moxo Dinxe sigininjo je Sinjobeetigo Ala kininbulo xoto, x'a nato je xabolu xan, xa bo sanjo to.» ⁶³ Isa xa wo fo tumo men, sadaxalasibaxa kuntigiba diminta fo x'a fan na doroko tofara. A xo: «N' maakuwo be seede jomannu la tugun?» ⁶⁴ Alu fannu x'a la Ala toxotijnaxumo me. Alu xo di?» Bee x'a jalagi, xo a xa xan ne xa faxesa. ⁶⁵ Dolu xa dajiyo tuppua ma. Dolu x'a na siti x'a juri, x'a fo a pen xo: «Ki-

laya ke, xa í lippabaxo fo!» Garadolu dulu x'a mafenta. ⁶⁶ Piyere tun be dugo ma, sadaxalasibaxa kuntigiba la lukeno ma. Wo la baaradinmuso do nata. ⁶⁷ A xa Piyere je í jala. A x'a mafele, a xo a pen xo: «Íte du tun nin Nasaretinga Isa be le i joxo fe!» ⁶⁸ A x'é xaro a la xo: «Nte man a lon, anin n' man a faamu, ite b'a fe xa men fo.» Wo xo, a bota non xa taxa bulunjo xono. Duntunjo kokorita. ⁶⁹ Baaradinmusu in xa Piyere je. A xo non du moxolu pen xo: «Moxo innu do le mu nin ti.» ⁷⁰ A x'é xaro a la tugun. Wo xo dondin, moxo tunnu be non, wolu x'a fo Piyere pen tugun xo: «Sikka nt'a to, í mu i do le ti, bawo í mu Galilengo le ti.» ⁷¹ Bari Piyere keta a ma x'é xali x'a fan danga xo: «Alu fele nin xe in men na xumo fola, nte man wo lon!» ⁷² Wo no bee to, duntunjo do kokorita sinja fulananjo to. Piyere haki lo jigita Isa la xumo la xo: «Jannin duntunjo xa kokori sinja fula, í s'í xaro nte la í xo sinja saba.» A bota tariya, xa ke a ma xa xasi.

15 Saxo ma junna, sadaxalasibaxa kuntigolu nin moxobalu nin sariya karanmoxolu anin Yahudiyalu la Kiititegekafo muume bee x'e joxo je. Wo xo, i xa Isa siti, xa taxa a dun Goferenere Pilate bulu. ² Pilate x'a njinxa xo: «Í mu Yahudiyalu la mansaxe le ti ba?» Isa x'a jaabi xo: «Nte mu wo le ti, a be í xo í x'a fo na men.» ³ Sadaxalasibaxa kuntigolu x'a jalagi ku kiika to. ⁴ Pilate x'a njinxa tugun, a xo a pen xo: «I be í jalagila kuwo mennu bee to, í nte jaabi dila ba?» ⁵ Bari Isa man jaabi si ke tugun. Wo xa Pilate dabaro ban bete. ⁶ San wo san Tanbinxansallo to, Pilate tun si kasolamoxo kilin bula. Jama je men njin a la, a si wo bula. ⁷ Awa, wo x'a tara, xe do tun be kaso la, a toxo xo Barabasi. A nin a tojoxolu tunnu be kaso la bawo i tunnu murutita, xa moxo do faxa wo murutilo sinfe. ⁸ Jama taxata Pilate bata, x'a matara xo a dalita xa men ke i pen san wo san, a xa wo ke. ⁹ Pilate xo i pen xo: «Alu b'a fe ba n' xa Yahudiyalu la mansaxe bula alu pen?» ¹⁰ Bawo a x'a je xo Isa la kuwo kiiliya le x'a tu, sadaxalasibaxa kuntigolu x'a dun bulo to. ¹¹ Bari sadaxalasibaxa kuntigolu xa jama xontosuruxu, xo i x'a fo Pilate pen xo a xa Barabasi le bula. ¹² Pilate xumata i pen tugun, a xo: «N' dun si mun ke Isa la, alu be men kilila xo Yahudiyalu la mansaxe?» ¹³ I fetenta tugun xo: «A gengen yiro ma!» ¹⁴ Pilate xo i pen xo: «A xa mun kujaxu le ke?» I fetenbeteta xo: «A gengen yiro ma!» ¹⁵ Pilate tun b'a fe xa jama sago ke. Wo to, a xa Barabasi bula, a x'a tu Isa xa buwo gajo la, wo xo, x'a dun i bulu, a xa gengen yiro ma. ¹⁶ Sorodasolu nin Isa taxata goferenero la lukeno ma, x'e tojoxolu kamari je. ¹⁷ I xa mansadoroke wulenjo dun a xanna, xa mansakufuno dara njaninjo la, x'a ke a kunjo la. ¹⁸ I boyita a xontonna xo: «Yahudiyalu la mansaxe, í nin sege!» ¹⁹ I x'a lippa a kunjo to guma la, xa dajiyo tuppu a ma, x'e jongi dugo ma, x'e buti a xoto í xo nin i b'a batula. ²⁰ I x'e soto jelela a ma tumo men, i xa

dorokeba wulen in bo a xanna, x'a fan na faanolu dun a la. Wo xo, i x'a labo, xa taxa a gengen yiro ma. ²¹ X'e taxato tu, i xa xe do tanbito je bola wulo to. Wo mu Sireninga Simon ne ti, Alekisandere nin Rufusi fa le mu. Sorodasolu xa wo diyakuwa, x'a bula Isa gengen yiro tala. ²² I taxata Isa ti dula do xo Goligota, wo xoto: «Kunxuludula.» ²³ I xa dolo nin mire njaxaminjo di a ma, xo a x'a min, bari Isa man son a to. ²⁴ I x'a gengen yiro ma, x'a la faanolu tala, xa dokkolo ke, walasa bee x'e ta lon. ²⁵ I x'a gengen yiro ma saxo ma, tilo wololafa. ²⁶ I x'a jalagikunjo safe yiro ma a kunnamato xo: «Yahudiyalu la mansaxe.» ²⁷ I x'a nin boyinxannila fula gengen yiro ma i joxo la. Kilin b'a kininjo, do b'a numanjo. [²⁸ Wo na ma, Kitaabo xa xumo men fo xo: «A jaateta kujaxukelalu do ti», wo dafata.] ²⁹ Tanbibaxolu tunnu s'a nani, x'e kunjolu todon xo: «Unhun! Ite men be Alabatusuba tela, x'a tolo tili saba xono, ³⁰ í fan kisi xo! Jigi xa bo gengen yiro xan!» ³¹ Sadaxalasibaxa kuntigolu nin sariya karanmoxolu du tunnu be jelela a ma. I xo i joxo pen xo: «A xa dolo kisi, bari a korita a fan kisila. ³² Kirisita! Banisirayila mansaxe! Jigi saasa xo, xa bo yiro la, walasa ntelu xa wo je, xa la í la!» A gengenjoxolu du tunnu b'a nanila. ³³ Tilinkunte tumo, dibo dunta jamano bee xono, fo xa si wura ma. ³⁴ Wo tumo, Isa fetenbeteta xo: «Eloyi, Eloyi, lama sabaxxatani?» Wo xoto xo: «N' na Ala, n' na Ala, mun na í xa n' bula?» ³⁵ Moxo men tunnu be lonin je, wolu dolo xa wo me tumo men, i xo: «A be kila Eli kilila!» ³⁶ Do woman in x'é bori xa taxa fuulanjo bula binegoro to, x'a den guma la, x'a di Isa ma, nin a s'a susu. A xo: «Alu i lo, alan x'a mafele nin kila Eli si na a lajigi jan.» ³⁷ Bari Isa fetenbeteta, wo xo, a sata. ³⁸ Faanuba men tun be Alabatusuba xonototegenin, wo farata fula ti, x'a ta santo ma fo xoto. ³⁹ Sorodasi jalatigiba men tun be lonin Isa nafe, wo xa Isa sapa je tumo men, a xo: «Tonja la, nin xe in mu Ala Dinxe le ti!» ⁴⁰ Muso do dulu tunnu be lonin dulajan, x'a mafele. Magidala Mariyama nin Yaxubandinjo nin Sose na Mariyama, anin Salome tunnu be wolu to. ⁴¹ Xa Isa tu Galile, wo tunnu b'a nofe, x'a haajolu njaja; i nin musu kiika xotelu, mennu nin a taxata Yerusaleme. ⁴² Wura sita. Wo lunjo tun mu sallinasigilunjo le ti, wo lun do le tun mu tofopolunjo ti. ⁴³ Arimate Yusufu nata, wo mu Yahudiyalu la Kiititegekafo to moxo lonninba do le ti. Ate tun be Ala la Mansaya la nalo maxononin. A fatiyata xa taxa Isa fure njin Pilate la. ⁴⁴ Pilate x'a me xo Isa sata xa ban, wo x'a dabaro ban. A xa sorodasi jalatigiba kili, x'a njinxa xo fo Isa satumo meta. ⁴⁵ A xa sorodasi jalatigiba la jaabo soto tumo men, a sonta Yusufu xa Isa fure ta. ⁴⁶ Wo xa kasanke san, xa Isa fure lajigi gengen yiro xan. A x'a kasanke, xa taxa a lasi xaburo xono. Wo xaburo tun jagata kuro to. A xa kuruba do birigintin, x'a ke xa xaburo dataxun. ⁴⁷ Magidala

Mariyama anin Sose na Mariyama, wo tunnu be Isa ladula mafelela.

16 Yahudiyalu la tofopolunŋo lun do, Magidala Mariyama, nin Yaxuba na Mariyama, anin Salome xa sumadiyalu san x'e be taxala i kela Isa fure ma. ²Yahudiyalu la loxokunŋo lun folo, nin wo mu alahado ti, saxo ma junna, tilo bowaxato, i taxata Isa xaburo da la. ³I taxato tun b'a fola i joxo nen xo: «Jon si kuru in birigintin n nen, x'a bo xaburo da la?» ⁴I x'e na xotota tumo men, i x'a je xo kuru in birigintinta, xa bo xaburo da la. ⁵I dunta xaburo xono. I xa xamarindinŋo do tara siginin i kininŋo xoto, dorokexoyi janba b'a xanna. Wo x'e lasila jaxu. ⁶Bari wo xo i nen xo: «Alu xana sila! Nasareti Isa men gengenta, alu be wo le njinna. A nte jan, a kunita! Alu na a mafele, a tun be lanin dula men!» ⁷Alu taxa a fo Piyere nin a la xarandin tolu nen, xo a be i na Galile, xo i b'a jela non ne, í xo a tun x'a fo i nen na men ma.» ⁸I bota xaburo xono, x'e bori xa taxa, bawo i silata fo i si jarajara. Xonotofili kujaxo bulu, i korita fen fola moxo nen. [⁹Isa kunita loxokunŋo lun folo saxo ma. A folota x'é yita Magidala Mariyama la, a tun xa jinne woorowula xoyi wo men to. ¹⁰Magidala Mariyama taxata xibaro fo Isa taxam-

apoxolu nen. Wolu tunnu jusukunŋo tooroninŋo be xasila. ¹¹Bari i x'a me tumo men xo Isa b'é nila tugun, anin xo Mariyama x'a je, i man la a la. ¹²Wo xo, Isa x'é yita na xote ma, a la xarandin fula la, x'e taxato tu gallo do to. ¹³I x'e koppa, xa taxa a fo xarandin tolu nen. Bari haali wo, i man lannaya ke. ¹⁴Wo bee xo, a x'é yita a la xarandin tan nin kilinŋo la x'e tu domolo la. A x'e madigaamu i la lannayabaliya nin i la jusukunxoleya to; bawo mennu x'a kunininŋo je, i man la wolu la. ¹⁵Wo xo, a xo i nen xo: «Alu taxa duniya bee to, xa xibaru Dimanŋo waajulo ke moxolu bee nen. ¹⁶Moxo men je lannaya ke, xa batise, wo si kisi. Bari moxo men man lannaya ke, wo si jalagi. ¹⁷Taagumanseedolu fele, lannayabaxolu si mennu ke: I si jinnolu xoyi x'e bo moxolu to nte toxo la, i si xan xotelu fo. ¹⁸Haali nin i xa salu muta i bulu, walla xa moxofaxafenŋo min, wo me ku ke i la. I s'i bulolu la jangarutolu xan, xa Ala matara, wolu si kendeya.» ¹⁹Marigi Isa x'é soto wo xumo bee la tumo men, a layeleta sanŋo to, xa taxa í sigi Ala kininŋo fe. ²⁰Wo keninma, xarandinŋolu taxata waajulo ke dula bee. Marigi Isa tun be i deemala i la baaro bee to. I tunnu be taagumanseedolu kela Marigi barako to, mennu x'a yita xo i la xumolu mu tonja le ti.]

LUKA

1 Namoxoba Tewofili, kuwo mennu keta n bata, moxo kiika x'a mafele xa wolu safe. 2 Moxo dolu xa Isa la kuwolu je i na la kabirin a damuto. Ala la xumo waajulo xarifata i ma. Wolu xa kuwolu laxali n pen na men, wo safelilalu x'e safe wo na in ne. 3 Tewofili, wo le x'a tu, kuwo mennu bee keta kabirin a damuto, n du xa wolu segesege. Nte x'a je xo a xa nin nte du x'e safe i pen, x'e la i joxo da la. 4 N x'a ke le walasa i xa xarango mennu soto, i x'a lon xo wolu mu keso le ti. 5 Yude mansaxe Herode la waxato, sadaxalasibaxo do tun be je, a toxo xo Sakariya. Abiya sadaxalasibaxolu jama moxo do le mu. A musu toxo xo Elisabeti. Wo tun mu sadaxalasibaxa kuntigiba Haruna bonsongo do le ti. 6 I fulo tun bee be tilinnin Ala na xoto. I tunnu be Marigi la sariyalu nin a la ku lategeninngolu bee dafala. 7 Bari din tun nte i bulu, bawo Elisabeti tun mu wulubalo le ti, anin du i fulo bee tun xotota xa ban. 8 Lundo, Sakariya tun be a la sadaxalasibaxaya baaro la Ala na xoto, bawo itelu la jama le tun na baaraloxo mu. 9 X'a la sadaxalasibaxolu la laado xan, dokkolo xa ate yita xo a xa dun Marigi la dula Senumanba xono, xa je siisi digico la. 10 Xa Sakariya tu digico janila, jama bee tun be keno ma xa Ala matara. 11 Marigi la melekiyo do woman in x'e yita a la lonin sadaxajanilango kininngo mafan, digico be janila men xan. 12 Sakariya xa melekiyo je tumo men, a ja wulita, a silata. 13 Melekiyo xo a pen xo: «Sakariya, i xana sila; katugala Ala x'e la taralo muta. I musu Elisabeti si wulu dinxe la i pen, i s'a toxola xo Yaya. 14 I niyo si sewo bete a la kuwo to, moxo kiika si paxali a wuluwo la, 15 bawo a si ke moxoba ti Marigi bulu. A me dolo min, a me minfen fatiman xote min. A si fa Ni Senunngo la kabirin a man wulu. 16 A si Banisirayila moxolu kiika lakoppa Marigi i la Ala ma. 17 A s'i taxama Ala na xoto Ni Senunngo barako to anin sintigiya la, i xo kila Eli, walasa xa falu nin dinngolu laben, xa moxo murutinngolu hakilo yeleva x'e bula moxo tilinninngolu la silo xan. A si siya do toben Marigi pen.» 18 Sakariya xo melekiyo pen xo: «N si wo lon na di? Nte xotota xa ban, n musu du xotota?» 19 Melekiyo x'a jaabi xo: «Nte mu Jibirilu le ti, n be Ala senbo to x'a la baaro ke. A xa n ki xo n xa na nin xibaru diman in fo i pen. 20 Awa, i si ke muumuwo ti fo xa taxa si nin ku inu bee dafawaxato ma, katugala i man la n na xuma foninngolu la, wo mennu xa xan xa ke i waxato.» 21 Jama ken tun be Sakariya laxononin. I dabaro banta, bawo a

meta Alabatusuba xono. 22 A boninma, a korita xumala i pen; moxolu x'a faamu xo Ala xa fen ne yita a la Alabatusuba xono. A xa taagumansedolu ke i pen, bari a muumuyaninngo tuta. 23 Sakariya la baaro banta Alabatusuba xono tumo men, a taxata a bata. 24 Wo xo, Sakariya musu Elisabeti xa xono ta, a x'e namadugu xaru luulu xono. A tun b'a fola xo: 25 «Marigi xa men ke nte pen, wo fele: Din wulubaliya men tun malo be n na, moxolu nala, a xa wo bo n na.» 26 Xaru woornango la, Ala x'a la meleke Jibirilu ki Galile gallo do to, xo Nasareti. 27 A x'a ki xarafandin xelonbalo do ma, wo toxo xo Mariyama. Wo x'a tara futuwo lategeta Mariyama nin Dawuda bonsonngo do te, nin wo mu Yusufu ti. 28 Melekiyo dunta a bata, a xo: «Mariyama, n b'e xontonna, ite men xa Ala la neemo soto. Marigi be i bata.» 29 Wo xumolu xa Mariyama xonotolafilu. A x'e miiri nin xontonninnga in xoto si ke men ti. 30 Melekiyo xo a pen xo: «Mariyama, i xana sila, katugala i xa Ala la neemo soto. 31 A fele, i si xono ta, xa wulu dinxe la. I si a toxola xo Isa. 32 A si ke moxoba ti. A si kili xo Ala Xototaninba Dinxe. Marigi Ala si a mamaxe Dawuda la mansasigilango di a ma. 33 A si ke mansaxe ti Yaxuba xabiilo konna fo abada. A la mansaya me ban muume.» 34 Mariyama xo melekiyo pen xo: «Wo si ke na di, nte dun man xe lon abada?» 35 Melekiyo x'a jaabi xo: «Ni Senunngo si jigi i xan, Ala Xototaninba si a la sintigiya buuri i konna. Wo le x'a tu, i be nala din senumanngo men bangela, wo si kili xo Ala Dinxe. 36 I badinmusu Elisabeti du xonoma fele dinxe la, x'a tu a xotota. A fota xo wo men mu wulubalo ti, a xono be xaru wooro la saasa. 37 Ala me kori ku ma.» 38 Mariyama xo: «N mu Marigi la jonmuso le ti. A xa ke n pen i xo i x'a fo na men.» Wo xo, melekiyo bota a bata. 39 Wo waxato, Mariyama wulita x'e tariya xa taxa Yude maro kuro xan, xa taxa gallo do to non. 40 A dunta Sakariya la luwo ma xa Elisabeti xonton. 41 Elisabeti xa Mariyama la xontonnixanngo me tumo men, a dinngo x'e lamaxa a xono. Elisabeti fata Ni Senunngo la. 42 A fetenbeteta x'a fo xo: «Duwa be i fe xa tanbi muso bee xan; i be nala dinngo men du bangela, duwawo be wo fe. 43 Nte mu jon ti nin n Marigi na be nala nte bata? 44 Awa, kabirin n x'e xontonnixanngo me, nin n dinngo papaninggo x'e lamaxa n xono. 45 Heero b'e fe, bawo Marigi xa men fo i pen, xo a s'a ke, i lata wo la.» 46 Mariyama xo: «N be Marigi tantula n jusukunngo la. 47 Nte paxalininngo be n Kisibaxa Ala barako to, 48 ba-

wo a x'a la jonmuso majigininngo mafele. Tili natalu, moxolu bee s'a fo xo heero be n fe; ⁴⁹ bawo Sinjobeeti-go xa kubalu ke nte pen. A toxo xa senu. ⁵⁰ Mennu be silala a na, a la hinno be wolu bonsonjolu nin i bonsonjolu nen, fo abada. ⁵¹ A x'a barako yita xa kubalu ke, xa fankekutolu jenjen. ⁵² A xa faamalu lajigi xa bo i la mansasigilannjolu xan, xa moxo majigininngolu xotota. ⁵³ A xa xonxotolu lafa domoli beto la; a xa fentigolu bulutoxulunngo bula xa taxa. ⁵⁴ A x'a la baaradin Banisirayila deema: A hakilo tuta a la hinno la ⁵⁵ Burehima nin a bonsonngo pen, fo abada, í xo a tun xa wo lahido ta n mamaxelu nen na men.» ⁵⁶ Mariyama xa xaru saba noxon ke Elisabeti bata. Wo xo, a x'é koppa a la luwo ma. ⁵⁷ Elisabeti wulutumo sininma, a wuluta dinxe la. ⁵⁸ Elisabeti sigijoxolu nin a badinjolu x'a me xo Marigi x'a la hinnayeba yita a la, wolu nin a naxalita. ⁵⁹ Dinngo wuluwo tili sago, i nata a naxo to. I tunnu b'a fe x'a toxola a fa Sakariya la, ⁶⁰ bari dinngo na xo: «Ayi, a si toxola xo Yaya.» ⁶¹ Bari i xo a pen xo: «Í la moxo si toxo nte Yaya ti.» ⁶² I xa dinngo fa komosi xo a b'a fe a dinngo xa toxola jon na. ⁶³ Sakariya xo x'e xa walaho di a ma. A x'a safe walaho xan xo: «Yaya le mu a toxo ti.» I bee dabaro banta wo la. ⁶⁴ Wo no bee to, Sakariya x'a da nin a nenngo soto tugun. A woman in keta a ma xa Ala tantu. ⁶⁵ Wo keninma, i sigijoxolu bee silata. Moxolu tunnu be wo kuwolu xiidefatala Yude maro kuro xan, dula bee. ⁶⁶ Moxo fen wo fen xa wo kuwolu me, wolu keta a ma x'e miiri xo: «Nin dindin in si na ke mun ti?» I xa wo fo, bawo Marigi la sintigiya tun b'a fe. ⁶⁷ Dindinngo fa Sakariya fata Ni Senunngo la. A keta a ma xa nin kilaya xuma innu fo xo: ⁶⁸ «Tanto be Marigi pen, Banisirayila la Ala, bawo a x'a hakilo tu a la moxolu la, x'e bo bulo to. ⁶⁹ A xa kisibaxa barakema di n ma, xa bo a la baaradin Dawuda bonsonngo to. ⁷⁰ A tun xa wo fo kabirin tuma jan a la kila senumannjolu da la, ⁷¹ x'a si n bo n jaxolu bulu, xa n bo n xonneyabaxolu bee la fango xoto; ⁷² x'a si a la hinno yita n mamaxelu la, x'a hakilo tu a la Kafuxan senumannngo la. ⁷³ A tun x'é xali n maxe Burehima nen, ⁷⁴ x'a si n bo n jaxolu la fango bulu, walasa n hakilo lasigininngo xa baaro ke a pen, ⁷⁵ xa senuya, xa tilin a na xoto n na nilamaya bee xono. ⁷⁶ N din, ite du si kili xo Ala Xototaninba la kila, bawo í si bula Marigi na, x'a la silo toben. ⁷⁷ Í s'a fo a la moxolu nen xo a s'i la junubolu yaafa, x'e kisi. ⁷⁸ Bawo dan nte n na Ala la hinno nin a la pumaya ma; a si saxuyelo keneya bo n xan xa bo sanngo to, ⁷⁹ walasa mennu be suwo nin saya dibo to, a xa keneya bo wolu nen, xa n bula heero silo xan.» ⁸⁰ Dindinngo ken tun be bunpaxan, xa hakilitigiya soto. A tuta wulo xono fo a x'é yita Banisirayila dinngolu la lunngo men.

2 Wo waxato, Rome mansaxe Ogusiti x'a latege, xo xa duguxulo moxo bee toxo safe. ² Wo toxosafe folo xa Kirinisi tara goferenereya la Siri kunna. ³ Moxo bee taxata i safe i wulugallo to. ⁴ Yusufu du bota Galile

gallo do to, xo Nasareti, xa taxa Yude maro to, xa taxa Dawuda la gallo to, Betileheme, bawo Dawuda bonsonngo nin a la xabiilo moxo do le mu. ⁵ A nin a mamutamuso Mariyama taxata i safe je, x'a tara wo xonoma. ⁶ X'e tu je, Mariyama wulutumo nata si. ⁷ A wuluta a dinxe folo la. A x'a lala faano to, x'a bula marafen danjininxulunngo xono, katugala i man dula soto luntanjigidula. ⁸ Saaxanegaanilalu tunnu be non namininngo to. Wo tunnu be sila i nala wulo xono, x'e la marafenngolu korosi. ⁹ Marigi la melekiyo do nata i ma. Marigi nooro keneya x'e laminin. I silata fo xa danmatanbi. ¹⁰ Melekiyo xo i nen xo: «Alu xana sila, katugala n nata xibaru dimanngo le fo alu nen. Wo xibaro si moxolu bee nitodiya. ¹¹ Kirisita wuluta alu nen bi, mansaxe Dawuda la gallo to. Ate le mu Kirisita nin Marigi ti. ¹² Nin si ke alu nen taagumansseedo ti: Alu si deenano murugumurugininngo tara lanin faano to, marafen danjininxulunngo xono.» ¹³ Wo no bee to, melekiyolu kiika kafuta wo melekiyo ma, xa Ala tantu. ¹⁴ I xo: «Tanto be Ala nen, men be sanjanba to. Heero xa ke duguxulo xan, a la moxo sugandininngolu nen.» ¹⁵ Melekiyolu taxaninma sanngo to, saaxanegaanilalu xo i noxo nen xo: «Alan xa taxa fo Betileheme, x'a je men keta, anin Marigi xa men yita n na.» ¹⁶ I x'e tariya xa taxa; xa Mariyama nin Yusufu je, xa deenano je lanin marafen danjininxulunngo xono. ¹⁷ I x'a je tumo men, men fota i nen deenano la kuwo to, i dunta wo na to, x'a fo. ¹⁸ Moxo fen fen xa negaanilalu la xumo lame, wolu bee dabaro banta. ¹⁹ Mariyama du xa wo kuwolu bee mara a hakilo la, x'é miiri i xoto ma. ²⁰ Wo xo, negaanilalu x'e koppa. I taxato tun be Ala bunpala x'a tantu, katugala i xa men me, i xa wo je, í xo a fota i nen na men. ²¹ Dindinngo tun xa xan xa naxa lunngo men, nin wo mu a wuluwo tili sago lunngo ti, a toxolata xo Isa. Melekiyo tun xa toxo men fo jannin a na x'a xono ta, a toxolata wo le la. ²² Mariyama senuyalilunngo sininma í xo Musa la sariya x'a fo na men, i nin dinngo taxata Yerusaleme xa taxa a di Marigi ma, ²³ bawo a be safenin Marigi la sariya xono xo: «Dinxe fololu bee xa ke Marigi ta ti.» ²⁴ Marigi la sariya xa sadaxo men fo xo: «Tubandin fula walla jenetubandin fula», i xa wo sadaxo bo. ²⁵ Xe do tun be Yerusaleme, a toxo xo Simeyon. Wo xe tun mu moxo tilininngo nin Alapasi-lanpabaxo le ti. A tun be Banisirayila la kisilo laxononin. Ni Senunngo tun nin a be i noxo fe. ²⁶ Ni Senunngo tun x'a yita a la xo a me sa, x'a tara a man Marigi la Kirisita je. ²⁷ Ni Senunngo taxata a ti Alabatusuba xono. Isa wulubaxolu nata a ti tumo men, walasa xa sariya la foninngo dafa, ²⁸ Simeyon xa dindinngo ta a bulo to, xa Ala tantu xo: ²⁹ «Marigi, í x'é la lahido latimme: Saasa í s'í la jonxe bula a xa sa heero to. ³⁰ Bawo n fan na xa í la kisilo je, ³¹ í xa wo kisilo men toben siyalu bee pen. ³² Í x'a ke keneya ti, men si í yita siyalu la, xa nooro la Banisirayila, í la moxolu xan.» ³³ Isa fa nin a na dabaro

bee banta Simeyon na xumolu la. ³⁴ Simeyon duwata i nen, x'a fo Isa na Mariyama nen xo: «Nin din in si ke moxo kiika laboyi sabaabo nin i lawuli sabaabo ti Banisrayila xono. A si ke Ala la taagumanseedo ti, soosolo si ke men na kuwo to. ³⁵ Wo si moxo kiika la miiriyalu la keno xan. Ite ken, diminŋo do s'í soxo í jusukunŋo to í xo tanbo.» ³⁶ Kila musuma do tun be je, a toxo xo Ane. Fanuyeli dinmuso do le mu. A bota Asere xabiilo to. A tun xotobeteta. A xarafa fututa xe men ma, a xa sanji woorowula ke wo kun, wo xo, wo xe sata. ³⁷ Wo xo, a tuta futubaliya la. A siyo be tan sagi sanji nin sanji naani la. A man Alabatusuba bula. A tun be baaro kela Ala nen sunŋo nin mataralo la, su nin tili. ³⁸ A du nata wo waxato fan; a tun be Ala tantula, moxo fen wo fen tun be Yerusaleme kunbolo laxononin, a xa Isa la kuwo fo wolu bee nen. ³⁹ Isa wulubaxolu xa Marigi la sariya bee dafa tumo men, i nin a x'e koppa Galile maro ma, xa na i la gallo to, nin wo mu Nasareti ti. ⁴⁰ Dindingo tun be bunŋaxan xa barako soto. Hakilitigiyaba tun b'a fe, Ala la neemo tun b'a xan. ⁴¹ San wo san, Isa wulubaxolu tunnu si taxa Tanbinxansallo ke Yerusaleme. ⁴² Isa xa san tan nin fula soto sanŋo men, i taxata wo sallo to, x'a la laado xan. ⁴³ Sallo tilolu tanbininŋo xo, i x'e koppa. Isa dindingo tuta Yerusaleme, bari a wulubaxolu tunnu nte wo xalama. ⁴⁴ I tunnu nen xo a be i taxamaŋoxolu to. I xa tili kilin ke Isa njinna i badinŋolu nin i lonŋoxolu to. ⁴⁵ I man a je tumo men, i x'e koppa Yerusaleme ma, xa taxa a njinin. ⁴⁶ Tili saba tanbo xo, i x'a tara Alabatusuba xono, siginin sariya karanmoxolu to; a be wolu lamela, x'e njinxaxa. ⁴⁷ Moxo fen fen x'a lame, wolu bee dabaro banta a la lonŋo nin a la jaabolu ma. ⁴⁸ A wulubaxolu x'a je tumo men, i dabaro banta. A na xo a nen xo: «N'í din, mun na í xa nin ke ntelu la? A fele, nte nin í fa xonotofilinŋo b'é njinna.» ⁴⁹ A x'e jaabi xo: «Mun na alu be n'í njinna? Alu man a lon ba, xo n'í xa xan xa tara n'í Fa la luwo xono?» ⁵⁰ Bari wolu man a la wo xumo faamu. ⁵¹ Wo xo, a nin i taxata Nasareti. A tun be a wulubaxolu bunŋala. A na ken tun be nin ku innu bee marala a xono. ⁵² Isa tun be bunŋaxan, do tun be kafula a la lonŋo ma. A la kuwo tun xa di Ala nen, a xa di moxo dulu bee nen.

3 Rome mansaxe Tibere la mansaya san tan nin lulunanŋo le tun mu, Ponsi Pilate tun be Yude goferenereya la. Wo waxati kilinŋo xa Herode tara Galile kunna; a badinxexa Filipe, wo be Iture nin Terakonite jamano kunna; Lisaniyasi, wo tun be Abilene kunna. ² Ane nin Kayife le tunnu be sadaxalasibaxa kuntigiya la wo tumo. Wo waxato, Ala la xumo sita Sakariya dinxe Yaya ma, x'a tu wulo xono. ³ Yaya taxata Yuruden basenbo jamano bee to, xa moxolu waaju xo i x'e xodi i la junubolu la, xa batise, nin i la junubolu si yaafa. ⁴ Nin tun safeta kila Esayi la kitaabo to xo: «Moxo do fetenxanŋo si bo wulo xono x'a fo xo: Alu Marigi la silo toben, x'a la sila mesenŋolu latilin.

⁵ Xoononolu bee si lafa, kurolo nin tintolu bee si majigi. Sila dogininŋolu si latilin. Dula jaxolu si toben. ⁶ Hadamadinŋolu bee si Ala la kisilo je.» ⁷ Jama men tunnu be naxan Yaya ma xa batise, a tun b'a fola wolu nen xo: «Foonedinnŋolu, jon x'a yita alu la, alu si kisi na men Ala la diminŋo ma, men be nanin? ⁸ Alu ke-walolu ke mennu s'a yita xo alu tuubita. Alu xana a fo i xono to xo: "N mu Burehima mamarinŋolu ti." N'í b'a fola alu nen, xo Ala si sin no xa nin kuru innu yelemax'e ke Burehima bonsonŋolu ti. ⁹ Nendo tata yirolu lillo tego xanma xa ban. Yiri wo yiri nte din numa kela, wo si tege xa fili ta to.» ¹⁰ Jama tun be Yaya njinxala, xo i xa xan xa mun ke. ¹¹ A x'e jaabi xo: «Doroke fula be men kun, wo xa kilin di feetoto ma. Baluwo be men kun, wo xa do di xonxoto ma.» ¹² Sagallemutalalu dulu nata xa batise. I xo Yaya nen xo: «Karanmoxo, ntelu xa xan xa mun ke?» ¹³ A x'e jaabi xo: «Alu xana fen muta moxo la xa tanbi sariya xan.» ¹⁴ Sorodaso do dulu x'a njinxaxa xo: «Nte dunnu xa xan xa mun ke?» A x'e jaabi xo: «Alu xana moxo diyakuwa x'a la xaaliso muta a la. Alu xana xaro la moxo la. Alu muta ke alu la sara ti.» ¹⁵ Jama ken tun nin a be siginin, xo kuba do be kela, i bee b'e miirila nin Yaya me tara Kirisita ti. ¹⁶ Yaya x'e bee kafuninŋo jaabi, a xo: «Nte ken be alu batisela jiyo le la; bari do be nala, men barako xa bun nte ti. Haali x'a la samatolu firin, nte nin wo man xan. Ate si alu batisela Ala Ni Senunŋo nin ta la. ¹⁷ A la nosurundulanŋo b'a bulu, x'a la no surundu. A si a keso ke a la kurukuro xono, bari naxa, a si ta sabalo ke xa wo jani.» ¹⁸ Yaya xa xuma xote kiika fo moxolu nen x'e tonben, xa Ala la xibaru Dimanŋo fo i nen. ¹⁹ Mansaxe Herode x'a badinxexa musu Herodiya muta a la. Yaya x'a jalagi wo to, anin a tun xa kujaxu kiika xote men dulu ke. ²⁰ Herode xa kujaxu xote kafu wolu ma, a xa Yaya bula kaso la. ²¹ Moxolu bee batiseta tumo men, Isa du batiseta. X'a tu Ala matarala, sanxulo dayeleta, ²² Ni Senunŋo bala-ma jigita a xan í xo jenetubanŋo. Xumaxanŋo do bota sanŋo to xo: «Í mu n'í Dinxe baato le ti, í la kuwo xa di bete nte nen.» ²³ Isa b'a la baaro damutala waxato men, a siyo tun be taxala tan saba san ma. Moxolu x'a jaate Yusufu dinxe ti, Yusufu bota Yeli to, ²⁴ Yeli bota Matati to, Matati bota Lewi to, Lewi bota Melesi to, Melesi bota Yanayin to, Yanayin bota Yusufu to, ²⁵ Yusufu bota Matitiya to, Matitiya bota Amosi to, Amosi bota Nahumu to, Nahumu bota Esili to, Esili bota Nagayi to, ²⁶ Nagayi bota Mate to, Mate bota Matitiya to, Matitiya bota Semeyin to, Semeyin bota Yoseki to, Yoseki bota Yoda to, ²⁷ Yoda bota Yokanan to, Yokanan bota Resa to, Resa bota Sorobabeli to, Sorobabeli bota Salatiyeli to, Salatiyeli bota Neri to, ²⁸ Neri bota Melesi to, Melesi bota Adi to, Adi bota Kosame to, Kosame bota Elimadame to, Elimadame bota Ere to, ²⁹ Ere bota Yosuwe to, Yosuwe bota Eliyesere to, Eliyesere bota Yorime to, Yorime bota Matati to, Matati bo-

ta Lewi to, ³⁰ Lewi bota Simeyon to, Simeyon bota Yuda to, Yuda bota Yusufu to, Yusufu bota Yoname to, Yoname bota Eliyakime to, ³¹ Eliyakime bota Meleya to, Meleya bota Menna to, Menna bota Matata to, Matata bota Natan to, Natan bota Dawuda to, ³² Dawuda bota Yese to, Yese bota Yobede to, Yobede bota Bowasi to, Bowasi bota Sala to, Sala bota Nason to, ³³ Nason bota Aminadabe to, Aminadabe bota Ademine to, Ademine bota Rami to, Rami bota Eseron to, Eseron bota Faresi to, Faresi bota Yuda to, ³⁴ Yuda bota Yaxuba to, Yaxuba bota Nsiyaxa to, Nsiyaxa bota Burehima to, Burehima bota Tara to, Tara bota Nasoro to, ³⁵ Nasoro bota Seruse to, Seruse bota Rehu to, Rehu bota Pelegi to, Pelegi bota Ebere to, Ebere bota Sala to, ³⁶ Sala bota Kenan to, Kenan bota Arafakisade to, Arafakisade bota Semu to, Semu bota Nuhun to, Nuhun bota Lameke to, ³⁷ Lameke bota Metusela to, Metusela bota Enoke to, Enoke bota Yerede to, Yerede bota Mahalaleli to, Mahalaleli bota Kenan to, ³⁸ Kenan bota Enose to, Enose bota Seti to, Seti bota Adama to, Adama bota Ala to.

4 Isa faninjo Ala Ni Senunjo la, a bota Yuruden bada la. Ni Senunjo taxata a ti wulo xono. ² Sentane x'a xotobo tan naani tili xono. Wo waxato, a man fusi domo. Wo tilolu tanbininma, xonxo x'a muta. ³ Wo to, Sentane xo a pen xo: «Nin í mu Ala Dinxe le ti, a fo nin kuru in xa yeleva xa ke buuro ti.» ⁴ Isa x'a jaabi xo: «A be safenin Kitaabo to xo: "Moxo nte balula domo-lifenjo doron na." » ⁵ Sentane taxata a ti sanjo to, xa duniya jamanolu bee yita a la nondin kilin to. ⁶ A xo a pen xo: «Ní si nin jamanu innu bee kuntigiya nin i naafulo di í ma, bawo wolu dunta nte bulu le; a xa di n pen x'e di men ma, n s'i di wo ma. ⁷ Nin í x'é pongi n xoto xa n batu, i bee si ke í ta ti.» ⁸ Isa x'a jaabi xo: «A be safenin Kitaabo to xo: "Í si Marigi í la Ala batu, xa baaro ke ate kilin doron pen." » ⁹ Sentane bulata a na tugun, xa taxa a ti Yerusaleme, x'a lalo Alabatusuba sanjo to, x'a fo a pen xo: «Nin í mu Ala Dinxe le ti, í tu jan x'é butun dugo ma xo, ¹⁰ bawo a be safenin Kitaabo to xo: "Ala si a la melekoyolu bula í lakantala. ¹¹ I s'í ta i bulolu to, í sinjo me xosi kuru la." » ¹² Isa x'a jaabi xo: «A fota Kitaabo xono xo: "Í xana Marigi í la Ala xotobo." » ¹³ Sentane x'a xotobo xa ban tumo men, a x'é soobo a la fo waxati xote. ¹⁴ Isa x'é xolasaagi Galile ma, a nin Ni Senunjo barako. A toxo bota jamano dula bee. ¹⁵ A tun be moxolu laxaranna i la Alabatusuwolu xono. Bee tun b'a bunjala. ¹⁶ Wo xo, Isa taxata Nasareti, a bunjata gallo men to. Tofopolunjo, a dunta Alabatusuwo xono í xo a dalita x'a ke na men. A wulita x'é lo ki-taabuxaranjo xanma. ¹⁷ I xa kila Esayi la kitaabo dun a bulu. A x'a dayele, xa dula do je x'a xaran. A safeta wo dula xo: ¹⁸ «Marigi Niyo be n fe, bawo a xa nte sugandi nin n si xibaru Dimanjo fo segebaxantunjololu pen, xa kasolamoxolu hooroyalixumo fo. A xa n ki xa fiyontolu

nalu yele, xa toorobaxatolu bo i toorobaxolu bulu, ¹⁹ xa Marigi la neemasango gangu.» ²⁰ Wo xo, a xa kitaabo dataxun, x'a dun baaradinjo bulu, x'é sigi. Alabatusuwo xono moxolu bee na tuta lonin a to. ²¹ Wo to, Isa xo i pen xo: «Alu birin bola Kitaabo xumo men namela, wo dafata bi, alu x'a lame tumo men.» ²² Bee tun be Isa la numaya fola. Xuma numa men tunnu be bola a da, wo xa bee dabaro ban. I xo: «Nin nte Yusufu dinjo ti ba?» ²³ A xo i pen xo: «Ní x'a lon pere, xo alu si nin sanda in fo n pen xo: "Jaaralikela x'a fan jaara folo. Í xa fen fen ke Kaperenahun, n xa wo bee me; jan men mu í fasuwo ti, wo noxonnu ke jan du." » ²⁴ A xo i pen tugun xo: «Tonja la, n b'a fola alu pen xo kila si me bunja soto a fasuwo la. ²⁵ Xa tonja fo alu pen, musujaxe tun xa sa Banisirayila kila Eli la waxato. Wo tumo le, sanjiyo xa san saba nin xaru wooro ke, a man na; xonxoba nata jamano bee xono. ²⁶ Bari Eli man ki wo musujaxelu fen si ma. A kita Sarepeta musujaxe do le ma. Sarepeta, wo be Sidon jamano le xono. ²⁷ Bagito tun xa sa Banisirayila kila Elise la waxato; bari fusi man kendeya wolu to fo jamanu xote moxo do, nin wo mu Siringa Naman ti.» ²⁸ Alabatusuwo xono moxolu xa wo xumolu me tumo men, i bee juso bota. ²⁹ I wulita, xa Isa labo gallo xo ma. I la gallo be siginin kuro men sanjo to, i taxata a ti wo malanjo da la, xo i b'a laparatila non na. ³⁰ Bari Isa bota i te la xa taxa. ³¹ Isa taxata Galile gallo do to xo Kaperenahun. A tun si moxolu laxaran Yahudiyalu la tofopolunjo. ³² A la xaranjo x'e dabaro ban, bawo barako tun be ate la xumolu to. ³³ Xe jinneto do tun be Alabatusuwo xono. Wo fetenbeteta xo: ³⁴ «Heyi, Nasareti Isa, mun x'é si n ma? Í nata n halagi le ba? Ní x'a lon pere xo í mu Ala la Senumanjo le ti.» ³⁵ Isa x'a madigaamu xo: «A sukki a la, í xa bo nin xe in to.» Jinno x'a laboyi jama to, wo xo, a bota a to. Bari a man fusi ke a la. ³⁶ Moxolu bee dabaro banta. I tunnu be i noxo njinxala xo: «Mun xuma mu nin ti? A be xumala jinnolu pen barako nin sintigiya to, i be bola moxolu to.» ³⁷ A toxo bota jamano bee xono. ³⁸ Isa boninma Alabatusuwo xono, a taxata Simon na luwo ma. Xandi fatin tun be Simon bitanmusu la. I x'a njinin Isa fe xo a xa a deema. ³⁹ A x'é jimi a kunna, xa xuma xolen xando pen. Xando fatata a ma. Wo no bee to, a wulita x'e haajolu ke. ⁴⁰ Tilo boyo xo, moxolu nata i la jangarutolu bee ti a bata. A x'a bulolu la i bee kilin kilin xan, x'e kendeya. ⁴¹ Jinnolu fetento bota moxo kiika to. I x'a fo xo: «Í mu Ala Dinxe le ti.» Bari a xa wolu madigaamu. A man son i xa xuma, bawo wolu x'a lon xo a mu Kirisita le ti. ⁴² Saxo yeleninma, Isa bota xa taxa wulo xono. Jama wulita a njinno la. I x'a je tumo men, i tunnu b'a fe x'a tomuta, walasa a xana bo i bata. ⁴³ Bari Isa xo i pen xo: «Ní xa xan xa Ala la Mansaya xibaru Dimanjo waaju gallu to dulu to; bawo Ala xa n ki wo le la.» ⁴⁴ A taxata Yude maro xono xa waajulo ke i la Alabatusuwolu xono.

5 Lun do, Isa tun be lonin Genesareti dalaba da la. Jama tun be i poxo digila Ala la xumo lamelo nofe. ² A xa xulun fula je danxanjo la. Negemutalalu tunnu bota wolu xono x'e la jalalu ku. ³ Isa dunta xulunjo do xono, wo xuluntigo toxo xo Simon. A x'a njinin Simon fe xo a nin xulunjo x'e soobo dandanjo la dondin. Wo xo, a x'e sigi xulunjo xono xa jama laxaran. ⁴ A x'e soto xumo la tumo men, a xo Simon pen xo: «Í nin xulunjo xa taxa dinoya to, x'alu la jalalu fayi.» ⁵ Simon x'a jaabi xo: «Karanmoxo, n xa suwo bee ban, n man fen muta. Bari í la xumo xan, n si jala fayi.» ⁶ I xa jalalu fayi, i xa nege kiika muta, fo i la jalalu boyita farala. ⁷ I x'e bulo fayi i topoxolu ma xulun do xono, xo wolu xa na i deema. Wolu nata i deema, xa xulun fulo lafa pego la, fo xulunjolu be njinin xa dun jiyo xoto. ⁸ Simon Piyere xa wo je tumo men, a x'e pongi Isa xoto x'a fo a pen xo: «Marigi, í soobo nte la, bawo nte mu junubeto le ti.» ⁹ I xa nege kiika men muta, Simon nin a topoxolu bee silata wo la. ¹⁰ Simon kafupoxolu, nin wolu mu Sebede dinxelu ti, Yaxuba nin Yaya, wolu dulu silata. Isa xo Simon pen xo: «Simon, í xana sila. Silan, í be moxo lelu njinna x'e lasi Ala ma.» ¹¹ I nata i la xulunjolu bula danjo la, xa kuwo bee bula, x'a lo Isa nofe. ¹² Xa Isa tu gallo do to, xe do tun be je, bago bota a balo bee ma. A xa Isa je tumo men, a x'e fili dugo ma a pada xan, x'a matara xo: «Marigi, nin a xa di í pen, í si sin no xa nte kendeya, anin xa n senuya.» ¹³ Isa x'a bulo tosaba x'e maxa a la. A xo: «A diyata n pen, senuya!» Wo no bee to, bago x'a bula. ¹⁴ Isa x'a xoleya a ma xo: «Í xana fen fo moxo si pen, bari taxa í yita sadaxalasi-baxo la. Kila Musa xa sadaxo men waajibiya, wo bo, men s'a yita i la xo í senuyata.» ¹⁵ Wo bee nin a ta, Isa toxo bota xa taxa a fe. Jamaba tun be kamarila a bata x'a lame, anin, nin i la jangarolu si kendeya. ¹⁶ Bari Isa kilin tun be tula xa taxa wulo xono, xa Ala matara. ¹⁷ Lun do, Isa tun be laxaranno la. Farisiya dolu nin sariya karanmoxolu tunnu be siginin a bata, xa bo Galile nin Yude gallolu bee to anin Yerusaleme. Marigi la sintigiya tun be Isa to. A tun b'a ma xa moxolu kendeya. ¹⁸ Wo to, moxo dolu nata xe muruxunte do ti, a be lanin laranjo to. I x'a njinin x'a ladun bilo xono, x'a lala Isa na xoto. ¹⁹ I korita a ladunna jama kun tumo men, i yeleta bilo sanjo to, xa dula do lawuli, x'a nin a la laranjo lajigi wo dula fe, x'a lala jama temo to, Isa na xoto. ²⁰ Isa xa wo moxolu la lannaya je tumo men, a xo xe muruxunte pen xo: «Xe, í la junubolu yaafata.» ²¹ Sariya karanmoxolu anin Farisiyalu x'a fo i xonoto xo: «Nin xe in mu jon ti, nin a be Ala toxo tinjala ten? Jon si junubolu yaafa no, nin Ala kilin nte?» ²² Isa xa i la miiriya lon, a xo i pen xo: «Mun na alu be nin miiriya in tala alu jusukunjo la?» ²³ X'a fo: «Í la junubolu yaafata», walla: «Wuli, í x'e taxama.» Wo xuma fulo to, joman fo xa di? ²⁴ Bari n b'a fe le alu x'a lon xo a sinjo be Moxo Dinxe pen xa junubolu yaafa duguxulo xan». Wo to, a

xo muruxunte pen xo: «N x'e yanmaru, wuli, í x'e la laranjo ta, xa taxa í bata!» ²⁵ Wo no to, a wulita i bee pala, x'a la laranjo ta, xa taxa a bata. A tun b'a ma xa barako bula Ala pen. ²⁶ I bee dabaro banta, i keta a ma xa barako bula Ala pen. I silata, i xo: «N xa dabariban kuwolu je bi.» ²⁷ Wo tanbo xo, Isa bota je, a xa sagallemutala do je, wo toxo xo Lewi, a be siginin a la baaradula. Isa xo a pen xo: «A lo n nofe.» ²⁸ Lewi wulita xa kuwo bee bula, x'a lo a nofe. ²⁹ Wo xo, Lewi xa domoliba dara a pen a la luwo ma. Sagallemutala kiika nin moxo xotelu nin i xa domolo ke. ³⁰ Farisiyalu nin i la sariya karanmoxolu kiika nuununuunuta; i xo Isa la xarandinjolu pen xo: «Mun na alu nin sagallemutalalu nin kujaxukelalu be domolo nin minno kela i poxo fe?» ³¹ Isa x'e jaabi xo: «Moxo kendolu maaku nte dogotooro la, jangaruto lelu maakuwo b'a la. ³² Moxo men nu be i fannu jaatenin moxo tilinninjolu ti, nte man na wolu kili; nte nata junubeto lelu kili, xo i x'e xodi i la junubolu la.» ³³ Moxo dolu xo Isa pen xo: «Yaya la xarandinjolu be sunna kiika ti, xa Ala matara, anin Farisiyalu la xarandinjolu; bari ite la xarandinjolu kennu be domolo kela, x'e min.» ³⁴ Isa x'e jaabi xo: «Alu hakilo la x'alu s'a no ba xa maapoxe topoxolu bali domolo kela, x'e nin maapoxe tu i poxo fe? Ayi, alu me wo no!» ³⁵ Bari lunjo si na, maapoxe si buusi i la, nin wo lunjolu sita, i si sun.» ³⁶ Isa xa pin tali in du fo i pen xo: «Moxo si me do fara faanu kuto la, x'e be wo beterefa faanu xoto ma. Nin wo keta, faanu kuto faraninjo si tu, faanuxonokutun kuto du me na ben faanu xoto ma. ³⁷ Moxo me resenji kuto ke sumalle xotolu to. Nin wo keta, resenji kuto kumuto si fuunu, xa sumalle xotolu te, xa bon. Sumallolu si tija. ³⁸ Bari resenji kuto kedula mu sumalle kuto lelu ti. ³⁹ Moxo si du nte resenji kuto fe, xotomanno minjo xo, katugala a s'a fo xo: «Xotomanno le xa pin.» »

6 Tofonolunjo do, Isa xa alixaamafuuto dolu tofara. A la xarandinjolu xa kunjo dolu tege x'e mojonxo i bulo to, x'e keso nimi. ² Farisiyalu dolu xo i pen xo: «Men nte dagenin tofonolunjo, mun na alu be wo kela?» ³ Isa x'e jaabi xo: «Wo tumo, Dawuda xa men ke, alu man wo xaran ba, tumo men, xonxo x'a nin a nofemoxolu muta? ⁴ Xonxo x'a nin a nofemoxolu muta tumo men, a dunta Ala la bunjo xono. Buuro mennu be dila Ala ma sadaxo ti, a xa wolu ta xa do domo, xa do di a nofemoxo dulu ma. Wolu domo be dagenin sadaxalasi-baxolu doron nelu ma.» ⁵ Wo xo, a xo i pen xo: «Tofonolunjo tigo mu Moxo Dinxe le ti.» ⁶ Tofonolun xote, Isa dunta Alabatusuwo xono xa moxolu laxaran. Xe do tun be je, a kininbulo be sanin. ⁷ Sariya karanmoxolu nin Farisiyalu tunnu be Isa korosinin nin a tun si moxo do kendeya tofonolunjo, walasa i s'a jalagi na men. ⁸ Bari Isa tun x'e la miiriyalu lon, a xo xe bulu saninjo pen xo: «Wuli, í x'e lo jama temo to.» A wulita x'e lo. ⁹ Isa xo i pen xo: «N be alu njinxala nin a

be dagenin xa puma le ke tofoɗolunɗo walla jaxu-manɗo? A be dagenin xa moxo kisi ba walla x'a faxa?»¹⁰ A x'a ɗa laxalan i bee to, wo xo, a xo xe pen xo: «Í bu-lo tosaba.» A x'a bulo tosaba. A woman in bulo kende-yata.¹¹ I diminbeteta, x'e ɗoxo je, i si na men ke Isa la.¹² Wo waxato, Isa taxata kuro to, xa Ala matara. A xa suwo bee ban Ala matarala.¹³ Saxo yeleninma, a x'a la xarandinɗolu kili, xa tan nin fula sugandi i to. A xa wolu kili xo kiladinɗolu.¹⁴ Wo kiladinɗolu fele: Simon, a xa wo kili xo Piyere, anin wo doxoxe Andere nin Yaxuba, nin Yaya, nin Filipe, nin Baratelemi,¹⁵ nin Macu, nin Tomasi, nin Alife dinxe Yaxuba, nin Simon Seloti,¹⁶ nin Yaxuba dinxe Yudasi, anin Yudasi Isikariyoti. Wo le keta Isa janfabaxo ti.¹⁷ Isa nin a la xarandinɗolu jigita xa bo kuro to. A x'é lo keneba do xan; a la xarandinɗolu kiika tun be non. Jamaba du tun be je, i bota Yude maro dula bee, anin Yerusaleme nin xooxojida la jamanolu to, nin Tire anin Sidon.¹⁸ I nata Isa lame anin walasa i la jangarolu xa kende-yata. Jinnolu tunnu be moxo mennu degunin, wolu bee kende-yata.¹⁹ Jama moxo bee tun b'a njinna x'e maxa Isa la, bawo barako tun be bola a to x'e bee kende-yata.²⁰ Wo to, Isa x'a ɗa xotota, x'a la xarandinɗolu mafele, a xo: «Atelu mennu mu fangantanɗolu ti, heero be alu pen, bawo Ala la Mansaya mu alelu ta ti.²¹ Xonxo be ate mennu la saasa, heero be alu pen, bawo alu si fa. Ate mennu be xasila saasa, heero be alu pen, bawo alu si ɗaɗa.²² «Nin moxolu be alu jaxuyala, x'alu xoyi, x'alu doxoya, x'alu jikuwa Moxo Dinxe la kuwo koso, heero be alu pen.²³ Alu ɗaɗa x'e don wo lunɗo, bawo barajiba be alu pen sanɗo to. I mamaxe dulu xa kilalu tooro ten ne.²⁴ «Bari atelu naafulubatigolu, bone be alu pen, katugala alu x'alu la heero soto xa ban.²⁵ Ate mennu be fanin bi, bone be alu pen, katugala alu si xonxo. Ate mennu be jelela saasa, bone be alu pen, katugala alu si nitokuwa xa xasi.²⁶ «Bone be alu pen, nin bee be alu toxoɗuma le fola, katugala i benbalu xa kila fanolu bunɗa wo ɗa le ma.»²⁷ «Í namebaxolu, í b'a fola alu pen xo: Al'alu jaxolu xanu, moxo mennu nte alu fe, alu puma ke wolu pen.²⁸ Moxo mennu be alu dangala, alu duwa wolu pen. Mennu be alu mutakujaxula, alu Ala matara wolu pen.²⁹ Nin do x'é te í tulu do to, í si do du yelema a pen. Nin do x'é la dorokeba muta í la, í xana a bali í la dorokexotobulo du ti.³⁰ Moxo wo moxo x'é tara, wo so. Nin moxo do x'é bulufenɗo do ta, xana a manjinxa a la.³¹ Alu b'a fe moxolu xa men ke alu pen, alu dulu xa wo ɗoxon ke i pen.³² «Nin alu be alu xanubaxolu doronnu xanula, alu si tantu wo la ba? Haali Alapasilanɗabalolu, í xo i b'e xanubaxolu xanula.³³ Mennu be ku beto kela alu pen, nin alu be ku beto kela wolu doronnu pen, alu si tantu wo la ba? Haali Alapasilanɗabalolu, í xo i be wo ɗoxon kela.³⁴ Nin alu be julo dunna moxolu doronnu la, alu yilo b'a ma men- nu si alu sara no, alu si tantu wo la ba? Haali Alapasilanɗabalolu si julo dun Alapasilanɗabalolu la, i yilo be mennu la saralo ma.³⁵ Al'alu jaxolu xanu, xa ku puma ke, alu julo dun x'é hakilo bo a saralo ma. Barajiba si ke alu pen, anin alu si ke Ala Xototaninba dinɗolu ti, katugala ate xa bete kuɗumalonbalolu nin moxo jaxolu ma.³⁶ Alu hinna, a be í xo alu Fa Ala si hinna ɗa men.»³⁷ «Alu xana kiiti tege moxo xan, kiiti me tege alu dulu xan. Alu xana moxo jalagi, alu dulu me jalagi. Alu yaafa, yaafu si ke alu dulu ma.³⁸ Alu moxolu so, alu dulu si so. Badan butunniɗo, fo xa bon a da la, wo si yelema alu kun; x'a la a xan alu be tolu ta sumanna sumannilanɗo men na, alu dulu ta si suman wo la.»³⁹ Isa xa ɗin sanda in du fo i pen, a xo: «Fiyonto si fiyonto la guma saba no ba? Nin wo keta, i bee me bula dinxo xono ba?»⁴⁰ xarandinɗo man bun a karanmoxo ti. Bari nin xarandinɗo xaranbeteta, a si ke í xo a karanmoxo.⁴¹ «Mun na dokkondinɗo men be í badinɗo ɗa to, í be í ɗa lola wo to, x'a tara salo men be í fan ɗa to, í ɗa nte wo la?»⁴² Í s'a fo no ɗa di í badinɗo pen xo: «Í badinɗo, í lo, dokkondinɗo men be í ɗa to, í xa wo bo je," ite men ɗa nte salo la í fan ɗa to? Fulankafu in, salo bo í fan ɗa to folo. Nin wo keta, í si jelo ke a ɗa ma, xa dokkondinɗo bo í badinɗo ɗa to.»⁴³ «Yiri puma me din ke no, men man pin. Yiro du men man pin, wo me din puma ke no.⁴⁴ Yiro bee be lonna a dinɗo le ma: Turodinɗo me xati ɗaninjuwo la; resen moninɗo me xati ɗogonsaase la.⁴⁵ Moxo puma si ku puma labo a sondonme puma la. Moxo jaxo si ku jaxo labo a sondonme jaxo la, bawo moxo sondonmo be fanin men na, a da be wo le fola.»⁴⁶ «Mun na alu be í kilila xo: "Marigi, Marigi", x'a tara í be men fola alu pen, alu nte wo kela?»⁴⁷ Moxo men je na nte ma, xa í na xumolu lame, x'e ke, a nin men xa xan, í si wo fo alu pen:⁴⁸ A be le í xo bunlola do, a xa duguxulo jaga, x'a jaga, x'a la bunɗo jusigi fataxulo xan, xa bunɗo lo wo xan. Waamo nata, xa woyo ke wo bunɗo xan, bari a man boyi, bawo a tun be lonin bete.⁴⁹ Bari nin moxo men be nte la xumo lamela, nin a nt'a kela, a nin men be bonin, í si wo du fo alu pen: A be le í xo moxo do, men x'a la bunɗo lo duguxulo xan. A man jusigilan ke a xoto. Woyo nata a xan, wo no bee to, a boyita guran. Wo bunɗo boyiɗa laxasayata kujaxu.»

7 Isa x'e soto a la xumo bee la jama pen tumo men, a dunta Kaperenahun gallo xono.² Sorodasi jalatigiba do be je, jonxe do be wo kun, men tun na kuwo xa di a pen haali. Wo jonxe tun man kende, a tun be saya dakunɗo to.³ A xa Isa toxome tumo men, a xa Yahudiyalu la moxoba dolu ki Isa ma x'a matara, nin a si na a la jonxe lakende-yata.⁴ Wolu nata Isa bata, x'a matara bete xo: «A nin deemalo xa xan,⁵ bawo a be n na siya fe, ate le xa n na Alabatusuwo lo.»⁶ Isa nin i taxata, a sutiyaniɗa luwo la, sorodasi jalatigiba x'a xanunte dolu ki a ma xo: «Marigi, í fan segekujaxu nte ten, bawo nte nin a man xan í xa dun nte la luwo ma.

⁷ Wo le du x'a tu nin n' xa n' fan jaate xo n' xa doxo í tax-anbato ma. Bari xuma kilin fo, n' na jonxe si kendeya. ⁸ Bawo kuntigo dolu be nte kunna, nte du be sorodaso dolu kunna. N' s'a fo do pen xo: "Taxa," a si taxa. N' s'a fo do xote pen xo: "Na," a si na. N' s'a fo n' na jonxe pen xo: "Nin ke," a si wo ke.» ⁹ Isa xa sorodasi jalatigiba la xumolu lame tumo men, a dabaro banta. A x'é yeleva a nofejama mafan, a xo: «N' b'a fola alu pen xo: Haali Banisirayila xono, n' man pin noxon lannaya je moxo la.» ¹⁰ Sorodasi jalatigiba la kilalu koppaninma, i x'a tara xo jonxe jangaruto kendeyata. ¹¹ Wo xo, Isa taxata gallo do to xo Nayin. A nin a la xarandinjolu nin jamba taxata i noxo la. ¹² I be sila wo gallo dunda la tumo men, i nin moxolu benta, fure be i bulu, i be taxanin a lasila. Wo tun mu musujaxe do le dinxe kilinjo ti. Gal-luxonomoxolu jamaba tun be wo muso nofe taxanin furelasidula. ¹³ Marigi xa wo muso je tumo men, a hinno x'a muta. A xo muso pen xo: «Í xana xasi!» ¹⁴ A x'é sodun x'é maxa furetalanno la. Fure tabaxolu x'e lo. Isa xo: «Xamarindinjo, n' b'a fola í pen xo: Wuli!» ¹⁵ Fure wulita x'é sigi, xa xuma. Isa x'a di a na ma. ¹⁶ Moxo bee silata, xa barako bula Ala pen. I xo: «Kilaba wulita alan to. Ala nata bo a la moxolu ma.» ¹⁷ Isa la wo kuwo meta Yude nin a lamininjo bee to. ¹⁸ Yaya la xarand-injolu x'a lalon wo kuwolu bee la. A xa fula kili ¹⁹ x'e ki Marigi Isa ma, xo i x'a njinxa xo: «Kisibaxo men na naxumo fota, ite le mu wo ti ba, walla n xa xan xa do xote le laxono?» ²⁰ I sininma Isa ma, i xo: «Batiselila Yaya xa n ki i ma xo, men xa xan xa na, ite le mu ba, walla n xa xan xa do xote le laxono?» ²¹ Wo waxato fan, Isa xa moxo kiika kendeya: Jangarutolu nin dimintolu nin jinnetolu, xa fiyonto kiika na ye. ²² A xo i pen xo: «Alu xa men je, anin alu xa men me, alu taxa wo fo Yaya pen xo: "Fiyontolu be ma xa dula je, sin kilinjolu b'e taxamaxan, bagitolu be senuyaxan, tuluxutiyolu be ma xa melo ke, furelu be kunixan, xibaru Dimanjo be fola fangantanjolu pen." ²³ Moxo men man sikka nte la kuwo to, heero be wo tigo pen.» ²⁴ Yaya la kilad-injolu taxaninma, Isa x'a damuta xa xuma jama pen Yaya la kuwo to. A xo i pen xo: «Alu taxata mun fen mafele wulo xono? Alu taxata badoxala gansanjo le mafele ba, fojno be men namaxala? ²⁵ Alu dunnu taxata mun fen mafele? Faanubetetigo ba? Bari faanubete-dunnalu, anin mennu be bendiya xono, wolu be sotola mansaxelu la luwo lelu xono. ²⁶ Alu dunnu taxata mun ne mafele? Kila do le mu ba? Iyo, kila do le mu. Nte b'a fola alu pen, xo Yaya xa bun kila ti. ²⁷ A be safenin Ki-taabo to ate le la kuwo to xo: Ala xo: "N' fele n' na kilad-injo kila í na, xa í la silo toben í pen." ²⁸ «Nte b'a fola alu pen xo: Din man nala dinnalaranjo to, men xa bun Batiselila Yaya ti. Bari, wo bee nin a ta, Ala la Mansaya xono, moxolu bee to doxomandinjo xa bun Yaya ti. ²⁹ Jama bee x'a lame tumo men, haali sagallemutalalu, wolu bee xa tilinninjo saagi Ala ma, xa batise í xo Yaya

x'a fo i nen na men. ³⁰ Bari Farisiyalu nin sariya karan-moxolu x'e ban Ala la ku lategeninjo to i nen, bawo i x'e ban xa batise. ³¹ «N' si bi moxolu xaapan jon ma? I nin munnu xa xan? ³² I be le í xo dindinjolu be siginin bera to, x'e noxo kili xo: "N xa fule fo alu ma, alu man i don. N xa sanjabundala donkilo do la, alu man xasi." ³³ Bawo Batiselila Yaya nata, a tun nte domoli kela, a nte dolo minna. Bari alu xo a ma xo: "Jinno le b'a to." ³⁴ Moxo Dinxe nata, a be domolo kela, x'é min, alu xo: "Nin xe in mu nuxuma nin dolominna le ti. A xanunte mu sagallemutalalu nin junubekela lelu ti." ³⁵ Bari moxo mennu bee sonta a ma, a yitata wolu bee fe xo Ala la hakilitigiya be tilinnin.» ³⁶ Farisiya do xa Isa kili, xo a xa taxa domolo ke a bata. Isa taxata a la luwo ma xa sigi domolo kunna. ³⁷ Musu jado do tun be wo gallo to. A x'a me tumo men xo Isa be domolo la Farisiya ba-ta, a nata kurudaxandin daxolenjo do ti. Wo be fanin tulu sumadimanjo la. ³⁸ A xasito nata í lo Isa sinjolu mafan. A xa Isa sinjolu pigin a najiyo la, x'a kunsino ke x'e masuusa, x'e suusu, xa tulu sumadimanjo bon i xan. ³⁹ Farisiya in men xa Isa kili domolo ma xa wo je tumo men, a xo í xonoto xo: «Nin pin xe in tun mu kila le ti, pin musu in men je maxanin a la, a tun s'a lon a mu men ti. A tun s'a lon xo musu son bete nte.» ⁴⁰ Isa xo: «Simon, xumo do be n' kun x'a fo í pen.» Simon x'a jaabi xo: «Karanmoxo, xuma.» ⁴¹ Isa xo: «Julumandintigo do le, a la julo tun be moxo fula la. A la depe xalisso keme luulu tun be kilin na, tan luulu tun be do la. ⁴² Bari fen tun nte i bulu x'a sara. A woman in x'e fulo bee la julo yaafa. Wolu fulo to, joman s'a xanu bete?» ⁴³ Simon x'a jaabi, a xo: «Nte la miiro to, xalisiba tun be men na, wo le xa xan x'a xanu bete.» Isa xo: «Í xa tonja fo!» ⁴⁴ Wo xo, a x'é yeleva muso mafan, a xo Si-mon pen xo: «Í na be pin musu in na de? N' dunta í la luwo ma, í man sinmakuji di n' ma, bari ate xa n' sinjolu pigin a najiyo la, x'a kunsino ke x'e suusa. ⁴⁵ Í man n' xonton dasusuwo la, bari ate, kabirin n' dunta, nin a be n' sinjolu suusula. ⁴⁶ Í man tulu bon n' kunjo xan, bari ate xa tulu sumadimanjo bon n' sinjolu xan. ⁴⁷ Wo le x'a tu, n' b'a fola í pen, xo muso la xanuyaba x'a yita, xo a la junube kiika bee yaafata. Bari dondin yaafata men ma, wo la xanuya xa doxo.» ⁴⁸ Wo xo, a xo muso pen xo: «Í la junubolu yaafata.» ⁴⁹ A domolijox-olu xo i xonoto xo: «Nin mu jon ti nin haali a si junubo dula yaafa?» ⁵⁰ Isa xo muso pen xo: «Í la lannaya x'é kisi: Taxa heero to.»

8 Wo xo, Isa taxata galluba nin galluba, anin gal-lundin nin gallundin, a tun be Ala la Mansaya xibaru Dimanjo fola xa waajulo ke. A la xarandin tan nin fulo tun b'a bata. ² A tun xa jinnolu xoyi xa bo muso dolu to, x'e la jangarolu kendeya, wo du tunnu b'a ba-ta: Mariyama men kilita xo Magidala Mariyama, jinna woorowula xoyita xa bo men to, ³ anin Janne, nin wo mu Susa musu ti, wo mu mansaxe Herode la fankama

do le ti, anin Susana nin moxo kiika xotelu mennu bota i bulufenɗolu la xa Isa nin a la xarandinɗolu deema. ⁴Jamaba bota gallu kiika to, xa na kamari Isa bata. A xa pin tali in la i pen, a xo: ⁵«Senekela do bota xa taxa a la siyo sari. X'a tu sarilo la, keso dolu butunta silasenbo fe: Moxolu x'e taxama wolu xan, xonolu nata wolu sokki. ⁶Keso dolu butunta fataxulo xan: Wolu falinninma, i jata, bawo sumaya tun nte i xoto. ⁷Keso dolu butunta ɗaninɗolu to: Wolu nin ɗaninɗolu bunɗata i ɗoxo la. ɗaninɗolu xa wolu muta. ⁸Dolu butunta duguxulu beto to: Wolu falinta, xa wulu. Kun wo kun xa kese keme ke.» Wo xumo xo, Isa fetenta xo: «Tulo be men ma xa lamelo ke, wo xa lamelo ke!» ⁹A la xarandinɗolu x'a ɗininxa pin tali in xoto la. ¹⁰A x'e jaabi xo: «Lonɗo dita ate lelu ma xa Ala la Mansaya gullolu soto. Bari moxo tolu, fen bee be fola wolu pen taliyo lelu to, walasa i felelito xana jeli ke, i lamelito xana fen faamu.» ¹¹Isa xo: «Tali in xoto fele: Siyo mu Ala la xumo le ti. ¹²Keso mennu butunta silasenbo fe, wo xoto fele: Moxo do lelu mu, mennu xa Ala la xumo lame, bari wo xo, Sentane si na xa wo xumo bo i xono, walasa i xana lannaya ke, xa kisi. ¹³Keso mennu butunta fataxulo xan, wolu mu moxo do lelu ti, mennu be Ala la xumo mutala ɗajo to, nin i x'a lame. Bari lilli nte i xoto, i la lannaya mu waxatindin ne ti. Nin i xa xotobolo soto doron, i si lannaya bula. ¹⁴Keso mennu butunta ɗaninɗolu to, wolu mu moxo do lelu ti, mennu xa Ala la xumo lame. Bari taxanin ɗa, hanmekuwolu nin naafulukuwu nin pin duniya in negefenɗolu si i naxasi, fo i me din moninɗo ke. ¹⁵Bari keso mennu butunta duguxulu beto to, wolu mu moxo do lelu ti, mennu xa Ala la xumo lame, x'a muta i jusukunɗo la, soobeya la. Wolu sinsinta Ala la xumo xan, xa dinɗo ke í xo lanfenɗo.» ¹⁶Wo xo, Isa xo i pen tugun xo: «Moxo si me lanpo lamana xa fe buti a kun na, walla x'a sigi bariyo xoto. Í s'a sigi a sigilanɗo le xan, walasa bugo xono dunbaxolu x'a keneya je. ¹⁷Fen wo fen be duguwo to, wo si bo keno xan. Gulle si du nte je nin a me wunjan xa bo keno xan. ¹⁸Alu i korosi alu la lamelijna ma! Bawo fen be men bulu, do si di wo ma; bari fen nte men bulu, haali a miiro to xo dondinɗo men b'a bulu, wo si muta a la.» ¹⁹Isa na nin a badinxelu nata a bata, bari i tunnu me a lasoto no jama kun. ²⁰Wo fota Isa pen ten xo: «Í na nin í badinxelu be banto to, i b'a fe x'é je.» ²¹Bari Isa xo jama bee pen xo: «Mennu be Ala la xumo lamela x'a latimme, wo lelu mu í na nin í badinxelu ti.» ²²Lun do, Isa nin a la xarandinɗolu dunta xulunɗo xono. A xo i pen xo: «Alan xa taxa dalaba boxo do.» I woman innu taxata. ²³X'e tu jiyo xan, Isa sinnoxota. Fopoba wulita dalaba xan, xa xulunɗo fa jiyo la, fo i nin xulunɗo be ɗinin xa tu. ²⁴Wo to xarandinɗolu x'e sodun Isa la x'a lakuni, x'a fo a pen xo: «Karanmoxo, karanmoxo, n je tu de!» Isa wulita xa xuma xolen fopon nin jixutolu pen. Fopon lota, jiyo x'é

mafaxa. ²⁵Isa xo xarandinɗolu pen xo: «Alu la lannaya be min?» I silata. I dabaro banninɗo keta a ma x'e ɗoxo ɗininxa xo: «Nin xe in dun mu jon ti? Haali a si xuma fopon nin jiyo pen, wolu s'a xumaxanɗo labatu.» ²⁶I sita Gadarangolu la jamano to, men be dalaba boxo do, Galile kuntilinɗo la. ²⁷Isa boninma xulunɗo xono, wo gallo xe do x'a kunben. Jinnolu tunnu be wo xe to. Kabirin tuma jan, a tun nte faanu dunna, a nte lu ma, bari a tun kedula mu xaburufe to le ti. ²⁸A xa Isa je tumo men, a kuleta, x'é boyi a xoto, xa feten xo: «Isa, Ala Xototaninba Dinxe, mun x'é si í ma? Í b'é matarala í xana í tooro.» ²⁹A xa wo xumo fo, bawo Isa tun x'a waajibiya jinno ma xo a xa bo a to. Jinne in tun si wuli a la tuma kiika ti. Nin a tun wulita xe in na, fo nin í x'a bululu nin a sinɗolu siti negejoloxo la, walasa x'a lamara. Bari a tun si wo sitilanɗolu totege, jinno si taxa a ti wulo xono. ³⁰Isa x'a ɗininxa xo: «Í toxondi?» A x'a jaabi xo: «Jamaba.» Bawo jinne kiika le tun dunta xe in to. ³¹Wo jinnolu xa Isa matara xo a xana i bula halagilo dinxajironba danjebalo xono. ³²Wo x'a tara legooreba tun be non, i be domolo la kuro to. Jinnolu xa Isa matara xo a x'é lo i xa dun wo lelu to. Isa x'e yanmaru wo kela. ³³Wo keninma, jinnolu bota xe to xa dun legoore in to. Legoore bee gidita x'e parati kurumalanɗo la, xa jigi dalaba to, xa sa jiyo to. ³⁴Lenegaanilalu xa wo kuwo je tumo men, i x'e bori xa taxa wo laxali gallo nin senesuwolu la. ³⁵Moxolu bota xa taxa wo kuwolu lasaxa. I nata Isa bata, xa xe je, jinnolu bota men to. Xe in tun be siginin Isa senbo to, faanolu b'a ma, a hakilo dafaninɗo. Wo to, moxolu silata. ³⁶Mennu xa wo kuwolu bee je, wolu xa xe jinneto kendeyana laxali moxolu pen. ³⁷Wo keninma, Gadarangolu bee x'a ɗinin Isa fe, xo a xa taxa xa bo i la jamano xono, bawo i silata fo xa danmatanbi. Isa dunta xulunɗo xono xa taxa. ³⁸Jinnolu bota xe men to, wo xa Isa matara nin a si tu a bata. Bari Isa x'a lakoppa x'a fo a pen xo: ³⁹«Í koppa, í xa taxa í bata. Ala xa men ke í pen, í xa wo bee laxali.» Wo to, xe taxata. Isa xa fen wo fen ke a pen, a xa wo laxali gallo dula bee. ⁴⁰Isa x'é koppa xa taxa dalaba boxo do tugun. Jama x'a kunben, bawo bee tun b'a laxononin. ⁴¹Xe do nata Isa ma, a toxo xo Jarusi. Alabatusuwo kuntigo le mu. A x'é boyi Isa xoto x'a matara, xo a xa taxa a la luwo ma, ⁴²bawo dinmusu kilinɗo men b'a kun, nin a siyo be san tan nin fula la, wo be ɗinin xa sa. Isa taxato non, jama tun b'a ma x'a digi. ⁴³Muso do tun be je, laada banbalo b'a la kabirin san tan nin fula. A x'a la naafulo bee di jaaralikelalu ma, bari wolu si man a kendeya. ⁴⁴A x'é sodun Isa la a xo ma, x'é maxa a la dorokexuwo la. Wo no bee to, jelo lota. ⁴⁵Isa xo: «Jon x'é maxa í na?» Bee tun b'e son xo itelu nte. Wo to, Piyere xo: «Karanmoxo, jama le b'é xarandanin, anin x'é digi.» ⁴⁶Isa xo: «Do maxata í na, bawo í x'a lon xo sinɗo do bota í to.» ⁴⁷Muso x'a je tumo men x'a fo xo a xa men ke, wo me tu no dugunin, a jarajarato nata í

boyi Isa xoto, x'a fo jama bee jala, kunjo men x'a tu a x'é maxa a la, anin a kendeyata na men, no kilinjo to. ⁴⁸ Isa xo a pen xo: «N' dinmusu, í la lannaya x'é kisi. Taxa heero to!» ⁴⁹ Xa Isa tu wo xumo la, do nata xa bo Alabatusuwo kuntigo bata, x'a fo wo pen xo: «Í dinmuso sata. Xana karanmoxo sege bitugun!» ⁵⁰ Bari Isa xa wo me tumo men, a xo Alabatusuwo kuntigo pen xo: «Í xana sila! Lannaya ke doron! Í dinmuso si balu tugun.» ⁵¹ Isa sita luwo ma tumo men, a man son a nin moxo xote xa dun non, fo Piyere nin Yaya nin Yaxuba anin dinjo na nin a fa. ⁵² Bee tun be xasila dindinjo kunna xa xuure. Isa woman in xo: «Alu xana xasi. Dindinjo man sa. A be sinnoxonin ne.» ⁵³ I jeleta a ma, bawo i x'a lon xo a sata xa ban. ⁵⁴ Isa woman in xa dindinjo muta a bulo ma, xa feten xo: «Dindinjo, wuli!» ⁵⁵ A niyo saagita a to, wo no bee to, a wulita. Isa xo, xo i xa domolo di a ma. ⁵⁶ Dindinjo wulubaxolu dabaro banta. Isa x'a xoleya i ma xo men keta, i xana wo fo moxo pen.

9 Isa xa xarandin tan nin fulo kamari xa sinjo nin fango di i ma xa jinnolu bee xoyi, anin xa jangarutolu kendeaya. ² Wo xo, a x'e ki xa taxa Ala la Mansaya kuwo waaju, xa jangarutolu kendeaya. ³ A xo i pen xo: «Alu xana fusi ta taxamo xanma, guma wo, fudi wo, domolifen wo, xaalisi wo, alu nin wolu fen xana taxa. Alu nin doroke fula xana taxa. ⁴ Alu je jatigila soto lu wo lu ma, alu tu non fo alu taxatumo xa si. ⁵ Nin moxolu man alu jigiya dula wo dula, alu bo i la gallo to, x'alu sinnabanxo konkon x'a bo alu sinjolu la. Wo s'i lasobi.» ⁶ Xarandinjolu taxata. I sita gallolu bee to, xa xibaru Dimanjo fo, xa jangarutolu kendeaya dula bee. ⁷ Mansaxe Herode xa wo kuwolu bee xibaro me tumo men, a hakilo paxamita, bawo moxo dolu x'a fo xo: «Batiselila Yaya kunita xa bo furelu to.» ⁸ Do xote tunnu b'a fola xo: «Kila Eli le nata.» Do xotelu xo: «Folo kilalu to do le kunita.» ⁹ Bari Herode xo: «Nte xa Yaya kunjo tege. N' be pin xuma innu bee mela xe men na kuwo to, wo dun mu jon ti?» A tun b'a fe xa Isa je. ¹⁰ Kiladinjolu x'e koppa xa na. I xa fen fen ke, i xa wo bee na fo Isa pen. A nin i bota non, xa taxa i danna, Betsayida mafan. ¹¹ Bari jama xa wo me, i woman innu x'a lo a nofe. Isa x'e kunben, xa Ala la Mansaya xumo fo i pen. Men tunnu man kende, a xa wolu kendeaya. ¹² Tilo boyita jigila; wo to xarandin tan nin fulo x'e sodun Isa la x'a fo a pen xo: «Jama labula walasa i xa taxa senbetogallolu nin senesuwolu la, nin i si domolo nin jatigila soto, bawo n be wulo le xono jan ti.» ¹³ Bari Isa x'e jaabi xo: «Alu fannu xa domolo di i ma!» I xo: «Buurukun luulu anin negexala fula doron ne be n bulu. Í b'a fe le ba n xa taxa domolo san pin jama in bee pen?» ¹⁴ Awa, wulu luulu xeba poxon ne tun be je. Isa xo a la xarandinjolu pen xo: «Alu i tan luulu tan luulu lasigi.» ¹⁵ Xarandinjolu x'a ke ten, x'e bee lasigi sigi. ¹⁶ Isa xa buurukun luulu anin negexala fulo ta, x'a na

xotota sanjo to, xa duwa i ma, x'e tokutun x'e di a la xarandinjolu ma, xo i x'e tala jama te. ¹⁷ I bee xa domolo ke x'e fa. Xarandinjolu xa sinisi tan nin fula fa tokutunjolu la. ¹⁸ Lun do, xa Isa tu Alamatara la i danna, a la xarandinjolu tunnu be a senbo to. A x'e njinxaxo: «Moxolu be mun fola n' na kuwo to?» ¹⁹ I x'a jaabi xo: «Dolu xo x'é mu Batiselila Yaya le ti, dolu xo kila Eli, dolu xo x'é mu folo kilalu to do le ti, men kunita.» ²⁰ Isa xo i pen xo: «Atelu dunnu b'a fola xo n' mu jon ti?» Piyere x'a jaabi xo: «Í mu Ala la Kirisita le ti.» ²¹ Isa x'a xoleya bete i ma, xo i xana wo fo moxo si pen. ²² A xo: «Waajibo le mu Moxo Dinxe xa tooro bete; moxobalu nin sadaxalasibaxa kuntigolu nin sariya karanmoxolu x'e ban a to. A si faxesa. A sa tili sabo, a si kuni.» ²³ Wo xo, a xo i bee pen xo: «Nin do b'a fe x'a lo nte nofe, wo x'é ban a fan to, x'a fan gengenyiro ta lun wo lun, x'a lo n' nofe. ²⁴ Moxo men je a fo xo a b'a fan niyo lakisila, wo si bono a niyo to. Bari moxo men je bono a niyo to nte la kuwo xanma, wo tigo si a niyo lakisi. ²⁵ Duniya bee soto si mun nan moxo pen, nin a be a fan sankola le, walla x'a fan halagi? ²⁶ Nin nte nin n' na xumolu je ke maluyaku ti moxo wo moxo bulu, wo tigo du si ke maluyaku ti Moxo Dinxe bulu, a je na a la nooro to lun men, anin a Fa la nooro anin meleke senumanjolu la nooro. ²⁷ Tonja la, nte b'a fola alu pen xo, moxo dolu be jan, wolu me sa x'a tara i man Ala la Mansaya je.» ²⁸ Wo xumo fo xo loxokun poxon, Isa nin Piyere nin Yaya nin Yaxuba taxata kuro xan xa taxa Ala matara. ²⁹ Xa Isa tu Alamatara la, a pada kepa mayelemata, a la faanolu xoyiyata fo xa njelenxu. ³⁰ Nakun kilin, xeba fula nata, i nin Isa tun be xumala: Kila Musa nin kila Eli le tunnu mu. ³¹ I x'e yita nooro xono. Isa be nala a la baaro men dafala Yerusaleme, xa sa, i tunnu be xumala wo le xan. ³² Piyere nin a kafupoxolu tunnu sinnoxobeteta, bari i kunita xa Isa la nooro je, a nin xeba fulo men tunnu nin Isa mu. ³³ Wo xeba fulo be taxala tumo men xa bo Isa bata, Piyere xo a pen xo: «Karanmoxo, alan be jan, wo xa pin. Alan xa tillisi saba lo, ite ta mu kilin ti, kila Musa ta kilin, kila Eli ta kilin.» A be men ma x'a fo, a man wo lon. ³⁴ X'a tu wo xumo la, xabo do jigita i xan, x'e dugu. Wo xabo jiginxanjo xa xarandinjolu lasila. ³⁵ Xumaxanjo do bota wo xabo to xo: «Nin mu n' Dinxe le ti, n' xa men sugandi. Alu a lame!» ³⁶ Wo xumaxanjo xo, i man moxo xote je nin Isa kilin nte. Xarandinjolu x'e de; i xa men je, wo waxato, i man fen fo moxo si pen wo kuwo to. ³⁷ Wo lun do, i jigita xa bo kuro xan. Jamaba nata Isa kunben. ³⁸ Xe do keta a ma xa feten jama to xo: «Karanmoxo, n' b'é matarala, í na lo n' dinxe to, n' dinxe kilinjo. ³⁹ Jinno do b'a mutala. Nin a x'a muta, wo no bee to, a s'a bula fetenna, x'a bula í seregeseregela, xa fuuta labo a da la; wo jinno bo xa xole, a boto s'a tooro bete. ⁴⁰ N' x'e la xarandinjolu matara x'e xa jinne in xoyi, bari i korita.» ⁴¹ Isa xo: «Moxo lannayabalolu anin kukebalikelalu, nte

si tu alu bata fo waxati joman, xa muƙa alu xoto? Na í dinxé ti jan.»⁴² Dindinƙo be sila a ma tumo men, jinno x'a ketu, x'a fili dugo ma, x'a bula í seregeserege xolenna. Isa xa jinno madigaamu, xa dindinƙo kendeya x'a di a fa ma.⁴³ Moxo bee dabaro banta Ala la sintigiyaba xanma. Xa moxolu dabaro tu bannin Isa la ku ketalu bee la, a xo a la xarandinƙolu nen xo:⁴⁴ «Ní be nala men fola alu nen, alu i tulo lo bete: Moxo Dinxé be nala dunna moxolu bulu.»⁴⁵ Bari i man wo xumo faamu. A xoto duguta i ma, walasa i xana a faamu. I tunnu be silanin xa Isa níninxa wo kuwo la.⁴⁶ xarandinƙolu keta a ma x'e noxo masooso, xo i to, jon xa bun i bee ti.⁴⁷ Isa x'e la miiriya je. A xa dindinƙo do muta x'a lalo a bata.⁴⁸ A xo i nen xo: «Moxo men je nin dindin in mutakubete nte la kuwo la, wo xa nte fan ne mutakubete. Moxo men je nte mutakubete, wo xa n' Kibaxo du mutakubete. Alu to doxomandinƙo le mu alu la moxoba ti.»⁴⁹ Yaya xa xumo ta, a xo a nen xo: «Karanmoxo, n xa moxo do je, men be jinnolu ma x'e xoyi í toxo la. Ntelu xo a nen xo a xana wo ke, bawo a tun nte n na kafo xono.»⁵⁰ Isa xo a nen xo: «Alu xana a bali xa wo ke, katugala men nte alu jaxu ti, wo mu alu pinƙo le ti.»⁵¹ Isa tun xa xan xa bo duniya to xa taxa sanƙo to waxato men, wo sutiyaninma, a x'a latege xa taxa Yerusaleme.⁵² A xa kiladinƙolu bula a na. Wolu taxaninƙo, i dunta Samari gallo do xono, walasa x'a maakupanfenƙolu bee toben.⁵³ Bari non moxolu man son a xa jigi i bata, bawo a tun kun be Yerusaleme xan.⁵⁴ A la xarandinƙolu Yaxuba nin Yaya xa wo je tumo men, i xo: «Marigi, n x'a fo ba xo ta xa jigi xa bo sanƙo to xa pinnu halagi?»⁵⁵ Isa x'é tirimin i mafan x'e madigaamu.⁵⁶ I woman innu taxata gallu xote to.⁵⁷ X'e tu silo xan, xe do xo Isa nen xo: «Í je taxa dula wo dula, n' s'a lo í nofe.»⁵⁸ Isa xo a nen xo: «Wuwo be kunkuwo-lolu kun, naxanƙo be xonolu kun, bari dula nte Moxo Dinxé bulu, a s'í tofoƙo jan men.»⁵⁹ A xo xe do xote nen xo: «A lo n' nofe!» Bari wo xe xo a nen xo: «Marigi, a tu folo, nte xa taxa n' fa lasi.»⁶⁰ Isa x'a jaabi xo: «A tu furelu x'e la furelu lasi, ite ken xa taxa Ala la Mansaya xibaro fo.»⁶¹ Xe do xote xo tugun xo: «Marigi, n' s'a lo í nofe, bari í lo n' xa taxa n' sara n' na dinbaya la folo.»⁶² Isa xo a nen xo: «Moxo men xa saridabo muta, xa saagi í xo felenin, wo tigo nin Ala la Mansaya man xan.»

10 Wo kuwolu tanbininƙo, Marigi xa xarandin tan woorowula nin fula xotelu sugandi, x'e fula fula bula i xa taxa a na gallolu nin dulalu bee to, a fan xa xan xa si dula mennu.² A xo i nen xo: «Senefen nadarata xa sa, bari baarala xa doxo. Wo to, alu fuututigo matara, walasa a xa baarala kiika bula i xa taxa a la senefenƙolu ladara.³ Alu taxa! A fele, n' be alu kila í xo saaxandinƙolu, warolu temo to.⁴ Alu xana silafanda ta, alu xana fudi ta, alu xana samata ta. Alu xana i lo silo to x'alu be moxo xontonna.⁵ Nin alu dunta luwo

do ma, alu a fo xo: "Heero xa ke pin lu in xono."⁶ Nin heeramoxo do be non, wo tigo si alu la xontonna heero soto; nin wo fen nte je, alu la heero si saagi alu ma.⁷ Alu xa tu wo luwo ma. Nin i xa men di alu ma, alu wo domo, xa wo min; bawo baarakela nin a sara xa xan. Alu xana bo luwo do xono xa yelema do xono.⁸ Nin alu dunta gallo do to, i dunnu x'alu muta, i je men di alu ma, alu wo domo,⁹ alu xa wo gallo jangarutolu kendeya, x'a fo a moxolu nen xo: "Ala la Mansaya x'é sutiya alu la."¹⁰ Bari nin alu dunta gallo do xono, je moxolu dunnu man alu lamuta, alu bo silolu fe x'a fo xo:¹¹ "Haali alu la gallo banxo, n b'a konkonna x'a bon n sinƙolu la alu xanma. Bari alu a lon xo Ala la Mansaya x'é sutiya."¹² N' b'a fola alu nen xo kiito lunƙo, Sodome gallo la pangilo si feya xa tanbi wo gallo ta xan.»¹³ «Korasin gallo moxolu, bone be alu nen. Bete-sayida gallo moxolu, bone be alu nen. Bawo kawakuwo mennu keta alu bata, nin wo tunnu keta Tire nin Sidon, biyan x'a tara non moxolu sigita xa faanu kurunƙolu dun, xa bugutixoyo ke i kunƙo la, walasa x'a yita xo i tuubita.¹⁴ Wo le x'a tu, kiito lunƙo, alu la tooro si bunƙa xa tanbi Tire nin Sidon ta xan.¹⁵ Ite dun Kaperenahun, í la miiro la xo í si xotota ba fo sanxulo ma? Ayi de! Í be majigila le fo lahara.»¹⁶ A x'a fo a la xarandinƙolu nen du xo: «Moxo wo moxo je alu lame, wo xa nte le lame; men man alu lamuta, a man nte lamuta. Men man nte lamuta, a man n' kibaxo du lamuta.»¹⁷ Kiladin tan woorowula nin fulo napaninƙo x'e koppa, i xo: «Marigi, haali jinnolu xuluta n nen í toxo la.»¹⁸ Isa xo i nen xo: «N' xa Sentane je boyila xa bo sanƙo to a be í xo sanjimepenxo.¹⁹ Alu n' name! N' xa sinƙo di alu ma alu x'e taxama salu nin dondonkonelu xan, xa Jaxu Sentane la sintigiya bee tiƙa, fusi me jaxumanƙo ke no alu la.²⁰ Bari alu xana napa xo jinnolu xuluta alu nen; alu napa don ne la xo alu toxolu be safenin sanƙo to.»²¹ Wo tumo fan, Ni Senunƙo xa Isa lapaxali haali, a xo: «N' Fa, sanxulo nin duguxulo Marigi, n' be barako bulala í nen bawo í xa pin ku innu dugu hakilitigolu nin moxo xaranninƙolu ma, x'e yita dindinƙolu la. N' Fa, a keta ten, bawo wo le diyata í nen.²² «N' Fa xa kuwo bee dun n' bulu. Moxo si man a lon Dinxé mu men ti, nin Fa kilinpe nte. Moxo si du man a lon Fa mu men ti, nin Dinxé kilinpe nte, anin a xa di Dinxé nen x'a yita mennu la.»²³ Wo xo, Isa x'é yelema a la xarandinƙolu mafan, x'a fo wolu doronnu nen xo: «Heero be alu nen alu la fen jetalu xanma.²⁴ Bawo nte b'a fola alu nen xo, kila kiika, anin mansaxe kiika tunnu b'a fe x'alu la ku jetalu je, bari i man i je, anin x'alu la xuma metalu me, bari i man i me.»²⁵ Sariya karanmoxo do wulita x'a be Isa xotobola. A xo: «Karanmoxo, nte xa xan xa mun ke nin n' si nilamaya banbalo soto?»²⁶ Isa x'a jaabi xo: «Mun be safenin sariya xono? Í be mun xaranna wo la?»²⁷ Wo xe x'a jaabi xo: «Í si Marigi í la Ala xanu í jusukunƙo bee la, í

niyo bee la, í barako bee la, í miiro bee la; anin í xa í moxoxoxo xanu í xo í fan.»²⁸ Isa xo a pen xo: «Í la jaabo benta. Wo ke, í si nilamaya.»²⁹ Wo sariya karanmoxo tun b'a fe x'a fan jaate moxo tilinningo ti, a woman in xo Isa pen xo: «Jon mu n' moxoxoxo ti?»³⁰ Isa xa xumo ta tugun, a xo: «Xe do le, a tun be bola Yerusaleme xa taxa Yeriko, a nata í bula boyinxannilalu da. I x'a la faanolu bo a ma, x'a lippa, x'a xitinningo tu je xa taxa.»³¹ A nata ke xo sadaxalasibaxo do la taxamo bota wo silo fe. Wo x'a je tumo men, a x'a goori.³² Lewikundango do du nata wo dula, wo du x'a je tumo men, a x'a goori.³³ Bari Samaringo do dugutotaxa to nata si a ma x'a je; a hinno x'a muta.³⁴ Wo x'é sodun a la, xa tulo nin dolo ke a la joogilidalu la, x'e siti. Wo xo, a fan be marafenjo men xan, a x'a layele wo xan, xa taxa a ti luntanjigidula do, x'a maakuwo njina.³⁵ Wo lun do, Samaringa in xa depe xaalisi ganana fula bo í kun, x'a di a jatigi ma x'a fo a pen xo: «Í hakilo tu jin xe in na. Nin í xa men ke a pen xa tanbi wo xan, n' koppato si wo lasaagi í ma.»³⁶ Isa xo xe in pen xo: «Íte hakilo la, boyinxannikelalu boyita xe men xan, jon keta a moxoxoxo ti wo xe sabo to?»³⁷ Sariya karanmoxo x'a jaabi xo: «Men hinnata a la, wo le keta a moxoxoxo ti.» Wo xan, Isa xo a pen xo: «Taxa, í du xa wo poxon ke.»³⁸ Xa Isa nin a la xarandinjolu tu silo xan, a nata dun gallo do xono. Muso do x'a lajigi a bata. Wo muso toxo xo Marate.³⁹ Marate badinmuso do be je, a toxo xo Mariyama, wo x'é sigi Marigi senbo to, x'a la xumolu lame.⁴⁰ Marate tun be jawulenin luxonobaaro kiika la. A nata Isa ma, a xo: «Marigi, n' badinmuso fele baaro bee tunin n' kilin ne bulu. Í nte wo jaatela ba? A fo a pen xo a xa n' deema.»⁴¹ Marigi x'a jaabi, a xo: «Marate, Marate, í be hanmela x'é fan sege ku kiika la.»⁴² Ku kilinpe le be je, men xa xole. Mariyama xa men sugandi, wo le xa jin; wo me muta a la.»

11 Lun do, Isa tun be Alamatara la dula do. A sotoninma, a la xarandinjo do xo a pen xo: «Mari-gi, n xaran Alamatara la, í xo Yaya x'a la xarandinjolu digi a la na men.»² Isa xo i pen xo: «Nin alu be Ala matarala tumo men, alu s'a fo xo: «N Fa, í toxo la senuya xa lon, na í la Mansaya ti.»³ N na lun wo lunjo baluwo di n ma.⁴ N na haxxolu yaafa, katugala n dulu be yaafala n haxxetabaxolu ma. Í xana a tu n xa dun xotoboliku xono.»⁵ Isa x'a fo i pen du xo: «Alu to moxo joman be je, nin xanunte b'a kun, a dun xa taxa wo bata dugutala ma, x'a fo a pen xo: «N' xanunte, buurukun saba juludun n' na, bawo n' xanunte do nata saasa xa bo taxamo to. Fusi dun nte n' bulu x'a di a ma.»⁷ Nin wo x'é tu bunjo xono x'a fo xo: «Í xana n' sege. Da soxota; nte nin n' dinjolu x'e la xa ban. N' me wuli no xa buuru di í ma.»⁸ N' b'a fola alu pen xo nin a man wuli xa wolu di a ma xanunteya xanma, a si wuli x'a maakupanfenjo bee di a ma, a la mameseyalo xanma.⁹ «Nte ken b'a fola alu pen xo, alu Ala matara, a si

di alu ma; alu njinno ke, alu si soto ke; alu da konkon, da si yele alu na.¹⁰ Moxo wo moxo je Ala matara, wo si soto ke; men je njinno ke, wo si fen je; men je da konkon, da si yele wo na.¹¹ Jon be alu to nin a dinjo xa nego njin a la, nin a si sa di a dinjo ma nego no to?¹² Walla nin a dinjo xa sisekilo tara a la, a si dondonkoje di a dinjo ma ba sisekilo no to?¹³ Atelu men-nu xa jaxu, nin atelu xa fen numa dija lon alu dinjolu ma, alu Fa men be sanjo to me Ni Senunjo di a tarabaxolu ma bete bete ba xa tanbi atelu xan?»¹⁴ Isa tun b'a ma xa jinno xoyi x'a bo xe do to. Wo jinno tun xa wo xe ke muumuwo ti. Jinno xoyininma, muumuwo x'a damuta xa xuma. Jama dabaro banta.¹⁵ Bari moxo dolu xo: «A be jinnolu xoyila xa bo moxolu to, jinnolu la kuntigo Bilisa le barako la.»¹⁶ Dolu tunnu b'a fe x'a xotobo: I xo a pen xo a xa taagumansedo do ke, men s'a yita xo a be bola Ala bata.¹⁷ Isa tun x'e xonokuwo lon. Wo to, a xo i pen xo: «Mansaya wo mansaya, nin a boxo kilinjo wulita a boxo do xanma, wo mansaya si te, a bunjolu si boyi i noxo xan.¹⁸ Awa, nin Sentane du wulita a fan xanma, a la mansaya si tu siginin na di? Atelu dunnu xo, xo n' be jinnolu xoyila Bilisa le barako la?»¹⁹ Nin alu xo, xo nte be jinnolu xoyila Bilisa le barako la, alu la moxo dunnu b'e xoyila jon barako la? Alu fannu la moxolu s'a yita xo alu nte tonpatigi ti.²⁰ Bari nin nte be jinnolu xoyila Ala bulo le la, wo b'a yitala xo Ala la Mansaya sita alu ma.²¹ «Nin xe barakema kelekemirantigo b'a la luwo korosila, fusi me si a bu-lufenjolu ma.²² Bari nin xe do nata, men barako xa bun a ta ti, nin wo x'a mano, a si na a la kelekemiranjolu muta a la, a gigo tun be mennu xan, x'a bu-lufenjolu bee ko, x'e tala tala.²³ «Men nte n' jin ti, wo mu n' jaxo le ti. Men nte n' deemala xa kamarilo ke, wo be jenjenno le kela.»²⁴ «Nin jinno bota moxo do to, a si wula jarolu tobori, tofopodula njinjo la. A me dula je, wo to, a s'a fo a fan pen xo: «N' be n' koppala n' na bunjo ma, n' bota jan men.»²⁵ A koppaningo si a tara xo wo bunjo be fitanin xa toben.²⁶ Wo to, a si taxa, xa na jinne woorowula xotelu ti, mennu xa jaxu xa tanbi ate xan. A nin wolu si dun, x'e sigi je. Wo moxo labanja si jaxuya xa tanbi folo xan.»²⁷ Xa Isa tu wo xumo la, muso do x'é tu jama to xa feten xo: «Muso men x'é wulu, x'é lasuusuu, heero be wo pen!»²⁸ Isa x'a jaabi xo: «Moxo mennu be Ala la xumo lamela x'a latimme, heero be wo lelu pen.»²⁹ Xa jama tu bunjala Isa bata, a xa xumo ta. A xo: «Bi moxolu xa jaxu. I be taagumansedo do njinna, bari taagumansede si me yita i la nin kila Yunusi ta nte.³⁰ Bawo Yunusi keta taagumansedo ti Niniwe moxolu pen na men de, wo na ma Moxo Dinxe du be kela taagumansedo ti bi moxolu pen.³¹ Kiito lunjo, Worodugu mansamuso si wuli xa bi moxolu jalagi, bawo ate nata xa bo duguxulo danjo ma, walasa xa mansaxe Sulemani la hakilitigiya xumolu lame. Men dun fele, wo xa bun Sulemani ti.³² Ki-

ito lunjo, Niniwengolu si wuli xa bi moxolu jalagi, ba-wo Niniwengolu tuubita Yunusi la waajulo koso. Men dun felenti, wo xa bun Yunusi ti.»³³ Isa xo du xo: «Moxo si me lanpo lamana x'a dugu walla xa miranjo do labuti a kunna, bari nin í x'a lamana, í s'a sigi a sigi-lanjo le xan, walasa bugo xono dunbaxolu x'a keneya je.³⁴ Moxo na le mu a balo lanpo ti. Nin í na xa nin, í balo bee be keneya la, bari nin í na man nin, í balo bee be dibo le to.³⁵ Í hakilo tu í fan na, walasa keneya men be í to, wo xana ke dibo ti.³⁶ Nin í balo bee be keneya la, dula si nte dibo to, a dulalu bee si keneya bo, í xo lanpamano be keneya bola í nen na men.»³⁷ Isa x'é so-to xumo la tumo men, Farisiya do x'a kili domolo ma a bata. Isa dunta a la luwo ma, x'é sigi domolo kunna.³⁸ Bari Isa man a bulolu ku Farisiyalu la laado na ma, jannin a xa domolo damuta. Wo Farisiya x'a je tumo men, a dabaro banta.³⁹ Marigi x'a fo a pen xo: «Atelu Farisiyalu kennu be jitafelu nin tasolu xomala lelu kula x'e senuya, x'a tara alu xono be fanin suuñalikuwolu nin jaxuya la.⁴⁰ Hakilintan innu! Ala men xa fenjolu xoxanna dara, ate le man i xono du dara ba? ⁴¹ Alu miranjo xonofenjo di fangantanjo ma. Nin wo ke-ta, fenjo bee si senuya alu pen.⁴² «Bone be alu Farisiyalu pen, bawo alu be nanaye nin natokefenjo anin naaxoxono fen mesenjo bee jakko bola, bari alu be tilininna nin Ala xano tula je. Alu tunnu xa xan xa wo bunbumaba lelu ke, xa wo fen mesenjo dulu kafu a ma.⁴³ «Bone be alu Farisiyalu pen, bawo Alabatusuwo xono nafesigilanjo nin moxolu la beratoxon-tonnolu xa di alu pen.⁴⁴ Bone be alu pen, bawo alu be le í xo xaburu duguninjo, moxolu be i taxamala i xan, x'a tara i man a lon xo wo s'i noxo Ala na xoto.»⁴⁵ Sariya karanmoxo do xo a pen xo: «Í la pin xumapa in fe, í be ntelu dulu nanila!»⁴⁶ Isa x'a jaabi xo: «Bone be alu sariya karanmoxolu dulu pen, bawo dono men-ta xa xole, alu be wolu lala moxolu kun. Haali alu dunnu me son x'alu buluxonondin kilin ke x'e deema xa wo donolu ta.⁴⁷ Bone be alu pen, atelu mennu be xaburu betolu darala kilalu pen, x'a tara alu mamaxe le dunnu x'e faxa.⁴⁸ Wo na ma, alu b'a yitala xo alu sonta alu mamaxelu la kebaarolu ma, bawo wo lelu xa kilalu faxa. Atelu kennu x'e xaburolo dara.⁴⁹ Wo le x'a tu, Ala x'a fo a la hakilitigiya xono xo: "Ní si kilalu nin kilad-injo ki i ma. I si dolu faxa, x'a lo dolu nofe, x'e tooro."⁵⁰ Wo bee si ke walasa kilalu mennu sata kabirin duniya da tumo, wolu jelo xa manjinxaxa bi moxolu la.⁵¹ X'é ta Abila jelo ma, fo xa taxa a bula Sakariya jelo la, wo men faxata sadaxajanidula nin Alabatusuba te. Ní b'a fola alu pen, xo wolu bee jelo si manjinxaxa bi moxolu la.⁵² «Bone be alu sariya karanmoxolu pen, bawo alu xa lonjo xundinjo ta. Alu fannu man dun. Mennu b'a fe xa dun, alu be wolu balila.»⁵³ Isa boninma wo dula, sariya karanmoxolu nin Farisiyalu x'a damuta x'e la diminba yita a la, x'a njinxaxa kuwo bee do la.⁵⁴ I xa

korojugaya bee do yita a la, walasa x'a muta a fan dalaxumolu ma.

12 Wo waxato, moxo kiika kamarita, i tunnu si moxo wulu kiika bo. I xa sa na men, fo i tunnu si ye le i noxo sinjo xan. Isa xa xumo damuta a la xarandinjo nen folo, a xo: «Alu i fannu korosi Farisiyalu la farinfuunulanjo ma, nin wo mu fulankafuya ti.² Fusi nte dugunin nin a me bo keno la. Fusi nte gullo to nin a me lon.³ Wo le x'a tu, alu je fen wo fen fo dibo to, wo si me keneya la. Alu je men kondikondi moxo tulo to bun dataxunninjo xono, wo si gangu bunjo sanjo to.»⁴ Wo xo, Isa xo tugun xo: «Ate mennu mu n' xanun-telu ti, n' b'a fola alu pen xo: Mennu si moxo faxa no, x'a tara i me fen xote ke no wo xo, alu xana sila wolu na.⁵ Alu xa xan xa sila men na, n' si wo yita alu la: A sinjo be Ala men pen xa moxo faxa, x'a niyo bula jahanaba xono, alu sila wo le na. Ní b'a fola alu pen de, alu xa xan xa sila wo le na!⁶ «Titine luulu nte fiirila kuseeti fula la ba? Bari haali wo, Ala me njina i si kilin kun.⁷ Haali alu kunsinolu, i bee jaateninjo le mu. Wo to, alu xana sila. Alu xa fisa titinolu bee ti.»⁸ «Ní b'a fola alu pen xo: Moxo wo moxo je a yita xo a mu nte ta ti moxolu nala, Moxo Dinxe du s'a yita Ala la mekiyolu nala, xo wo tigo mu a ta le ti.⁹ Bari moxo wo moxo je bo nte la, moxolu nala, Moxo Dinxe du si bo wo tigo la, Ala la mekiyolu nala.¹⁰ Moxo wo moxo je xuma jaxo fo Moxo Dinxe ma, wo si yaafa a ma; bari nin men xa Ni Senunjo toxo tjina, yaafa me ke wo ma.¹¹ «Nin moxolu taxata alu ti Alabatusuwolu xono, anin kiititegelalu nin fankamalu bata, alu xana hanme alu la jaabo nin alu la fota xanma,¹² bawo alu xa xan xa men fo, Ni Senunjo si alu xaran wo la wo no fan to.»¹³ Moxo do x'é tu Isa pen jama xono xo: «Karanmoxo, a fo nte xotoxe pen xo a xa n na ke tala, xa n ta di n' ma.»¹⁴ Isa xo a pen xo: «Xe, jon xa nte ke alu te kiititegela nin ketalal-ibaxo ti?»¹⁵ A xo jama pen xo: «Alu i korosi naafu-lukunteya ma. Moxo la naafulo siyata na wo na, a la nilamaya nte dennin wo la de.»¹⁶ A xa pin tali in la i pen xo: «Naafulubatigo do keta je, a la senefenjo sabatita.¹⁷ A x'a fan njinxaxa xo: "Ní si mun ke? Bawo n' na senefenjo kedula nte n' bulu." ¹⁸ A xo: "Ní be nala men kela wo fele: Ní si n' na kurukurolo te, xa do xotelu lo, mennu xa bun. Ní si n' na senefenjo nin n' kun-fenjo bee ke wolu xono.¹⁹ Wo xo, n' s'a fo n' fan pen xo: Fen kiika be n' kun fo waxati jan. Ní be n' tofojola, xa domolo ke, xa n' min, xa n' tulun." ²⁰ Bari Ala xo a pen xo: "Hakilintanjo, bi su in to fan, í niyo si muta í la. Í xa men toben, jon ta si ke wo ti?" »²¹ Wo xo, Isa xo: «A fele de, moxo men be naafulo kamarila a kilin pen, x'a tara fen nte a bulu Ala bata, wo la kuwo be ten.»²² Wo xo, Isa xo a la xarandinjo pen xo: «Wo le x'a tu, n' b'a fola alu pen xo: Alu xana hanme alu baluna la x'a fo xo: "Ntelu si mun domo?" Alu xana hanme alu feetofato la x'a fo xo: "Ntelu si n feetofato soto na di?"

²³ Bawo nilamaya xa xole domolo ti, balo xa xole faano ti. ²⁴ Alu xonoxaaxelu mafele, i nte fen lanna, i nte fen tegela. Buntun nt'e kun, kurukuru nt'e kun, bari, Ala be i labalula. Atelu man fisa bete xonolu ti ba? ²⁵ Jon be alu to, nin wo la hanmo si haali dondin kafu no a siyo ma? ²⁶ Wo le xanma, nin alu me wo kundinjo ke no, mun dun na alu be hanmela ku tolu la? ²⁷ Alu wulaxonobaxolu firo boja mafele. I nte baara kela, i nte wurundili kela. Wo bee nin a ta, nte b'a fola alu nen xo, haali mansaxe Sulemani nin a la saramaya bee, a la faanolu beteya man wolu kilin ta bo. ²⁸ Nin Ala be wulaxonobinjo feetofatala ten, wo men be je bi, sinin a si fili ta to, a me atelu feetofata bete ba xa tanbi wolu xan? Alu la lannaya xa doxo. ²⁹ Alu xa xan xa men domo, x'a min, alu xana hanme wolu njinno la, alu juso xana tege i sotoja la. ³⁰ Nin duniya in Alalonbalo lelu be wo fenjololu bee njinna tuma bee. Bari alu Fa x'a lon xo alu maakuwo be wo fenjololu la. ³¹ Atelu kennu xa Ala la Mansaya le njinin. Nin wo keta, wo fenjololu bee si di alu ma x'a kafu wo ma. ³² «Saaxagoorendin, alu xana sila! Bawo a diyata alu Fa nen xa Mansaya di alu ma. ³³ Alu i bulufenjololu fiiri x'e xaalisidisegebantunjololu ma. Alu xaalisibulalan xotobalolu dara alu fannu nen, xa naafulu banbalo lakamari sanjo to: Sunjo me si non, tunbo me a tija non. ³⁴ Bawo alu la naafulo be jan men, alu jusukunjo du be kela non ne. ³⁵ «Alu te sitininjo xa tu, x'alu la lanpolu mananinjo tu. ³⁶ Alu ke i xo moxo mennu be siginin x'e marigi laxono xa bo maajoya to, walasa nin a nata tumo men xa da konkon, alu xa da yeke a ja. ³⁷ Nin wo marigo nata xa jonjo mennu tara i pala, heero be wolu nen. N' b'a fola alu nen, tonja la, xo wo marigo si a te tositi, xa wolu lasigi domolo kunna, x'a tala tala i te. ³⁸ A nata dugutala ma wo, a nata saxuyelenda la wo, nin a x'e tara i pala, heero be i nen. ³⁹ Alu x'a lon xo nin lutigo tun xa sunjo nawaxato lon, a tun si tu a pala, walasa a xana dun a la luwo xono. ⁴⁰ Alu dulu tobenninjo xa tu, bawo alu hakili nte waxato men ma, Moxo Dinxe be nala wo waxato fan ne.» ⁴¹ Piyere x'a fo a nen xo: «Marigi, i be pin tali in lala ntelu doronnu nen ba, fo bee le nen mu?» ⁴² Marigi xo: «Jon mu xotosigibaxa xantigo nin hakilima ti, men marigi s'a lasigi a la luwo kunna, xo a x'a jon tojoxolu la domolo di i ma a tumo to? ⁴³ Nin a marigi nata wo jonjo tara wo baaro la, heero b'a nen. ⁴⁴ Tonja, n' b'a fola alu nen xo a marigi s'a lasigi a bulufenjo bee kunna. ⁴⁵ Bari nin wo jonjo xo: "N' marigi meta a man na;" nin a bulata jon noxolu la, xemalu nin musumalu, x'e buwo, x'a ta ke domolo nin minno ti, x'e fa dolo la, ⁴⁶ wo jonjo marigi si na lunjo do, a hakili nte lunjo men ma, anin waxato do, a man men lon. A si wo jonjo xoyi, x'a nin lannayabalolu sara ke kilin ti. ⁴⁷ Jonjo men x'a Marigi sago lon, bari a man tobenni ke, a man a sago du ke, buwoliba si la wo xan. ⁴⁸ Bari jonjo men man a Marigi sago lon, nin a xa ku-

wolu ke, a xa xan xa buwo mennu to, buwoliba me la wo xan. Fen kiika dita men ma, kiika si marjininxo wo la; fen kiika xarifata men ma, kiikaba si njinin wo la. ⁴⁹ «N' nata ta le bula duguxulo xan. Nte tun b'a fe saasa x'a tara mananin. ⁵⁰ Batiseli tooroma do be je; waajibo le mu, wo xa ke n' na folo. Wo kuwo be nte niyo tooronin jannin a xa ke! ⁵¹ Atelu la miiro to xo nte nata benjo le ke duguxulo xan ba? Ayi de, n' nata talalo le ti. ⁵² Kabirin saasa, moxo luulu si tara lu kilin xono, i si tala xan ma. Moxo sabo s'i xodi moxo fulo la, moxo fulo s'i xodi moxo sabo la. ⁵³ Fa s'i xodi dinxe la, dinxe s'i xodi fa la. Na s'i xodi dinmuso la, dinmuso s'i xodi na la. Bitanmusuba s'i xodi bitanmusundinjo la, bitanmusundinjo s'i xodi bitanmusuba la.» ⁵⁴ Isa xo jama nen du xo: «Nin alu xa xabo je bola tiliboyi tumo men, alu s'a fo wo no bee to xo: "Sanjiyo be nala," a dun si na. ⁵⁵ Nin alu xa fojo je bola banbugu, alu s'a fo xo: "Funtano si ke bi," a si ke ten. ⁵⁶ Fulankafu innu! Alu si sin no xa duguxulo nin sanxulo kepalu lon; mun dunna alu me bi waxati in kepa faamu? ⁵⁷ «Mun na alu fanu me sila tilinninjo faranfansi? ⁵⁸ X'e nin i kelepoxo tu taxanin kiitidula, i jija i nin a xa ben, walasa a xana i dun kiititegela bulu, wo x'e di garado ma x'e bula kaso la. ⁵⁹ N' s'a fo i nen xo i me bo non abada nin i man wo julo bee sara. Haali tanga, a me tu i la.»

13 Wo waxato, moxo dolu nata Galilengo dolu xibaro laxali Isa nen. Pilate tun xa moxo bula xa wolu faxesa, x'e tu sadaxamarafenjololu faxala, x'e jelo nin wo marafenjololu jelo jaxami. ² Isa xo wolu nen xo: «Alu la miiro to xo wo Galilengolu mu junubekelalu ti xa tanbi Galilenga tolu bee xan ba? ³ Ayi, n' si wo fo alu nen de! Bari nin alu man alu jigo yekelema, alu bee si sa i xo i sata ja men. ⁴ Silowe sankansuwo boyita moxo tan nin sago men xan x'e faxesa, alu la miiro to xo wolu mu junubekelalu ti xa tanbi Yerusalememo moxo tolu xan ba? ⁵ Ayi, n' si wo fo alu nen de! Bari nin alu man alu jigo yekelema, alu bee si sa i xo i sata ja men.» ⁶ Wo xo, Isa xa pin tali in la i nen, a xo: «Xe do le, turo seneta tun b'a kun a la naaxo xono. Lun do, a nata a lafele fo a si dinjo do soto a la. Bari a man fen soto a la. ⁷ A xo naaxo senebaxo nen xo: "A sanji sabo le fele, n' be nala turodinjo njinna nin turoju in na, n' nte fen tarala a la. A sege! Mun na a be duguxulo tanin fu?" ⁸ Bari naaxo senebaxo xo a nen xo: "Marigi, a tu je njinan tun, n' si dinxo jaga x'a laminin, xa noxo ke a la. ⁹ Wo to, a do to a si dinjo ke jaari. Nin a dun man i din, i s'a sege." ¹⁰ Tofopolunjo do, Isa tun be moxolu xaranna Alabatusuwo do xono. ¹¹ Muso do tun be je, jinne jangaro tun be wo la kabirin san tan nin sagi. Wo jangaro x'a xutu fo a me i latilin no muume. ¹² Isa xa musu in je tumo men, a x'a kili x'a fo a nen xo: «Muso, i x'e fan soto i la jangaro la bi.» ¹³ A x'a bulolu la muso xan. Wo no bee to, muso x'e latilin, a keta a ma xa Ala tantu. ¹⁴ Alabatusuwo kuntigo diminta, katugala Isa xa wo ke to-

foɗɗolunɗo le. A woman in xo jama pen xo: «Baaro xa xan xa ke tili wooro le xono. Alu na xa kendeya wo lunɗolu, alu xana na tofoɗɗolunɗo.»¹⁵ Marigi x'a jaabi xo: «Atelu mu fulankafo lelu ti. Alu do wo do nte alu la falo, walla alu la tuura firinna tofoɗɗolunɗo ba xa taxa a lamin?»¹⁶ Nin musu in men mu Burehima bonsonɗo ti, Sentane tun x'a siti kabirin san tan nin sagi. A fo, wo tun man xan xa bo Sentane la joloxo la tofoɗɗolunɗo?»¹⁷ A la wo xumaxanɗolu x'a jaxolu bee maluya. Jama bee paxalita a la kuba keninɗolu la.¹⁸ Isa xo: «Ala la Mansaya nin mun xa don? N' s'a la mun ma?»¹⁹ A be le i xo mutaradekeso. Moxo do x'a ta x'a sari a la naaxo xono. A bunɗata xa ke yirijuwo ti. Xonolu nata i paxanɗolu la a bulolu la.»²⁰ Isa xo tugun xo: «N' si Ala la Mansaya la mun ma?»²¹ A be le i xo farinɗuunulanɗo. Muso do x'a ta, x'a nin farinɗo kilo muxan nin luulu paxami, fo farinɗo bee xa fuunu.»²² Isa tun be galubalu nin gallundinɗolu yaalala. A tun kun be Yerusaleme xan. A taxato tun b'a ma xa moxolu laxaran.²³ Moxo do xa Isa njinxa xo: «Marigi, moxo danta lelu be kisila ba?» Wo to, Isa x'e jaabi xo: «Alu i balan xa dun da doxomandinɗo fe. N' s'a fo alu pen xo moxo kiika s'a mafele x'e be dunna, bari i si dasa.»²⁵ Nin lutigo wulita tumo men xa da soxo, x'a tara atelu be banto to, wo tumo alu si wuli dakonkonɗo la x'a fo xo: «Marigi, da yele n ja.» A woman in si alu jaabi xo: «N' man alu bodula lon.»²⁶ Wo to, alu s'a fo xo: «Ntelu xa domolo ke i pala, x'e min i pala. I xa xaranɗo ke n na beralu to.»²⁷ A woman in si alu jaabi xo: «N' man alu bodula lon. Alu i soobo n na, atelu mennu bee be jaxumanɗo kela!»²⁸ Alu si xasi x'alu dafato kin, nin alu xa Burehima, nin Nsiyaxa, nin Yaxuba, nin kilalu bee je Ala la Mansaya xono tumo men, x'alu fannu je filinin banto to.²⁹ Moxolu si na xa bo koton nin tiliboyi nin saheli nin banbugu, x'e sigi xa domolo ke Ala la Mansaya xono.³⁰ Xomoxo dolu si ke pamoxolu ti; pamoxo dolu si ke xomoxolu ti.»³¹ Wo tumo la, Farisiya dolu x'e sodun Isa la, x'a fo a pen xo: «Taxa i xa bo jan, katugala Herode b'a fe x'e faxesa.»³² Isa x'e jaabi xo: «Alu taxa a fo Herode korojuga in pen i xo sandin xo: «Bi nin sinin, nte si jinnolu xoyi x'e labo moxolu to, xa jangarutolu kendeya. A tili sabananɗo, n si n soto n na baaro la.»³³ Wo bee nin a ta, waajibole mu, nte xa tu silo xan taxanin, bi nin sinin nin sinikindin. Bawo a nte bennin kila do xa faxesa dula xote, men nte Yerusaleme ti.³⁴ «Yerusaleme, Yerusaleme, ite men be kilalu faxala, xa Ala la kiladinɗolu bun kuro la, x'e faxesa, sinna kiika ti nte keta a fe xa i la moxolu kamarila, i xo sisejibo b'a dinɗolu kamarila a danfatannɗolu xoto ja men. Bari alu man son.»³⁵ A fele, alu la luwo toxulunɗo si tu alu bulu. Nte b'a fola alu pen xo, alu me nte je bitugun, fo lunɗo men alu s'a fo xo: «Men nato fele Marigi toxo la, duwa-wo be wo fe!» »

14 Tofɗolunɗo do, Isa taxata Farisiyalu la kuntigo do bata domolo la. Men tunnu be je, wolu tunnu be Isa lakorosinin bete.² Xe do tun be je, fuunujan-garo tun b'a la.³ Isa xa xumo ta, xa sariya karanmoxolu nin Farisiyalu njinxa xo: «A be dagenin ba xa jangaruto kendeya tofoɗɗolunɗo, walla a nte dagenin?»⁴ Bari i tuta denin. Wo tumo la, Isa xa jangaruto muta x'a kendeya, x'a bula a xa taxa.⁵ Wo xo, a xo i pen xo: «Nin alu do dinxe walla a la tuura bulata xolonɗo xono, a me a layele wo no bee to ba, haali nin tofoɗɗolunɗo le mu?»⁶ I korita a jaabila.⁷ Isa x'a korosi xo moxo mennu kilita domolo ma, wolu tunnu be nafe-sigidulalu palatonbonna. A xa taliyo la wolu pen xo: «Nin moxo do x'e kili domolo la maɗnoya to, i xana taxa i sigi nafe. I man a lon nin moxo do kilita domoli in ma, men xa bun i ti;»⁹ alu fulo bee kilibaxo xana na a fo i pen xo: «Wuli, i xa pin sigidula in di pin ma.» Nin wo keta, i maluninɗo si taxa i sigi xofe.¹⁰ Bari nin i kilita domolo ma, taxa i sigi xofe, walasa nin i kilibaxo nata, a x'a fo i pen xo: «N' terixe, na taxa i sigi nafe.» Nin wo keta, i si bunna soto i domolikepoxolu pala.¹¹ Moxo wo moxo x'a fan xotota, wo si majigi, men je a fan majigi, wo si xotota.»¹² Wo xo, Isa xo a kilibaxo du pen xo: «Nin i xa xontonba walla siimanba dara, i xana i xanuntelu kili, walla i la lumamoxolu walla i badinɗolu, walla i siginɗo naafulutigolu. Nin wo nte, wo dulu si i kili no domolo ma, x'e la julo sara.»¹³ Bari nin i xa domoliba toben, fangantanɗolu nin moxo yellatolu nin namatolu nin fiyontolu kili.¹⁴ I si heero soto, katugala wolu me na i la kililo julo sara no. I si wo sara soto moxo tilininɗolu kunilunɗo.»¹⁵ Wo domolikebaxolu do xa wo xumolu lame tumo men, a xo Isa pen xo: «Moxo men si domolo ke Ala la Mansaya xono, heero be wo pen.»¹⁶ Isa x'a jaabi pin tali in na xo: «Xe do le, a xa domoliba toben, xa moxo kiika kili a ma.»¹⁷ Domoli waxato sininma, a x'a la jonxe ki, xo a xa taxa a fo moxo kilininɗolu pen xo: «Alu na, saasa domolo mota.»¹⁸ Bari i bee kilin kilin xa yaafo njinin a fe. Folo xo: «N' xa fuuto do san, n xa xan xa taxa wo mafele; i s'i balan xa yaafa n ma.»¹⁹ Do xote xo a pen xo: «Nte xa sarituura tan san, n xa xan xa taxa wolu mafele; i s'i balan xa yaafa n ma.»²⁰ Do xote xo: «N' birin muso tala. Wo le x'a tu, n me taxa no.»²¹ Jonxe x'e koppa xa taxa wolu fo a marigi pen. Wo to, lutigo diminta. A xo a la jonxe pen xo: «I tariya i xa taxa gallo beralu nin a bedolu to, i nin segebaxantunɗolu nin moxo yellatolu nin fiyontolu nin namatolu xa na.»²² Wo keninma, jonxe xo: «N' marigi, i xa men fo, wo keta. Haalibi, kundula be je.»²³ Marigo xo a la jonxe pen xo: «Taxa silabalu nin silandinɗolu fe, i x'a fo moxolu pen xo i x'e balan xa na, walasa n na luwo xa fa.»²⁴ N' b'a fola alu pen xo moxo men tunnu fololu kilita, wolu si me n na domolo nene.»²⁵ Jamaba tun b'a lonin Isa nofe. Isa x'e yeleva i ma, x'a fo i pen xo: «Nin moxo do x'a lo nte nofe, a xa xan xa nte xo-

leya a na nin a fa nin a musu nin a dinɗolu nin a bad-inxelu nin a badinmusolu ti, anin haali a fan niyo ti. Nin wo nte, a me ke no nte la xarandinɗo ti. ²⁷ Moxo men nte a fan gengeniyero tala, x'a lo nte nofe, wo me ke no nte la xarandinɗo ti. ²⁸ Alu to, moxo joman be je, nin a b'a fe xa sankansuwo lo, nin a me sigi xa jaate bo folo, x'a lon nin sin b'a pen x'a laban? ²⁹ Nin wo nte, nin a x'a damuta, a dun man na sin x'a laban, wo jebaxolu bee si jele a ma, ³⁰ x'a fo xo: "Nin xe in xa bunlo damuta, bari a korita a labanna." ³¹ Walla mansaxe joman, nin a be taxala mansaxe xote kelela, nin a me í sigi folo x'é miiri, nin a nin xe wulu tan si sin no xa mansaxe xote nin xe wulu muxan kele? ³² Nin a me sin no wo la, a si kiladinɗolu bula xa taxa benɗo njinin mansaxe do la dulajan. ³³ Wo ɗa ma, alu to moxo wo moxo me ɗiɗa no a bulufenɗolu bee xo, wo me ke no nte la xarandinɗo ti.» ³⁴ «Xooxo mu fen ɗuma le ti, bari nin a diya bota a la, mun s'a ladiya tugun? ³⁵ A me fusi ɗan duguxulo pen. A me ke no noxo du ti fuuto to. Moxolu s'a bon banto to. Tulu be men ma xa lamelo ke, wo xa lamelo ke del»

15 Sagallemutalalu nin kujaxukelalu bee x'e sutiya Isa la x'a lame. ² Farisiyalu nin sariya karanmoxolu ɗuunɗuunuta x'a fo xo: «A be kujaxukelalu mutakubetela, fo a nin i be kafula domolo ma.» ³ Isa woman in xa ɗin tali in la i pen xo: ⁴ «Moxo joman be alu to, nin saaxa keme b'a kun, kilin xa sanko wulu to, nin a me tan xononto nin xononto tu wulo xono, xa taxa sankoninɗo njinin, fo a x'a je tumo men? ⁵ Nin a x'a je tumo men, a si ɗaɗa, xa saaxa in la a danbankunɗo la, a nin a xa taxa su. ⁶ Nin a x'é koppa a bata ma, a si a xanuntelu nin a siginɗoxolu kili x'a fo i pen xo: "Alan xa ɗaxali i ɗoxo fe, bawo n' na n' na saaxo je, men tun sankota." ⁷ N' b'a fola alu pen xo wo ɗa ma, nin junubekela kilin tuubita, ɗaxalo si ke sanɗo to xa tanbi moxo tilinnin tan xononto nin xononto la kuwo la, mennu maakuwo nte tuubilo la.» ⁸ Isa xo tugun xo: «Musu joman be je, nin xaaɓisixoyi ganan tan b'a kun, kilin xa sanko wulu to bunɗo xono, nin a me lanpo lamana, xa bunɗo fita, x'a la xaaɓisixoyo njinin, x'a njinin, fo a x'a je? ⁹ Nin a x'a je tumo men, a s'a xanunte-musolu nin a siginɗoxomusolu kili a bata, x'a fo i pen xo: "Alan xa ɗaxali i ɗoxo fe, bawo n' tun na xaaɓisixoyo men sankota, n' x'a je!" » ¹⁰ Isa xo: «Wo be ɗa men, n' b'a fola alu pen xo, nin junubekela kilin tuubita, Ala la mekekiyolu si ɗaɗa wo tigo la.» ¹¹ Isa xo tugun xo: «Dinxé fula tun be xe do kun. ¹² Lun do, doxo xo a fa pen xo: "N' fa, n' ta di n' ma í ke to." Fa woman in x'a la naafulo tala i te. ¹³ Tili dantalú tanbininɗo xo, doxo x'a la fenɗo bee fiiri, xa taxa jamanu janɗo do xan. A x'a la naafulo bee ɗiɗa duniyadiya la non. ¹⁴ A x'a la naafulo bee domo tumo men, xonxoba nata wo jamano xono. Fenɗo bee dasata a la. ¹⁵ A taxata wo jamano moxo do bata, xa ke wo bulu baaro la. Wo x'a bula lenegaano la

wulo xono. ¹⁶ Xonxo digikujaxo a la, a tun b'a fe x'a xono fa lelu la domolo la, bari moxo si man fen di a ma. ¹⁷ X'a tu wo ɗa ma, a x'é miiri a fan ma, a xo: "Baaradin kiika be nte fa la luwo xono, wolu b'e fala lun wo lun x'a to tu, nte felenti sala xonxo bulu jan." ¹⁸ A xo: "Nte si wuli xa taxa n' fa bata, x'a fo a pen xo: N' fa, n' xa Ala junubo ta, x'é junubo ta. ¹⁹ Nte man xan xa kili xo í dinɗo tugun. N' muta í xo í la baaradinɗo do." ²⁰ Wo to, a wulita xa taxa a fa bata. «X'a tu dulajanɗo, a fa x'a je. A hinno x'a muta: A woman in x'é bori xa taxa í sappi a ma, x'a baataya xonton. ²¹ Dinxé xo a fa pen xo: "N' fa, n' xa Ala junubo ta, x'é junubo ta. N' man xan xa kili xo í dinɗo tugun." ²² Bari a fa xo a la jonɗolu pen xo: "Alu i tariya xa na dorokolu to betemanɗo ti, x'a dun a xanna, xa doronma dun a bulo la xa samatolu dun a to. ²³ Alu na tuurandin tolonɗo ti, x'a faxes. Alan xa domolo ke, x'e tulun, ²⁴ bawo n' dinxe men tun sata, a kunita. A tun sankota, bari a jeta." I woman innu xa tulunɗo damuta. ²⁵ «Wo be kela tumo men, wo xa xoto tara fuuto to. A sutiyaninɗo luwolu la, a xa folixanɗo nin donxanɗo me. ²⁶ A woman in xa baaradinɗo do kili x'a njinxaxa wo tulunɗo kunɗo la. ²⁷ Wo xo a pen xo: "Í doxoxe le nata. Í fa dun xa tuurandin tolonɗo faxes a pen, bawo a x'a kendo je." ²⁸ Xoto diminta, a man son xa dun luwo ma. A fa bota xa taxa a matara, xo a xa dun. ²⁹ A x'a fa jaabi xo: "A san kiika fele, nte be baaro la í pen í xo jonɗo, n' man dali x'é sooso. Bari í bada man bakotondin di nte ma xo n' nin n' xanuntelu x'é tulun. ³⁰ Í dinɗo men x'é la naafulo ɗiɗa jadomusolu la, wo naninma, í janxa tuurandin tolonɗo faxes a pen." ³¹ A fa xo a pen xo: "N' din! Ite be n' kun jan tuma bee. Fen wo fen be n' kun, a bee mu ite le ta ti. ³² Bari n xa xan xa ɗaxali, x'é tulun, bawo í doxoxe men tun sata, a kunita. A tun sankota, bari a jeta." »

16 Isa xo a la xarandinɗolu pen xo: «Xe naafulutigo do le, xotosigibaxa nanbarante do tun b'a kun. A fota a pen xo a la xotosigibaxo b'a ma x'a la naafulo totipa. ² A marigi x'a kili, x'a fo a pen xo: "N' be men menin í xotoxo to, wo mu mun ti? Í xa xaaɓiso labaara ɗa men, wo ɗa yita n' na, bawo í me tu no n' xotosigibaxaya la tugun." ³ Xotosigibaxa in x'é tu a xonoto xo: "N' marigi be n' nabola le a xotosigibaxaya la. N' si na mun ke? A barake nte n' na xa seno ke, don dun maluya be n' na xa sadaxo tara. ⁴ Uhun! N' be nala men kela, n' x'a lon. Nin n' na baarada ɗiɗa n' ma, moxolu si n' nadun i bata." ⁵ Wo xo, a marigi la julo be moxo mennu la, a xa wulu kili kilin kilin. A xo folo pen xo: "N' marigi la jelu b'é la?" ⁶ A xo: "Oliwetulo barigondin keme." Xotosigibaxo xo a pen xo: "Í la julusafe fele. Í tariya í x'é sigi xa tan luulu safe." ⁷ Wo xo, a xo do xote pen xo: "Ite xa xan xa jelu sara?" Wo xo: "Alixaamo booto keme." Xotosigibaxo xo: "Í la julusafe fele. Tan sagi safe." ⁸ Marigi in x'a la xotosigibaxa nanbarante in tantu, bawo a xa ɗin ku innu ke kewuya la. Bawo ɗin

duniya in moxolu xa kewu i joxo te kuwolu to xa tanbi moxolu la, mennu be i taxamala keneya la.»⁹ Isa xo du xo: «Nte ken b'a fola alu pen xo pin duniya in naafulo, men be moxo neenela, alu wo ke xa terolu soto alu fannu ma, walasa nin a dasata alu la lunjo men, wo terolu x'alu ladun sigidula wulibalolu xono.¹⁰ Moxo men mu lannayamoxo ti kundinjololu to, a mu lannayamoxo ti kuba dulu to; moxo men mu nanbarante ti kundinjololu to, a mu nanbarante ti kuba dulu to.

¹¹ Nin alu man ke lannayamoxo ti pin duniya in naafulo labaarapa to, wo men be moxo neenela, jon si la a la no xa naafulu soobe xarifa alu ma? ¹² Nin alu man ke lannayamoxo ti nandinaafulo to, jon si alu ta di alu ma? ¹³ «Baaradin si me baaro ke no marigi fula pen. Nin a be kilin jaxuyanin, a be do xanunin ne. Walla nin a be notonin kilin na, a nte do jaatela. Alu me baaro ke no Ala nin xaaliso pen i joxo la.» ¹⁴ Farisiyalu xa wo xumolu bee me, i jeleta Isa ma, bawo xaaliso tun xa di i pen. ¹⁵ Isa xo i pen xo: «Alu be alu fannu kela moxo tilinninjololu ti moxolu nala, bari Ala x'alu sondonmelakuwolu lon; bawo hadamadinjololu be men jaatela kuba ti, wo mu haramo le ti Ala na xoto. ¹⁶ «Sariya nin kilalu la xumolu tunnu be je, fo xa na a bula Batiselila Yaya la waxato la. Kabirin wo tumo, nin Ala la Mansaya xibaru Dimanjo be fola, moxolu bee be i jijala xa dun a xono. ¹⁷ Sanxulo nin duguxulo si sanko, bari haali safedin doxomandin kilin me bo sariya la. ¹⁸ «Moxo wo moxo je a musu bula, xa do xote futu, wo xa fuyanja ke. Moxo men je musu futusaninjo ta, wo xa fuyanja ke.» ¹⁹ «Nin keta xe naafulutigo do le ti, a tun be faama faanolu nin lenfaanolu dunna, xa domoli beto nin tulunjo ke lun wo lun. ²⁰ Xe segebaxantunjo do tun be lanin a la da la, a toxo xo Lasare. Wo balo bee be telenin. ²¹ Domolo mennu be butunna naafulutigo domolito xoto, a tun b'a fe xa wolu domo. X'a fara wo xan, wulolu tunnu be nala a la dalu newula. ²² «Lun do, segebaxantunjo sata. Melekiyolu taxata a bula Burehima bata. Wo xo, naafulutigo du sata, a lasita. ²³ Xa naafulutigo tu lahara, a tun be tooroba to je. A x'a na xotota xa Burehima je dulajanjo, Lasare b'a bata. ²⁴ A fetenta xo: "N Fa Burehima, hinna n na; Lasare ki a xa taxa a buluxonondinjo nunjo bula jiyo to, xa na maxa n nenjo la, bawo n be tooronin jaxu pin ta in to." ²⁵ Burehima x'a jaabi xo: "N din, i hakilo tu a la xo ite xa fen numa kiika soto i la nilamaya xono. Lasare dun segejaxuta a la nilamaya xono. Saasa ate be nasuma xono, ite be tooro xono. ²⁶ Anin du, dinxajironba be ntelu nin atelu te. Mennu b'a fe xa bo jan xa taxa alu bata, wolu me wo no; mennu b'a fe du xa bo alu bata xa na jan, wolu me wo no." ²⁷ Naafulutigo xo: "N fa Burehima, Lasare bula a xa taxa n fa bata, ²⁸ bawo n badinx moxo luulu be non. A xa taxa wolu lasobi, walasa i xana na pin tooro in to." ²⁹ Burehima x'a jaabi xo: "Musa nin kilalu la xumolu b'e bulu je: I xa wolu lame."

³⁰ Naafulutigo xo: "N fa Burehima, wo me i bo. Bari nin do bota furelu to xa taxa xuma i pen, i si tuubi." ³¹ Bari Burehima x'a jaabi xo: "Nin i man son xa Musa nin kila tolu lame, haali nin fure do kunita, i me son xa tuubi." »

17 Isa xo a la xarandinjololu pen xo: «Kuwo mennu si moxolu bula xa junubo ke, wolu me furun no. Bari moxo men je ke a sabaabo ti, bone be wo tigo pen. ² Xa kuru belebeleba siti a xanjo la, x'a fili xooxojiyo to, wo xa fisa wo tigo ma don ti xa pin dindin innu kilin bula junubo kela. ³ Alu i korosi bete! «Nin i badinjo xa junubo ke, xuma soobe a pen. Nin a nimisita, yaafa a ma. ⁴ Nin a x'e haxxo ta i xo sinja woorowula tili kilin xono, nin a saagita i ma sinja woorowula, x'a fo i pen xo: "Haketu," i xa yaafa a ma.» ⁵ Kilandinjololu xo Marigi pen xo: «Do kafu n na lannaya ma.» ⁶ Marigi xo: «Haali nin alu la lannaya tun xa bun i xo mutaradeke-so, alu tunnu s'a fo pin yiriju in pen xo: "I nin i lillolu bee xa bo xa taxa tutu xooxojiyo to", wo tun si alu lame.» ⁷ «Alu to jon be je, nin jonxe b'a bulu seno la, walla marafen negaano la, nin a s'a fo wo pen a boninma wulo to xo: "Na sigi, i xa domolo ke?" ⁸ A me a fo a pen ne ba xo: "Domolo dara x'a di n ma. I tetositi xa n na haajolu ke fo n xa domolo ke xa n min tumo men. Wo xo, i du si domolo ke x'e min." ⁹ A si wo jonxe tantu ba, bawo a x'a bula men na, a xa wo ke? ¹⁰ Atelu dulu je bula baaro men na, nin alu xa wo ke x'a dafa, alu a fo xo: "N mu jon gansanjo lelu ti. N tunnu xa xan xa men ke, n xa wo doron ne ke." » ¹¹ Xa Isa tu taxanin Yerusaleme, a bota Samari maro nin Galile maro te la. ¹² A dunto gallo do to, bagito tan x'a kunben. I x'e lo dulajan, ¹³ x'e xanjo labo Isa ma. I xo: «Karanmoxo Isa, hinna n na!» ¹⁴ Isa x'e je tumo men, a xo i pen xo: «Alu taxa i yita sadaxalasibaxolu la.» I bulata silo to. X'e taxato tu, i kendeyata. ¹⁵ Wolu to kilin x'a fan kendeyaninjo je tumo men, a x'e koppa xa Ala tantu, a xanjo layeleninjo. ¹⁶ A x'a foda lo dugo ma Isa xoto, x'a tantu. Wo xe tun mu Samaringo le ti. ¹⁷ Isa xa xumo ta, a xo: «I tanjo bee man kendeya ba? Xononto be min? ¹⁸ Nin luntan in kilin doron ne x'e koppa ba xa na Ala tantu?» ¹⁹ Wo xo, Isa xo a pen xo: «Wuli i xa taxa. I la lannaya x'e kisi.» ²⁰ Farisiyalu xa Isa nininxa Ala la Mansaya na waxato la. A x'e jaabi xo: «Ala la Mansaya nte nala na ma, fo moxolu na s'a je. ²¹ A me fo xo: "A fele jan!" walla: "A fele non!" Bawo Ala la Mansaya fele alu bata.» ²² A xo a la xarandinjololu pen xo: «Lunjololu si na, a si diya alu pen xa Moxo Dinxe la lunjo do je, bari alu me a je. A si fo alu pen xo: ²³ "A be jan!" walla: "A be non!" Bari alu xana taxa non, alu xana a lo wo fobaxolu nofe. ²⁴ Awa, sanjimepenxo be keneya bola sanxulo kun nin a kun te na men, Moxo Dinxe du si ke ten a nalunjo. ²⁵ Bari jan nin wo te, waajibo le mu, a xa tooro bete folo, anin bi moxolu xa ban a to. ²⁶ Kuwo mennu keta Nuhun na waxato, wo

noxonnu si ke Moxo Dinxe la lunḡolu. ²⁷ Nuhun tilo, moxolu tunnu be domolo kela, x'e min, xa futuwo ke, x'e dinḡolu di futuwo la, fo Nuhun dunta xulunba xono lunḡo men. Wo xo, waameba nata x'e bee halagi.

²⁸ Men keta Lote la waxato, wo noxon si ke. Moxolu tunnu be domolo kela x'e min, xa sanno nin fiiri ke, xa seno ke, xa bunḡolu lo. ²⁹ Bari lunḡo men, nin Lote bo-ta Sodome gallo to, wo lunḡo fan, ta nin tinbiritiyo jigita xa bo sanḡo to í xo sanjiyo, x'e bee halagi. ³⁰ Moxo Dinxe du je í yita lunḡo men, wo noxon si ke. ³¹ «Wo lunḡo je men tara a la bilo sanḡo to, x'a tara a bu-lufenḡolu be bugo xono, wo xana jigi x'a be wolu tala. A je men du tara fuuto to, wo xana í koppa. ³² Al'alu hakilo lajigi Lote musu la kuwo la. ³³ Moxo men je a fo xo a be a niyo kisila, wo si bono a niyo to. Moxo men je bono a niyo to, wo niyo si kisi. ³⁴ N' s'a fo alu pen xo wo lunḡo suwo to, moxo fula si tara laran kilin xan: Do si ta, xa do tu je. ³⁵ Musu fula si tara jurilo la i noxo fe: Do si ta, xa do tu je. [³⁶ Xe fula si tara fuuto to: Do si ta, xa do tu je.]» ³⁷ Xarandinḡolu x'a njinxa xo: «Marigi, wo si ke min?» A x'e jaabi xo: «Fen fure banna kela dula wo dula, dugolu si jigi non.»

18 Wo xo, Isa xa pin tali in la i pen, x'a yita i la xo i xa xan xa Ala matara tuma bee, i xana sege muume. ² A xo: «Kiititegela do tun be gallo do to, a nte silala Ala na, a nte moxo si bunḡala. ³ Musujaxe do du tun be wo gallo to, a tun be tula nala xe in bata x'a fo a pen xo: "N' na mone labo n' keleḡoxo to!" ⁴ Kiititegela in xa waxati jan ke, a man son. Wo xo, a x'a fo a fan pen xo: "Tonḡa, n' nte silala Ala na, n' nte moxo du bunḡala. ⁵ Bari pin musujaxe in be nte segela. Wo xanma, n' be nala a mone labola a keleḡoxo to. Nin wo nte, a si tu nala n' segela." » ⁶ Wo xo, Marigi xo du xo: «Alu pin kiititegela jaxu in na xumo lame! ⁷ Ala la palatonbonninḡo mennu be xasila a ma su nin tili, a me wolu la mone bo ba? A si me ba x'a tara a man wolu deema? ⁸ Nte b'a fola alu pen xo a si wolu la mone bo junna. Bari nin Moxo Dinxe nata lunḡo men, a si lannaya tara duguxulo xan ba?» ⁹ Isa xa pin tali in la moxolu pen, mennu be i fannu jaatenin moxo tilinninḡolu ti, xa tolu jaate fuwo ti, a xo: ¹⁰ «Moxo fula taxata Alabatusuba xono Ala matara la. Do tun mu Farisiya le ti, do mu sagallemutala ti. ¹¹ Farisiya in tun b'a danna xa Ala matara í xonoto ten xo: "Ala, n' be barako bulala í pen, bawo n' nte í xo moxo tolu be na men, wolu mennu xa sun, i xa jaxu, i xa jado; n' b'e tantula, bawo n' nte í xo pin sagallemutala in be na men. ¹² N' be tili fula sunna loxokunḡo xono. N' be fen fen sotola, n' be wo jakko bola." ¹³ Sagallemutala, wo x'e lo dulajan, haali a tun me fatiya, x'a kunḡo xotota xa sanxulo mafele. A tun be a xaro malippala x'e fan majigi x'a fo xo: "Ala, hinna n' na, bawo nte mu junubekela le ti." » ¹⁴ Isa xo: «N' b'a fola alu pen xo, pin xe in tilinninḡo taxata a la luwo ma, bari Farisiya in, wo man tilinninḡa soto. Bawo

moxo wo moxo je a fan xotota, wo si majigi. Moxo wo moxo je a fan majigi, wo si xotota.» ¹⁵ Moxo dolu nin deenano do dulu nata Isa bata, walasa a x'a bulo la i xan, xa duwa i pen. xarandinḡolu xa wo je tumo men, i xa wolu madigaamu. ¹⁶ Bari Isa xa deenanolu sodun í la, x'a fo xo: «Alu a tu dindinḡolu xa na nte bata! Alu xana i bali, bawo Ala la Mansaya mu i noxon nelu ta ti. ¹⁷ Tonḡa la, n' b'a fola alu pen xo: Nin moxo wo moxo man Ala la Mansaya muta í xo dindinḡo, wo me dun no a xono abada.» ¹⁸ Yahudiyalu la namoxo do xa Isa njinxa xo: «Karanmoxo puma, n' xa xan xa mun ke nin n' si nilamaya banbalo soto?» ¹⁹ Isa xo a pen xo: «Mun na í be pumaya fola nte pen? Moxo si nte puma ti nin Ala kilin nte. ²⁰ Í xa sariyalu lon xo: "Í xana jadoya ke; í xana moxo faxes; í xana suupali ke; í xana xaro la í mox-oxoxo la; í na nin í fa bunḡa." » ²¹ Xe xo: «Kabirin n' dindin, nin n' be pin sariya innu bee labatula.» ²² Wo xumolu me xo, Isa xo a pen xo: «Ku kilin tuta í pen xo. Fen wo fen be í kun, taxa a bee fiiri, xa wo xaaliso tala segebaxantunḡolu te. Nin wo keta, naafuluba si ke í kun sanḡo to. Wo xo, í si na a lo nte nofe.» ²³ Xe xa wo xumo me tumo men, a nitokuwata, bawo naafulutigi-ba le tun mu. ²⁴ Isa x'a na tositininḡo je tumo men, a xo: «Naafulubatigo dunḡo xa xole Ala la Mansaya xono de! ²⁵ Nogomo dunḡo mesendiwuwo fe, wo xa newo xa tanbi naafulubatigo dunḡo ti Ala la Mansaya xono.» ²⁶ Wo xumo mebaxolu xo: «Jon dun si kisi no?» ²⁷ Isa x'e jaabi xo: «Hadamadinḡolu si kori men ma, Ala me kori wo ma.» ²⁸ Wo to, Piyere xo: «Ntelu kennu buruta n bu-lufenḡolu to, x'a lo í nofe.» ²⁹ Isa xo i pen xo: «Tonḡa la, n' b'a fola alu pen xo: Moxo wo moxo je piḡa a la luwo xo, walla a musu, walla a badinxelu, walla a wulubaxolu, walla a dinḡolu xo, Ala la Mansaya xanma, ³⁰ a si wo noxon kiika soto x'a tu nin duniya in xono, xa nilamaya banbalo soto sinin.» ³¹ Isa x'a la xarandin tan nin fulo kili, x'a fo i pen xo: «Alan taxato fele Yerusalem, kilalu xa fen wo fen safe Moxo Dinxe la kuwo to, wo bee si dafa. ³² A si dun Alalonbalolu bulu, i si jele a ma, x'a nani, xa dajiyo tuppuppu a ma. ³³ I s'a buwo gaḡo la. Wo xo, i s'a faxes. A sa tili sabo, a si kuni xa bo furelu to.» ³⁴ Bari xarandinḡolu man fusi faamu wo kuwo to. Wo xumo xoto tun be dugunin i ma. I man a lon Isa tun b'a fe xa men fo i pen. ³⁵ Isa sutiyata Yeriko la. Wo xa fiyonto do tara siginin silada la, sadaxatara la. ³⁶ A xa jama tanbito sonxoxanḡo me tumo men, a xa njininxalo ke, xo mun be je. ³⁷ I x'a fo a pen xo Nasareti Isa le be tanbila. ³⁸ A fetenta xo: «Isa, Dawuda Mamarinḡo, hinna n' na!» ³⁹ Moxo men tunnu be na, wolu x'a madi-gaamu xo a x'e de. Bari wo bee xan, a xa do kafu fetenḡo ma, x'a fo xo: «Dawuda Mamarinḡo, hinna n' na!» ⁴⁰ Isa lota, xa yanmaro di xo i xa na a ti. Fiyonto sininma a ma, Isa x'a njininxalo xo: ⁴¹ «Í b'a fe n' xa mun ke í pen?» Fiyonto x'a jaabi xo: «Marigi, n' b'a fe n' palu xa ye!» ⁴² Isa xo a pen xo: «Jelo ke! Í la lannaya x'e

kendeya.»⁴³ Wo no bee to, a xa dula je. A x'a lo Isa nofe, xa Ala tantu. Jama bee xa wo je, xa Ala tantu.

19 Isa dunta Yeriko, xa gallo tofara.² Xe do bota, a toxo Sake; sagallemutalalu la kuntigo do le mu, naafulubatigo le du mu.³ A tun b'a fe xa Isa je x'a lon, bari a tun me a je no jama kun, bawo a xa sutu.⁴ A x'é bori xa taxa ja, xa yele yirijuwo do to, nin a s'a je, bawo Isa tun xa xan xa tanbi non na.⁵ Isa sita a ma tumo men, a x'a ja xotota, a xo a pen xo: «Sake, í tariya xa jiggi, bawo n' xa xan xa jiggi í bata bi.»⁶ Sake x'é tariya xa jiggi. A napaninngo xa Isa jiggiya a bata.⁷ Moxo fen fen xa wo je, í njuununuunuta x'a fo xo: «A taxata jiggi Alapasi-lanpabalo bata.»⁸ Sake wulita x'é lo, a xo Marigi pen xo: «Marigi, n' xa n' na naafulo tala, x'a tala di segebaxantunngolu ma. Nin n' xa men na fen nanbara, n' si wo noxon naani saagi wo tigo ma.»⁹ Isa xo a pen xo: «Kisilo dunta pin lu in xono bi, bawo ite du mu Burehima bonsonngo do le ti.¹⁰ Moxo Dinxe nata le, men sankota, xa wo njinin, x'a kisi.»¹¹ Xa moxolu tu a lamela, Isa xa pin tali in la i pen. A tun sutiyata Yerusaleme la, a tun be moxolu pen xo Ala la Mansaya je na le, wo no bee to.¹² A xa men fo, wo fele: «Mansaxedinngo do taxata jamanujanngo do xan, x'a be taxala mansaya njininna a fan pen, wo xo, x'é koppa.¹³ A taxato x'a la jonxe tanngo kili, xa xaaalisixoyi ganan keme di i kilin wo kilin ma, x'a fo i pen xo: "Alu jaago ke pin xaalisi in to, jannin n' be n' koppala." ¹⁴ Bari a la jamano moxo tunnu nte a fe; i xa kilalu bula a xofe x'a fo xo: "N nte a fe pin xe in xa sigi n kunna." ¹⁵ A xa mansaya soto tumo men, a x'é koppa. A tun xa xaaliso di jonngo mennu ma, a x'e kili, walasa i xa tono men soto jaago to, a xa wo lon. ¹⁶ Folo nata x'a fo a pen xo: "Marigi, nte xa í la xaaliso noxon tan soto, x'a kafu í ta ma." ¹⁷ Mansaxe xo a pen xo: "Wo benta, í keta jon beto ti. Í keta lannayamoxo ti kundinngolu to. Wo xanma, n' x'é lasigi galluba tan kunna." ¹⁸ Jon fulananngo nata x'a fo a pen xo: "Marigi, í xa men di n' ma, n' x'a noxon luulu soto tono ti." ¹⁹ Mansaxe xo wo du pen xo: "N' x'é lasigi galluba luulu kunna." ²⁰ Wo xo, jonngo do xote nata x'a fo xo: "Marigi, í la xaaliso fele; nte xa faano murugumurugu a ma, x'a lamara. ²¹ Nte silata í ja, bawo í la kuwo xa xole. Í man fenngo men bula je, í be wo le tala, í man fenngo men lan, í be wo le tegela." ²² Mansaxe xo a pen xo: "Jon jaxu in! N' b'é la kito tegela x'a la í fan na xumo xan. Í tun x'a lon xo n' na kuwo xa xole; xo n' man men bula je, n' si wo ta, n' man men lan, n' si wo tege. ²³ Mun na í man n' na xaaliso bula bangi la, walasa n' koppaninngo xa n' na xaaliso nin a tono soto?" ²⁴ Mennu be lonin je, mansaxe xo wolu pen xo: "Alu a la xaaliso muta a la. Tanngo be men bulu, alu a di wo ma." ²⁵ I xo a pen xo: "Marigi, tan be wo bulu xa ban!" ²⁶ A x'e jaabi xo: "Nte b'a fola alu pen xo, fen be men bulu, do si di wo ma; bari fen nte men bulu, haali dondinngo men b'a bulu, wo si muta a la. ²⁷ Nte jaxolu kennu, mennu tunnu nte a fe nte xa sigi i kunna, alu

na i ti jan, x'e faxa n' jala." »²⁸ Isa sotoninma wo xumolu la, a bulata jama ja xa taxa Yerusaleme.²⁹ A sutiyata Betefaje nin Betani la tumo men, fo xa si kuro do senbo to, xo Oliwe kuro, a x'a la xarandin fula ki.³⁰ A xo i pen xo: «Alu taxa gallo to, men be alu nafe. Nin alu sita doron, alu si falindingo do tara sitinin je, moxo bada man yele men xan folo. Alu si a firin xa na a ti. ³¹ Nin do x'alu njininxo xo: "Mun na alu b'a firinna?" Alu s'a fo a pen xo: "Marigi le haajo b'a ma." »³² Kiladinngolu taxaninngo, Isa x'a fo i pen ja men, i x'a tara wo ja ma. ³³ X'e tu falindingo firinna, falitigolu xo i pen xo: «Mun na alu be pin falindin in firinna?» ³⁴ I xo: «Marigi le haajo b'a ma.» ³⁵ Wo xo, i taxata falindingo ti Isa bata. I x'e la faanolu feene a xan, xa Isa layele a xan. ³⁶ A taxato, moxolu x'e la faanolu feene silo to. ³⁷ Isa sutiyandinngo Yerusaleme la, xa si Oliwe kuro jigindanngo dula, a la xarandinngolu jama bee paxalininngo boyita Ala tantula xanba to, i xa kawakuwo mennu bee je xanma. ³⁸ I xo: «Mansaxe men nato fele Marigi toxo la, duwawo be wo fe! Heero xa ke sanngo to, tanto xa ke Ala pen sanjanbalu to!» ³⁹ Farisiya do tunnu be jama xono, wolu xo Isa pen xo: «Karanmoxo, xuma í la xarandinngolu pen i x'e de.» ⁴⁰ A x'e jaabi xo: «Nte b'a fola alu pen xo, nin pinnu x'e de, kurolu si feten!» ⁴¹ Isa sutiyandinngo Yerusaleme la fo x'a gallo je, a xasita a la kuwo la. A xo: ⁴² «Bi lun in, nin í tun x'a lon men si heero di í ma! Bari saasa, wo be dugunin í ma. ⁴³ Lunngolu si na í ma, í jaxolu si sigi í da la, x'é laminin tato la, xa dinxolu jaga, x'é xaranda í boxo bee la. ⁴⁴ I s'í te, x'é xono moxolu halagi. I me haali kuru tu kuru xan, bawo Ala nata í deemalo xanma tumo men, í man wo tumo faamu.» ⁴⁵ Isa dunta Alabatusuba xono, x'a damuta xa je fiirikelalu xoyi. ⁴⁶ A xo i pen xo: «A be safenin Kitaabo to xo: "Nte la bunngo si ke Alamatarabunngo ti." Bari atelu kennu x'a ke boyinxannilalu dugudula ti.» ⁴⁷ Isa tun be moxolu laxaranna Alabatusuba xono lun wo lun. Sadaxalasibaxa kuntigolu nin sariya karanmoxolu nin dugo moxobalu tunnu be ja njininna, i s'a faxa ja men. ⁴⁸ Bari i tunnu man a lon i s'a ke ja men, bawo a la xumo xa jama bee kunngo muta.

20 Lun do, Isa tun be moxolu xaranna x'e waaju xibaru Dimanngo la Alabatusuba xono. Sadaxalasibaxa kuntigolu nin sariya karanmoxolu nin moxobalu nata. ² I x'a njininxo xo: «Fanga joman x'é bula pin ku innu kela? Jon x'é yanmaru?» ³ Isa x'e jaabi xo: «Nte du be nala alu njininxala ku kilin na. Alu a fo n' pen, ⁴ men xa Yaya bula batiselo la, Ala ba, fo moxolu?» ⁵ I xo i noxo pen xo: «Nin n xo: "Ala le x'a ki", a s'a fo xo: "Mun dun na alu man la a la?" ⁶ Nin n dunnu xo: "Moxo lelu x'a ki", jama bee si n bun kurolu la xa n faxa, katugala moxolu bee be Yaya mutanin kila do le ti.» ⁷ Wo to, i x'a jaabi xo: «Ntelu man a lon, men x'a ki x'a xa na moxolu batise.» ⁸ Isa xo: «Awa, men xa fango di nte ma xa pin

ku innu ke, nte du nte wo fola alu pen.»⁹ Wo tumo, Isa xa nin tali in la moxolu pen, a xo: «Xe do le, a xa resenfuuto bo, x'a xarifa senekela dolu ma, xa taxama waxati jan xono.¹⁰ Resenmo tumo sita tumo men, a x'a la jonngo do ki a la resenfuuto senebaxolu ma, xo i x'a la resenmo di a ma. Bari resenfuuto senebaxolu x'a la jonngo buwo, x'a bulutoxulunjo lakoppa.¹¹ Fuututigo x'a la jonngo do xote ki. I xa wo du buwo, x'a nani, x'a bulutoxulunjo lakoppa.¹² A xa jonxe sabananjo ki. I xa wo du joogi, x'a bula banto to.¹³ Wo keninma, resenfuututigo xo: "N' si mun ke sa? N' si n' dinxe baato ki i ma; a do to i si wo bunja." ¹⁴ Bari kabirin resenfuuto senebaxolu na lata wo xan, i xo i joxo pen xo: "A ketabaxo fele. Alu na, alan x'a faxa. A ke si ke alan ta ti." ¹⁵ I x'a filii resenfuuto xo ma, x'a faxa.» Isa xo i pen xo: «Awa, resenfuututigo si na mun ke i la? ¹⁶ A si na xa wo resenfuuto senebaxolu faxa, x'a la resenfuuto xarifa moxo xotelu ma.» Moxolu xa wo me tumo men, i xo: «Ala mu n kisila wo ma!» ¹⁷ Bari Isa x'e mafele, a xo: «Nin xuma in xoto mu mun ti xo: "Kurubunlolalu x'e ban kuro men to, wo keta bunjo jusigikuro ti"?" ¹⁸ Moxo wo moxo je boyi wo kuro to, wo tigo si tote. A je boyi men to, a si wo tigo nooni.» ¹⁹ Sariya karanmoxolu nin sadaxalasibaxa kuntigolu tunnu be feere njinina xa Isa muta wo waxato fan, bawo i x'a lon x'a faamu, xo a la tali in be ite lelu xan. Bari i silata jama na. ²⁰ Wo tumo la, i x'a damuta xa Isa lakorosi. I xa naafigo dolu ki, xo i x'e fannu ke moxo tilinninjololu ti, nin i si Isa muta a fan na xumolu xono, walasa i x'a dun fango nin goferenero bulu. ²¹ Wo moxolu x'a njinixa xo: «Karanmoxo, n x'a lon xo í be xumala xa moxolu laxaran kuwo mennu ma, wolu be tilinnin. Í nte moxo bola moxo to, bari í si moxolu laxaran Alasilo ma x'a xoyiya. ²² A be dagenin ba n xa sagallo sara Rome mansaxe ma, walla a nte dagenin?» ²³ Bari Isa x'e la korjugaya lon. A xo i pen xo: ²⁴ «Alu depe xalisi ganan kilin yita n' na. Jon kunxulo nin jon toxo be a xan?» I xo: «Rome mansaxe le mu.» ²⁵ Wo tumo la, a xo i pen xo: «Awa, mansaxe ta mu men ti, alu wo di a ma, xa Ala ta di Ala ma.» ²⁶ I man sin x'a muta a dalaxumolu ma jama pala. A la jaabo x'e dabaro ban. I x'e de. ²⁷ Sadusen diino moxo dolu nata Isa bata. Wo lelu xo, xo furelu nte kunila. I x'a njinixa ten xo: ²⁸ «Karanmoxo, kila Musa x'a fo xo nin xe do sata, x'a tara a musu man din soto, a badinxe xa xan xa wo muso ta, xa dinjo do soto a ma, a badinxe saninjo pen. ²⁹ Awa, badinxe woorowula tun be je. Folo xa muso ta, a sata, a man din wulu a pen. ³⁰ Fulananjo x'a ta, ³¹ wo xo sabananjo. I moxo woorowulo bee x'a ta, xa sa, a man wulu i si pen. ³² Wo xo, muso du sata. ³³ Furekuniyo xo, musu in be kela i to jon kilin musu ti? Bawo a keta i woorowulo bee musu ti.» ³⁴ Isa xo i pen xo: «Nin duniya in to, xebalu si muso futu, musolu si sigi xe kun. ³⁵ Bari xelu nin musolu mennu xa xan xa kuni

duniya kuto xanma, wolu nte futu kela sinin. ³⁶ I me sa tugun, bari i si ke í xo melekiyolu be na men. I mu Ala dinjololu ti, bawo i kunita xa bo furelu to. ³⁷ Musa x'a yita xo sikka nte furekuniyo to. Dula men be xumala fitaare mananinjo xan, Musa xa Marigi kili non xo Burehima la Ala, Nsiyaxa la Ala, anin Yaxuba la Ala. ³⁸ Ala nte furelu la Ala ti, nilamalu la Ala le mu, bawo wolu bee nilama le mu Ala bulu.» ³⁹ Sariya karanmoxo dolu x'a jaabi xo: «Karanmoxo, í la xumolu benta!» ⁴⁰ Wo xo, i man fatiya x'a njinixa fusi la tugun. ⁴¹ Isa x'a fo i pen xo: «Mun na moxolu b'a fola xo Kirisita mu Dawuda Mamarinjo ti? ⁴² Bawo Dawuda fan x'a fo Jaburu kitaabo xono xo: "Marigi x'a fo nte Marigi pen xo: Í sigi n' kininjo xoto, ⁴³ fo nte xa í jaxolu ke í sinxotofenjo ti." ⁴⁴ Wo na ma, Dawuda be a kilila xo Marigi: Wo to, a dun si ke a mamarinjo ti na di?» ⁴⁵ Isa x'a fo a la xarandinjololu pen a lamebaxolu bee pala xo: ⁴⁶ «Alu i korosi sariya karanmoxolu ma, a xa di wo mennu pen x'e yaala dorokebalu xono. Moxolu x'e xonton beralu to, wo xa di i pen. Alabatusuwo xono, nafesigilannjololu xa di i pen. Domolibadulalu, nafesigidulalu xa di i pen. ⁴⁷ I be musujaxelu bulufenjololu bee mutala i la, wo xo, xa taxa Alamatarata janjololu ke, x'e fannu yita. Wo le x'a tu, i la kiito si xoleya bete.»

21 Isa x'a lamininjo mafele, xa naafulubatigolu je nilifenjo bulala nilifenbulamiranjo xono, Alabatusuba xono. ² A xa musujaxe segebaxantunjo do du je xalisi mesen fula bulala je. ³ A xo: «Tonja la, n' b'a fola alu pen xo: Nin musujaxe segebaxantun in xa men bula je, moxo man a joxon bula je. ⁴ Bawo tolu bee xa do ta men to x'a di, i man si wo ma folo; bari ate ken, a nin a la sege bee, a maakuwo tun be men na xa balu, a xa wo bee le di.» ⁵ Moxo do tunnu be xumala Alabatusuba xan. I tunnu b'a fola xo dandula nte a la beteya ma, a kurolo xa bete, anin a xono miranjololu, mennu dita Ala ma. Bari Isa xo: ⁶ «Alu na be pin fen in mennu la, lun si na, kuru si me tu kuru xan jan, i bee si boyi.» ⁷ I xa Isa njinixa xo: «Karanmoxo, wo kuwo be kela tuma joman? Taagumanseede joman si wo kuwo kewaxato yita?» ⁸ Isa x'e jaabi xo: «Alu i korosi, alu xana lafili. Bawo moxo kiika si na nte toxo la, x'a fo xo: "Nte mu", anin xo: "Waxato sita". Alu xana a lo wolu nofe. ⁹ Nin alu xa kelexibarolu me, xa murutilolu xibaro me, alu xana sila. Bawo waajibo le mu, wo kuwolu xa ke folo, bari duniya wulo nte kela wo no bee to.» ¹⁰ Wo xo, a xo: «Siya do si wuli siya do xanma, mansaya do du si wuli mansaya do xanma. ¹¹ Duguxulu jarajarabalu si ke, anin fono jangarolu nin xonxobalu si ke dula kiika. Silanja kubalu nin taagumanseede balu si je xa bo sanjo to. ¹² «Bari jannin wo bee xa ke, i si alu muta, x'alu tooro bete. I si alu dun Alabatusu kuntigolu bulu, x'alu bula kaso la. I si taxa alu ti mansaxelu nin goferenerolu na xoto nte toxo nofe. ¹³ Wo si ke sabaabu ti alu pen, xa nte la kuwo seedeja.

¹⁴ Atelu kennu x'e toben. Alu xana hanme alu fannu lafaasalixumolu la jannin wo waxato xa si; ¹⁵ bawo nte si xumada nin hakilitigiya di alu ma, fo alu jaxolu me a no x'alu sooso, walla x'alu la xumolu bori. ¹⁶ Haali alu falu, nin alu nalu, nin alu badinxelu, nin alu badinḡolu nin alu xanuntelu si alu dun bulo to. I si alu kiika jalagi, x'alu faxalo latege. ¹⁷ Moxolu bee si alu jaxuya nte toxo nofe. ¹⁸ Bari haali alu kunsina kilin, a me sanko. ¹⁹ Alu i muḡa! Wo ḡa ma, alu si alu niyolu lakisi.» ²⁰ «Nin alu xa kebulolu je Yerusaleme lamininnin, alu s'a lon wo tumo xo a je te le. ²¹ Wo to, wo je moxo mennu tara Yude maro xono, wolu x'e bori xa taxa kurolu to. Mennu je ke Yerusaleme gallo fan xono, wolu xa bo je. Mennu be wulo xono, wolu xana na gallo xono. ²² Bawo wo lunḡolu si ke Ala la diminḡo bolunḡo ti, walasa xuma safeninḡolu bee xa dafa. ²³ Musu xonomalu, anin dinḡo be mennu sunjiyo la, wolu si tooro bete wo lunḡolu! Bawo tooroba si ke duguxulo xan. Ala la diminḡo si boyi ḡin siya in moxolu xan. ²⁴ Fanḡo si ke x'e faxes, i si muta xa ke kasalamoxolu ti siyalu bee to. Siya tolu si Yerusaleme toḡonxo i sinḡo xoto, fo siyalu la waxato xa dafa tumo men. ²⁵ «Taagumanseedolu si ke tilo nin xaro nin loololu xan. Duguxulo xan, xooxojiyo nin fanfelu mankanḡo si duniya siyalu lasila fo xa danmatanbi. ²⁶ Kuwo mennu be nala kela duguxulo xan, wolu ḡasilanḡa si moxo dolu faxes, bawo sanxulo sintigiyalu si jarajara. ²⁷ Wo to, i si Moxo Dinxe nato je xabo xan, sintigiyaba nin nooroba xono. ²⁸ Nin wo kuwolu damutata tumo men, alu i latilin x'alu kunḡo xotota, bawo wo mu alu kunbo sutiyaniḡo le ti.» ²⁹ Wo xo, a xa taliyo do la i pen. A xo: «Alu turojuwo nin yiri tolu mafele. ³⁰ Nin alu x'a je xo wolu boyita nerunḡo xan, alu s'a lon xo sama sutiyata. ³¹ Wo ḡa ma, nin alu xa wo kuwolu keto je, alu a lon xo Ala la Mansaya sutiyata. ³² Tonḡa la, ḡ b'a fola alu pen xo bi moxolu bee me sa, x'a tara ḡin ku innu bee man ke. ³³ Sanxulo nin duguxulo si sanko, bari nte la xumaxanḡolu me sanko abada.» ³⁴ «Alu i korosi! Alu xana ke domolikelaba nin dolominnaba ti, xa hanme duniya fenḡolu sotoḡa la, fo x'alu hakilo ladoni jaxu. Nin wo keta, kiito lunḡo si alu ju x'alu muta, ³⁵ í xo kalanḡo; bawo wo lunḡo si duguxulo xan moxolu bee muta. ³⁶ Bari alu tu i ḡala xa Ala matara tuma bee, walasa alu xa barako soto xa kisi wo ku natalu bee ma, anin alu xa sin xa lo Moxo Dinxe ḡa xoto.» ³⁷ Isa tun be moxolu xaranna Alabatusuba xono lun wo lun tilo to. A tun be taxala sila Oliwe kuro to. ³⁸ Jama bee tun be sorila xa na Alabatusuba xono x'a lame.

22 Buurufuunulantan sallo, nin wo mu Tanbinxansallo ti, wo tun sutiyata. ² Sadaxalasibaxa kuntigolu nin sariya karanmoxolu tunnu be feere ḡininna xa Isa faxes. Bari i tunnu be silanin jama ḡa. ³ Wo tumo la, Sentane dunta Yudasia to, men kilita xo Isikariyoti, xarandin tan nin fulu to do le mu. ⁴ Yudasia

taxata xuma sadaxalasibaxa kuntigolu nin Alabatusuba lakorosibaxolu pen, a si Isa dun i bulu ḡa men ma. ⁵ I ḡanata wo la, i benta a to xo i si xaaliso di a ma. ⁶ Yudasia sonto wo ma, a x'a damuta xa waxati ḡuma ḡinin a si Isa dun i bulu ḡa men, x'a tara jama man bo a xalama. ⁷ Buurufuunulantan sallo lunḡo sita. Tanbinxansallo sadaxa saaxandinḡo xa xan xa faxes wo lunḡo. ⁸ Isa xa Piyere nin Yaya ki x'a fo i pen xo: «Alu taxa Tanbinxansallo domolo toben n pen.» ⁹ I xo: «Í b'a fe n xa taxa a toben min?» ¹⁰ A xo i pen xo: «A fele, alu dunto gallo xono, alu nin xe do si ben, jidaxo be siginin a kun. Alu s'a lo a nofe. A je dun luwo men ma, alu xa dun non. ¹¹ Alu s'a fo wo lutigo pen xo: "Karanmoxo xo, xo a nin a la xarandinḡolu be Tanbinxansallo domolo kela bunḡo men xono, wo be min?" ¹² Wo xe si bunba do yita alu la sankansuwo sanḡo to, miranḡolu b'a xono. Alu si domolo toben non.» ¹³ I taxata, x'a bee tara í xo a x'a fo i pen ḡa men. I xa Tanbinxansallo domolo toben je. ¹⁴ Waxato sininma, Isa nin a la kiladinḡolu x'e sigi domolo kunna. ¹⁵ A xo i pen xo: «A diyata ḡ pen haali, ḡ nin alu xa ḡin Tanbinxansalli in domolo ke, jannin ḡ be toorola. ¹⁶ Bawo ḡ s'a fo alu pen xo, ḡ me a domo tugun fo a kuwo xa dafa lunḡo men Ala la Mansaya xono.» ¹⁷ Wo to, a xa minfen jipoto ta, xa barako bula Ala pen, a xo: «Alu ḡin minfen poti in muta, alu x'a tala i ḡoxo te; ¹⁸ bawo ḡ b'a fola alu pen xo, kabirin saasa, ḡ me resenḡo jiyo min tugun, fo Ala la Mansaya xa na lunḡo men.» ¹⁹ Wo xo, a xa buuro ta, xa barako bula Ala pen, x'a tokutun, x'a di xarandinḡolu ma, x'a fo i pen xo: «ḡin mu ḡ balo le ti, men dita alu xanma. Alu ḡin ke x'alu hakilo jigi nte la.» ²⁰ Wo ḡa ma, i sotoninma domolo la, a xa minfen jipoto du ta, x'a di i ma, x'a fo xo: «ḡin minfen jipoti in mu Ala la Kafuxan Kuto minfen jipoto le ti, men tata ḡ jelo to, xa bon alu pen. ²¹ Bari alu a mafele: Men be ḡ dunna bulo to, wo be jan, a nin ḡ be domolo la! ²² Sikka nte a to, Moxo Dinxe si sa í xo Ala x'a latege ḡa men; bari moxo men be nala a dunna bulo to, bone be wo tigo pen!» ²³ Wo keninma, xarandinḡolu keta a ma x'e ḡoxo toḡininxa, xo jontigi be nala wo kuwo kela. ²⁴ xarandinḡolu wulita ḡoxomasooso la, xo jon si jaate i bee to moxoba ti. ²⁵ Isa xo i pen xo: «Mansaxelu be i la jamanolu marala fango la. Fankamalu b'a fe jamanudinḡolu x'e kili xo ḡumakelalu. ²⁶ Bari a man xan xa ke ten atelu bulu. Alu to moxoba xa ke í xo alu bee doxo; alu to ḡamoxo xa ke í xo alu la baarandinḡo. ²⁷ Jon xa bun? Men be siginin domolo la ba, walla men be baaro la? Men be siginin domolo la, wo le man bun? Bari wo bee nin a ta, nte be le alu to í xo baarandinḡo. ²⁸ Alu nin nte tuta ḡ na xoleyalu xono; ²⁹ Í Fa xa Mansaya di ḡ ma ḡa men, ḡ du be Mansaya dila alu ma wo ḡa in. ³⁰ Alu nin ḡ si domolo nin minno ke ḡ na Mansaya xono, alu si sigi mansasigilanḡolu xan, xa kiito tege Banisirayila bunda tan nin fulu xan.» ³¹ Isa xo: «Simon, Simon! Sentane x'a

ɲinin x'a be alu surundula í xo ɲo; ³² bari ń xa Ala matara í ɲen walasa í la lannaya xana tija. Nin í x'é koppa nte ma tumo men, í badinɲolu jusudun.» ³³ Piyere xo a ɲen xo: «Marigi, nte be tobennin haali ń nin í xa dun kaso la anin xa sa.» ³⁴ Bari Isa xo: «Piyere, ń b'a fola í ɲen xo, jannin duntunɲo xa kokori, í si í xaro í xo sinɲa saba, xo í man nte lon.» ³⁵ Wo xo, Isa xo í ɲen xo: «N' x'alu bula xa taxa tumo men, x'a tara alu nin silafanda nin fudi nin samata man taxa, mun dasata alu la?» I xo: «Fusi man dasa n na.» ³⁶ Wo to, a xo í ɲen xo: «Bari saasa silafanda be men kun, wo x'a ta, fudi be men kun, wo x'a ta. Fan nte men kun, wo x'a la dorokeba san xa fanɲo do san. ³⁷ Bawo ń b'a fola alu ɲen xo, waajibo le mu Kitaabo ɲin xuma in xa dafa nte la kuwo to xo: "A jaateta kujaxukelalu fe." Men safeta ń na kuwo to, wo be kela le.» ³⁸ xarandinɲolu xo: «Marigi, fan fula fele.» A x'e jaabi xo: «A waseta ten.» ³⁹ Isa bota, xa taxa Oliwe kuro to, í xo a dalita a kela ɲa men ma. A la xarandinɲolu x'a lo a nofe. ⁴⁰ I sininma je, a xo xarandinɲolu ɲen xo: «Alu Ala matara, walasa alu xana xotobo.» ⁴¹ Wo xo, a x'é soobo i la kuru fayininɲo dandula ɲoxon na, x'é ɲongi, xa Ala matara ten xo: ⁴² «N' Fa, nin a xa di í ɲen, ɲin tooro jitafe in soobo nte la. Bari nte sago xana ke, ite ta le xa ke.» [⁴³ Wo to, melekiyo do x'é yita a la, xa bo sanɲo to, xa barako di a ma. ⁴⁴ Isa niyo tooroninba xa do kafu Alamatara ma. A tarajiyo keta í xo jelo be tondila dugo ma.] ⁴⁵ A wulininma xa bo wo Alamatara la, a nata a la xarandinɲolu bata. A x'e tara sinnoxonin jusuxaso bulu. ⁴⁶ A xo í ɲen xo: «Mun na alu be sinnoxola? Alu wuli xa Ala matara, walasa alu xana xotobo.» ⁴⁷ X'a tu xumo la, jama nata. Isa la xarandinɲo do, xo Yudasí, wo tun be wo jama ɲa. A x'é sodun Isa la, x'a baataya xonton. ⁴⁸ Isa xo a ɲen xo: «Yudasí, í be Moxo Dinxe dunna bulo to baataya xontonno le la ba?» ⁴⁹ Isa kafuɲoxolu x'a je tumo men, men be nala kela, i xo: «Marigi, n xa fanɲolu ta i xanma ba?» ⁵⁰ I to do xa sadaxalasibaxa kuntigiba la jonxe kininbulu tulo carun. ⁵¹ Wo to, Isa xa xumo ta, a xo: «Alu a tu ten.» A x'é maxa wo xe tulo la, x'a kendeaya. ⁵² Wo xo, mennu nata Isa muta, nin wo mu sadaxalasibaxa kuntigolu nin Alabatusuba garadi kuntigolu anin moxobalu ti, a xo wolu ɲen xo: «Alu nin fanɲolu nin gumalu nata nte xanma, í xo nin nte mu boyinxannila le ti. ⁵³ N' tun nin alu be Alabatusuba xono lun wo lun, alu man nte muta de. Bari ɲin waxati in mu alu ta le ti, anin dibo fango ta.» ⁵⁴ I xa Isa muta, xa taxa a ti sadaxalasibaxa kuntigiba la luwo ma. Piyere x'é tu dulajan, x'a lo i nofe. ⁵⁵ I xa ta lamana lukeno temo to, xa sigi a la. Piyere x'é sigi i bata. ⁵⁶ Baaradinmuso do x'a je siginin tasinɲo la. Wo x'a ɲa lo a to, a xo: «Nin xe in du tun nin a mu le!» ⁵⁷ Bari Piyere x'é xaro a la, a xo: «Muso, nte man ɲin xe in lon.» ⁵⁸ Wo xo dondin, do xote x'a je. Wo xo a ɲen xo: «Í du mu i do le ti!» Piyere xa wo jaabi xo: «Nte nte i do ti de!» ⁵⁹ Wo xo, leere kilin

ɲoxon, do xote x'a fo x'a xoleya xo: «Sikka nt'a to, ɲin xe in du tun nin a mu le, bawo Galilengo le mu.» ⁶⁰ Piyere x'a jaabi xo: «Nte man a lon, ite b'a fe xa men fo.» X'a tu xumo la, wo no bee to, duntunɲo do kokorita. ⁶¹ Marigi x'é xofele, xa Piyere mafele. Marigi tun xa xumo men fo a ɲen, a hakilo jigita wo kun xo: «Jannin duntunɲo xa kokori bi, í s'í xaro nte la í xo sinɲa saba.» ⁶² Piyere bota, xa taxa xasi bete. ⁶³ Isa tun be xe mennu bulu, wolu jeleta a ma, x'a buwo. ⁶⁴ I x'a ɲa siti, x'a ɲininxo xo: «Kilaya ke! Jon x'é lippa?» ⁶⁵ I xa nanili kiika xotelu fo a ɲen. ⁶⁶ Saxo yeleninma, jama moxobalu nin sadaxalasibaxa kuntigolu anin sariya karanmoxolu kamarita, xa na Isa ti i la Kiititegekafo ɲa xoto. ⁶⁷ I x'a ɲininxo xo: «Nin í mu Kirisita le ti, wo fo n ɲen.» Isa x'e jaabi xo: «Nin ń x'a fo alu ɲen, alu me la a la. ⁶⁸ Nin ń x'alu ɲininxo du, alu me ń jaabi. ⁶⁹ Bari kabirin saasa, Moxo Dinxe si sigi Sinɲobeetigi Ala kininɲo xoto.» ⁷⁰ I bee xo: «Wo to, í mu Ala Dinxe le ti ba?» A x'e jaabi xo: «Alu fannu x'a fo, nte le mu.» ⁷¹ I woman innu xo: «N maakuwo be seedeyali joman na tugun, bawo n fannu x'a me a da la?»

23 Jama bee wulita xa taxa Isa ti Goferenere Pilate bata. ² I tunnu b'a jalagila xo: «N xa ɲin xe in tara n na siya lafilila x'e lamuruti. A tun b'a fola xo sagallo xana sara Rome mansaxe ma, xo ate le fan mu Kirisita nin mansaxe ti.» ³ Wo to, Pilate x'a ɲininxo xo: «Í mu Yahudiyalu la mansaxe le ti ba?» Isa x'a jaabi xo: «Nte mu wo le ti, a be í xo í x'a fo ɲa men.» ⁴ Wo to, Pilate xo sadaxalasibaxa kuntigolu nin jama ɲen xo: «Nte man jalagikun si je ɲin xe in na.» ⁵ Bari i x'e sinsin a xan, x'a fo xo: «A be jama lamurutila a la xarannɲo la Yude maro bee to. A x'a damuta Galile, fo xa na a bula jan na.» ⁶ Pilate xa wo me tumo men, a xa ɲininxalo ke fo xe in mu Galilengo le ti. ⁷ A x'a me tumo men, xo a be bola Herode la maro xono, a x'a bula xa taxa wo bata. Wo waxato xa Herode fan tara Yerusaleme. ⁸ Herode xa Isa je tumo men, a ɲaɲabeteta, bawo a tun x'a toxo me. A tun b'a fe x'a je, kabirin tuma jan. A tun yilo b'a ma x'a la kawakuwo do je. ⁹ A x'a ɲininxo ku kiika la, bari Isa man jaabi si di a ma. ¹⁰ Sadaxalasibaxa kuntigolu nin sariya karanmoxolu tunnu be je, xa feten, x'a jalagi xuma jaxu kiika la. ¹¹ Herode nin a la sorodasolu x'a doxoya, xa jele a ma. Wo xo, i xa mansadoroko dun a xanna, x'a lakoppa Pilate ma. ¹² Wo lun, Pilate nin Herode keta xanuntelu ti; i dun tunnu me ben. ¹³ Pilate xa sadaxalasibaxa kuntigolu nin ɲamoxolu nin jama kili. ¹⁴ A xo í ɲen xo: «Alu nata ɲin xe in ti nte bata, xo a be moxolu lafilila, x'e lamuruti. N' x'a ɲininxo alu fannu ɲala, alu x'a jalagi kuwo mennu to, bari nte man jalagikun soto a la wo kuwolu to. ¹⁵ Herode du man jalagikun soto a la, bawo a x'a lakoppa n ma. Nin xe in man fusi ke men si faxalikun bo. ¹⁶ Wo to, ń s'a buwo, x'a bula.» [¹⁷ Tanbinxansalli wo Tanbinxansalli, Pilate tun si kasolamoxo kilin bula

jama nen.]¹⁸ Bari i bee fetenta x'a fo xo: «Nin xe in faxa! Í xa Barabasi bula!»¹⁹ Barabasi tun bulata kaso la murutilo do nofe gallo xono, anin moxofaxakuwo to.²⁰ Pilate tun b'a fe xa Isa bula; wo to, a xumata jama nen tugun.²¹ Bari i fetenta xo: «A gengen yiro ma! A gengen yiro ma!»²² Pilate xo i nen a sinna sabanango to xo: «A xa mun kujaxu le ke? Nte man faxalikun si je a ma. Í b'a buwola, wo xo, x'a bula.»²³ Bari, i x'e balan a to, xa feten xo: «A gengen yiro ma!» I la fetenjo xanma, sonjo keta i la fo ma.²⁴ I tunnu be men njinina, Pilate x'a latege wo xa ke.²⁵ Men bulata kaso la murutilo nin moxofaxo to, a xa wo bula, í xo i x'a njinina men. A xa Isa ke i sago ti.²⁶ I taxato Isa ti, i nin xe do benta, a toxo xo Simon. Sireningo le mu. Wo tun be bola wulo to. I xa wo muta, x'a bula Isa gengenyiro tala a nofe.²⁷ Jamaba x'a lo a nofe. Muso dolu tunnu b'e to, wolu b'a ma x'e xaro juri, xa xasi Isa nofe.²⁸ Isa x'e yelema wolu ma x'a fo i pen xo: «Yerusalem musolu, alu xana nte xasi! Bari al'alu fannu nin alu dinjolu xasi!»²⁹ Bawo lunjolu si na, a si fo xo: "Muso mennu keta wulubalo ti, mennu man din soto, anin mennu man din nasuus, heero be wolu nen." ³⁰ Wo lunjolu, moxolu s'a fo kurubalu nen xo: "Alu parati n xan!" x'a fo kurundinjolu nen xo: "Alu n dugu!" ³¹ Nin pin be kela yiri kerengo la, mun si ke yiri jaro la?» ³² I nin kujaxukela fula du taxata, mennu nin Isa be faxala i joxo la. ³³ I siningo dula do xo «Kunxuludula», i x'a nin kujaxukela fulo gengen non. Kilin b'a kiningo, do b'a numango. ³⁴ Isa xo: «Í Fa, yaafa i ma, bawo i be men kela, i man wo lon.» I xa dokkolo ke a la faanolu xanma, x'e tala i joxo te. ³⁵ Jama tun be je xa wo kuwolu mafele. Yahudiyalu la kuntigolu tunnu be jelela Isa ma, x'a fo xo: «A xa dolu lakisi! A dun me a fan kisi xo, nin a mu Kirisita le ti, Ala la Sugandiningo.» ³⁶ Sorodaso dulu x'e sodun, xa jele a ma, xa binegaro di a ma, ³⁷ x'a fo xo: «Nin í mu Yahudiyalu la mansaxe le ti, í fan kisi xo!» ³⁸ Safelo do tun b'a kunnamato xo: «Nin mu Yahudiyalu la mansaxe le ti.» ³⁹ Kujaxukela mennu gengenta, wolu to kilin tun b'a nanila xo: «Ite nte Kirisita ti ba? Í fan kisi xo, xa n dulu kisi!» ⁴⁰ Wo kafujoxo x'a laxosi xo: «Í me sila Ala na ba, ite men b'a la tooro joxon xono?» ⁴¹ Ntelu kennu nin n na tooro xa xan, bawo n be n na kujaxu keningo lelu tooro xono; bari ate man kujaxu si ke.» ⁴² Wo xo: «Isa, í hakilo tu nte la, nin í nata tumo men xa ke mansaxe ti.» ⁴³ Isa x'a jaabi xo: «Tonja la, n b'a fola í pen xo, í nin nte si ke arajanna bi.» ⁴⁴ Taxanin tilinkunte ma, dibo dunta jamano bee xono, fo xa si wura ma. ⁴⁵ Mitiyo dunta tilo ma. Faanuba men tun be Alabatusuba xonototegenin, wo farata fula ti a temo to. ⁴⁶ Isa fetenbeteta xo: «Í Fa, n be n niyo bulala í bulu.» X'a tu wo fola, a sata. ⁴⁷ Sorodasi jalatigiba xa wo kuwo je tumo men, a xa barako bula Ala pen. A xo: «Tonja la, nin xe in tun mu moxo tilinningo le ti!» ⁴⁸ Jama men bee nata, wolu xa wo kuwo mafele. I xa wo

kuwolu je tumo men, i x'e koppa, xa ke a ma x'e xarolu malippa jusuxaso bulu. ⁴⁹ Isa xanubaxolu bee, anin muso mennu b'a nofe kabirin Galile, wolu x'e lo dulanjan, xa wo kuwolu mafele. ⁵⁰ Xe do tun be Yahudiyalu la Kiiitegekafo to, a toxo xo Yusufu. A bota Yahudiyalu la gallo do to xo Arimate. Moxo juma nin moxo tilinningo le tun mu. A tun be Ala la Mansaya nalo laxononin. A tun man son a topoxolu la xumolu nin i la kewalolu ma. ⁵² Wo taxata Pilate ma, xo a xa Isa fure di a ma. ⁵³ Wo xo, a x'a fure lajigi gengenyiro xan, x'a kasanke, xa taxa a lasi xaburo xono. Wo xaburo tun be jaganin kuro to. Moxo si tun man nasi non folo. ⁵⁴ Tofopolunjo tobenlunjo le tun mu, tofopolunjo tun be njinina xa damuta. ⁵⁵ Muso mennu be Isa nofe kabirin Galile maro la, wolu x'a lo Yusufu nofe, xa xaburo mafele, anin Isa lasina. ⁵⁶ Wo xo, i x'e koppa i bata, xa sumadiyalanjo lu nin tulu sumadimanjo lu toben. Tofopolunjo, i x'e tofojo í xo sariya x'a fo na men.

24 Alahado, saxo ma junna, musolu taxata xaburo da la, i nin sumadiyalu, i xa mennu dara. ² I x'a tara xo kuro birigintinta xa bo xaburo da la. ³ I dunta xaburo xono, bari i man Marigi Isa fure je. ⁴ X'e hakilo paxaminingo tu wo kuwo la, xe fula x'e lo i senbo to, i la faanolu be njelenxula. ⁵ I silata x'e kunjo buti dugo ma. Wo to, wo xelu xo i pen xo: «Mun na alu be nilama njinina furelu to?» ⁶ A nte jan, a kunita xa bo furelu to. A xa men fo alu nen x'a tu Galile, al'alu hakilo lajigi wo la. ⁷ A tun x'a fo xo: "Waajibo le mu, Moxo Dinxe xa dun junubekelalu bulu, xa gengen yiro ma, xa sa, xa kuni xa bo furelu to, a sa tili sabo." ⁸ Wo keninma, i hakilo jigita Isa la xumolu la. ⁹ I bota xaburuda la, xa taxa wo kuwolu bee laxali xarandin tan nin kilingo nin tolu bee nen. ¹⁰ Magidala Mariyama nin Janne nin Yaxuba na Mariyama le tunnu mu. Wolu nin musu tolu men tunnu mu, wo dulu xa wo ku kilingo lelu laxali Isa la kiladinjo lu nen. ¹¹ Bari musolu xa men fo, kiladinjo lu xa wolu mafele xuma xalantanjo lelu ti. I man la i la. ¹² Bari Piyere ken wulita, x'e bori xa taxa xaburuda la. A x'e majigi, a man fen xote je fo lenfaano doron, men keta kasanke ti. Wo xo, a x'e koppa xa taxa a bata, a dabaro tun be bannin wo ku keninjolu to. ¹³ Wo lunjo fan, xarandin moxo fula tun be taxanin gallo do to xo Emayusi. Non nin Yerusalem te si kilometere tan nin fula joxon bo. ¹⁴ Kuwo mennu bee keta, i tunnu be xi-defatala wolu xan. ¹⁵ X'e tu xumo la, Isa fan x'e sodun i la, a nin i xa taxa i joxo fe. ¹⁶ I tunnu na b'a la, bari a keta í xo fen do tun b'e balinin x'a lon. ¹⁷ Isa x'e njininxo xo: «Alu taxamato be mun fola i joxo nen?» I patositingo x'e lo. ¹⁸ I to do, nin wo mu Kilewopasi ti, wo xo a pen xo: «Kuwo mennu keta Yerusalem pin waxati laban in, ite kilin ne keta je nin í man wolu lon de?» ¹⁹ A xo i pen xo: «Wolu mu ku jomannu ti?» I x'a jaabi xo: «Men keta Nasareti Isa la dun! Kila barakeningo le tun mu. A xa wo yita a la kebaarolu nin a la xumolu la, Ala

nin moxolu bee pala. ²⁰ N na sadaxalasibaxa kuntigolu nin n na pamoxolu x'a dun bulo to, walasa xa kiito tege a xan, xo a nin faxalo xa xan, x'a gengen yiro ma. ²¹ N tunnu yilo b'a ma xo ate le be Banisirayila bola bulo to. Nin ku in dunnu ko tili sabananjo le mu bi ti. ²² Wo bee nin a ta, n na muso dolu xa n dabaro ban. I tunnu taxata xaburuda la saxo ma junna. ²³ I man a fure tara je tumo men, i nata x'a fo xo melekiyo dolu x'e yita i la x'a fo i pen xo a nilama mu. ²⁴ N kafuɲoxo dolu taxata xaburuda la. Musolu x'a fo ɲa men, i x'a tara ten. Bari i man a fan je.» ²⁵ Wo to, Isa x'a fo i pen xo: «Moxo hakilintanɲolu, alu kennu nte lala kilalu la xumolu la junna. ²⁶ Waajibo tun nte ba, Kirisita xa tooro ten folo, jannin a xa dun a la nooro xono?» ²⁷ Wo xo, men safeta a la kuwo to Kitaabo muume xono, a xa wo ɲa fo i pen. A x'a damuta Musa la kitaabolu ma, xa taxa ɲa kilalu bee la kitaabolu la. ²⁸ I sutiyaninjo i taxadula la, Isa x'a ke í xo nin a be taxala ɲa le. ²⁹ Bari i x'a matara xo: «Tu n bata jan! Tilo jigita, suwo je ku!» A woman in dunta, xa tu i bata. ³⁰ A nin i sigita domolo kunna, xa buuro ta xa barako bula Ala ɲen, x'a tokutun, x'a di i ma. ³¹ Wo to, i ɲalu yeleta, i x'a lon. Bari a sankota i ma. ³² I xo i ɲoxo ɲen xo: «A be xumala n pen silo fe tumo men, xa Kitaabo ɲafo n pen, n niyo sewoninba le ken tun mu.» ³³ Wo no bee to, i wulita x'e koppa xa taxa Yerusaleme. I xa kiladin tan nin kilinjo nin i kafuɲoxolu tara kamarinin non. ³⁴ Wolu tunnu b'a fola xo: «Tonɲa, Marigi kunita le! Simon x'a je!» ³⁵ Men keta silo to, i dulu woman innu xa wo ɲa fo, anin i xa Isa lon ɲa men x'a tu buuro tokutunna. ³⁶ Xa xarandinɲolu tu xumo la, Isa

fan lota i temo to. A xo i pen xo: «Heero xa ke alu fe.» ³⁷ I silata fo i xonotolafilita. A keta i pen xo fure le x'é yita i la. ³⁸ Isa xo i pen xo: «Mun x'alu xonotolafili? Mun na hakili fulanfulanjo be alu la? ³⁹ Alu n bulolu nin n sinɲolu mafele, x'a lon xo nte le mu. Alu i maxa n na, xa n je. Subu nin xulu nte ni ma, í xo alu ɲa be wolu la nte ma ɲa men.» ⁴⁰ A xa wo fo tumo men, a x'a bulolu nin a sinɲolu yita i la. ⁴¹ ɲaɲo nin dabaribanjo x'a tu i korita lala a la. Wo to, a x'e ɲninxa xo: «Domoli be alu bulu ba?» ⁴² I woman innu xa negetelen janininjo ta x'a di a ma. ⁴³ A x'a muta, x'a domo i pala. ⁴⁴ Wo xo, a xo i pen xo: «Xa nte nin alu tu i ɲoxo xan, n tun xa xumo mennu fo alu ɲen, wolu fele: Xo waajibo le mu, men safeta nte la kuwo to Musa la sariya xono, kilalu la kitaabolu nin Jaburu xono, wolu bee xa dafa.» ⁴⁵ Wo to, a x'e hakilolu dayele, nin i si Kitaabo xumolu faamu. ⁴⁶ Isa xo a la xarandinɲolu ɲen xo: «Men be safenin, wo fele: Kirisita xa xan xa tooro, xa faxa. A tili sabananjo, a si kuni, ⁴⁷ xo waajulo si ke siyalu bee ɲen ate toxo la, walasa i xa tuubi nin i la junubolu si yaafa. Wo waajulo si damuta Yerusaleme ma. ⁴⁸ Ate lelu mu wo kuwolu bee seedo ti. ⁴⁹ N Fa du xa men lahido ta, nte si wo lajigi alu xan. Alu xa tu Yerusaleme gallo xono, fo alu xa barako soto tumo men xa bo sanjo to.» ⁵⁰ Wo xo, Isa taxata i ti gallo xo ma, fo xa si Betani senbo to. A x'a bulolu xotota xa duwa i pen. ⁵¹ X'a tu duwala i pen, a nin i talata. A layeleta sanjo to. ⁵² Xarandinɲolu x'a batu. Wo xo, i ɲaɲaninba x'e koppa xa taxa Yerusaleme. ⁵³ I tunnu be Alabatusuba xono tuma bee, xa Ala tantu.

YAY

1 Folofolo, jannin haali duniya xa da, men be kilila xo Xumo, wo tun be je. Wo Xumo tun nin Ala be i noxo fe, wo Xumo tun mu Ala le ti. 2 Kabirin folofolo a tun nin Ala be i noxo fe. 3 Fenjo bee data ate le barako to. Dafen fusi man da ate xo. 4 Nilamaya tun be ate le to. Wo nilamaya tun mu hadamadinjolu la keneya le ti. 5 Wo keneya be manala dibo to, bari dibo man son a to. 6 Ala xa moxo do ki, a toxo xo Yaya. 7 A nata seedayalo ke. A nata wo keneya sedehya, walasa moxolu bee xa lannaya ke wo xanma. 8 A fan tun nte wo keneya ti, bari a nata le xa keneya sedehya. 9 Wo keneya tun mu keneya soobe le ti, men nata duniya to, xa keneya bo hadamadinjo bee nen. 10 Wo Xumo tun be duniya to. Duniya data ate le barako to, bari duniya man a lon. 11 A nata a fan na moxolu bata, bari a fan na moxolu man son a to. 12 Bari moxo mennu sonta a to, xa la a la, a xa fango di wolu bee ma xa ke Ala dinjolu ti. 13 Wolu man wulu moxo wulupa ma, hadamadinjo sago man wo ke, walla xebe sago, bari Ala kilin ne xa wo ke. 14 Wo Xumo keta moxo ti, xa na sigi ntelu to. Ntelu x'a nooro je, wo nooro be í xo Dinxe kilinpe nooro, men bota Fa Ala to, neemo nin tonja dafaninjo tun b'a bulu. 15 Yaya x'a la kuwo sedehya, a fetenta xo: «N' tun x'a fo ate le ma, xo men be nala nte xofe, a be n' na; bawo a tun be je jannin nte xa wulu.» 16 N bee xa do soto a la dafaninjo to, anin neema nin neema. 17 Ala xa sariya di n ma kila Musa le fe, bari neemo nin tonja nata Isa Kirisita le bulu. 18 Moxo si bada na man la Ala xan, bari Dinxe kilinpe men mu Ala ti, nin a be Fa Ala bata, wo le x'a yita n na. 19 Yahudiyalu la pamoxolu xa sadaxalasibaxolu nin Lewikundango dolu ki xa bo Yerusaleme, xa taxa Yaya njinixa xo a mu jon ti. A x'e jaabi xumo men na, wo fele: 20 A man i ban i jaabila, bari a x'a fo x'a laxoyiya i bee nen xo: «Nte nte Kirisita ti.» 21 I xo a pen xo: «Í dun mu jon ti? Í mu kila Eli le ti ba?» A xo: «Nte nte wo ti.» I xo: «Kila men na xumo fota, í mu wo le ti ba?» A xo: «Ayi, n' nte wo ti.» 22 I xo: «Í dun mu jon ti? Wo fo n pen, walasa n xa taxa jaabi kilin di n kibaxolu ma. Í be mun fola í fan na kuwo to?» 23 A xo: «Men be fetenna wulo xono x'a fo xo: "Alu Marigi la silo latilin!" Nte mu wo le ti, í xo kila Esayi x'a fo na men.» 24 Moxolu mennu kita, wo dolu tunnu mu Farisiya lelu ti. 25 I x'a tonjinixa xo: «Nin í nte Kirisita ti, í nte kila Eli ti, í nte wo kila ti, mun dun na í be moxolu batisela?» 26 Yaya x'e jaabi xo: «Nte ken be

batiselo kela jiyo le la. Bari moxo do be alu to, alu man wo lon. 27 A be nanin nte xo. Haali xa wo la samato julo firin, nte nin wo man xan.» 28 Wo kuwolu keta Betani, Yuruden ba xofe, Yaya tun be moxolu batisela dula men. 29 Wo lun do, Yaya xa Isa je nanin a ma, a xo: «Ala la Saaxandinjo fele, men be duniya la junubo bola je. 30 N' tun x'a fo ate le ma xo xe do be nala nte xofe, xo bari, a be nte na, bawo jannin nte xa bo duniya to, ate tun be le je. 31 Nte fan tun man a lon. Bari nte nata moxolu batise jiyo la, walasa x'ate yita Banisirayila dinjolu la.» 32 Yaya xa seedayalo ke xo: «N' xa Ni Senunjo je jigila a xan xa bo sanjo to í xo jenetubanjo, xa tu a xan. 33 Nte tun man a lon, bari men xa n' ki xa moxolu batise jiyo la, wo le x'a fo n' pen xo: "Í je Ni Senunjo je jigila men xan xa tu a xan, wo le be moxolu batisela Ni Senunjo la." 34 Nte xa wo je anin n' b'a seedayala xo nin xe in mu Ala Dinxe le ti.» 35 Wo lun do, Yaya nin a la xarandinjolu moxo fula tun be wo dula tugun. 36 A xa Isa tanbito je, x'a mafele, a xo: «Ala la Saaxandinjo fele.» 37 Xarandin fulo xa Yaya me wo fola, i woman innu x'a lo Isa nofe. 38 Isa x'é xofele. A x'a je xo i b'a nofe. A xo i pen xo: «Alu be mun njinna?» I xo: «Rabi, í be jiginin min?» «Rabi» xoto mu le xo «Karanmoxo». 39 A xo i pen xo: «Alu na, xa je je.» I woman innu taxata a jigidula mafele. Wo benta tilo sumayatumo ma. I tuta a bata wo lunjo. 40 Xarandin fulo men xa Yaya lame, x'a lo Isa nofe, Simon Piyere doxoxe Andere tun mu wolu to do le ti. 41 Andere taxata a xotoxe Simon ma folo, a xo a pen xo: «N xa Alimasiya je, nin wo mu Kirisita ti.» 42 Wo keninjo, a taxata a ti Isa bata. Isa xa Simon mafele, a xo a pen xo: «Í mu Simon ne ti, Yaya dinxe. Í si kili xo: Sefasi». Wo xoto xo «Piyere» walla «fataxulo». 43 Wo lun do, Isa xo x'a be taxala Galile. A xa Filipe je, a xo a pen xo: «A lo n' nofe!» 44 Filipe tun be bola Betesayida le, nin wo mu Andere nin Piyere la gallo ti. 45 Filipe taxata Natanayeli ma, a xo a pen xo: «Musa xa men na kuwo fo Sariya kitaabo xono anin kilalu dulu xumata men xan, ntelu x'a je. Isa le mu, Nasareti Yusufu dinxe.» 46 Natanayeli xo a pen xo: «Fen puma si bo no Nasareti ba?» Filipe xo a pen xo: «Na a mafele.» 47 Isa xa Natanayeli je nanin a ma, a xo: «Banisirayilango yeerewuluwo fele, nanbara fusi nte men na kuwo to.» 48 Natanayeli xo a pen xo: «Í xa nte lon min?» Isa xo a pen xo: «Jannin Filipe x'é kili, nte tun x'é je turojuwo xoto.» 49 Natanayeli x'a jaabi xo: «Karan-

moxo, í mu Ala Dinxe le ti. Í mu Banisirayila mansaxe le ti.»⁵⁰ Isa x'a jaabi, a xo: «Bawo n' x'a fo í pen xo n' x'é je turojuwo xoto, wo le x'a tu í xa lannaya ke ba? Í si kuwolu je mennu barako xa bun pinnu ti.»⁵¹ Isa xo: «Tonɲa tonɲa, n' b'a fola alu pen xo silan alu si sanxulo dayeleninɲo je, xa Ala la melekoyolu jigito nin i yeletu je Moxo Dinxe xan.»

2 Wo xo tili fula, maapɲoya keta Galile gallo do to, xo Kana. Isa na tun be wo maapɲoya to.² I xa Isa du nin a la xarandinɲolu kili wo maapɲoya to.³ Awa dolo nata dasa. Isa na woman in xo a pen xo: «Doli nt'e bulu tugun.»⁴ Isa x'a jaabi xo: «Muso, í b'a fe n' xa mun ke? N' na waxato man si folo.»⁵ A na woman in xo baaradinɲolu pen xo: «A je fen wo fen fo alu pen, alu a ke ten.»⁶ Kurudaxa wooro tun be je Yahudiyalu la fansenuya xanma Ala na xoto. Jibifeba na luulu fo wooro tun si ke wo daxolu kilin wo kilin xono.⁷ Isa xo baaradinɲolu pen xo i xa wo daxolu lafa jiyo la. Wolu x'e lafa, x'e ben i da ma.⁸ A xo i pen xo: «Alu do ta silan, xa taxa a di domolinabobaxo ma.» I taxata do di a ma.⁹ Wo x'a nene, a x'a tara a yelemata dolo ti. A man a lon, wo dolo bota dula men. Baaradinɲo mennu xa jiyo ta, wolu xa wo bodula lon. Domolinabobaxo xa maapoxe kili.¹⁰ A xo: «Moxo bee be folola le xa dolo dimanɲo di moxolu ma. Nin i x'e fa wo la, wo xo, men man di bete, a si laban xa wo di. Ite dun xa dolo dimanɲo lamara fo saasa?»¹¹ Awa wo le keta Isa la kawaku folo ti, Galile Kana. A x'a la nooro yita. A la xarandinɲolu lata a la.¹² Wo xo, Isa taxata Kapere-nahun gallo to, a nin a na nin a badinxelu nin a la xarandinɲolu. I xa tili dantalú ke je.¹³ Yahudiyalu la Tanbinxansallo sutiyaninma, Isa taxata Yerusaleme.¹⁴ A xa moxo dolo tara Alabatusuba xono, i be tuuralu nin saaxolu nin jenetubanɲolu fiirila. Xaalisifalinnalu du tunnu be siginin je.¹⁵ A xa julukesu ta xa buso dara, x'e bee labo Alabatusuba xono, i nin i la saaxolu nin i la tuuralu. A xa xaalisifalinnalu la tabalolu kundinmayelema, x'e la xaalisolu jenjen.¹⁶ A xo jenetuban fiirilalu pen xo: «Alu pinnu bee bo jan. Alu xana n' Fa la luwo ke fiirikedula ti.»¹⁷ A la xarandinɲolu hakilo jigita Kitaabo la pin xuma innu la xo: «Í la luwo kuwo hanmo be nte la, fo a be n' janila í xo ta.»¹⁸ Wo keninma, Yahudiyalu la namoxolu xa Isa n'ininxa xo: «Í be taagumanseede joman yitala, men s'a laxoyiya n ma, xo yanmaruya b'e bulu xa nin ke?»¹⁹ Isa x'e jaabi xo: «Alu nin Alabatusuba in te. N' s'a tolu tili saba xono.»²⁰ Yahudiyalu la namoxolu xo a pen xo: «Í xo di? Tan naani nin san wooro le keta nin Alabatusuba in lo la. Ite xo x'é si wo le tolu tili saba xono?»²¹ Bari Isa tun be Alabatusuba men ma, wo mu a fan balo le ti.²² Isa kunita xa bo furelu to tumo men, a la xarandinɲolu hakilo jigita a la wo xumo kun. I lata Kitaabo xumolu la, xa la Isa du xumaxanɲo la.²³ Xa Isa tu Tanbinxansallo to Yerusaleme, moxo kiika lata a la, bawo i tunnu na b'a la a be taagu-

manseedolu kela.²⁴ Bari Isa tun man la i la, bawo a tun x'e bee xonokuwo lon.²⁵ A haaju tun nt'a la, moxo xa moxo la na fo a pen, bawo men be moxo xono, a fan tun xa wo lon.

3 Nin keta Farisiya diino moxo do le ti, a toxo xo Nikodeme. Yahudiyalu la namoxo do le tun mu.

² Lun do, a nata Isa bata suwo to, a xo a pen xo: «Karanmoxo, ntelu x'a lon xo Ala le x'é ki xa na n xaran. Bawo í b'a ma xa taagumanseede mennu ke, moxo si me wolu ke no nin a nin Ala nte i ɲoxo fe.»³ Isa x'a jaabi xo: «Tonɲa tonɲa, n' b'a fola í pen, xo nin moxo men man towulu, wo me dun no Ala la Mansaya xono.»⁴ Nikodeme xo a pen xo: «Moxo men xotota xa ban, wo si wulu no na di tugun? A s'í koppa no a na xono to tugun ba, xa saagi wulunin?»⁵ Isa x'a jaabi xo: «Tonɲa tonɲa, n' b'a fola í pen, xo nin jiyo nin Ni Senunɲo man moxo men wulu, wo me dun no Ala la Mansaya xono.⁶ Balasubo xa men wulu, wo mu balasubo le ti. Ni Senunɲo xa men wulu, wo mu niyo le ti.⁷ Í dabaro xana ban nin n' x'a fo í pen xo waajibo le mu, alu xa towulu.⁸ Nin í xa foɲo mafele, dula wo dula xa di a pen, a si tege non. Í s'a sonxoxanɲo me í tulo la, bari a be bola jan men anin a be taxala jan men, í man wo lon. Niyo xa moxo men wulu, wo be ten.»

⁹ Nikodeme xo a pen xo: «Wo si ke na di?»¹⁰ Isa x'a jaabi xo: «Ite men mu Banisirayila la karanmoxo ti, í man wo kuwolu lon?»¹¹ Tonɲa tonɲa, n' b'a fola í pen xo, n xa men lon, n be wo le fola. N xa men je, n be wo le du seedeyala. Bari alu nte n na seedeya mutala.¹² N' xumata alu pen duguxulo xan kuwolu la, bari alu man la n' na. Alu si lannaya ke na di nin n' xumata alu pen sanɲo to kuwolu la?¹³ Moxo si man yeletu xa taxa sanɲo to, fo Moxo Dinxe, wo men jigita xa bo je.¹⁴ «Kila Musa xa sa dara, x'a siti guma la, x'a xotota wulo xono na men de, waajibo le mu Moxo Dinxe du xa xotota ten,¹⁵ walasa moxo wo moxo nin í lata a la, wo tigi xa nilamaya banbalo soto.¹⁶ Bawo Ala xa duniya xanu haali fo a x'a Dinxe kilinpe di, walasa xo nin moxo wo moxo lata wo la, wo xana halagi, bari a xa nilamaya banbalo soto.¹⁷ Ala man a Dinxe ki xo a xa na kiito tege duniya xan. A x'a ki le, nin a si duniya kisi.¹⁸ «Moxo men je la a la, wo sin nte sinin kiito to; bari moxo men man la a la, kiito tegeta wo tigi xan xa ban, katugu a man la Ala Dinxe kilinpe la.¹⁹ Wo kiito na fele xo: Keneya nata duniya xono, bari dibo diyata moxolu pen keneya ti, bawo i la kebaarolu xa jaxu.²⁰ Moxo wo moxo be jaxumannɲo kela, keneya man di wo pen. Wo tigo me son du xa na keneya la, a la kebaarolu xana taxa je.²¹ Bari moxo men, nin a la kebaarolu be tonɲa xan, wo si na keneya la, walasa bee x'a je x'a lon xo a la kebaarolu be Ala to.»²² Wo xo, Isa nin a la xarandinɲolu taxata Yude maro la. A tuta i bata je xa moxolu batise.²³ Yaya du tun be moxolu batisela Enon, Salimu senbo to, bawo jiyo kiika tun be non. Moxo tunnu be nala je xa batise.

²⁴ Wo x'a tara Yaya tun man bula kaso la folo. ²⁵ Lun do, soosolo wulita Yaya la xarandinḡolu nin Yahudiya do te. Wo soosolo tun be i la senuyalija xan, i la laado silo la. ²⁶ I nata Yaya ma, i xo: «Karanmoxo, í nin xe men tun be Yuruden ba xofe, fo í x'a la kuwo seedeja, a fele: A du be batiselo kela saasa. Moxo bee be taxala a bata.» ²⁷ Yaya x'e jaabi xo: «Moxo me fusi soto no nin Ala man men di a ma. ²⁸ Alu fannu mu í seedo ti, í x'a fo alu pen xo: Nte nte Kirisita ti, bari nte bulata a ja le.» ²⁹ Yaya xo i pen du xo: «Maapoxe le ta mu maapo ti. Bari maapoxe xanunte, wo men be maapoxe senbo to, x'a xumaxanḡo lame, a du si jajali bete maapoxe xumaxanḡo la. Nte du la jajalo be ten ne. Í na jajalo dafata. ³⁰ Waajibo le mu, do xa kafu ate bunja ma, do xa bo nte ta la. ³¹ «Men bota sanjo to, wo be bee kunna; men bota duguxulo xan, wo mu duguxulo ta le ti, a be duguxulo xumo lelu fola. Bari men bota sanjo to, wo be fen bee kunna; ³² a xa men je, a xa men me, a be wo le seedeja. Bari moxo si nte sonna a la seedeja ma. ³³ Moxo men be sonna a la seedeja ma, wo s'a yita x'a xoyiya, xo Ala mu tonjatigo le ti. ³⁴ Ala xa men ki, wo be Ala la xumaxanḡo lelu fola, katugu Ala xa Ni Senunḡo di a ma x'a dafa. ³⁵ Fa Ala be a Dinxe xanunin. Wo xanma, a xa kuwo bee dun a bulu.

³⁶ Moxo men je la a Dinxe la, wo xa nilamaya banbalo soto; moxo men man son xa la Ala Dinxe la, wo me nilamaya banbalo soto, bari Ala la diminḡo b'a xan.»

4 Farisiyalu x'a me xo Isa be xarandinḡo men soto-la x'a batisa, wo xa sa Yaya ta ti. ² Bari Isa fan tun nte moxo batisela. A la xarandinḡo le tunnu be wo kela. ³ Isa xa wo me tumo men, a bota Yude maro xono, x'é koppa Galile maro ma. ⁴ Wo to, a tun xa xan xa Samari maro tokutun. ⁵ X'a taxato tu non, Isa nata Samari gallo do to xo Sikare. Yahudiyalu mamaxe Yaxuba xa fuuto men di a dinxe Yusufu ma, Sikare be wo fuuto senbo to. ⁶ Yaxuba la xolonḡo be non. Isa segeninma taxamo la, a taxata í sigi wo xolonda la. Wo benta tilinkunte ma. ⁷ Awa, Samaringamusu do nata jita la. Isa xo a pen xo: «Jiyo do di í ma, í xa í min.» ⁸ Wo x'a tara a la xarandinḡolu taxata domolisandula gallo xono. ⁹ Samaringamusu xo a pen xo: «Aa, ite Yahudiya ma le be minnijiyo njinna nte Samaringama la?» Muso xa wo fo, bawo kafu tun nte Yahudiyalu nin Samaringolu te. ¹⁰ Isa xa muso jaabi xo: «Nin í tun xa Ala la nilifenḡo lon anin moxo men janxa minijiyo njin í la ten, ite fan tun si jiyo manjinxaxa wo la, a tun si nilamaya jiyo d'í ma.» ¹¹ Muso xo a pen xo: «Marigi, í si wo nilamaya jiyo bo min? Fate nte í bulu, xolonḡo dun xa jan. ¹² Ite xa bun ne ntelu mamaxe Yaxuba ti ba, wo men xa jin xolon in di ntelu ma? Ate fan x'a jiyo min, a dinḡolu dulu nin a la marafenḡolu x'a jiyo min.» ¹³ Isa x'a jaabi xo: «Moxo wo moxo xa jin ji in min, mindoxo s'a muta tugun. ¹⁴ Bari moxo wo moxo x'é min nte la jiyo la, mindoxo me wo muta abada. Í je jiyo men di a

ma, wo si ke a xono í xo ji woyota, xa nilamaya banbalo di a ma.» ¹⁵ Muso xo a pen xo: «Marigi, wo jiyo di í ma, walasa mindoxo xana í muta tugun, anin í xana na jita la jan tugun.» ¹⁶ Isa xo muso pen xo: «Taxa í xe kili, alu xa na jan.» ¹⁷ Muso x'a jaabi xo: «Xe nte í kun.» Isa xo a pen xo: «Í xa tonja fo, xo xe nte í kun; ¹⁸ bawo í sigita xe luulu kun xa tanbi. Haali xe men b'é kun saasa, wo nte í xe ti. Wo to, í xa tonja fo.» ¹⁹ Muso xo a pen xo: «Marigi, nte x'a je xo í mu kila le ti. ²⁰ Ntelu mamaxelu xa Ala batu jin kuru in xan. Bari atelu Yahudiyalu xo, xo batulo xa xan xa ke dula men, wo be Yerusaleme le.» ²¹ Isa xo a pen xo: «Muso, la a la, xo waxato si na, alu si Fa Ala batu, jan nte, Yerusaleme nte. ²² Atelu Samaringolu fannu be men batula, alu man wo lon. Ntelu Yahudiyalu be men batula, n xa wo lon. Bawo kisilo be bola Yahudiya lelu to. ²³ Waxato be nala, a sita xa ban, batubaxa soobelu si Fa Ala batu niyo nin tonja la; bawo Fa Ala be wo joxon batubaxo lelu njinna. ²⁴ Ala mu Niyo le ti. Waajibo le mu, a batubaxolu x'a batu niyo nin tonja la.» ²⁵ Muso xo a pen xo: «Í x'a lon xo Alimasiya be nala, nin wo mu Kirisita ti. Nin wo nata, a si fenjo bee ja fo n pen.»

²⁶ Isa xo a pen xo: «Nte men je xumala í pen de, nte le mu.» ²⁷ Xa Isa nin wo muso tu xumala, a la xarandinḡolu nata. I x'a nin muso tara xumala tumo men, wo x'e dabaro ban. Bari moxo si man a njinxaxa xo «Í be mun nofe?» walla xo: «Mun na í be xumala a pen?»

²⁸ Muso x'a la jitalanḡo sigi, xa taxa gallo xono, x'a fo moxolu pen xo: ²⁹ «Alu na xe do mafele, men saagita nte la ku keninḡolu bee ma í pen. A me tara Kirisita ti ba?» ³⁰ Moxolu bota gallo xono xa taxa Isa bata. ³¹ Wo xono, xarandinḡolu balanta a ma xo: «Karanmoxo, domolo kel!» ³² A xo xarandinḡolu pen xo: «Domolifenḡo do be í bulu x'a domo, atelu man wo lon.» ³³ Xarandinḡolu x'e joxo njinxaxa xo: «Do le nata domolo di a ma ba?» ³⁴ Isa xo i pen xo: «Xa í kibaxo sago nin a la baaro ke x'a dafa, wo le mu í na domolo ti. ³⁵ Alu nte a fola ba xo: "Xaru naani le be lanno nin tegelo te?" Bari nte b'a fola alu pen xo: Alu i jalu xotota xa fuutolu mafele, i mota xa si tego ma xa ban. ³⁶ Men be tegelo kela, wo s'a sara soto, xa siimankeso du kamari nilamaya banbalo xanma, walasa lannila nin tegelila bee xa jajali i joxo fe. ³⁷ Bawo jin sanda in mu tonja le ti xo: "Do x'a lan, do x'a tege." ³⁸ Alu man sege fenjo men na, í x'alu bula wo tegela. Dolu segeta, atelu xa wolu la tono soto.» ³⁹ Samari wo gallo moxolu kiika lata Isa la, muso la jin xuma in xanma xo: «Í xa ku wo ku ke, a saagita a bee ma í pen.» ⁴⁰ Samaringolu naninḡo Isa bata, i x'a matara xo a xa tu i bata. A woman in xa tili fula ke i bata. ⁴¹ A la xumo x'a tu moxo kiika lata a la. ⁴² I xo muso pen xo: «Í la xumo doron man a tu ntelu xa lannaya ke. Ntelu fannu x'a lame, n x'a lon tonja la, xo duniya Kisibaxo le mu.» ⁴³ Wo tili fulo tanbo xo, Isa bota je xa taxa Galile, ⁴⁴ bawo Isa fan tun xo, xo kila me bunja

soto a fan fasuwo la. ⁴⁵ A sita Galile tumo men, non moxolu x'a kunben bete. A xa kuwo fen wo fen ke Tanbinxansallo to Yerusaleme, wolu tunnu xa wo bee je, bawo i du tunnu taxata salli in to. ⁴⁶ A x'é koppa Galile Kana ma. A tun xa jiyo yeleva dolo ti non ne. Namoxoba do dinxe tun be Kaperenahun gallo to, a man kende. ⁴⁷ Wo xe x'a me, xo Isa bota Yude, xa na Galile. A woman in nata Isa bata x'a matara, xo a xa na Kaperenahun, a dinxe be njinin xa sa, nin a s'a lakisi. ⁴⁸ Isa xo a pen xo: «Xodi, nin alu man taagumansedolu nin kawakuwolu je de, alu me lannaya ke?» ⁴⁹ Wo namoxoba x'a jaabi xo: «Marigi, í balan í xa na jannin n' dinxe be sala.» ⁵⁰ Isa xo a pen xo: «Taxa! Í dinxe me sa.» Wo xe lata Isa la xumo la. A xa silo muta xa taxa. ⁵¹ A la jonjololu x'a kunben silo to, x'a fo a pen xo: «Í dinjo kende yata.» ⁵² A x'e njinxo xa a dinxe kende yata waxati joman? I x'a jaabi xo: «Kunun tilinkunte tumo le mu, nin xando fatata a ma.» ⁵³ Fa xa jaate muta, x'a lon xo wo waxato fan ne mu, Isa xo a pen xo: «Í dinjo me sa.» A nin a la kore bee lata Isa la. ⁵⁴ Wo keta Isa la kawaku fulanango ti, a boninma Yude, xa na Galile.

5 Wo xo, Yahudiyalu la sallo do keta Yerusaleme. Isa taxata je. ² Dinxa jima do tun be Yerusaleme xono, Saaxolu la Dunda senbo to. Dinxa jima in toxo heburuxango to xo: Beteseda. Biire luulu tun be lonin je. ³ Jangaruto kiika tun be lanin wolu xoto: Fiyontolu nin sinkilinjololu nin namatolu. [Wolu tunnu be jiyo lamaxalo laxononin. ⁴ Marigi la melekiyo do tun si jigi ji in to waxati nin waxati, x'a lamaxa. Nin jiyo lamaxata, jangaruto folo men je jigi a to, a keta jangaru wo jangaru ti, wo si kende ya.] ⁵ Xe do tun be je, a be jangarunin kabirin san tan saba nin sagi. ⁶ Isa x'a je lanin tumo men, x'a lon xo jangaru in tun b'a la kabirin waxati jan, a xo a pen xo: «Í b'a fe xa kende ya ba?» ⁷ Jangaruto x'a jaabi xo: «Marigi, moxo nte n' kun xa n' fili jiyo to nin a lamaxata. Nin n' xo, xo n' be jigila, n' s'a tara do xa n' saawa.» ⁸ Isa xo a pen xo: «Wuli, í x'é la laranjo ta, x'é taxama.» ⁹ Wo no bee to, a kende yata. A x'a la laranjo ta, x'é taxama. Wo kuwo keta tofopolunjo. ¹⁰ Yahudiyalu la namoxolu xo xe men kende yata pen xo: «Bi mu tofopolunjo le ti. A dagenin nte í pen í x'é la laranjo ta.» ¹¹ A x'e jaabi xo: «Men xa n' kende ya, wo x'a fo n' pen xo: Í la laranjo ta, x'é taxama.» ¹² I x'a njinxo xa: «Jon x'a fo í pen xo í x'é la laranjo ta, x'é taxama?» ¹³ Bari xe men kende yata, a man a kende yabaxo lon, bawo Isa tun bota jama to xa ban. ¹⁴ Wo xo, Isa xa wo xe tara Alabatusuba xono. A xo a pen xo: «A fele, í janxa kende ya. Í xana junube ke tuggun, ku xana taxa í soto, men xa jaxu nin ti.» ¹⁵ Wo xe taxata a fo Yahudiyalu la namoxolu pen xo Isa le x'a kende ya. ¹⁶ Wo le x'a tu, Yahudiyalu la namoxolu tunnu be Isa nofe, bawo a xa wo kuwo ke tofopolunjo. ¹⁷ Isa x'e jaabi xo: «Nte Fa be baaro la tuma bee. Nte du be baaro la.» ¹⁸ Wo xumo xanma, Yahudiyalu la namoxolu

x'a njinin xa Isa faxa xa tanbi folo xan. A xa tofopolunjo toxosi. Wo doron tun nte, bari a tun be Ala du kilila xo a Fa. Wo la, a x'a fan nin Ala xaapan. ¹⁹ Isa xa xumo ta tuggun, a xo i pen xo: «Tonja tonja, n' b'a fola alu pen xo: Dinxe me fusi ke no a fan pen, fo nin a xa Fa je men kela. Fa je men ke, Dinxe du si wo ke.» ²⁰ Fa be Dinxe xanunin, a be fen wo fen kela, a si wo yita a la. A si kebaarolu yita a la, mennu barako xa bun jinnu ti, walasa alu dabaro xa ban. ²¹ Fa be furelu lakunila ja men, xa niyo k'e to, wo ja ma, a xa di Dinxe pen xa niyo ke men to, a s'a ke wo to. ²² Fa nte kiiti du tegela moxo si xan. A xa kiititego bee tu Dinxe le ma, ²³ walasa bee xa Dinxe bunja í xo i be Fa bunjala ja men. Moxo men nte Dinxe bunjala, wo nte Fa du bunjala, wo men x'a ki. ²⁴ «Tonja tonja, n' b'a fola alu pen xo: Moxo wo moxo je n' na xumo lame, xa la n' kibaxo la, wo xa nilamaya banbalo soto. Kiito me tege wo xan abada. A bota saya la, xa nilamaya. ²⁵ Tonja tonja, n' b'a fola alu pen xo: Waxato si na, wo waxato sita fan, furelu si Ala Dinxe xumaxango me. Mennu ja me, wolu si nilamaya. ²⁶ Nilamaya tigiya be Fa bulu ja men, a xa nilamaya tigiya dun Dinxe du bulu ten. ²⁷ A xa kiititego barako di a ma, bawo a mu Moxo Dinxe ti. ²⁸ Alu dabaro xana ban wo la, bawo waxato do be nala; wo tumo moxo, mennu bee be xaburo xono, wolu si a xumaxango me, ²⁹ xa kuni xa bo furelu to. A x'a tara mennu xa puma ke, wolu si kuni nilamaya banbalo xanma. Mennu xa jaxumango ke, wolu si wuli kiito xanma. ³⁰ «Nte me fusi ke no n' fan barako la. Ala be men fola n' pen, n' be kiito tegela x'a la wo le xan. Nte la kiito be tilinnin, bawo n' nte n' fan sago njinna, bari n' kibaxo sago. ³¹ Nin nte le be n' fan sedehyala, n' be men fola, wo me muta. ³² Do xote le be nte sedehyala. N' x'a lon xo a be men fola nte la kuwo to, wo mu tonja le ti. ³³ Alu xa moxolu bula Yaya bata, a xa men fo n' na kuwo to, wo mu tonja le ti. ³⁴ Nin n' xa wo fo, a xoto nte xo nte haaju be hadamadin na sedehyali ma. N' xa wo fo le, nin alu si kisi. ³⁵ Yaya keta í xo lanpa mananinjo keneya. A diyata atelu pen xa najali a keneya la waxati la. ³⁶ Fa xa kebaaro mennu dun n' bulu xo n' x'e ke, wolu be nte sedehyala anin x'a yita xo Fa le xa n' ki. Wo sedehyalu xa bun Yaya ta ti. ³⁷ Fa men xa n' ki, wo fan xa n' sedehya. Alu bada man a xumaxango me. Alu bada man a pada je. ³⁸ Alu man a la xumo mara, bawo a xa men ki, alu man la wo la. ³⁹ Alu be Kitaabo xumolu xaranbetela, bawo alu pala, x'alu si nilamaya banbalo soto wo la. Wo Kitaabu kilinjo le xonoxumo be nte sedehyala. ⁴⁰ Bari alu nt'a fe xa na nte ma, xa nilamaya banbalo soto. ⁴¹ «Nte nte moxo la bunjali njinna. ⁴² N' x'a lon xo alu nte Ala xanula. ⁴³ N' nata n' Fa toxo la, alu man son n' to. Bari nin do nata a fan toxo la, alu si son wo to. ⁴⁴ Alu si lannaya ke ja di, atelu mennu be i noxo la bunja mutala, x'a tara bunja be bola Ala kilinpe men to, alu nte wo la bunja njinna?» ⁴⁵ A xana ke alu

nen de xo nte le be alu jalagila Fa Ala nala. Alu x'alu gigo la Musa men xan de, wo le be kela alu jalagibaxo ti. ⁴⁶ Nin alu tunnu lata Musa la, alu si la nte du la, bawo a xa nte la kuwo safe. ⁴⁷ Bari nin alu man la Musa la xuma safeninᅇolu la, alu si la nte la xumolu la ᅇa di?»

6 Wo xo, Isa taxata Galile dalaba boxo do. Dolu xo Tiberiyade dalaba. ² Jamaba tun b'a nofe, bawo i ᅇa x'a la taagumanseedu je jangarutolu kendeyalo fe. ³ Isa nin a la xarandinᅇolu yeleta kuro xan, x'e sigi. ⁴ Wo x'a tara Yahudiyalu la Tanbinxansallo sutiyata. ⁵ Isa x'a kunᅇo xotota xa jamaba je nanin a ma. A xo Filipe nen xo: «Alan si buuro san min, walasa xa ᅇin moxo innu danᅇin?» ⁶ A xa wo xumo fo le, xa Filipe xotobo, bawo a tun fan x'a lon a be nala men kela. ⁷ Filipe x'a jaabi xo: «Haali nin í xa deᅇe xaaliso keme fula dun buuro to, x'a fo xo í be dondin dondin dila bee ma, a bee me fen soto.» ⁸ A la xarandinᅇo do, xo Andere, Simon Piyere doxoxe, wo xo a nen xo: ⁹ «Xamarandinᅇo do be jan, buurukun luulu anin pegexala fula b'a bulu. Bari wolu si mun bo ᅇin moxo innu bee ᅇen?» ¹⁰ Isa xo: «Alu i lasigi.» Bin morosoninᅇo tun xa sa wo dula. I woman innu sigita. I xeᅇa haxxo tun be taxala wulu luulu ᅇoxon ma. ¹¹ Isa xa buurolu ta, xa barako bula Ala ᅇen, x'e di, i xa tala moxolu sigininᅇo te. A xa pego dula ta x'e ke wo ᅇa in. Moxo wo moxo, bee x'e sago soto. ¹² Moxolu faninma, Isa xo a la xarandinᅇolu ᅇen xo: «Alu tokutunᅇolu kamari, walasa fen xana tᅇa.» ¹³ I x'e kamari, xa sinsi tan nin fula lafa tokutunᅇolu la, men nu tuta buurukun luulo domoninᅇo xo. ¹⁴ Wo moxolu xa Isa la kawakuwo je tumo men, i xo: «Tonᅇa, kila men na naxumo fota duniya to, ᅇin ne mu.» ¹⁵ Isa x'a lon xo i b'a fe x'a muta diyakuwa la, x'a ke mansaxe ti. Wo to, a x'e koppa, xa taxa kuro to, a dan na. ¹⁶ Suwo kuninma, Isa la xarandinᅇolu jigita dalaba da la. ¹⁷ I dunta xulunᅇo xono, xa taxa Kaperenahun dalaba boxo do. Dibo tun dunta x'a tara Isa man na i bata. ¹⁸ X'e tu jiyo xan, foᅇoba wulita xa jiyo xutunba. ¹⁹ I taxata ᅇafe jiyo xan, kilometere luulu fo wooro ᅇoxon na. Wo tumo la, i xa Isa je í taxamala dalaba xan, nanin xulunᅇo ma. Xarandinᅇolu silata. ²⁰ Bari Isa xo i nen xo: «Alu xana sila! Nte le mu.» ²¹ I tunnu b'a fe x'a ladun xulunᅇo xono. Bari wo no bee to, i tunnu be taxanin dula men, xulunᅇo sita non danxanᅇo ma. ²² Jama men tun be dalaba boxo do, wolu tunnu x'a korosi xo xulun kilin ne tun be je. I x'a lon du xo Isa nin a la xarandinᅇolu man taxa i ᅇoxo la wo xono, bari xo xarandinᅇolu doron nelu taxata. ²³ Wo lun do, Marigi tun xa barako bula Ala ᅇen dula men, xa domolo di i ma, xulunᅇo dolu bota Tiberiyade xa na non. ²⁴ Jama x'a je xo Isa tun nte non, a la xarandinᅇo du tunnu nte non. Wo to, i dunta wo xulunᅇolu xono, xa taxa Kaperenahun, xa taxa Isa ᅇinin. ²⁵ I x'a tara dalaba boxo do tumo men, i xo a nen xo: «Karanmoxo, í nata jan tuma joman?» ²⁶ Isa x'e jaabi xo: «Tonᅇa tonᅇa, ᅇ b'a fola alu

nen xo alu nte ᅇ ᅇininna bawo alu xa taagumanseedu je. Alu be ᅇ ᅇininna le, bawo alu xa domolo ke x'e fa. ²⁷ Domolo men be tᅇnala, alu xana baaro ke wo soto xanma. Bari domolo men nte tᅇnala, men si nilamaya banbalo di alu ma, alu baaro ke xa wo soto. Moxo Dinxe si wo domolo di alu ma, bawo Fa Ala x'a la taagumanseedu ke ate le la.» ²⁸ I x'a ᅇininxa xo: «N xa xan xa mun ke nin n si Ala sago dafa?» ²⁹ Isa x'e jaabi xo: «Ala sago alu xa men ke, wo mu ᅇin ne ti xo: A xa men ki, alu xa la wo la.» ³⁰ I xo: «Í be taagumanseede joman yitala n na, men s'a tu n xa la í la? Í be mun kela n x'a je?» ³¹ Alan mamaxelu xa manne domo wulo xono í xo a be safenin Kitaabo to ᅇa men xo: «A xa domolo di i ma xa bo sanᅇo to.» ³² Isa x'e jaabi xo: «Tonᅇa tonᅇa, ᅇ b'a fola alu ᅇen, xo Musa man domolo di alu ma xa bo sanᅇo to, bari ᅇ Fa le be domoli soobe dila alu ma xa bo sanᅇo to. ³³ Bawo men jigita xa bo sanᅇo to, wo le mu Ala la domolo ti, wo le be nilamaya dila duniya ma.» ³⁴ I xo a nen xo: «Marigi, wo domolo di ntelu ma tuma bee.» ³⁵ Isa xo i nen xo: «Nte le mu domolo ti, men be nilamaya dila. Moxo men je na nte ma, xonxo me wo tigi muta abada. Moxo men je la nte la, mindoxo me wo muta abada. ³⁶ ᅇ x'a fo alu ᅇen xo: Alu xa ᅇ je, bari haali wo, alu man la nte la. ³⁷ Fa Ala je moxo wo moxo di ᅇ ma, wo si na ᅇ ma. Moxo men je na ᅇ ma, ᅇ me wo tigi xoyi muume. ³⁸ Bawo nte man jigita xa bo sanᅇo to ᅇ fan sago ke xanma. ᅇ jigita xa na ᅇ kibaxo le sago ke. ³⁹ ᅇ kibaxo sago fele: Xo a xa mennu di ᅇ ma, wolu fen xana sanko ᅇ bulu, bari xo ᅇ x'e lakuni duniya labanlunᅇo. ⁴⁰ ᅇ Fa sago mu men ti, xo moxo wo moxo xa Dinxe je, xa la a la, wo xa nilamaya banbalo soto. Duniya labanlunᅇo, ᅇ si wo tigi lakuni.» ⁴¹ Isa la wo xumo xa Yahudiyalu dimin x'e bula daxotoxumo la, bawo a tun x'a fo xo: «Nte le mu domolo ti, men jigita xa bo sanᅇo to.» ⁴² I tunnu b'a fola xo: «Yusufu dinxe Isa nte ᅇin ti ba? N xa moxo men na nin a fa lon. A dun s'a fo ᅇa di xo ate jigita xa bo sanᅇo to?» ⁴³ Isa x'e jaabi xo: «Alu ᅇuunuᅇuunu ku nte. ⁴⁴ Moxo si me na nte ma no, nin Fa Ala men xa ᅇ ki, wo man a saba xa na a ti ᅇ ma. Men je na ᅇ ma, ᅇ si wo tigo lakuni duniya labanlunᅇo. ⁴⁵ Kilalu do xa ᅇin xuma in safe xo: «Ala s'i bee laxaran.» Moxo wo moxo be Fa Ala lamela, xa son a la xaranᅇo ma, wo tigi si na ᅇ ma. ⁴⁶ Wo xoto nte xo moxo xa Fa Ala je, fo men bota Ala bata. Wo le kilinpe x'a je. ⁴⁷ Tonᅇa tonᅇa ᅇ b'a fola alu ᅇen, xo moxo wo moxo je la nte la, wo xa nilamaya banbalo soto. ⁴⁸ Nte mu domolo le ti, men be nilamaya dila. ⁴⁹ Xotonin x'alu mamaxelu tu wulo xono, i xa manne domo, i sata. ⁵⁰ Bari domolifenᅇo men jigita xa bo sanᅇo to, moxo wo moxo je wo domo, wo me sa. ⁵¹ Nte mu domolifen nilama le ti, men jigita xa bo sanᅇo to. Moxo men je ᅇin domolifen in domo, wo si nilamaya banbalo soto. ᅇ be domolifenᅇo men dila, wo mu ᅇ balasubo le ti; walasa duniya xa nilamaya soto.» ⁵² Wo xumo xa

Yahudiyalu bula i joxo la. I xo: «Nin xe in s'a balasubo di n ma na di, n x'a domo?»⁵³ Isa xo i jpen xo: «Tonja tonja, n b'a fola alu jpen: Nin alu man Moxo Dinxe balasubo domo x'a jelo min, nilamaya nte alu fe.»⁵⁴ Moxo men je n balasubo domo, xa n jelo min, wo xa nilamaya banbalo soto. Duniya labanlunjo, n si wo tigo lakuni.⁵⁵ Nte balasubo mu domolifen soobe le ti, n jelo mu minfen soobe le ti.⁵⁶ Moxo men je n balasubo domo, xa n jelo min, wo tigi nin nte kafuta, nte nin wo tigi kafuta.⁵⁷ Fa Ala men xa n ki, wo nilama mu; nte du nilama mu Fa Ala barako to. Wo na ma, moxo men xa nte domo, wo si nilamaya nte barako to.⁵⁸ Domo-lifenjo men jigita xa bo sanjo to, wo le je. Alu mamaxelu xa manne domo, wo xo, i sata. Wo nin jin nte kilin ti. Men je jin domolifen in domo, wo si tu i nila fo abada.»⁵⁹ Isa xa jin xuma innu fo x'a tu moxolu laxaranna Kaperenahun Alabatusuwo xono.⁶⁰ Isa la xarandinjolu kiika x'a la wo xumo lame tumo men, i xo: «Nin xuma in xa xole de! Moxo joman si son a ma no?»⁶¹ Isa x'a lon a fan ma, xo a la xarandinjolu be daxotoxumo la wo kuwo to. A woman in xo i jpen xo: «Wo x'alu lamuruti ba?»⁶² Nin alu xa Moxo Dinxe je yelega xa taxa, a tun be dula men folo, alu si mun fo wo to?⁶³ Ala Niyo le be nilamaya dila, balasubo nte fusi ti. N xa xumo mennu fo alu jpen, wolu mu Niyo nin nilamaya le ti.⁶⁴ Bari dolu b'alu to mennu man lannaya ke.» Isa xa wo fo, bawo kabirin a damuto, a tun x'a lon mennu man lannaya ke anin moxo men b'a dunna bulo to.⁶⁵ Isa xo: «Wo le x'a tu, n x'a fo alu jpen, xo moxo si me na no nte ma, nin wo man wuli Fa Ala la.»⁶⁶ Kabirin wo, a la xarandinjolu kiika bota. I man taxa a nofe tugun.⁶⁷ Isa xo a la xarandin tan nin fulo jpen xo: «Alu dulu b'a fe x'e koppa ba?»⁶⁸ Simon Piyere x'a jaabi xo: «Marigi, n si taxa jon bata? Nilamaya banbalo xumolu be ite le da.⁶⁹ N lata i la, n x'a lon du, xo i mu Ala la Senumanjo ti, a xa men ki.»⁷⁰ Isa x'e jaabi xo: «Xodi, nte le man alu tan nin fulo sugandi? Wo bee nin a ta, alu to kilin mu Sentane le ti.»⁷¹ A tun be Simon dinxe Yudas Isikariyoti le ma, men be nala a dunna bulo to. Haali x'a tara a la xarandin tan nin fulo to kilin ne mu.

7 Wo tanbo xo, Isa xa Galile maro yaala. A tun nt'a fe xa ke Yude, bawo Yahudiyalu la namoxolu tunnu b'a nofe x'a faxes. ² Wo x'a tara Yahudiyalu la sallo men be kilila xo Nafasallo, wo sutiyata. ³ A badinxelu xo: «I me bo jan i xa taxa Yude, walasa i be kebaaro mennu kela, i la xarandinjo mennu be non, wolu xa wolu je. ⁴ Moxo men b'a fe i xa lon, wo me a la kebaarolu ke duguwo to. Nin i be jin joxon kawakulu kela, i xa xan ne x'e yita duniya la.» ⁵ Isa badinxelu xa wo fo, bawo i du tunnu man la a la. ⁶ Isa xo i jpen xo: «Nte la waxato man si folo. Waxato bee xa jin atelu jpen, xa taxa. ⁷ Duniya me atelu jaxuya, bari a be nte jaxuyala, bawo nte b'a yitala duniya la, xo a la kebaarolu xa jaxu. ⁸ Ate kennu xa taxa sallo to. Nte nte

taxala, bawo n na waxato man si folo.»⁹ A xa wo fo i jpen tumo men, a tuta Galile. ¹⁰ Isa badinxelu taxaninjo sallo to, a du taxata. Bari a taxata duguwo to.

¹¹ Yahudiyalu la namoxolu tunnu b'a njinna sallo to. I tunnu be i joxo njinxala xo: «A be minto?»¹² A la xumo tun be jama bee da. Dolu tunnu b'a fola xo: «Moxo puma le mu.» Dolu xo: «Moxo puma nte, moxolafilila le mu.»¹³ Bari i xa wo xumolu bee fo duguwo to, bawo i tunnu be silala Yahudiyalu la namoxolu na. ¹⁴ Xa sallo tu a tala to, Isa dunta Alabatusuba xono, xa moxolu laxaran. ¹⁵ Yahudiyalu la namoxolu dabaro banta. I xo: «Nin xe in xa Kitaabo lon di, x'a tara a man xaran?»

¹⁶ Isa x'e jaabi xo: «Nte la xaranjo nte bola n fan to. A be bola n kibaxo le to. ¹⁷ Moxo men b'a fe xa Ala sago ke, wo s'a lon nin n na xaranjo be bola Ala la, walla nin n na xumolu be bola n fan ne to. ¹⁸ Moxo men na xumolu be bola a fan to, wo be a fan ne bunja njinna. Bari moxo men b'a kibaxo bunja njinna, wo le mu tonpatigo ti. Tilinbaliya si nte wo la. ¹⁹ Xodi, Musa le man sariya di alu ma? Bari alu si nte i taxamala sariya silo xan. Mun na alu b'a njinna xa nte faxes?»²⁰ Jama x'a jaabi, i xo: «Jinno le b'e to! Jon b'a njinna x'e faxes?»²¹ Isa xa xumo ta tugun xo: «N xa ku kilin ke tofopolunjo, men x'alu bee dabaro ban. ²² Musa xa jaxo sariya di alu ma. Wo man damuta Musa ma, a damutata alu mamaxe lelu ma. Wo sariya la, alu si moxo jaxa haali tofopolunjo. ²³ Nin alu si dinxe jaxa no tofopolunjo, walasa Musa la sariya xana tjina, mun na alu be diminna nte xanma, bawo n xa moxo muume lakendeya tofopolunjo?»²⁴ Alu fata kiito tegela kuwolu jena doron ma. Alu kiito tege tonja xan.»

²⁵ Yerusaleme moxo dolu xo: «I b'a fe xa xe men faxes, jin ne nte ba?»²⁶ A fele, a be xumala keno la, i nte fen fola a jpen. N na namoxolu lata a la ba, xo jin xe in ne mu Kirisita ti?²⁷ Ntelu xa jin bodula lon. Bari nin Kirisita nata, moxo me wo bodula lon.»²⁸ Xa Isa tu moxolu laxaranna Alabatusuba xono, a fetenta xo: «Alu xo, x'alu xa n lon, xa n bodula du lon. Bari n man na n fan ma. Men xa n ki, wo mu tonpatigo le ti. Alu man wo lon. ²⁹ Nte x'a lon, bawo n bota ate le bata. A le xa n ki.»³⁰ Wo xanma, i x'a njin x'e b'a mutala. Bari moxo si bulo man la a xan, bawo a la waxato tun man si folo.

³¹ Jama moxo kiika lata a la. I xo: «Nin Kirisita nata, a si taagumanseedolu ke ba xa tanbi jin xan?»³² Jama tun be men fola Isa la kuwo to dibo to, Farisiyalu xa wo me. Wo to, sadaxalasibaxa kuntigolu nin Farisiyalu xa garadolu bula, xo i xa taxa Isa muta. ³³ Isa xo wolu jpen xo: «N nin alu be i joxo xan dondin folo. Wo xo, n be taxala n kibaxo bata. ³⁴ Alu si n njin, bari alu me n je. N be taxala dula men, alu me taxa no non.»³⁵ Wo xumo xan, Yahudiyalu la namoxolu xo i joxo jpen xo: «A be taxala min, nin n me a je tugun? Yahudiya mennu be jennin Gerekolu to, a be taxala wolu bata ba, xa Gerekolu laxaran?»³⁶ A la jin xuma innu xoto mu mun

ti xo: Alu si n̄ njin, bari alu me n̄ je. N̄ be taxala dula men, alu me taxa no non?»³⁷ Sallo lunba, nin wo mu a lun labanjo ti, xa Isa tu lonin jama na xoto, a fetenta xo: «Nin mindoxo be men na, wo xa na nte ma x̄e min.³⁸ Men je la nte la, bajiyi men be nilamaya dila, wo si woyo xa bo wo to, í xo Kitaabo x̄a fo na men.»³⁹ Isa lannayabaxolu be nala Ni Senunjo men sotola, a xumata wo le kuwo la ten. Wo waxato, Ni Senunjo tun man di folo, bawo Isa tun man xotota folo xa taxa a la nooro xono.⁴⁰ Jama xono, moxo kiika xa Isa la xumolu lame tumo men, wolu xo: «Sikka nt'a to kila men na naxumo fota, jin ne mu.»⁴¹ Dolu xo: «Kirisita le mu.» Dolu xo: «Kirisita si bo no Galile ba?»⁴² Kitaabo man a fo xo Kirisita si bo mansaxe Dawuda to ba? Xo a si bo Betileheme, Dawuda bota gallo men to?»⁴³ Jama talata Isa la kuwo to.⁴⁴ Dolu tunnu b'a fe x̄a muta. Bari moxo si bulo man la a ma.⁴⁵ Garadolu x̄e koppa xa na sadaxalasibaxa kuntigolu nin Farisiyalu bata. Wolu xo i pen xo: «Mun na alu nin a man na?»⁴⁶ Garadolu x̄e jaabi xo: «Nin xe in be xumala na men, moxo man wo noxon je abada.»⁴⁷ Farisiyalu xo: «A x̄'alu dulu lafilu ba?»⁴⁸ Alu xa n na kuntigi walla Farisiya joman kilin ne je lanin a la?⁴⁹ Nin jama in men lata a la, wolu man Musa la sariya lon. I danganinjo le mu.»⁵⁰ Nikodeme men tun taxata Isa bata suwo to, wo tun mu Farisiya innu to do le ti. Wo xo tolu pen xo: «Alan na sariya la, moxo do si jalagi ba, x̄'a tara n man a lame, x̄'a lon a xa men ke?»⁵² I x̄'a jaabi xo: «Í du keta Galilengo ti ba? Kitaabo mafefe, í s'a je xo kila si nte bola Galile.» [⁵³ Wo xo, bee taxata í bata.

8 Isa taxata Oliwe kuro xan.² Wo lun do saxo ma junna, a taxata Alabatusuba xono tugun, jama bee kamarita a ma. A x̄e sigi, x̄e laxaran.³ Sariya karanmoxolu nin Farisiyalu nata muso do ti a bata. I xa wo muso muta fuyan̄a la. I xa muso lalo jama na xoto.⁴ I xo Isa pen xo: «Karanmoxo, n xa jin musu in muta fuyan̄a la.⁵ Musa xa yanmaro di sariya xono xo n xa jin noxon musulu bun kuro la, x̄e faxes. Ite dun xo di?»⁶ I la wo xumo fokunjo mu le, x̄'a xotobo, nin i s'a jalagi. Isa x̄'a kunjo lajigi xa safelo ke duguxulo ma, a buluxonondinjo la.⁷ I tuta a njinxala. Isa x̄'a kunjo lawuli. A xo i pen xo: «Alu to, moxo men bada man junube ke, wo tigo folo xa kuro fayi a ma.»⁸ Wo xo, a x̄'a kunjo lajigi tugun, xa safelo ke duguxulo ma.⁹ I xa wo me tumo men, i bee kilin kilin taxata, x̄'a damuta i to xotolu ma, fo xa taxa a bula i xo doxolu la. Isa nin muso kilin tuta je, wo be lonin a xoto.¹⁰ Isa x̄'a kunjo lawuli, a xo: «Muso, i dunnu be min? Moxo man í nangi ba?»¹¹ Muso x̄'a jaabi xo: «Marigi, moxo si man n̄ nangi.» Isa xo a pen xo: «Nte du nte í nangila. Taxa! Bari í xana junube ke tugun.»¹² Isa xumata jama pen tugun xo: «Nte mu duniya keneya le ti. Men je a lo n̄ nofe, wo me í taxama dibo to. A si keneya soto men si nilamaya di a ma.»¹³ Wo xanma, Farisiyalu xo: «Í be í fan

seedeyala. Wo xanma, í la seedeya me muta.»¹⁴ Isa x̄'e jaabi xo: «Haali nin n̄ be n̄ fan seedeyala, nte la seedeya mu tonja le ti, bawo nte x̄'a lon, n̄ bota dula men, anin n̄ be taxala dula men. Atelu man a lon n̄ bota dula men, anin n̄ be taxala dula men.¹⁵ Alu be kiito tegela hadamadin miiriya le la. Nte ken nte kiiti tegela moxo si xan.¹⁶ Bari nin nte xa kiito tege, n̄ b'a tegela tonja le xan, bawo n̄ kilin nte wo kiito tegela. Fa Ala men xa n̄ ki, nte nin wo be i noxo fe.¹⁷ A nte safenin alu la sariya xono ba, xo moxo fula je kuwo men seedeya, wo mu tonja le ti?»¹⁸ Nte be n̄ fan seedeyala. Fa Ala men xa n̄ ki, wo du be n̄ seedeyala.»¹⁹ I xo a pen xo: «Í Fa be min?» Isa x̄'e jaabi xo: «Alu man nte lon, sakuta n̄ Fa. Nin alu tunnu xa nte lon, alu si n̄ Fa du lon.»²⁰ Isa xa wo xumolu fo, x̄'a tu laxaranno la Alabatusuba xono. A tun be nilifenbulamiranjo senbo to. Moxo si man a muta, bawo a la waxato tun man si folo.²¹ Isa xo i pen tugun xo: «N̄ be taxala. Nin n̄ taxata, alu si n̄ njin, bari alu si sa alu la junubolu xono. N̄ be taxala dula men, alu me taxa no non.»²² Wo xumo xan, Yahudiyalu la namoxolu xo: «A b'a fan faxala ba? Bawo a xo: "N̄ be taxala dula men, alu me taxa no non." »²³ Isa x̄'e jaabi xo: «Alu mu duguxulo ta le ti. Nte mu sanxulo ta le ti. Alu mu jin duniya in ta le ti. Nte nte jin duniya in ta ti.²⁴ Wo le x̄'a tu, n̄ x̄'a fo xo alu be sala alu la junubolu xono. Bawo nin alu man la a la xo: "Nte mu" wo mu nte le ti, alu si sa alu la junubolu xono.»²⁵ I xo: «Í mu jon ti?» Isa x̄'e jaabi xo: «N̄ xa men fo alu pen kabirin folofolo, n̄ mu wo le ti.²⁶ Fen kiika be n̄ ma, x̄'a fo alu la kuwo to, fen kiika du be je n̄ si kiito tege alu xan mennu to. Men xa n̄ ki, wo mu tonpatigo le ti. N̄ xa men me a la, n̄ be wo le fola duniya pen.»²⁷ A tun be xumala Fa Ala le ma i pen. Bari i man wo faamu.²⁸ Isa xo i pen xo: «Nin alu xa Moxo Dinxe xotota tumo men, alu s'a lon xo: "Nte mu" wo mu nte le ti. Alu s'a lon du xo n̄ nte ku kela n̄ fan ma: Fa Ala xa n̄ naxaran men na, n̄ be wo doron ne fola.²⁹ Men xa n̄ ki, n̄ nin a be i noxo fe; a man n̄ kilin doron tu, bawo n̄ b'a sago kela tuma bee.»³⁰ Isa la wo xumo x̄'a tu, moxo kiika lata a la.³¹ Yahudiya mennu lata Isa la, a xo wolu pen xo: «Nin alu tuta n̄ na xumaxanjo xo, alu mu n̄ na xarandinjolu ti soobe la.³² Alu si tonja lon, tonja si alu hooroya.»³³ I x̄'a jaabi xo: «Ntelu mu Burehima bonsonjo lelu ti. Ntelu bada man ke moxo la jon ti. Í dun s'a fo na di xo: "Alu si hooroya?" »³⁴ Isa x̄'e jaabi xo: «Tonja tonja, n̄ b'a fola alu pen xo: Moxo wo moxo be junubo kela, wo mu junubo la jonjo le ti.³⁵ Jonjo nte tula a marigi la luwo ma kadawu. Bari a fan dinxe ken be tula je kadawu.³⁶ Wo to, nin Ala Dinxe x̄'alu hooroya, alu si hooroya soobeya la.³⁷ N̄ x̄'a lon, xo alu mu Burehima bonsonjolu ti. Bari haali wo, alu b'a fe xa nte faxes, bawo n̄ na xumo korita kunna alu to.³⁸ Nte xa men je n̄ Fa bata, n̄ be wo le fola alu pen. Alu dulu xa kuwo mennu me alu fa la, alu be wo lelu kela.»

³⁹ I x'a jaabi xo: «Ntelu fa mu Burehima le ti.» Isa xo i pen xo: «Nin alu mu Burehima dinŋo lelu ti, alu Burehima la kewalolu joxonnu ke. ⁴⁰ A fele saasa, alu b'a fe xa nte faxa, nte men xa tonŋa fo alu pen, n' xa men me Ala la. Burehima man wo joxon ke de! ⁴¹ Atelu be alu fa la kebaaro lelu kela.» I x'a jaabi xo: «Ntelu nte jangadinnu ti. Fa kilinpe le be ntelu la, nin wo mu Ala ti.» ⁴² Isa xo i pen xo: «Nin Ala le tun mu alu Fa ti, alu tunnu si nte xanu, bawo nte bota Ala le to xa na. N' man na n' fan ma. Ate le xa n' bula xa na. ⁴³ Mun na alu nte n' na xumo faamula? Bawo alu me a no xa nte la xumolu lame. ⁴⁴ Alu fa mu Sentane le ti. Alu b'a fe x'alu fa le diyanŋekuwolu ke. Ate keta moxofaxala ti kabirin folo-folo. A man tu tonŋa xan, bawo haali tonŋa kese kilin nt'a fe. Nin a be faniya fola, a si xuma x'a la a fan keŋa xan, bawo faniyafola le mu. Faniya fan fa le mu. ⁴⁵ Nte ken be tonŋa le fola. Wo xanma alu nte lala nte la. ⁴⁶ Alu to moxo joman s'a fo no, xo nte xa pin junube in ne ke? Nin n' xa tonŋa fo, mun na alu nte lala n' na? ⁴⁷ Men mu Ala la moxo ti, wo si Ala la xumolu lame. Alu nte lameli kela bawo alu nte Ala la moxo ti.» ⁴⁸ Yahudiyalu x'a jaabi, i xo: «Nin n xo x'é mu Samaringo le ti anin xo jinno b'é to, n man tonŋa fo ba?» ⁴⁹ Isa x'e jaabi xo: «Jinne nte n' to. N' be n' Fa le bunŋala, alu be nte doxoyala. ⁵⁰ N' nte n' fan bunŋa njinina. Do be je men be kiito tegela, wo le b'a njinina xa nte bunŋa. ⁵¹ Tonŋa tonŋa, n' b'a fola alu pen xo, nin moxo men xa nte la xumolu muta, wo me sa abada.» ⁵² Yahudiyalu xo: «N x'a lon saasa xo jinno le b'é to. Burehima sata, kila dulu sata, ite xo, xo men je í la xumo muta, wo me sa abada. ⁵³ Ite xa bun ne ntelu fa Burehima ti ba, wo dun sata, kila dulu sata? Í b'é fan kela jon ti?» ⁵⁴ Isa x'e jaabi xo: «Nin nte tun be n' fan bunŋala, wo bunŋa nte fusi ti. N' Fa le be nte bunŋala, alu xo wo men ma xo "alu la Ala". ⁵⁵ Alu man a lon. Nte ken x'a lon. Nin nte tun xo, xo n' man a lon, n' si ke faniyafola ti, í xo atelu. Nte x'a lon, n' b'a la xumo marala. ⁵⁶ Alu fa Burehima ŋaxalita xo a si nte tilo je. A x'a je, a ŋaŋata.» ⁵⁷ Yahudiyalu xo a pen xo: «Í man haali tan luulu sanji soto, ite xa Burehima je ba?» ⁵⁸ Isa xo i pen xo: «Tonŋa tonŋa, n' b'a fola alu pen xo, jannin Burehima xa wulu, "Nte mu." » ⁵⁹ Wo xumo nofe, i xa kurolo ta, x'e b'a bunna. Bari Isa x'é dugu, xa bo Alabatubaxo.

9 Xa Isa tanbito tu, a xa xe do je, a fiyonto le wuluta. ² Isa la xarandinŋolu x'a njininxaxo: «Karanmoxo, jon xa junubo ke? Nin xe in ba walla a wulubaxolu, fo a nin ŋa man wulu?» ³ Isa x'e jaabi xo: «Nin xe in na junube no nte, a wulubaxolu la junube no nte, bari a keta le, walasa Ala la sintigiya xa yita a la kuwo to. ⁴ Waajibo le mu, n xa n' kibaxo la kebaarolu ke tiliya to. Suwo si ku; nin suwo kuta, moxo si me baara ke no wo tumo. ⁵ Xa nte tu duniya xono, nte mu duniya keneya le ti.» ⁶ Wo xumo foninma, Isa xa dajiyo tuppudu

ma, xa wo banxu ŋiginninŋo ta, x'a mu fiyonto ŋalu ma. ⁷ A x'a fo a pen xo: «Taxa í ŋa ku Silowe dinxo jiyola.» Silowe xoto xo «Kiladinŋo». Fiyonto taxata je, x'a ŋa ku. A ŋa yeleninŋo x'é koppa. ⁸ A senbetomoxolu nin mennu dalita a jela sadaxatara la xo: «Xe men tun be siginin sadaxatara la, wo le nte pin ti ba?» ⁹ Dolu xo: «Ate le mu.» Dolu xo: «Ayi, ate nte, bari a nin a xa don.» Xe fan xo: «Nte le mu.» ¹⁰ I x'a njininxaxo: «Í ŋa yeleta ŋa di?» ¹¹ A x'e jaabi xo: «Xe men toxo xo Isa, wo le xa banxo mu n' ŋa la, x'a fo n' pen xo n' xa taxa n' ŋa ku Silowe dinxo jiyola. N' du taxata n' ŋa ku, n' ŋa woman in yeleta.» ¹² I saagita x'a njininxaxo: «Wo xe be min?» Fiyonto xoto x'e jaabi xo: «Nte man a lon.» ¹³ I taxata wo fiyonto xoto ti Farisiyalu bata. ¹⁴ Isa xa banxo ke, x'a ŋa ye le lunŋo men, wo lun tun mu tofopolunŋo le ti. ¹⁵ Wo sabaabo le x'a tu, Farisiyalu x'a njininxaxo, a ŋa ye le ŋa la. A xo i pen xo: «A xa banxo le mu n' ŋa la, n' xa n' ŋa ku, wo no bee to, n' xa dula je.» ¹⁶ Farisiya dolu xo: «Nin xe in me bo no Ala la, bawo a nte tofopolunŋo sariya labatula.» Do xotelu xo: «Nin pin xe in tun mu junubekela le ti, a si pin joxon taagumanseede ke no ŋa di?» I man ben a la kuwo to. ¹⁷ Farisiyalu saagita xa fiyonto xoto njininxaxo tugun xo: «Men xa í ŋa ye le, ite be mun fola a la kuwo to?» Fiyonto xoto xo: «Kila le mu.» ¹⁸ Bari Yahudiyalu la ŋamoxolu tunnu man la a la, xo pin xe in tun fiyonto mu, fo i taxata a wulubaxolu kili, ¹⁹ x'e njininxaxo: «Alu dinxe le je ba, alu xo, xo men fiyonto wuluta? A be dula jela ŋa di saasa?» ²⁰ A wulubaxolu x'e jaabi xo: «Ntelu x'a lon xo n' dinxe le je, a fiyonto le wuluta. ²¹ Bari a be dula jela ŋa di saasa, ntelu man wo ŋa lon de! N man a lon du, men x'a ŋa ye le. Dindin nte tugun, alu a fan njininxaxo. A si wo ŋa faranfansi alu pen.» ²² Fiyonto xoto wulubaxolu xumata wo ŋa ma, katugala i silata Yahudiyalu la ŋamoxolu ŋa. Bawo wolu tunnu benta a to, xo nin moxo wo moxo x'a fo doron, xo Isa mu Kirisita ti, wo tigo si xoyi, xa bo Alabatusuwo kafo xono. ²³ Wo le x'a tu, a wulubaxolu xo: «Dindin nte tugun, alu a fan njininxaxo.» ²⁴ Farisiyalu saagita fiyonto xoto kilinin x'a fo a pen xo: «Í tilin Ala la xa tonŋa fo. Nte kennu x'a lon, xo pin xe in mu junubeto le ti.» ²⁵ Fiyonto xoto x'e jaabi xo: «Nin junubeto mu, walla nin junubeto nte, nte man wo lon de. Nte xa ku kilinŋo men lon, wo fele: Nte tun mu fiyonto ti, bari saasa n' be dula jela.» ²⁶ I saagita x'a njininxaxo: «A xa mun ke í la? A xa í ŋa ye le ŋa di?» ²⁷ Fiyonto xoto x'e jaabi xo: «Nte xa wo fo alu pen xa ban, bari alu man nte lame. Mun dun na alu b'a fe xa wo me tugun? Alu dulu b'a fe xa ke a la xarandinŋolu ti ba?» ²⁸ I xa fiyonto xoto nani. I xo: «Ite le mu a la xarandinŋo ti! Nte kennu mu Musa le la xarandinŋolu ti. ²⁹ N x'a lon xo Ala xumata Musa pen. Bari pin xe in, ntelu man pin bodula lon!» ³⁰ Fiyonto xoto x'e jaabi xo: «Nin mu kawaku ti de: Atelu man a bodula lon, a dun xa nte ŋa ye le. ³¹ Alan bee x'a lon xo Ala nte junubetolu

lamela. Bari moxo men be silala a ɲa, x'a sago ke, a be wo tigo le lamela. ³² N man a me abada, xo moxo do xa fiyonto wuluninɲo ɲa ye. ³³ Nin ɲin xe in tun man bo Ala la, a tun me fusi ke no.» ³⁴ I xa wo xe jaabi xo: «Í junubeto fan ne wuluta. Í b'a fe xa ntelu laxaran ba?» Wo xo, i xa xe xoyi, x'a labo Alabatusuwo xono. ³⁵ Isa x'a me xo i xa fiyonto xoto xoyi. Isa x'a kunben x'a fo a ɲen xo: «Í lata Moxo Dinxe la ba?» ³⁶ A x'a jaabi xo: «Marigi, jon mu wo tigo ti, walasa nte xa la a la?» ³⁷ Isa xo a ɲen xo: «Í ɲa je men na, nin a be xumala í ɲen, wo le mu.» ³⁸ Xe xo: «Marigi, nte lata í la.» A x'é buti Isa xoto, x'a batu. ³⁹ Wo keninɲo, Isa xo: «N nata ɲin duniya in to ɲin kiiti in ne xanma: Walasa mennu fiyonto mu, wolu xa dula je, mennu ɲa be dula la, wolu xa fiy-onɲa.» ⁴⁰ Farisiya dolu tunnu be Isa senbo to, wolu x'a ɲininxa xo: «Wo tumo la, nte dulu mu fiyonto le ti ba?» ⁴¹ Isa x'e jaabi xo: «Nin alu tunnu fiyonto mu, junube tun me tu alu xan. Bari alu xo, x'alu ɲa be dula la. Wo xanma, alu la junubolu be alu xan».

10 Isa xo: «Tonɲa tonɲa, n b'a fola alu ɲen xo, nin moxo do dunta saaxabunɲo xono, a dun man dun da la, fo boxo xote la, wo mu sunɲo nin boyinxan- nila le ti. ² Bari men je dun da la, wo le mu saaxolu negaanibaxo ti. ³ Dakantabaxo si da ye le a ɲa, saaxolu si a xumaxanɲo me. Saaxo mennu mu a ta ti, a si wolu kili i toxo la, x'e labo banto to. ⁴ Nin a x'a fan na saaxolu bee labo tumo men, a si bula i ɲa. Wolu s'a lo a nofe, katugala i x'a xanɲo mategeninɲo lon. ⁵ I me a lo luntan nofe. I s'i bori, x'e soobo luntanɲo la, bawo i man luntan xumaxan lon.» ⁶ Isa xa ɲin tali in la moxolu ɲen, bari i man a faamu. ⁷ Isa xo i ɲen tugun xo: «Tonɲa tonɲa, n b'a fola alu ɲen xo: Nte le mu saaxolu la dunda ti. ⁸ Fen wo fen nata nte ɲa, wolu mu sunɲolu nin boyinxannila lelu ti. Bari saaxolu man i xumaxanɲo lame. ⁹ Nte le mu da ti. Men je dun nte fe, wo si kisi. Wo si dun, xa bo, xa domolo soto. ¹⁰ Sunɲo be nala supalo nin faxalo nin tipalo le doron xanma. Nte nata le walasa hadamadinɲolu xa nilamaya soto, dandula nte men ma. ¹¹ Nte le mu negaanila beto ti. Negaanila beto si a niyo di a la saaxolu xanma. ¹² Bari men b'a la sara doron ɲininna, wo men nte saaxolu negaanibaxo nin i tigo ti, nin wo xa waro nato je, a s'í bori xa saaxolu tu. Waro si na, xa mutalo ke, x'e jenjen. ¹³ Wo negaanila s'í bori, katugala saranjinna le mu. Saaxolu hanme nt'a la. ¹⁴ Nte le mu negaanila beto ti. Nte xa n na saaxolu lon, n na saaxo dulu xa nte lon, ¹⁵ í xo Fa Ala xa n lon ɲa men, anin nte xa Fa Ala lon ɲa men. N be n niyo dila n na saaxolu xanma. ¹⁶ Saaxo do xotelu be n kun, mennu nte ɲin saaxabun in xono. Fo n xa na wo saaxo dulu ti le. I si n na xumo lame. I bee si ke saaxagoore kilin ti. Negaanibaxa kilin si ke i bee ma. ¹⁷ Fa Ala be n xanunin, katugala n be bola n niyo la, xa saagi a sotonin tugun. ¹⁸ Moxo si nte n niyo mutala n na. N fan ne be bola a la x'a di. A sinɲo be n ɲen x'a di,

a sinɲo du be n ɲen, x'a soto tugun. N Fa xa wo le yan- maro di n ma.» ¹⁹ Wo xumolu xa Yahudiyalu tala xan ma tugun. ²⁰ Moxo kiika xo i to xo: «Jinno le b'a to. A kunxulo nte je. Mun na alu b'a lamela?» ²¹ Dolu xo: «Jin- neto xuma nte ɲinno ti de! Jinno si fiyonto ɲalu ye le no ba?» ²² Yahudiyalu la sallo do keta Yerusaleme sankunɲo to. Wo sallo be i hakilo lajigila Alabatusuba xarifalo la Ala ma. ²³ Wo sallo to, Isa tun be taxaninsaa- go la Alabatusuba biire do xoto, men be kilila xo mansaxe Sulemani la biire. ²⁴ Yahudiyalu kamarita a ma, x'a ɲininxa xo: «Í be n tula hakili fulanfulanɲo la fo tuma joman? Nin í mu Kirisita le ti, wo laxoyiya n ma.» ²⁵ Isa x'e jaabi, a xo: «N xa wo fo alu ɲen xa ban, bari alu man la a la. N be kebaaro mennu kela n Fa toxo la, wo lelu be nte seedeyala. ²⁶ Bari alu man la n na, bawo alu nte nte la saaxolu do ti. ²⁷ Nte la saaxolu be n xu- maxanɲo mela. N x'e lon, i s'a lo n nofe. ²⁸ N si nila- maya banbalo di i ma, i me halagi abada. Moxo si me i bo no nte bulu. ²⁹ N Fa men x'e di n ma, wo xa bun bee ti. Moxo si me i bo no n Fa bulu. ³⁰ Nte nin Fa Ala mu kilin ne ti.» ³¹ Wo tumo la, Yahudiyalu xa kurolo ta tu- gun, xo i b'a bunna x'a faxa. ³² Isa xo i ɲen xo: «N xa ke- baara beto kiika yita alu la, n Fa barako to. Wo ke- baarolu to, alu be n bunna kuro la joman ne xanma?» ³³ Yahudiyalu x'a jaabi xo: «N nte í bunna kuro la ke- baara bete xanma. Í la Ala toxotija le nofe mu, nin n b'é bunna. Ite men mu hadamadinɲo ti, í x'é fan ke Ala ti.» ³⁴ Isa x'e jaabi xo: «A nte safenin alu la sariya xono ba xo: "Nte Ala xo: Alu mu ala dolu ti?"» ³⁵ Alan x'a lon xo Kitaabo xumaxanɲo nte yelemala. Ala la xumo fota mennu ɲen, alaya fota wolu ma. ³⁶ Wo to, nin nte xo, xo n mu Ala Dinxe ti, alu dunnu s'a fo di, xo n be Ala toxo tipala? Fa Ala xa nte men sugandi, xa n ki duniya xono. ³⁷ Nin nte nte n Fa la kebaarolu kela, alu xana la n na. ³⁸ Bari x'a tu, n be a la kebaarolu kela, alu la wo kebaarolu la, haali nin alu man la nte la, walasa alu x'a lon, x'a faamu, xo nte nin n Fa mu kilin ne ti, xo Fa Ala nin nte mu kilin ti.» ³⁹ Wo xumo xan, i x'a ɲinin tugun, x'e b'a mutala. Bari a x'a fan soto i la xa taxa. ⁴⁰ Isa tax- ata Yuruden ba boxo do tugun. Yaya tun xa batiselo ke dula men folo, a sigita non. ⁴¹ Moxo kiika nata a ma non. Wolu xo: «Yaya man kawaku kilin ke. Bari a xa fen fen fo ɲin xe in na kuwo to, keso le mu.» ⁴² Moxo kiika lata a la non.

11 Xe do tun be Betani xo Lasare, a jangaruta. Mariyama nin a badinmuso Marate la gallo le mu Betani ti. ² Wo Mariyama le xa tulu sumadimanɲo ye lema Marigi sinɲolu xan, x'a kunsino ke, x'e masu- usa. Wo maxe Lasare le tun man kende. ³ Lasare ma- musuwolu xa kila bula Isa ma, x'a fo a ɲen xo: «Marigi, í xanuntexe man kende.» ⁴ Isa xa wo me tumo men, a xo: «Lasare la jangaro nte a faxajangaru ti. A keta le nin Ala la sintigiya nooroma si je, anin nin Ala Dinxe la sintigiya si yita wo fe.» ⁵ Isa be Marate nin a badinmu-

so nin a maxe Lasare xanula. ⁶ A x'a me, xo Lasare man kende. A xa tili fula ke non tugun. ⁷ Wo xo, a xo xarandinjolu pen xo: «Alan x'e koppa, xa taxa Yude.» ⁸ Xarandinjolu xo a pen xo: «Karanmoxo, haali a man me, Yahudiyalu tunnu b'a fe, x'é bun kuro la, x'é faxa. Í b'a fe x'é koppa non ma tugun ba?» ⁹ Isa x'e jaabi xo: «Leere tan nin fula le nte tilo xono ba? Xa moxo tu í taxamala tiliya to, a me ye le fen na, bawo a ja be duniya keneya la. ¹⁰ Bari nin moxo b'é taxamala suwo to, a si ye le fenjo do la, bawo keneya nt'a to.» ¹¹ Wo xumolu foninjo xo, a xo: «Alan terixe Lasare sinnoxota. Bari n be taxala a lakunila.» ¹² Xarandinjolu xo a pen xo: «Marigi, nin a sinnoxota le, a si kendeya.» ¹³ Isa xa Lasare la saya le fo. Bari xarandinjolu pen, x'a be sinnoxo gansanjo le ma. ¹⁴ Wo to, Isa x'a late i pen, a xo: «Lasare sata. ¹⁵ Nte man ke je, wo keta nte diyanjekuwo ti atelu xanma, walasa alu xa lannaya ke. Alu na alan xa taxa je.» ¹⁶ Wo to, Tomasi men be kilila xo Fune, wo xo xarandin tolu pen xo: «Alu na alan dulu xa taxa, n nin karanmoxo xa sa i joxo fe.» ¹⁷ Isa be sila je tumo men, a x'a tara Lasare xa tili naani ke xaburo xono xa ban. ¹⁸ Betani nin Yerusaleme tun te man jan. A dasata kilometere saba to dondin ne la. ¹⁹ Wo xanma, Yahudiyalu kiika nata Marate nin Mariyama bata, xa na i maxe banxonton. ²⁰ Marate x'a me tumo men xo Isa be nanin, a taxata a kunben. Mariyama, wo tuta siginin luwo ma. ²¹ Marate sininma Isa ma, a xo a pen xo: «Marigi, nin í tun be jan, n maxe tun me sa. ²² Bari haali saasa, n x'a lon xo í je kuwo men njin Ala la, a si wo ke í pen.» ²³ Isa xo a pen xo: «Í maxe si kuni.» ²⁴ Marate x'a jaabi xo: «N x'a lon, xo a si kuni duniya labanlunjo, furelu kunilunjo.» ²⁵ Isa xo a pen xo: «Nte le mu furekuniyo nin nilamaya ti. Moxo men je la nte la, haali nin a sata a si nilamaya. ²⁶ Moxo wo moxo be í nila, a dun be lanin nte la, wo me sa abada. Í lata wo la ba?» ²⁷ A x'a jaabi xo: «Iyo, Marigi, n lata a la, xo í mu Kirisita le ti, Ala Dinxe, men tun xa xan xa na duniya xono.» ²⁸ Isa la wo xumo xo, Marate taxata a badinmusu Mariyama kili x'a ladunmun xo: «Karanmoxo be jan, a b'é manjinxala.» ²⁹ Mariyama xa wo me doron, a wulita wo no bee to, xa taxa Isa bata. ³⁰ Isa tun man dun gallo xono folo. Marate x'a kunben dula men, a tun be non ne. ³¹ Mariyama nin Yahudiya do tunnu be luwo xono, mennu nata banxontonno la. Wolu xa Mariyama gidito je xa wuli tumo men, i x'a lo a nofe. A tun be i pen xo a be taxala xasila xaburuda le la. ³² Mariyama sita Isa ma tumo men, x'a je, a x'é boyi a xoto, x'a fo a pen xo: «Marigi, nin í tun be jan, n maxe me sa.» ³³ Isa xa Mariyama je xasila tumo men, a nin Yahudiya dulu, mennu nata a nofe, wo x'a juso xasi, x'a hakilo naxami. ³⁴ A xo: «Alu x'a bula minto?» I xo: «Marigi, na a mafele.» ³⁵ Wo to, Isa xasita. ³⁶ Yahudiyalu mennu x'a xasito je, wolu xo: «Alu a mafele de! A tun b'a xanula ja men.» ³⁷ Bari dolu xo i to xo: «Ate men xa

fiyonto jalu ye le, a tun si kori a kela Lasare xana sa?» ³⁸ Isa juso xasita tugun. A taxata xaburuda la. Kuruwuwu le tun mu. Kuro tun be lanin a da la. ³⁹ Isa xo: «Alu kuro bo je!» Fure mamusuwo Marate xo Isa pen xo: «Marigi, a sumo bota xa ban, bawo a tili naano le je jan.» ⁴⁰ Isa xo a pen xo: «Nte man a fo í pen ba, xo nin í xa lannaya ke, í si Ala la sintigiya je?» ⁴¹ I xa kuro bo je. Isa x'a jalu xotota sanjo to. A xo: «N Fa, n be barako bulala í pen, bawo í xa nte lame. ⁴² Nte x'a lon xo í be nte lamela tuma bee. Bari jin jama in men be n namininnin, n xumata wo lelu pen, walasa i xa la a la, xo ite le xa n ki.» ⁴³ Wo xumo xo, a fetenbeteta xo: «Lasare, bo!» ⁴⁴ Fure bota, a sinjolu nin a bulolu be sitinin faano la, a nada be buurinin faanuxoyo la. Isa xo i pen xo: «Alu a firin, x'a bula a xa taxa.» ⁴⁵ Yahudiya mennu nata Mariyama la luwo ma, wolu xa Isa la wo kebaaro je. I kiika lata a la. ⁴⁶ Bari i to, dolu taxata Isa la wo kebaaro laxali Farisiyalu pen. ⁴⁷ Wo to, sadaxalasibaxa kuntigolu nin Farisiyalu xa Yahudiyalu la Ki-itegekafo kamari x'a fo i pen xo: «Alan si mun ke? Bawo jin xe in xa kawakuwo kiika ke saasa. ⁴⁸ Nin n x'a tu je, moxo bee si lannaya ke a la. Wo to, Romengolu si na n na Alabatusuba te, xa n na siya silatunu.» ⁴⁹ I to kilin, a toxo xo Kayife, ate le tun mu sadaxalasibaxa kuntigiba ti wo sanjo. Wo xo i pen xo: «Atelu man fusi lon. ⁵⁰ Alu man a lon ba xo moxo kilin xa sa jamano bee pen, wo xa fisa siya bee la halago ti?» ⁵¹ Bari Kayife man wo xumo fo a fan ma. Ate le tun mu sadaxalasibaxa kuntigiba ti wo san. Ala le janxa wo xumo dun a da, xo Isa xa xan xa sa Yahudiyalu la siya pen. ⁵² A nte sala Yahudiyalu la siya doron pen. A be sala du, walasa Ala dinjolu mennu be jennin duniya xono, wolu xa kamari, xa ke kilin ti. ⁵³ X'é ta wo lunjo ma, Yahudiyalu la namoxolu benta a to, xa Isa faxa. ⁵⁴ Wo xa Isa lafata í yaalala Yahudiyalu to. A taxata Efarayime gallo to, wulaba da la. A nin a la xarandinjolu sigita non. ⁵⁵ Yahudiyalu la Tanbinxansallo sutiyaninjo, jamano moxo kiika taxata Yerusaleme, xa taxa i senuya, í xo i la laado x'a fo ja men, jannin sallo xa si. ⁵⁶ I tunnu be Isa njinina. X'e tu Alabatusuba xono, i tunnu b'a fola i joxo pen xo: «Atelu xo di dun? A si na sallin to ba, walla a me na?» ⁵⁷ Sadaxalasibaxa kuntigolu nin Farisiyalu tunnu xa yanmaro di, xo nin moxo men x'a dula lon, wo x'a fo; walasa a xa muta.

12 Xa tili wooro tu Tanbinxansallo la, Isa nata Betani tugun. A xa Lasare men nakuni xa bo furelu to, wo tun be siginin non ne. ² I xa siimanjo dara Isa pen je. Marate le tun be domolo dila moxolu ma. Lasare tun be Isa domolipoxolu to. ³ Mariyama xa tulu sumadimanjo litere tala ta, men toxo xo nare, x'a ye le ma Isa sinjolu xan. Wo tun mu tulu hooro le ti, men da xa xole. Wo xo, a x'a kunsino ke xa Isa sinjolu masuusa. Tulo sumo xa bugo bee ta. ⁴ Isa la xarandinjo do, xo Yudasí Isikariyoti, men tun b'a dunna bulo to,

wo xo: ⁵ «Mun na jin tulu in man fiiri, x'a sonjo di segebaxantunḡolu ma? A tun si depe xaaliso keme saba bo.» ⁶ A man wo fo, xo segebaxantunḡolu hinna b'a la. A x'a fo le, bawo a tun mu sunjo le ti. I la xaaliso tun be lamaranin ate le ma. Men je di a ma, a si do bo wo la. ⁷ Isa xo: «Alu fata a ma. A xa wo ke nte kasankelunjo le nen. ⁸ Alu nin segebaxantunḡolu be i noxo xan tuma bee. Bari alu nin nte nte tula kadawu.» ⁹ Yahudiyalu moxo kiika x'a me, xo Isa be Betani. I taxata Isa je. Bari i taxata le du, walasa xa Lasare je, Isa xa men nakuni xa bo furelu to. ¹⁰ Sadaxalasibaxa kuntigolu x'a latege, xo xa Lasare du faxesa. ¹¹ Katugala ate le la kuwo x'a tu Yahudiyalu kiika yelemata, xa la Isa la. ¹² Wo lun do, jamaba men nata Tanbinxansallo la, wolu x'a me xo Isa be silo to, nanin Yerusaleme. ¹³ I xa tamarabulolu xati, xa taxa Isa kunben. I tunnu be fetenna xo: «Tanto xa ke Ala nen! Men nato fele Marigi toxo la, duwawo be wo fe! Duwawo be Banisirayila mansaxe fe!» ¹⁴ Isa xa falindinjo do soto, xa yeke a xan, í xo a safeta Kitaabo to na men xo: ¹⁵ «Siyon gallo, í xana sila: A fele, í la mansaxe be nanin, a be siginin falimuso dinjo xan.» ¹⁶ Wo kuwolu kewaxato, a la xarandinḡolu tunnu man i faamu. Bari Isa kunita tumo men, xa dun a la nooro xono, i hakilo jigita a la, xo wo kuwolu safeta Kitaabo to a la kuwo to, xo moxolu xa wo lelu ke a nen ten. ¹⁷ Moxo men tunnu be Isa nofe, a be Lasare kilila xaburo xono tumo men, x'a labo furelu to, wolu x'a seedeya. ¹⁸ Jama x'a me, xo a xa wo kawakuwo ke. Wo le x'a tu, i x'a kunben. ¹⁹ Farisiyalu xo i noxo nen xo: «Alu na b'a la, alan me fusi bo no a to. A fele, duniya bee taxata a nofe.» ²⁰ Gereko mennu taxata sallo to Yerusaleme batulo xanma, ²¹ wolu dolu x'e sodun Filipe la, men bota Galile Betesayida, x'a fo a nen xo: «Jatigixe, n b'a fe xa Isa je.» ²² Filipe taxata a fo Andere nen, i fulo taxata a lasi Isa ma. ²³ Isa x'e jaabi xo: «Nooro be lala Moxo Dinxe xan waxato men, wo sita. ²⁴ Tonja tonja, n b'a fola alu nen xo, nin pokeso man bula duguxulo xoto, xa sa, a kilin si tu. Bari nin a sata, a si keso kiika ke. ²⁵ Moxo men niyo xa di a nen, wo si bono a niyo to. Bari moxo men niyo man di a nen jin duniya in xono, wo s'a niyo lamara nilamaya banbalo xanma. ²⁶ Nin men b'a fe xa baaro ke nte nen, wo x'a lo n nofe. Wo to, n be dula men, n na baaradinjo du si ke non. Men be baaro kela nte nen, Fa Ala si wo tigi bunja. ²⁷ «Saasa nte juso be naxaminin. N si mun fo? X'a fo ba xo: "N Fa, n kisi jin waxati in tooro ma?" Bari n nata jin waxati in fan fan ne xanma.» ²⁸ Isa xo: «N Fa, í toxo bunja!» A xa wo fo tumo men, xumaxanjo bota sanjo to, wo xo: «N x'a bunja xa ban. N si do kafu a ma tugun.» ²⁹ Jama men tun be je, wolu xa wo xumaxanjo me tumo men, dolu xo: «Sanjiyo le fetenta.» Dolu xo: «Melekiyo do le xumata a nen.» ³⁰ Isa xo i nen xo: «Nin xumaxan in man ke nte xanma. A keta a lelu xanma. ³¹ Saasa kiito be nala

tegela jin duniya in xan. Nin duniya in kuntigo be nala xoyila saasa. ³² Bari nte, nin n xototata xa bo duguxulo xan tumo men, n si moxolu bee saba xa na i ti n ma.» ³³ Wo xumolu fe, Isa x'a la saya na fo. ³⁴ Jama x'a jaabi jin na xo: «N x'a xaran Kitaabo xono, xo Kirisita si tu í nila fo abada. Ite dun xo, xo waajibo le mu Moxo Dinxe xa xotota? Wo Moxo Dinxe mu jon ne ti?» ³⁵ Isa xo i nen xo: «Haalibi, keneya be tula alu bata, bari dondin doron. Alu i taxama x'alu tu keneya la, dibo xana dun alu ma. Moxo men be í taxamala dibo to, wo man a taxadula lon. ³⁶ Xa keneya tu alu bata, alu la keneya la, walasa alu xa ke keneya la moxolu ti.» Isa xa wo xumolu fo i nen tumo men, a taxata, x'e dugu i ma. ³⁷ A xa taagumanseede kiika ke i nala, bari haali wo bee xan, i man la a la. ³⁸ Wo na ma, kila Esayi tun xa jin xuma in men fo, wo keta. A xo: «Marigi, n xa xibaro men fo, jon lata wo la? Marigi x'a la sintigiya yita jon na?» ³⁹ I tunnu me lannaya ke no du, bawo Esayi tun xa jin du fo xo: ⁴⁰ «Ala x'e fiyonja, x'e jusukunjo xoleya; walasa i palu xana jeli ke, i xana faamuyali ke i hakilolu la, i xana taxa i yeke ma, nte Ala x'e kendeya.» ⁴¹ Esayi xa wo xumolu fo Isa la kuwo to, bawo a tun x'a nooro je. ⁴² Wo bee nin a ta, haali Yahudiyalu la namoxolu to, fo kiika lata Isa la. Bari Farisiyalu nasilanja bulu, wolu tunnu me fatiya, x'e la lannaya labo keno ma, i xana taxa labo Alabatusuwo kafo xono. ⁴³ Moxolu la bunja tun xa di i nen Ala ta ti. ⁴⁴ Isa fetenta xo: «Moxo men lata nte la, a man la nte la, a lata n kibaxo le la. ⁴⁵ Moxo men xa nte je, a xa n kibaxo du je. ⁴⁶ Nte nata duniya xono í xo keneya, walasa moxo wo moxo je la n na, wo xana tu dibo to. ⁴⁷ Nin moxo do xa nte la xumolu me, bari a man i mara, nte nte kiito tegela wo xan, bawo n man na kiito tege duniya xan, n nata duniya kisilo le xanma. ⁴⁸ Moxo men j'i ban nte to, x'e ban xa n na xumolu muta, men be kiito tegela wo tigi xan, wo fele: Nte xa xumo mennu fo, wo lelu be kiito tegela a xan duniya labanlunjo. ⁴⁹ Katugala n na xumo man bo nte fan to. N xa xan xa xaranjo men di, n xa wo soto Fa Ala le la, ate men mu n kibaxo ti. ⁵⁰ Nte x'a lon xo yanmaro men bota Fa Ala la, wo si nilamaya banbalo di moxolu ma. N be men fola, Fa Ala x'a fo n nen na men, n b'a fola wo na in ne.»

13 Tanbinxansallo sutiyata. Isa tun x'a lon xo a la waxato sita, xa bo jin duniya in xono, xa taxa Fa Ala bata. Moxo mennu lata a la, duniya xono, a xa wolu xanu fo xa si a danjo ma. ² Isa nin a la xarandinḡolu tunnu be siimandomo la. Sentane tun x'a bula Simon dinxe Yudasi Isikariyoti jusukunjo la xa ban, xa Isa dun bulo to. ³ Isa tun x'a lon a fan na kuwo to, xo Fa Ala xa kuwo bee sinjo di a ma, a tun x'a lon du xo a bota Ala la, anin xo a b'e koppala Ala bata tugun. ⁴ Wo to, Isa wulita domolo kunna, x'a la dorokeba bo, xa faano do ta, x'a te tosi to wo la. ⁵ Wo keninma, a xa jiyo ke miranjo do xono, xa boyi a la xarandinḡolu sinjolu

kula, x'e masuusa a la wo tetositilanjo la. ⁶ A sita Simon Piyere ma tumo men, wo xo a pen xo: «Marigi, ite le be nte sinjolu kula ba?» ⁷ Isa x'a jaabi xo: «N be men kela, í man a xoto lon folo, bari í si laban x'a faamu.» ⁸ Piyere xo a pen xo: «Í me nte sinjolu maku abada.» Isa x'a jaabi xo: «Nin nte man í sinjolu maku, nidula nte í pen nte kun tugun.» ⁹ Simon Piyere xo a pen xo: «Awa Marigi, nin wo le mu, xana dan n sinjolu ma, bari n bulolu nin n kunjo du maku.» ¹⁰ Isa xo a pen xo: «Moxo men x'é ku, a maaku nt'a la x'é ku tugun, bari a si a sinjolu maku. Bawo alu senuyaninjo le mu xa ban. Alu senuyaninjo le mu, bari alu bee nte de.» ¹¹ A tun x'a lon, men be nala a dunna bulo to. Wo le x'a tu a xo: «Alu bee senuyanin nte de.» ¹² A x'e sinjolu maku tumo men, a x'a la faanolu dun, x'é sigi domolo kunna tugun. A xo i pen xo: «N xa men ke alu la, alu x'a xoto lon ba?» ¹³ Alu be nte kilila xo alu Karanmoxo anin alu Marigi. Alu xa tonja fo, bawo n mu wolu ti. ¹⁴ Wo to, nte men mu alu Marigi nin alu Karanmoxo ti, nin nte x'alu sinjolu maku, alu dulu xa xan xa i noxo sinjo maku. ¹⁵ Nte xa wo ke, x'a na yita alu la, walasa alu dulu xa wo noxon ke i noxo pen. ¹⁶ Tonja tonja, n b'a fola alu pen xo jonjo man bun a marigi ti, kiladinjo du man bun a kibaxo ti. ¹⁷ Nin alu xa wo kuwolu lon, x'e ke, alu si heero soto. ¹⁸ N nte alu bee ma de; n xa men nu sugandi, n xa wolu lon. Bari waajibo le mu Kitaabo la jin xumaxan in xa ke xo: «N domolikepoxo fan xa n jaxuya.» ¹⁹ Kabirin saasa, n b'a fola alu pen, walasa nin a keta, alu xa la a la xo: «Nte mu.» ²⁰ Tonja la, n b'a fola alu pen xo: Moxo wo moxo je nte la kiladinjo jigiyi, wo xa nte le jigiyi; men du xa nte jigiyi, wo xa n kibaxo le jigiyi.» ²¹ A x'e soto wo xumo fola tumo men, a jusukunjo toorota. A woman in xo: «Tonja tonja, n b'a fola alu pen xo, alu do be nala n dunna bulo to.» ²² xarandinjolu x'e noxo mafele, x'e fannu tonjinxa, a si tara men tigi ma wo ti. ²³ Isa la xarandinjo do, a xa men xanu, wo tun be tabalo la Isa senbo to. ²⁴ Simon Piyere x'a na maxati wo pen, xo a xa Isa njinxa, a be men tigi ma. ²⁵ Wo xarandinjo x'e jenge Isa mafan, x'a njinxa xo: «Marigi, jontigi mu?» ²⁶ Isa x'a jaabi xo: «N je buurukutunjo su domolo to x'a di men ma, wo le mu.» A xa buurukutunjo su domolo to, x'a di Simon Isikariyoti dinxe Yudasi ma. ²⁷ Yudasi xa buuro muta tumo men, Sentane x'e dun a to. Isa xo a pen xo: «Í be men kela, wo ke tariya.» ²⁸ A xa wo fo, xa wo la kunjo men xan, a domolipoxolu si tun man wo lon. ²⁹ I la xaliso tun be maranin Yudasi le ma. A keta dolu pen xo Isa xo a pen ne xo: «N haajo be fenjo mennu la sallo to, wolu san!» Walla x'a xo le, xo a xa fen do di segebaxantunjolu ma. ³⁰ Yudasi xa buuro muta doron, a wulita xa bo wo no bee to. Wo x'a tara suwo kuta. ³¹ Yudasi bota tumo men, Isa xo: «Saasa, Moxo Dinxe xa bunja soto, Ala du xa bunja soto a la kuwo xanma. ³² Nin Ala xa bunja soto a la kuwo xanma, Ala fan du si

a Dinxe la bunja yita. Wo nte mela tugun. ³³ N na dindinjolu, haalibi, n nin alu be tula í noxo xan, bari waxatindin xono. Alu si nte njinin, bari, n xa men fo Yahudiyalu pen, n be wo fola alu dulu pen saasa: Nte be taxala dula men, alu me taxa no je. ³⁴ N be jin sariya kuta in dila alu ma: Alu i noxo xanu! N x'alu xanu na men, alu dulu x'e noxo xanu ten. ³⁵ Nin alu be i noxo xanula, moxolu bee s'a lon wo le ma, xo alu mu nte la xarandinjolu ti.» ³⁶ Simon Piyere xa Isa njinxa xo: «Marigi, í be taxala min?» Isa x'a jaabi xo: «N be taxala dula men, í me taxa no je saasa, bari lun do, í si taxa je.» ³⁷ Piyere xo a pen xo: «Marigi, mun na nin nte me taxa no je saasa? N si bo n niyo la í pen.» ³⁸ Isa x'a jaabi xo: «Xa bo í niyo la nte pen ba? Tonja tonja, n b'a fola í pen xo, jannin duntunjo xa kokori, í s'í xaro í xo sinja saba, xo í man nte lon.»

14 Wo xo, Isa xo a la xarandinjolu pen xo: «Alu hakilo xana najami. Alu la Ala la, alu la nte du la. ² Sigidula kiika be n Fa Ala la luwo xono. Wo mu tonja le ti, nin wo tun nte, n me a fo alu pen. N be taxala dula do tobenna alu pen je. ³ Nin n taxata xa dula do toben alu pen tumo men, n si na tugun, x'alu ta, walasa n be jan men, alu dulu xa ke non. ⁴ Alu xa n taxadula silo lon.» ⁵ Tomasi xo a pen xo: «Marigi, n s'í taxadula silo lon na di, x'a tara, n man í taxadula lon?» ⁶ Isa xo a pen xo: «Nte le mu silo ti, anin tonja nin nilamaya. Moxo si me taxa no Fa Ala bata, fo nte doron fe. ⁷ Nin alu tunnu xa nte lon, alu tunnu si n Fa du lon. Kabirin saasa, alu x'a lon, alu x'a je.» ⁸ Filipe xo a pen xo: «Marigi, Fa Ala yita n na, wo si n bo.» ⁹ Isa x'a jaabi, a xo: «Filipe, bi man n nin alu bula i noxo xan, bari í man n lon. Men xa nte je, wo xa Fa Ala du je. Wo to, í dun s'a fo na di xo: «Fa Ala yita n na?» ¹⁰ Í man la a la ba, xo nte nin Fa Ala mu kilin ne ti, anin xo Fa Ala du nin nte mu kilin ne ti? N be xumo mennu ma x'e fo alu pen, wolu nte bola n fan to. N Fa Ala men be tunin nte la, wo fan ne b'a la kebaarolu ma x'e ke. ¹¹ Alu la n na, xo nte nin Fa Ala mu kilin ne ti, anin xo Fa Ala du nin nte mu kilin ne ti. Haali nin alu man la n na n na xumolu xanma, n be jin kebaara innu mennu ma x'e ke, alu la n na wolu xanma. ¹² Tonja tonja, n b'a fola alu pen xo: Men je la nte la, a si nte la kebaarolu noxonnu ke. A si kebaarolu ke fan, mennu barako xa bun nte talu ti, bawo n be taxala Fa Ala bata. ¹³ Alu je fen wo fen tara Ala la, nte toxo la, n si wo ke, walasa Dinxe xa Fa Ala la nooro yita. ¹⁴ Nin alu xa fen do tara nte toxo la, n si wo ke.» ¹⁵ «Nin alu be nte xanula, alu si n na sariyalu labatu. ¹⁶ Nte si xuma Fa Ala pen, a si Deemabaxo do xote di alu ma, alu nin men si tu i noxo fe fo abada. ¹⁷ Wo Deemabaxo mu Ni Senunjo le ti, nin wo mu tonja Niyo ti. Duniya me wo Niyo soto no, bawo a na nte a la, a man a lon du. Bari atelu kennu x'a lon, bawo a be alu bata, a si ke alu jusukunjo la du. ¹⁸ N me alu kilon dinma tu. N si na alu bata tugun. ¹⁹ Dondin duniya

me ń je tugun, bari atelu si ń je, bawo nte be ń nila, alu dulu si ke i nila. ²⁰ Wo lunḡo, alu s'a lon, xo nte nin ń Fa mu kilin ne ti, xo atelu nin nte mu kilin ti, anin xo nte nin alu mu kilin ti. ²¹ «Moxo men be nte la sariyalu marala, x'e ke, wo tigi le be ń xanula. Moxo men be nte xanula, ń Fa si wo xanu. Nte du s'a xanu, xa ń yita a la.» ²² Isa la xarandinḡo do xote tun be je, wo du toxo xo Yudasi, wo xo Isa ńen xo: «Marigi, mun na í s'í yita ntelu la, bari í nte í yitala duniya la?» ²³ Isa x'a jaabi xo: «Nin men be nte xanula, a si ń na xumaxanḡolu labatu. ń Fa s'a xanu, ntelu si na wo tigi bata, xa sigi je. ²⁴ Moxo men nte ń xanula, wo me ń na xumaxanḡolu labatu. Alu tulo be xumo men na, wo man bo nte to. Fa Ala men xa ń ki, a bota wo le to. ²⁵ ń xa wo fo alu ńen, xa nte nin alu tu i ńoxo xan. ²⁶ Deemabaxo, nin wo mu Ni Senunḡo ti, Fa Ala be men kila nte toxo la, wo si alu laxaran kuwo bee la, x'alu hakilo lajigi nte la xumolu bee kun. ²⁷ «ń be alu nin heero tula. ń xa ń na heero di alu ma. Duniya b'a dila ńa men, nte nt'a dila alu ma ten. Alu juso xana ńaxami. Alu xana sila. ²⁸ Alu x'a me ń na xo: "ń be taxala, bari wo xo, ń si na alu bata tugun." Nin alu be ń xanula, alu si ńaxali nte la taxo la Fa Ala bata, katugala Fa Ala xa bun nte ti. ²⁹ ń xa ńin fen innu fo alu ńen saasa jannin i xa ke, walasa nin i keta, alu xa lannaya ke. ³⁰ ń nin alu nte xuma kiika fola tugun, bawo ńin duniya in kuntigo be nanin. Sin fusi nt'a ńen nte xan. ³¹ Bari ńin duniya in xa xan x'a lon, xo nte be Fa Ala xanula. Wo to, a xa nte bula men na, ń be wo le kela. Alu wuli, alan xa taxa, xa bo jan.»

15 Isa xo: «Nte le mu resenju soobe ti. ń Fa mu a senebaxo ti. ² Bulu wo bulu be nte la, nin a nt'e dinna, a si wo tege. Bulu wo bulu be dinḡo kela, a si wo kunnakutun, walasa a xa dinḡo kiika ke, xa tanbi folo xan. ³ ń xa xumo men fo alu ńen, wo xanma, alu senuyata xa ban. ⁴ Alu tu nte la, nte xa tu alu la. Resenbulo gansanḡo me dinḡo ke no nin a nte a juwo la. Wo be ńa men de, nin alu dulu man tu nte la, alu me í din no. ⁵ «Nte le mu resenjuwo ti, atelu mu a bulolu ti. Men je tu nte la, nte xa tu a la, wo s'í din bete, bawo nin nte nte, alu me fusi ke no. ⁶ Men man tu nte la, wo si fili banto to. A si ke í xo yiribulo mennu tegeta xa bo resenjuwo la. A si ja, xa kamari x'a fili ta to, x'a jani. ⁷ Nin alu tuta nte la, anin nte la xumaxanḡolu xa tu alu xono, fen wo fen xa di alu ńen, alu wo tara, alu si wo soto. ⁸ Nin alu b'e dinbetela, wo si nooro la ń Fa xan. Wo s'a yita xo alu mu nte la xarandinḡolu ti. ⁹ Fa Ala xa nte xanu ńa men, nte du x'alu xanu ten. Alu tu ń na xanuya xono. ¹⁰ Nin alu be ń na sariyalu labatula, alu be ń na xanuya xono, í xo nte xa ń Fa la sariyalu labatu ńa men, xa tu a la xanuya xono. ¹¹ «ń xa ńin xuma innu fo alu ńen, walasa alu xa ń na ńaxalo soto, anin alu la ńaxalo xa dafa. ¹² ń na sariya fele: "Alu i ńoxo xanu í xo nte x'alu xanu ńa men." ¹³ Xanuya me tanbi don na, xa bo í niyo la í xanuntelu ńen. ¹⁴ Nte xa men waajibiya

alu ma, nin alu be wo kela, alu mu nte xanuntelu ti. ¹⁵ ń nte alu kilila tugun xo jonḡolu, bawo jonḡo man a marigi la ku ketalu lon. ń x'alu kili xo ń xanuntelu, bawo ń xa fen wo fen me ń Fa la, ń x'alu lalon wo bee la. ¹⁶ Atelu man nte sugandi. Nte le x'atelu sugandi, x'alu bula, xa taxa, walasa alu x'e din, dinḡo men si tu. Wo to, alu je Fa Ala tara fen wo fen na nte toxo la, a si wo di alu ma. ¹⁷ Nte be men waajibiyala alu ma, wo fele: Alu i ńoxo xanu.» ¹⁸ «Nin duniya x'alu jaxuya, alu a lon, xo a xa nte folo le jaxuya. ¹⁹ Nin alu tunnu mu duniya talu ti, duniya tun si alu xanu, katugu alu mu a ta ti. Bari alu nte duniya ta ti, nte x'alu sugandi x'alu fata duniya ma, wo xanma, duniya be alu jaxuyala. ²⁰ ń xa ńin xuma in men fo alu ńen, alu hakilo xa jigi wo la xo: "Jonḡo man bun a marigi ti." Nin i xa nte tooro, i si alu dulu tooro. Nin i xa nte la xumolu muta, i si alu dulu talu muta. ²¹ Bari i be ńin ku innu bee kela alu la nte toxo le nofe, bawo i man nte kibaxo lon. ²² Nin ń tun man na xa xuma i ńen, junube tun nt'e xan. Bari saasa, i me fusi fo no men si jela muta bo. ²³ Moxo men be nte jaxuyala, wo be ń Fa du jaxuyala. ²⁴ Nin ń tun man kebaarolu ke, moxo man dali xa men ńoxonnu ke, junube tun me ke i la. Bari saasa, i xa ń na kebaarolu je, i xa nte nin ń Fa bee jaxuya. ²⁵ Bari wo keta walasa ńin xuma in, men safeta i la sariya xono, wo xa ke xo: "I xa ń jaxuya, x'a tara kun nt'a la." ²⁶ «Deemabaxo, nin wo mu Ni Senunḡo ti, men be tonḡa yitala duniya la, wo si na, xa bo Fa Ala bata. ń s'a bula xa na alu ma ń Fa toxo la. Nin a nata, a si nte la kuwo seedeya moxolu ńen. ²⁷ Alu dulu si nte la kuwo seedeya moxolu ńen, bawo alu nin nte keta i ńoxo fe kabirin folofolo.»

16 «ń xa ńin fen innu fo alu ńen walasa nin i sita, alu la lannaya xana tiḡa. ² I si alu xoyi Alabatusuwolu xono. Waxato do fan si na, moxo men je alu faxesa, a si ke wo tigo ńen xo a janxa baaro le ke Ala ńen ten. ³ I si wo kuwolu ke alu la, bawo i man Fa Ala lon, i man nte du lon. ⁴ Bari nin ń xa ńin ku innu fo alu ńen, ń x'a ke le, walasa nin i waxato sita, alu hakilo xa jigi a la xo nte xa wolu fo alu ńen.» Kabirin folofolo, nte tun man i fo alu ńen, bawo ń nin alu b'e ńoxo xan. ⁵ Bari saasa, ń be taxala ń kibaxo bata. Alu to moxo si man soto xa ń ńininxa xo: "Í be taxala min?" ⁶ Alu juso xasita fo xa danmatanbi, bawo ń xa wo fo alu ńen. ⁷ A dun, xa tonḡa fo alu ńen, a xa fisa alu ma nte xa taxa; bawo nin nte man taxa, Deemabaxo me na alu bata. Bari nin ń taxata, ń s'a ki alu ma. ⁸ Nin a nata, a si duniya moxolu la filo yita: Junubo kuwo to, Ala la tilinningḡa kuwo to, anin Ala la kiito kuwo to. ⁹ I filita junubo kuwo to; bawo i man la nte la. ¹⁰ I filita Ala la tilinningḡa kuwo to; bawo nte be taxala Fa Ala bata, anin x'alu me nte je tugun. ¹¹ I filita Ala la kiito kuwo to; bawo kiito tegeta ńin duniya in kuntigo xan xa ban. ¹² «Xuma kiika be ń ma x'a fo alu ńen, bari alu me wolu bee muḡa no saasa. ¹³ Nin tonḡa Niyo nata tumo men, a si tonḡa muume

bee lasi alu ma. Bawo a la xumolu nte bola a fan to. Bari a je fen wo fen me, a si wo lasi alu ma, xa ku natalu fo alu pen. ¹⁴ A si nte la nooro yita, bawo xumo men be nte kun, a si wo soto, x'a lasi alu ma. ¹⁵ Fen wo fen be Fa Ala kun, nte ta le mu wo bee ti. Wo le x'a tu, n' x'a fo xo a si nte talu ta, x'e lasi alu ma.» ¹⁶ «Dondin dondin, alu me n' je tugun. Wo xo dondin, alu si n' je tugun.» ¹⁷ Wo to, a la xarandinjo dolu xo i noxo pen xo: «A la pin xuma in xoto mu mun ti xo: "Dondin dondin, alu me n' je tugun, wo xo dondin, alu si n' je tugun," anin xo: "N' be taxala Fa Ala bata?" ¹⁸ «Dondin dondin!" Wo xoto mu mun ti? N man a la pin xuma in xoto lon de.» ¹⁹ Isa x'a lon, xo i b'a fe x'a njinxa. A xo i pen xo: «Nte xa men fo alu pen xo: "Dondin dondin, alu me n' je tugun, wo xo dondin, alu si n' je tugun", alu be i noxo tonjinxala wo le ma ba? ²⁰ Tonja tonja, n' b'a fola alu pen xo: Alu si xasi, xa mapumatoxanqolu fo, duniya si paxali. Alu si nitokuwa, bari alu la nitokuwa si laban xa ke pajo ti. ²¹ Muso tinto si nitokuwa, bawo tinjo waxato sita. Bari nin a x'a dinjo wulu tumo men, a hakilo nt'a la tooro la tugun, bawo a si paxali xo moxo do bangeta duniya xono. ²² Atelu dulu fele nitokuwala saasa. Bari n' si alu je tugun, alu si paja. Moxo si me alu bo no wo pajo xono. ²³ Wo lunjo, alu me nte njinxa fusi la tugun. Tonja tonja, n' b'a fola alu pen xo: Alu je fen wo fen tara Fa Ala la nte toxo la, a si wo di alu ma. ²⁴ Haalibi alu man fusi tara nte toxo la. Alu taralo ke, alu si soto ke, walasa alu la pajo xa dafa.» ²⁵ «N' xumata alu pen pin ku innu xan taliyolu la. Bari waxato be nanin, nte me xuma alu pen tali la tugun, bari n' si xuma, xa Fa Ala la kuwo xoyiya alu pen. ²⁶ Wo lunjo, alu si Fa Ala matara nte toxo la. N' me a fo wo lunjo xo nte si Fa Ala matara alu pen. ²⁷ Bawo Fa Ala fan be alu xanula x'a la a xan, alu be nte xanula, anin alu lata a la xo nte bota Ala le to. ²⁸ N' bota Fa Ala bata xa na duniya to. Saasa n' be bola duniya to xa taxa Fa Ala bata.» ²⁹ A la xarandinjolu xo a pen xo: «Saasa í be xumala n pen x'a xoyiya. Í nte xumala tali si to tugun. ³⁰ Saasa n x'a lon, xo í xa fen bee lon. Moxolu b'a fe x'e njinxa fen fen na, í xa wolu bee lon xa ban. Wo le x'a tu, n lata a la, xo í bota Ala to.» ³¹ Isa x'e jaabi xo: «Alu xa lannaya ke saasa ba? ³² A fele, waxato be nala, a sita xa ban, alu si jenjen, bee si taxa í ta boxo, xa n' kilin tu. Bari n' kilin nte tula de! Bawo n' nin Fa Ala le mu. ³³ N' xa pinnu fo alu pen, walasa alu xa heero soto nte kafunoxoya fe. Alu si tooro soto duniya to, bari alu i jija, nte sinta le duniya la.»

17 Isa xa wo xumolu fo tumo men, a x'a nalu xotota sanjo to, xa Ala matara xo: «N' Fa, waxato sita. Í Dinxe la nooro yita, walasa ate du xa ite la nooro yita. ² Í xa fango di a ma hadamadinjolu bee xan, walasa í xa moxo mennu di a ma, a xa nilamaya banbalo di wolu bee ma. ³ Ite men kilinpe mu Ala soobe ti, nin i xa ite lon, xa Isa Kirisita lon, í xa wo men ki, wo le

mu nilamaya banbalo ti. ⁴ N' xa bunja la í xan xa n' tu duguxulo xan; í xa baaro men dun n' bulu, n' xa wo dafa. ⁵ Saasa, n' Fa, bunja la n' xan í fan bata, bunja men tun be n' xan í bata jannin duniya xa da. ⁶ «Í xa moxolu mennu fata duniya moxolu ma, x'e dun n' bulu, nte xa í toxo yita wolu la. I tunnu mu ite le ta ti, í x'e di nte ma, i x'e la xumo muta. ⁷ Saasa i x'a lon, xo í xa fen wo fen di nte ma, wolu bee bota ite le to. ⁸ Bawo í xa xumo mennu dun n' da, n' xa wolu lasi i ma. I xa wo xumolu muta. I x'a lon tonja la, xo n' bota ite le to. I lata a la du xo ite le xa n' ki. ⁹ «N' b'é tarala ite lelu pen. N' nt'é tarala duniya pen. Í xa mennu di n' ma, n' b'é tarala wo lelu pen; bawo ite le talu mu. ¹⁰ Fen wo fen mu nte ta ti, wo bee mu ite ta le ti. Ite ta du bee mu nte ta le ti. I la kuwo x'a tu, nte la bunja lonta. ¹¹ Nte nte tula duniya xono tugun, bari itelu be duniya xono; nte be taxala ite bata. N' Fa, ite men xa senu, i lakanta í toxo barako to, wo toxo men, nin í x'a di nte ma; walasa i xa ke kilin ti, í xo nte nin ite mu kilin ti ja men. ¹² Xa nte nin i tu i noxo xan, nte x'e lakanta í toxo barako to, í xa wo toxo men di nte ma. Nte x'e lakanta, i fen man halagibaxato kilin doron, men na kuwo safeta Kitaabo xono. Wo ja ma, wo xumo dafata. ¹³ Saasa nte be taxala í bata. N' be pin xuma innu fola xa n' tu duniya xono, walasa i xa nte la paxalo soto, paxalo men be dafanin. ¹⁴ N' x'e la xumo lasi i ma. Wo xanma, duniya x'e jaxuya, bawo i nte duniya ta ti, í xo nte nte duniya ta ti ja men. ¹⁵ N' nt'é tarala xo í x'e labo duniya xono. N' b'é tarala le xo í x'e kisi Jaxumango ma. ¹⁶ Duniya talu nte, í xo nte nte duniya ta ti ja men. ¹⁷ I senuya tonja la. Í la xumo le mu tonja ti. ¹⁸ Í xa nte ki duniya xono ja men, nte du xa itelu ki duniya xono wo ja ma. ¹⁹ Nte xa n' fan di ite ma wolu pen, xa ke ite kilinpe ta ti, walasa i dulu xa i fannu di ite ma xa ke ite kilinpe ta ti, tonja la. ²⁰ «N' nte í tarala itelu doronnu pen. Men dulu be nala lala n' na i la xumolu xanma, n' b'é tarala wo dulu pen; ²¹ walasa, n' Fa, i bee xa ke kilin ti, í xo nte nin ite mu kilin ti ja men, wolu dulu nin ntelu xa ke kilin ti, walasa duniya xa la a la, xo ite xa nte ki. ²² Í xa bunja men di nte ma, nte xa wo d'í ma, walasa i xa ke kilin ti, í xo ntelu mu kilin ti ja men. ²³ Nte nin itelu kafuta xa ke kilin ti ja men, anin ite nin nte be kafunin xa ke kilin ti ja men, a ke xo wo dulu xa kafu xa ke kilin ti, i la kilinja xa dafa. Nin wo keta, duniya s'a lon xo ite le xa n' ki, anin xo í x'e xanu, í xo í xa nte xanu ja men. ²⁴ «N' Fa, í xa mennu di n' ma, nte be dula men, n' b'a fe i dulu xa ke n' bata non, walasa í xa nooro men di n' ma, i xa wo je; bawo í xa nte xanu jannin duniya xa da. ²⁵ N' Fa, ite men be tilinnin, duniya man í lon, bari nte x'e lon, pin dulu x'a lon, xo ite xa n' ki. ²⁶ N' x'e toxo yita i la, walasa i x'e lon. N' s'a yita i la tugun, walasa í xa nte xanu xanuya men na, wo xanuya xa ke i la, anin nte du xa ke i la.»

18 Isa x'é soto wo xumolu la tumo men, a nin a la xarandinḡolu wulita xa taxa Sedoron xo boxo do. Yirifuuto do tun be non, a nin a la xarandinḡolu dunta wo xono. ² Yudasi men be nala a dunna bulo to, wo tun xa wo dula lon, bawo Isa nin a la xarandinḡolu dalita kela je kiika ti. ³ Yudasi nata yirifuuto to, a nin sorodasolu nin garadolu, sadaxalasibaxa kuntigolu nin Farisiyalu xa mennu ki. I nin maramafenḡolu nin lanpolu nin moḡolu nata. ⁴ Kuwo fen wo fen tun xa xan xa ke Isa la, a fan tun xa wo bee lon. Wo to, a taxata i kunben, x'e ḡininxa xo: «Alu be jon ḡininna?» ⁵ I xo: «Nasareti Isa.» A xo i pen xo: «Nte le mu!» Yudasi men b'a dunna bulo to, wo tun b'e to. ⁶ Isa xo i pen tumo men xo: «Nte le mu», i x'e koppa i xo la, xa boyi dugo ma. ⁷ Isa x'e ḡininxa tugun xo: «Alu be jon ḡininna?» I xo: «Nasareti Isa.» ⁸ Isa x'e jaabi xo: «N' x'a fo alu pen xo nte le mu. Nin alu be nte le ḡininna, alu n' nofemoxolu bula i xa taxa.» ⁹ Isa xa wo xumo fo, walasa a tun xa pin xuma in men fo xa dafa xo: «N' Fa, i xa mennu di n' ma, i fen man sanko n' kun.» ¹⁰ Fanḡo tun be Simon Piyere bulu, a x'a boosi, xa sadaxalasibaxa kuntigiba la jonxe kininbulu tulo carun. Wo jonxe toxo xo Malikusi. ¹¹ Isa xo Piyere pen xo: «Í la fanḡo bula a la to. Wo tuma, Fa Ala xa tooro jipoto men di nte ma, nte man xan xa son wo to ba?» ¹² Wo to, sorodasi kuntigo nin a la sorodasi jama nin Yahudiyalu la garadolu xa Isa muta, x'a bulolu siti, ¹³ xa taxa a ti Ane bata folo. Ane mu Kayife bitanxe le ti, wo le tun mu sadaxalasibaxa kuntigiba ti wo san. ¹⁴ Kayife le tun xa Yahudiyalu la namoxolu tonben ten xo: «A xa fisa moxo kilin xa sa jamanadinḡolu bee pen.» ¹⁵ Simon Piyere nin Isa la xarandin xote x'a lo a nofe taxanin. Wo xarandinḡo tun mu sadaxalasibaxa kuntigiba lonbaxo le ti. Wo le x'a tu wo dunta Isa nofe sadaxalasibaxa kuntigiba la luwo ma. ¹⁶ Bari Piyere tuta lonin da la, banto to. Xarandinḡo men tun mu sadaxalasibaxa kuntigiba lonbaxo ti, wo bota xa xuma muso pen, men be da korosila. A x'a tu Piyere xa dun luwo xono. ¹⁷ Wo to, baaradinmuso men tun be da korosila, wo xo Piyere pen xo: «Íte du nte pin xe in na xarandinḡo do le ti ba?» Piyere xo: «Nte nt'a la xarandin ti de!» ¹⁸ Jonḡolu nin garado men tunnu be je, wolu xa ta bula x'e ja, bawo neno tun b'a to. Piyere tun b'e bata. A du tun b'é jala. ¹⁹ Sadaxalasibaxa kuntigiba xa Isa ḡininxa a la xarandinḡolu la kuwo nin a la xarannḡo kuwo la. ²⁰ Isa x'a jaabi xo: «Nte xumata moxolu bee pen keno la. Tuma bee n' xa moxolu laxaran Alabatusuwolu nin Alabatusuba xono, Yahudiyalu bee be kamarila dula mennu. Nte man fusi fo duguwo to. ²¹ Mun na í be nte ḡininxala? N' xumata mennu pala, wolu ḡininxa. N' xa men fo, wolu xa wo lon bete.» ²² Wo xumolu xan, garadolu to do, men tun be je, xa Isa te a na xan, x'a fo xo: «Í be sadaxalasibaxa kuntigiba jaabila ten ne ba?» ²³ Isa x'a jaabi xo: «Nin n' xa xuma jaxo le fo, wo yita. Nin n' dun man xuma jaxu fo, mun na í be n'

lippala?» ²⁴ Wo tumo la, Ane xa Isa bulolu sitininḡo bula, xa taxa sadaxalasibaxa kuntigiba Kayife bata. ²⁵ Simon Piyere tun be non, a b'é jala. Dolu x'a ḡininxa xo: «Íte du nt'a la xarandinḡo do le ti?» A x'e xaro a la, a xo: «Nte nt'a la xarandin ti de!» ²⁶ Sadaxalasibaxa kuntigiba la jonxe do, Piyere xa men tulo tege, wo badinxe xo Piyere pen xo: «Nte man í nin xe in je yirifuuto to ba?» ²⁷ Piyere x'é xaro a la tugun. Wo no bee to, duntunḡo do kokorita. ²⁸ Wo xo, Yahudiyalu la namoxolu nin Isa bota Kayife bata, xa taxa a ti goferenere la xube la. Wo keta saxo ma junna. I fannu man dun luwo xono, bawo i tunnu nt'a fe xa noxo, men tun s'i bali xa Tanbinxansallo domolo ke. ²⁹ Goferenere Pilate bota, xa si i ma. A xo: «Alu be pin xe in jalagila kun joman na?» ³⁰ I x'a jaabi xo: «Nin kujaxukela tun nte, n tunnu me a dun í bulu.» ³¹ Wo to, Pilate xo i pen xo: «Alu fannu x'a muta, xa kiito tege a xan, alu la sariya la.» Yahudiyalu la namoxolu xo a pen xo: «A nte dagenin ntelu pen xa moxo si faxesa.» ³² Wo na ma, Isa tun xa men fo x'a la saya keḡa yita, wo keta. ³³ Pilate dunta xube xono, xa Isa kili x'a ḡininxa. A xo: «Í mu Yahudiyalu la mansaxe le ti ba?» ³⁴ Isa x'a jaabi xo: «Wo mu í fan na miiriya ti ba, walla do xotelu xa wo fo nte ma í pen?» ³⁵ Pilate x'a jaabi xo: «Nte mu Yahudiya le ti ba? Í fan na siya moxolu nin sadaxalasibaxa kuntigolu x'é dun nte bulu. Í xa mun ne ke?» ³⁶ Isa x'a jaabi xo: «Nte la mansaya nte pin duniya in ku ti. Nin n' na mansaya tun mu pin duniya in ku ti, n' na moxo tunnu si kelo ke, walasa n' xana dun Yahudiyalu la namoxolu bulu. Bari saasa, nte la mansaya nte pin duniya in ku ti.» ³⁷ Pilate xo a pen xo: «Wo to, í mu mansaxe le ti ba?» Isa xo: «Í x'a fo na men, a be ten. N' mu mansaxe le ti. N' nata wulu duniya to men xanma, wo mu le, xa na tonḡa yita moxolu la. Moxo wo moxo be tonḡa fe, wo si n' name.» ³⁸ Pilate xo a pen xo: «Tonḡa mu mun ne ti?» A xa wo xumo fo tumo men, a bota tugun xa taxa Yahudiyalu la namoxolu bata keno ma. A xo i pen xo: «Nte man jalagikun si je pin xe in ma. ³⁹ Bari x'a la alu la laado xan, san wo san Tanbinxansallo to, n' si kasolamoxo kilin bula alu pen. Alu b'a fe ba, n' xa Yahudiyalu la mansaxe bula alu pen?» ⁴⁰ Wo to, Yahudiyalu fetenta tugun x'a fo xo: «Ayi! Barabasi le be bulala.» Barabasi tun mu boyinxannila le ti.

19 Wo tumo, Pilate x'e bula Isa mutala, x'a xosi gaḡo la. ² Sorodasolu xa mansakufuno dara ḡaninḡo la, x'a ke a kunḡo la, xa mansadoroke wulenḡo dun a xanna. ³ I x'e sodun a la, x'a fo xo: «Yahudiyalu la mansaxe, í nin sege!» I x'a te a na xan. ⁴ Pilate bota tugun keno ma, x'a fo Yahudiyalu pen xo: «N' fele a labo-la keno ma alu pen, walasa alu x'a lon xo nte man jalagikun si soto pin xe in na.» ⁵ Isa bota keno ma, a nin ḡaninkufuno nin mansadoroke wulenḡo. Pilate xo i pen xo: «Xe fele.» ⁶ Sadaxalasibaxa kuntigolu nin garadolu x'a je tumo men, i fetenta xo: «A gengen yiro

ma, a gengen yiro ma!» Pilate xo i pen xo: «Alu fannu x'a muta, x'a gengen yiro ma, bawo nte man jalagikun si je a ma.»⁷ Yahudiyalu x'a jaabi xo: «Sariya do be n bulu. Wo sariya la, a xa xan xa faxa, bawo a x'a fan ke Ala Dinxe ti.»⁸ Pilate xa wo me tumo men, do kafuta a la silanpa ma tugun.⁹ A nin Isa dunta a la xube xono tugun, a xo Isa pen xo: «Í bota dula joman?» Isa man jaabi fusi di a ma.¹⁰ Wo to, Pilate xo a pen xo: «Í be í dela nte le la ba? Í man a lon ba xo a sinjo be nte pen x'é bula, walla x'é gengen yiro ma?»¹¹ Isa x'a jaabi xo: «Í tun me sin fusi soto nte xan nin a tun man di í ma xa bo sanjo to. Wo le x'a tu, men xa n' dun í bulu, wo la junubo xa bun ite ta ti.»¹² Kabirin wo tumo, Pilate x'a njinin xa Isa bula. Bari Yahudiyalu fetenta xo: «Nin í x'a bula, í nte Rome mansaxe xanunte ti. Bawo moxo men b'a fan kela mansaxe ti, wo mu mansaxe jaxo le ti.»¹³ Pilate xa wo xumolu lame tumo men, a xa Isa labo keno ma. Dula do tun be je, men dugumala be dalax-aanannin kuro la. Wo dula toxo heburuxanjo to xo «Gabata». Pilate nata í sigi kiititegesigilanjo xan non.¹⁴ Wo keta tilinkunte waxato, Tanbinxansallo tobenlunjo. Pilate xo Yahudiyalu pen xo: «Alu la mansaxe fele.»¹⁵ Yahudiyalu fetenta xo: «A faxa! A faxa! A gengen yiro ma!» Pilate xo i pen xo: «Nte x'alu la mansaxe gengen yiro ma ba?» Sadaxalasibaxa kuntigolu xo: «Mansaxe xote nte ntelu kun nin Rome mansaxe nte.»¹⁶ Wo to, Pilate x'a dun i bulu, i x'a gengen yiro ma. I xa Isa muta xa taxa a ti.¹⁷ Isa fan x'a gengen yiro ta, xa na si dula do, men toxo xo «Kunxuludula». Non be kilila heburuxanjo to xo «Goligota». ¹⁸ Sorodasolu x'a gengen yiro ma non. I xa moxo fula xote dulu gengen yirolu ma je. Kilin gengenta a kininjo, do gengenta a numanjo, Isa be i temo to. ¹⁹ Pilate xa safelo do ke, x'a noto Isa gengen yiro ma, a kunnamoto. A xa men safe, wo fele xo: «Nasareti Isa, Yahudiyalu la mansaxe.»²⁰ Yahudiyalu kiika xa wo safelo xaran, bawo i xa Isa gengen yiro ma dula men, non tun xa sutu gallo la. Wo safelo tun be heburuxanjo nin latenxanjo nin gerekixanjo to. ²¹ Yahudiyalu la sadaxalasibaxa kuntigolu xo Pilate pen xo: «Í tun man xan x'a safe xo: "Yahudiyalu la mansaxe". Bari í xa xan x'a safe xo: "A xo, xo ate mu Yahudiyalu la mansaxe le ti." »²² Pilate x'e jaabi xo: «N' xa men safe, n' xa wo safe le!»²³ Sorodasolu xa Isa gengen tumo men xa ban, i x'a la faanolu ta x'e tala naani ti, xa tala kilin di sorodasolu kilin wo kilin ma. I x'a la dorokexotobulo ta, xaralisila si tun nte wo la. Faanuxono kilin doron ne tun mu, x'a ta a sanjo to, fo x'a bula a xoto la. ²⁴ Sorodasolu xo i noxo pen xo: «Alan xana a tofara, bari alan xa dokkolo ke, x'a lon, a si ke men ta ti.» Wo pa ma, Kitaabo tun xa men fo xo: «I xa n' na faanolu tala i noxo te, xa dokkolo ke n' na dorokexotobulo xanma,» wo keta. Sorodasolu xa men ke, wo le fele. ²⁵ Isa na nin a na badinmuso, anin Kulopasi musu Mariyama, nin Magidala Mariyama tunnu

be lonin Isa gengen yiro senbo to. ²⁶ Isa x'a na je, anin a xa xarandinjo je lonin a na senbo to, a xa wo men xanu. A xo a na pen xo: «N' na, í dinjo fele.»²⁷ Wo xo, a xo wo xarandinjo du pen xo: «Í na fele.» Kabirin wo waxato, wo xarandinjo taxata Isa na ti a bata. ²⁸ Wo xo, Isa x'a lon xo kuwo bee keta xa ban tumo men, a xo: «Mindoxo be n' na.» Wo pa ma, Kitaabo tun xa men fo, wo keta. ²⁹ Miranjo do tun be je, wo be fanin binegaro la. Sorodasolu xa fuulanjo bula wo binegaro to, x'a siti hisope yiribulo kunjo la, x'a lasi Isa da ma. ³⁰ Isa xa binegaro min tumo men, a xo: «Kuwo bee dafata.» Wo xo, a x'a kunjo lajigi, a niyo bota. ³¹ Tanbinxansallo tobenlunjo le tun mu. Yahudiyalu la namoxolu tunnu nt'a fe furelu xa tu gengennin yiro xan tofopolunjo, bawo wo tofopolunjo tun mu lunba le ti. Wo la, i x'a njinin Pilate la, xo moxo gengenninjo sinxalolu xa xati, nin i si sa tariya x'e fure lajigi. ³² Sorodasolu nata xa si Isa gengen xoxo folo ma, xa wo sinxalolu xati, i sita do du ma, xa wo talu xati. ³³ I sininma Isa ma, i x'a je xo a sata xa ban. Wo to, i man a sinxalolu xati. ³⁴ Sorodaso do x'a soxo a baraso xan a la tanbo la. Wo no bee to, jelo nin jiyo bota. ³⁵ Moxo men xa nin ku innu laxali, wo fan ne x'a je a pa la. A xa men je x'a seedeya, wo mu tonpa le ti. A fan x'a lon xo a be tonpa le fola. A b'a fola le walasa alu dulu xa lannaya ke. ³⁶ Wo pa ma, Kitaabo tun xa nin xumaxan in men fo xo: «A xulolu si me xati», wo keta. ³⁷ Kitaabo dula xote b'a fola xo: «I xa men soxo, i pa si wo je.»³⁸ Wo xo, Arimate Yusufu x'a njinin Pilate la, xo a xa Isa fure di a ma. Yusufu tun mu Isa la xarandinjo do le ti. Bari Yahudiyalu la namoxolu jasilanpa bulu, a xa wo dugu. Pilate sonta. Yusufu nata, xa Isa fure ta. ³⁹ Nikodeme men tun taxata Isa bata suwo to, wo du nata a nin mire nin alowesi tulu sumadiman jaxamininjo tan saba kilo noxon ti. ⁴⁰ Wo moxo fulo xa Isa fure ta, x'a kasanke, xa wo tulu sumadimanjo ke a ma, í xo Yahudiyalu la fureto-benpa be kela pa men. ⁴¹ Isa gengenta dula men, yirifuuto do tun be non, xaburu kuto tun be non, moxo bada man nasi non folo. ⁴² I xa Isa lala non, bawo Yahudiyalu la tofopolunjo tobenlunjo le tun mu, anin du, wo xaburo tun xa sutu je la.

20 Alahado, saxo ma junna, jannin keneya xa bo, Magidala Mariyama taxata xaburo da la. A x'a je xo kuro men tun be xaburo dataxunnin, wo bota je. ² A x'é bori xa taxa Simon Piyere bata, anin Isa tun xa xarandinjo men xanu. A xo wolu pen xo: «I xa Marigi fure labo xaburo xono. N man a lon i x'a bula dula men.»³ Wo to, Piyere nin wo xarandinjo bota, xa taxa xaburuda la. ⁴ I fulu tun b'e borila i noxo fe taxanin. Bari xarandin do x'é bori xa Piyere dan. Wo folo sita xaburuda la. ⁵ A sininma, a x'é majigi xa xaburo xono mafele, a xa kasanke je dugo ma, bari a man dun xaburo xono. ⁶ Wo xo, Simon Piyere du sita, ate dunta xaburo xono, xa kasanke je bulanin dugo ma, ⁷ anin

faano, men tun keta Isa kunjo la. Wo kunnafaano nin kasanke tun nte dula kilin. Bari wo tun be xutunin xa bula a dan na. ⁸Wo xo le mu, xarandinjo men tun folo sita, wo du dunta xaburo xono. A ja xa wo fenjolu je, a xa lannaya ke. ⁹Kitaabo xa men yita, xo Isa xa xan xa kuni xa bo furelu to, i tunnu man wo faamu folo. ¹⁰Wo xo, xarandinjolu x'e koppa xa taxa i bata. ¹¹Mariyama ken tun be lonin keno ma, xaburo senbo to. A tun be xasila. X'a tu xaso la, a x'e majigi xa xaburo xono mafele. ¹²A xa meleke fula je, faanu xoyo b'e ma. Wolu tunnu be siginin Isa fure ladula, do b'a kunmafanno, do b'a sinmafanno. ¹³Melekiyolu xo Mariyama jen xo: «Muso, í be mun xasila?» A x'e jaabi xo: «Bawo i xa n Marigi fure ta. N man a lon i x'a bula dula men.» ¹⁴A xa wo fo tumo men, a x'e yeleva, a xa Isa je lonin. Bari a tun man a lon xo Isa le mu. ¹⁵Isa xo a jen xo: «Í be mun xasila? Í be jon njinna?» A tun be Mariyama jen xo yirifuuto xono baarabaxo le mu. A xo: «Jatigixe, nin í le x'a ta, í x'a bula dula men, wo fo n jen, n xa taxa a ta.» ¹⁶Isa xo a jen xo: «Mariyama!» Mariyama x'e yeleva a mafan x'a fo a jen heburuxanno to xo: «Rabuni!» Wo xoto xo: «Karanmoxo.» ¹⁷Isa xo a jen xo: «N bula, bawo n man yeleva xa taxa n Fa bata folo. Taxa n badinjo la bata í x'a fo i jen xo: N be yeleva xa taxa n Fa nin alu Fa bata, n na Ala nin alu la Ala bata.» ¹⁸Magidala Mariyama taxata a fo xarandinjolu jen, xo a xa Marigi je. Isa xa xumo mennu fo a jen, a xa wolu laxali i jen. ¹⁹Wo lunjo, alahado wura la, xarandinjolu kamarininjo tun be bunjo do xono, wolu xa bundalu soxo i da la, bawo i tunnu be silanin Yahudiyalu la namoxolu ja. Isa nata x'e lo i temo to, x'a fo i jen xo: «Heero xa ke alu fe.» ²⁰A xa wo fo tumo men, a x'a bulolu nin a baraso yita i la. Xarandinjolu xa Marigi je tumo men, i nanabeteta. ²¹Isa xo i jen tugun xo: «Heero xa ke alu fe! Fa Ala xa n ki ja men, nte du be atelu kila ten.» ²²Wo xumolu xo, a x'e fuute, x'a fo i jen xo: «Alu Ni Senunjo muta. ²³Alu je moxo wo moxo la junubolu yaafa, yaafa si ke wo ma. Alu man moxo wo moxo la junubolu yaafa, wo la junubolu me yaafa.» ²⁴Isa nata a la xarandinjolu ma tumo men, wo x'a tara a la xarandinjolu to do, xo Tomasi, men kilita xo Fune, wo tun nte je wo tumo. ²⁵Xarandin tolu xo a jen xo: «Ntelu xa Marigi je.» A xo i jen xo: «Nin n man pontidalu je a bulutego to, xa n buluxonondinjo dun wo pontidalu wuwo la, xa n bulo la a barasa soxoninjo ma, n me la a la abada.» ²⁶Wo xo tili sagi, Isa la xarandinjolu tunnu be bunjo xono tugun. Tomasi du tun be je. Da tunnu be soxonin. Isa nata x'e lo i temo to. A xo i jen xo: «Heero xa ke alu fe.» ²⁷Wo keninma, a xo Tomasi jen xo: «Í buluxonondinjo dun jan, n bulutegolu mafele, í bulo tosaba x'a la n baraso ma. Fata lannayabaliya ma, xa lannaya ke.» ²⁸Tomasi x'a jaabi xo: «N Marigi nin n na Ala.» ²⁹Isa xo a jen xo: «Bawo í xa n je, í xa lannaya ke! Mennu be lannaya kela x'a tara i ja man la n xan,

heero be wolu jen!» ³⁰Isa xa taagumanseede kiika xotelu ke a la xarandinjolu jala, mennu man safe jin bukke in xono. ³¹Ninnu safeta le, walasa alu xa la a la xo Isa le mu Kirisita ti, Ala Dinxe; anin walasa alu xa nilamaya soto a toxo barako to, wo lannaya xanma.

21 Wo xo, Isa x'e yita a la xarandinjolu la Tiberiyade dalaba da la. A x'e yita ja men ma, wo fele: ²Simon Piyere nin Tomasi, men kilita xo Fune, nin Natanayeli, men bota Galile maro gallo do to xo Kana, nin Sebede dixelu anin Isa la xarandin fula xote, wolu tunnu be i poxo fe. ³Simon Piyere xo tolu jen xo: «N be taxala negemutadula.» I xo a jen xo: «N dula be taxala.» Wo to, i wulita xa taxa dun xulunjo xono. Bari wo lunjo suwo to, i man fusi muta. ⁴Saxo yeleninma, i xa Isa je lonin dalaba da la. Bari xarandinjo tunnu man a lon xo Isa le mu. ⁵Isa xo i jen xo: «N na dandinjolu, alu man nege soto ba?» I x'a jaabi xo: «Ayi, n man fen soto.» ⁶A xo i jen xo: «Alu jala fili xulunjo kininbulo xoto, alu si do soto.» I xa jala fili. Nego siyakujaxo bulu, i korita jala sabala. ⁷Isa tun xa xarandinjo men xanu, wo xo Piyere jen xo: «Marigi le mu!» Kabirin Simon Piyere x'a me doron xo Marigi le mu, a x'a la doroko dun, bawo a xannaxulunjo le tun mu, x'e fili jiyo to. ⁸Xarandin tolu nin xulunjo nata. I tunnu be jala ma, x'a saba, a be fanin nego la. I tunnu nin danxanno te mu nonxon keme fula joxon ne ti. ⁹I sita danxanno la tumo men, i xa takeso je, nego be lanin a to, anin buuro. ¹⁰Isa xo i jen xo: «Alu birin nego mennu mutala, alu na dolu ti.» ¹¹Simon Piyere dunta xulunjo xono, xa jala nin nego saba, x'a lasi tinto la. Jala faninjo tun be nege belebebeba keme nin tan luulu nin saba la. Bari haali nege innu nin i la siya, jala man fara. ¹²Isa xo i jen xo: «Alu na domolo ke.» Xarandin si man fatiya x'a njinxo xo: «Íte mu jon til!» Bawo i x'a lon xo Marigi le mu. ¹³Isa x'e sodun i la, xa buuro ta, x'a di i ma. A xa nego du di i ma. ¹⁴Nin keta Isa yita kunja sabananno ti a la xarandinjolu la, a kuniyo xo xa bo furelu to. ¹⁵Domolo keninma, Isa xo Simon Piyere jen xo: «Yaya dinxe Simon, í be nte xanula ba xa tanbi pinnu xan?» A xo: «Íyo Marigi, í x'a lon xo nte b'e xanula.» Isa xo a jen xo: «N na saaxandinjolu negaani.» ¹⁶Isa xo a jen sinja fulananno to xo: «Yaya dinxe Simon, í be nte xanula ba?» Piyere x'a jaabi xo: «Íyo Marigi, í x'a lon xo n b'e xanula.» Isa xo a jen xo: «N na saaxolu korosi.» ¹⁷Isa xo a jen sinja sabananno to xo: «Yaya dinxe Simon, í be nte xanula ba?» Piyere juso xasita bawo Isa x'a njinxo í xo sinja saba nin a b'a xanula. A xo: «Marigi, í xa fen bee lon. Í x'a lon xo nte b'e xanula.» Isa xo a jen xo: «N na saaxolu negaani. ¹⁸Tonja tonja, n b'a fola í jen xo, x'e xamarindinma tu, í fan tun si í te siti, xa taxa í diyanpedula. Bari nin í xotota, í s'í bulolu xotota, do xote s'í te siti, xa taxa í ti dula, dula men man di í jen.» ¹⁹Piyere be nala sala ja men, xa bunja la Ala toxo xan, Isa xa wo le yita wo

xumolu la. Wo xo, a xo Piyere nen xo: «A lo ń nofe.»
²⁰ Piyere x'é yelema, Isa xa xarandinjo men xanu, a xa wo nato je i nofe. Wo xarandinjo le tun x'é jenge Isa mafan, x'e tu siimandomo la, x'a njinxa xo: «Marigi, jon be nala í dunna bulo to?»²¹ Piyere xa wo xarandinjo je tumo men, a xo: «Marigi, mun si ke jin dun nen?»²² Isa xo a nen xo: «Nin a xa di ń nen, a nilama si tu fo nte xa na tumo men, ite la mun be wo to? Ite x'a lo ń nofe doron.»²³ Wo xumo jenjenta badin lan-

nayabaxolu to, xo wo xarandinjo nte sala. Tonja la, Isa tun man a fo a nen xo a nte sala. Bari a xo le: «Nin a xa di ń nen, a nilama si tu fo nte xa na tumo men. Ite la mun be wo to?»²⁴ Wo xarandinjo le xa wo kuwolu seedeya x'e safe. N x'a lon, xo a la seedeya mu tonja le ti.²⁵ Isa xa ku kiika xotelu ke, nin wo tunnu bee safeta, ń na miiro to, xo wo bukkolu bee tun me kun no duniya xono.

KEWALOLU

1 **1** Ní badinxé Tewofili, Isa xa kuwo mennu ke, anin a xa laxaranno mennu ke, kabirin a la kuwolu damuto, ² fo a yeleta lunjo men xa taxa sanjo to, n tun xa wolu na fo n na bukke folo xono. Jannin a xa yeleté xa taxa sanjo to, a la kiladin sugandininjo la xan xa baaro mennu ke, a x'e laxaran wolu la, Ni Senunjo barako to. ³ Isa la tooro nin a la saya xofe, a nil-ama x'é yita a la kiladinjo la. A x'a yita i la taagu-manseede xoyi kiika la, xo a b'é nila. Tan naani tili xono, a x'é yita i la, x'e xaran Ala la Mansaya kuwolu ma. ⁴ Lun do, x'e tu domolo la, a x'a fo x'a xoleya i ma xo: «Alu xana i soobo Yerusaleme la, bari n Fa Ala xa men lahido ta, n xumata alu nen nilifenjo men na kuwo la, alu si sigi xa wo laxono. ⁵ Yaya xa batisele ke jiyo la, bari atelu kennu, tili dantalu bi xo, alu si batise Ni Senunjo la.» ⁶ Awa xa kiladinjo kamarininjo tu Isa ma, i x'a njinxa xo: «Marigi, wo waxato le mu ba, nin i be Banisirayila mansaya sigila tugun?» ⁷ A x'e jaabi xo: «Ní Fa Ala xa waxato nin tumo mennu latege a fan na mansaya xono, atelu man xan xa wolu lon. ⁸ Bari nte b'a fola alu nen xo, nin Ni Senunjo jigita alu xan tumo men, alu si barako soto. Alu si ke nte seedolu ti Yerusaleme, Yude maro bee xono, anin Samari jamano xono, fo xa taxa a bula duguxulo danjo la.» ⁹ Wo xumolu foninjo xo, Isa yeleta xa taxa sanjo to, x'e tu a mafelenin. Wo to, xabo x'a sanko i ma. ¹⁰ Kiladinjo la tun be sanjo to, Isa yeleta jan men. Wo na in, xe faanuxoyitigi fula nata i ma. ¹¹ Wolu xo i nen xo: «Galilengolu, mun na alu b'e lola xa sanxulo mafele? Isa men bota alu to xa yeleté sanjo to, alu x'a taxato je na men de, alu si a nato du je wo na in.» ¹² Wo to, i x'e koppa xa taxa Yerusaleme, xa bo Oliwe kuro dula. Wo kuro nin Yerusaleme man jan; kilometere kilin jaate le mu. ¹³ I sininma Yerusaleme, i dalita xa ke sankansuwo men xono, i dunta non. I moxo men tunnu mu, wolu fele: Piyere, Yaya, Yaxuba, Andere, Filipe, Tomasi, Baratelemi, Macu, Alife dinxe Yaxuba, Seloti Simon anin Yaxuba dinxe Yudasi. ¹⁴ I bee xanbenninjo tun s'i noxo tara tuma wo tuma, xa Ala matara, i nin muso dolu, i nin Isa na Mariyama, anin Isa badinxelu. ¹⁵ Wo lunjo la, lannayabaxolu moxo keme nin muxan noxon tun be kamarinin. Piyere wulita x'é lo i temo to, x'a fo i nen xo: ¹⁶ «Ní badinjo la, Ni Senunjo tun xa men fo Kitaabo to, waajibo le tun mu wo xa ke. Ni Senunjo tun xumata mansaxe Dawuda da la, xa Yudasi la kuwo fo,

jannin a xa si. Ate le keta Isa mutabaxolu palo ti. ¹⁷ Yudasasi tun mu n do le ti, a x'a nidula soto n na baaro to.

¹⁸ A xa fuuto do san a la ku jaxo sara to. Wo xo, a lota a kunjo da, a xono farata, x'a nuxolu bee sari.

¹⁹ Yerusaleme moxolu bee xa wo lon. I xa wo fuuto toxola i fannu la xanjo to xo "Hakelidama". Wo xoto xo: "Jelu fuuto". ²⁰ A be safenin Jaburu kitaabo xono xo: "A la luwo xa ke tunbunjo ti. Moxo si xana sigi je tugun." Anin xo: "Moxo xote xa bula a no to wo baaro to."

²¹ Wo le x'a tu, moxo do xa xan xa kafu ntelu ma, men keta Marigi Isa kuniyo seedo ti. A xa xan xa ke moxo ti, men xa n nin Marigi Isa dandan tumo bee, x'a tu n tema, kabirin Yaya x'a batise lunjo men, fo a bota n bata lunjo men xa taxa sanjo to.» ²³ Wo to, lannayabaxolu xa xe fula sugandi: Yusufu men kilita xo Barasabasi walla Yusitusi, a nin Macasi. ²⁴ Wo xo, jama xa nin tarali in ke xo: «Marigi, ite men xa sondonmekunjo bee lon, ite fan xa men sugandi jinnu fulo to, wo yita n na, ²⁵ walasa a xa ke kiladinjo ti Yudasasi no to, wo men bota kiladinjo la, xa taxa dula, a nin dula men xa xan.» ²⁶ Wo to, i xa dokkolo ke, dokkolo xa Macasi yita. Wo woman in kafuta kiladin tan nin kilinjo ma.

2 **2** Pantekoti sallo lunjo sininma, lannayabaxolu bee tun be kamarinin dula kilin. ² Nakun kilin, sonxo do bota sanjo to. Wo sonxo be i xo fopoba sonxoxanjo. Lannayabaxolu sigininjo be bunjo men xono, sonxo xa wo bee suulu. ³ I xa fen dolu tamanama je, mennu be i xo nennjo la. I talatalata. Do jigita lannayabaxolu bee kilin wo kilin xan. ⁴ Ni Senunjo xa i bee jusukunjo lafa. I keta a ma xa xan xotelu fo, Ni Senunjo la yanmaro xono. ⁵ Wo x'a tara Yahudiyalu Alapasilanjabaxolu kiika tunnu be siginin Yerusaleme, mennu bota duniya siyalu bee to xa na. ⁶ Wo mankanba bota tumo men, jama kamarita. Bee xonotofilita, bawo bee xa lannayabaxolu xanme xumala i fannu la xanjo la to. ⁷ I dabaro banta. I xonotofilininnjo x'e noxo njinxa xo: «Nin mennu je xumala, i bee nte Galilengolu ti ba? ⁸ Alan dunnu kilin wo kilin be n bata xanjo la mela i da na di? ⁹ Paratengolu, nin Medengolu nin Elamitingolu anin mennu be siginin Mesopotami nin Yude nin Kapadosi anin Pon nin mennu be Asimaro to, ¹⁰ nin Firiji nin Panfili nin Misira nin Libi maro men be Sireni senbo to anin mennu nata xa bo Rome, ¹¹ Yahudiyalu anin mennu x'e ke Yahudiyalu ti,

Keretingolu nin Arabolu, n bee tulo x'e me Ala la kubalu laxalila n na xanḡolu to.»¹² I bee dabaro banta. I hakilo naxamininḡo tuta i nḡoxo nḡininxala xo: «Nin xo-to mu mun ti?»¹³ Dolu jeleta lannayabaxolu ma; wolu xo: «I be fanin dolo dimanḡo le la.»¹⁴ Wo to, Piyere nin kiladin tan nin kilin tolu wulita x'e lo. A x'a xanḡo xoto-ta x'a fo jama nen xo: «Alu Yahudiyalu anin alu moxo fen wo fen be siginin Yerusaleme, alu i tulo lo n na xumolu la, xa nin faamu.»¹⁵ Alu miiro la xo nin moxo innu be sunin ne; i sunin nte, bawo tilo wololafa le mu folo.¹⁶ Bari kila Yoweli xa men fo, wo le dafata saasa: ¹⁷«Ala xo: Labanḡo lunḡolu, nte si n Niyo lajigi hadamad-inḡolu bee xan Alu dinxelu nin alu dinmusolu si kilaya ke. Fenḡo dolu si yita alu la xamarindinḡolu la. Alu la xexotobalu si siibolu ke.»¹⁸ Wo lunḡolu, sikka nt'a to, nte si n Niyo lajigi n na jonxelu nin n na jonmusolu xan xa siya, i si ke kilalu ti.¹⁹ N si kawakuwolu yita sanḡo to, xa taagumanseadolu ke duguxulo xan: Jelo nin ta nin xaba siisima.²⁰ Tilo si dibi, xaro si wule i xo jelo, jannin Marigi la lunḡo be nala, wo lunba nooroma.²¹ Wo tumo la, moxo wo moxo je Marigi toxo kili, wo si kisi.»²² «Banisirayila moxolu, alu i tulo lo nin xuma innu la. Nasareti Isa keta moxo ti, Ala xa men na kiladinḡa seedeaya, kawaku sifa nin kubalu nin taagumanseadolu la, alu to. Alu fannu xa wo lon.»²³ Nin xe in dunta alu bulu x'a la a xan, Ala fan tun xa wo latege kabirin waxati jan. Alu xa Alalonbalolu bula a gengen-na yiro ma, x'a faxesa.²⁴ Bari Ala x'a lakuni x'a bo saya tooro bulu, bawo sin tun nte saya nen x'a lamara.²⁵ Mansaxe Dawuda tun xumata ate la kuwo to xo: «N nḡa be Marigi la n nḡa xoto waxato bee, a be n senbo to, walasa n xana jarajara.»²⁶ Wo le x'a tu, n jusukunḡo be fanin naxalo la, n be xumolu tala nḡa to; haali nte sa xofe, nte gigo b'a xan xo nte balasubo si tu heero to,²⁷ bawo, Marigi, i me i xodi nte la lahara; i me son i la moxo senunḡo xa toli xaburo xono.²⁸ I xa nilamaya banbalo silolu yita n na, i si n na naxali bete, bawo i be nte senbo to.»²⁹ «N badinḡolu, alu a tu n xa nin ku in pereperelatege alu nen n mamaxe Dawuda la kuwo to. A sata, xa lasi. A xaburo be alan bata haalibi.»³⁰ Bari Dawuda fan tun mu kila le ti, a x'a lon xo Ala x'e xali a nen xo a si a bonsonḡo do ke mansaxe ti a no to.³¹ Men tun xa xan xa ke, Dawuda xa wo je wo lunḡo nḡa. A xo tumo men xo: «Xodiyo man ke a la lahara, a balasubo man toli xaburo xono.» A xa Kirisita la kuniyo le fo wo xumolu xono.³² N je men na xumo ma x'a fo ten, nin wo mu Isa ti, Ala x'a lakuni xa bo furelu to. N bee mu wo kuwo seedo ti.³³ Wo le x'a tu a xototata tumo men, xa taxa Ala kininḡo xoto, a xa Ni Senunḡo soto, a Fa tun xa men lahido ta, a xa wo lajigi n xan. Alu nḡa be wo le la, alu tulo be wo le la.³⁴ Dawuda fan man ye le xa taxa sanḡo to, bari a x'a fo xo: «Marigi xo nte Marigi nen xo: I sigi nte kininḡo xoto,³⁵ fo nte x'e jaxolu mano, xa na i ti i sanḡo xoto.»³⁶ Wo le x'a tu, Ban-

isirayila bonsonḡo bee xa xan x'a lon tigi tigi, xo alu xa nin Isa in men gengen yiro ma, x'a faxesa, Ala xa ate le ke Marigi nin Kirisita ti.»³⁷ Jama xa wo xumolu lame tumo men, xuma innu dunbeteta i la. I woman innu xo Piyere nin kiladin tolu nen xo: «N badinḡolu, ntelu xa xan xa mun ke?»³⁸ Piyere xo: «Alu tuubi, alu kilin wo kilin xa batise Isa Kirisita toxo la, nin alu la junubolu si yaafa alu ma. Wo to, alu si Ni Senunḡo soto.»³⁹ Bawo lahido tata alu nin alu dinḡolu bee le nen, anin dulajan moxolu, anin Marigi n na Ala be nala fen wo fen killila.»⁴⁰ Piyere xa xuma kiika xotelu fo, men s'i lason, x'e jusudun. A tun b'a fola i nen xo: «Alu i soobo nin tili in moxo jaxolu la.»⁴¹ Mennu sonta a la xumo ma, wolu batiseta. Moxo wulu saba nḡoxon kafuta lannayabaxolu la jama ma wo lunḡo.⁴² Tumo bee, i tunnu si taxa kiladinḡolu la xaranḡolu la, x'e lame, xa tu lannayabaxolu la kafo xono, xa buuro tokutun i nḡoxo te, xa Ala matara i nḡoxo fe.⁴³ Alapasilanḡa tun be i bee la, bawo kiladinḡolu tunnu be kawakuwolu nin taagumanseadolu kiika kela.⁴⁴ Lannayabaxolu bee tun b'e nḡoxo fe. I tunnu b'e bulufenḡolu bee talaxan i nḡoxo te.⁴⁵ I tunnu b'e la duguxulolu nin i bulufenḡolu fiirila, x'e tala i nḡoxo te, x'a ben bee maakuwo ma.⁴⁶ I tunnu xan-beninḡo si taxa Alabatusuba xono lun wo lun, xa domolo ke i nḡoxo fe i la luwolu xono, naxalo nin fanmajigo xono.⁴⁷ I tunnu si tu xa Ala tantu. I ku diyata moxo bee nen. Marigi tun si moxo dolu kisi lun wo lun, x'e kafu lannayabaxolu la jama ma.

3 Lun do wura la, Amatara waxato, Piyere nin Yaya tunnu be taxanin i nḡoxo la Alabatusuba xono.² Moxolu nata xe do ti. Wo namatama le wuluta. I tunnu b'a tala lun wo lun, x'a bula Alabatusuba da do la, men toxo xo Da Beto, nin a si sadaxo tara non dunbaxolu la.³ Wo xe xa Piyere nin Yaya dunto je Alabatusuba xono tumo men, a xa sadaxo tara i la.⁴ Piyere nin Yaya x'e nalu lo a to. Piyere xo a nen xo: «N mafele!»⁵ Xe xa i mafele bete, bawo a tun nen xo i je a so fen do le la.⁶ Wo to, Piyere xo a nen xo: «Sanu nte n bulu, xalisi nte n bulu, bari men be n bulu, n si wo di i ma. Isa Kirisita, Nasaretingo toxo barako to, wuli i x'e taxama.»⁷ Piyere x'a muta a kininbulo ma, x'a lawuli. Wo no bee to, a sinḡolu tofirinta.⁸ A x'e ba, xa wuli x'e taxama. A nin i dunta Alabatusuba xono i nḡoxo la. A tun b'a ma x'e taxama taxama, x'e ba ba, xa Ala tantu.⁹ Moxo bee x'a taxamato je, anin x'a je Ala tantula.¹⁰ Moxolu x'a lon xo xe men tun be siginin sadaxatara la Alabatusuba Da Beto la, xo ate le mu. Kuwo men keta xe nen, wo xa i bee dabaro ban x'e xonotolafilili.¹¹ Xe ken korita a tala Piyere nin Yaya nofe. Jama bee dabaro banta, x'e bori taxanin i ma Alabatusuba biire do xoto, men kilita xo «Mansaxe Sulemani la biire.»¹² Piyere xa wo je tumo men, a xumata jama nen ten xo: «Banisirayila dinḡolu, mun na nin kendeayali in be alu dabaro bannin? Mun na alu be ntelu mafelela i xo

nin ntelu xa jin xe in nataxama n fannu barako le la, walla n na Alapasilanŋa le xanma? ¹³ Burehima la Ala, Nsiyaxa la Ala, Yaxuba la Ala, anin n benbalu la Ala le x'a la baaradin Isa bunŋa. Atelu kennu x'a dun fankamalu bulu, xo i x'a faxa, x'e ban a to Pilate pala, wo men tun x'a latege xo a xa bula. ¹⁴ Alu x'e ban moxo Senunŋo nin moxo Tilinninŋo to, x'a ŋinin moxofaxala le xa bula alu jen. ¹⁵ Alu xa nilamaya banbalo tigo faxa. Bari Ala x'a lakuni xa bo furelu to. Ntelu mu wo seedolu ti. ¹⁶ Ntelu lata Isa la. Wo xanma, a toxo le barako x'a tu, nin jin xe in kendejata; alu ŋa je xe in men na, nin alu x'a lon. Xa lannaya ke Isa la, wo le xa kendejata muume di a ma, í xo alu ŋa b'a la ŋa men. ¹⁷ «Bari ŋ badinŋolu, ŋ x'a lon xo lonbaliya le x'alu nin alu la kuntigolu bula ku kela Isa la. ¹⁸ Bari wo ŋa ma, Ala tun xa men fo a la kilalu bee da la kabirin folofolo, wo dafata. A tun x'a fo xo a la Kirisita tun xa xan xa tooro. ¹⁹ Wo to, alu tuubi, x'e ŋadi Ala la, walasa a x'alu la junubolu bo je. ²⁰ Nin wo keta, Marigi si laxafiya di alu ma, xa Isa ki alu ma, nin wo mu Kirisita ti. Ala xa ate le sugandi alu xanma, kabirin waxati jan. ²¹ Bari Isa Kirisita xa xan xa tu sanŋo to folo, fo fenŋo bee xa tokutaya, í xo Ala tun x'a fo a la kila senunŋolu da la ŋa men, kabirin waxati jan. ²² A folo, kila Musa x'a fo xo: "Marigi, alu la Ala, si nte ŋoxon kila do ki alu ma, men si bo alu badinŋolu to. Wo je fen fen fo alu jen, alu wo lame. ²³ Moxo wo moxo man wo kila lame, wo tigo si halagi xa bo Ala la jama xono." ²⁴ Kila mennu xumata, x'a damuta kila Samuyeli ma, wolu dulu bee kilin kilin xumata, xa bi kuwolu yita. ²⁵ Ala xa kuwo mennu bee yita kilalu la, wolu bee fota alelu jen. Ala xa Kafuxanŋo men sigi ate nin alu mamaxelu te, alu nidula be wo to, bawo Ala xo Burehima jen xo: "Duguxulo dinbayalu bee si ŋ na duwawo soto í bonsonŋo fe." ²⁶ Ala x'a la baaradinŋo lawuli alelu xanma folo, xa duwawo lasi alu ma, x'alu bee kilin kilin bula í xodila í la kewale jaxolu la.»

4 Xa Piyere nin Yaya tu wo xumo la jama jen, sadaxalasibaxolu, nin Alabatusuba korosibaxolu la kuntigo, nin Sadusen diino moxolu nata i ma. ² Wolu tunnu diminnata bawo wo kiladinŋolu tunnu be jama laxaranna, xa Isa kuniyo fo i jen, x'a yita wo ŋa ma, xo furelu si kuni. ³ I xa kiladinŋolu muta x'e bula kaso la, fo wo lun do, bawo suwo tun kuta xa ban. ⁴ Wo bee nin a ta, mennu xa kiladinŋolu la waajulo lame, wolu kiika xa lannaya ke. Lannayabaxolu bee kafuninŋo tun si taxa wulu luulu xe ba ŋoxon ma. ⁵ Wo lun do, Yahudiyalu la kuntigolu nin moxobalu nin sariya karanmoxolu kamarita Yerusaleme. ⁶ Sadaxalasibaxa kuntigiba Ane du tun be je, anin Kayife nin Yaya, nin Aleksandere anin sadaxalasibaxa kuntigiba badinŋolu bee. ⁷ I nata Piyere nin Yaya ti i ŋa xoto, x'e ŋininxa xo: «Alu xa nin kendejali in ke jon barako to, walla jon toxo la?» ⁸ Wo to, xa Piyere tu fanin Ni Senunŋo la, a xo

i jen xo: «Banisirayila pamoxolu nin a moxobalu, ⁹ n kilita bi, bawo n xa ku beto do ke moxo jonbininŋo jen. N ŋininxata wo xe kendejata la. ¹⁰ Alu bee, anin Banisirayila bee xa xan x'a lon xo jin xe in kendejaninŋo fele lonin alu ŋa xoto Isa Kirisita Nasaretingo toxo le barako to. Alu xa ate le gengen yiro ma, nin Ala x'a lakuni. ¹¹ Kitaabo x'a fo Isa le la kuwo to xo: "Atelu kurubunlolalu x'e ban kuro men to, wo keta bunŋo jusigikuro ti." ¹² Kisilo me soto do xote si barako to nin ate nte, bawo duniya muume to, Ala man kisibaxa xote di hadamadinŋolu ma ate xo.» ¹³ Piyere nin Yaya man sila, xa yilanyilan i la xumolu xono. Wo xa Yahudiyalu la Kiititegekafo dabaro ban, bawo i x'a lon xo wolu tunnu mu moxo xaranbali gansanŋo lelu ti. I x'a lon xo Isa nofemoxo le du tunnu mu. ¹⁴ I xa wo xe kendejaninŋo je lonin Piyere nin Yaya senbo to tumo men, i man xuma soto x'e jaabi. ¹⁵ Wo to, i xa yanmaro di xo Piyere nin Yaya xa labo kiititegedula. Wo xo, i x'a damuta x'e ŋoxo ŋininxa ¹⁶ xo: «Alan si mun ke jin xe innu la? Bawo sikka nt'a to, Yerusaleme moxolu bee x'a lon, xo i xa jin kawaku in ke. Alan me soosoli ke no wo kuwo to. ¹⁷ Bari, walasa moxo bee xana wo xibaro me xa taxa a fe, alan xa kankero la i jen, xo i xana xuma moxo si jen, jin toxo in na tugun.» ¹⁸ Wo tumo la, i xa Piyere nin Yaya kili xa taxa i ti kiititegedula tugun, x'a xoleya i ma xo i xana xuma, walla xa moxo laxaran Isa toxo la tugun. ¹⁹ Bari Piyere nin Yaya x'e jaabi xo: «Alu fannu x'a mafele nin don ne be tilinnin Ala ŋa xoto xa atelu sago ke, xa Ala ta tu je. ²⁰ Ntelu kennu xa kuwo mennu je, x'e me, n me tu no nin n man wolu fo.»

²¹ Yahudiyalu la Kiititegekafo xa kankero la Piyere nin Yaya jen tugun, wo xo, x'e bula i xa taxa. I man ŋa si soto, xa Piyere nin Yaya ŋangi, bawo men keta, jama bee tun be Ala tantula wo xanma. ²² Kawakuwo xa jin xe in men kendejata, a siyo tun tanbita tan naani san na. ²³ Piyere nin Yaya bulaninŋo, i taxata lannayabaxa tolu bata. Sadaxalasibaxa kuntigolu nin moxobalu xa fen fen fo, i xa wolu bee laxali i jen. ²⁴ Lannayabaxolu xa wo me tumo men, i xanbenninŋo xa Ala matara ten xo: «Marigi, ite le xa sanxulo nin duguxulo nin xooxojiyo nin i to fenŋolu bee da. ²⁵ Ite le xa n mamaxe, í la baaradin Dawuda bula a fola Ni Senunŋo barako to xo: "Mun xa siyalu ladimin? Mun na i xa janfo siti fu?"

²⁶ Duguxulo mansaxelu x'e toben kelo xanma, kuntigolu benta Marigi Ala nin a la Kirisita xanma, a xa men sugandi." ²⁷ Bawo a man dugu xo mansaxe Herode nin Ponsi Pilate nin Banisirayila moxolu nin siya tolu benta jin gallu in to jan, í la baaradin senumanŋo, Isa xanma, nin wo mu í la Sugandininŋo ti. ²⁸ Wo ŋa ma, ite Ala xa men natege, kabirin waxati jan, í la sintigiya nin í sago la, jin moxo innu xa wo ke. ²⁹ Saasa, Marigi, i xa kankero men la, wo jaate. A ke xo, ntelu mennu mu í la jonŋolu ti, n xa í la xumo fo x'a tara n man sila. ³⁰ Í la sintigiya di n ma, walasa n xa

jangarutolu kendeya, xa taagumanseedolu nin kawakuwolu ke, í la baaradin senumanjo, Isa toxo la.»³¹ I x'e soto Alamatara la tumo men, i kamarininjo be dula men, non jarajarata. I bee fata Ni Senunjo la, xa Ala la xumo fo, x'a tara i man sila.³² Lannayabaxolu jama bee tun be xan kilin ma, njanne nin miiro la. Moxo si kilin tun nte a fola i to xo a bulufenjolu mu a kilin ne ta ti. I tunnu xa xan fenjo bee to.³³ Kiladinjolu tunnu be Marigi Isa la kuniyo seedeyala sintigiyaba to. Ala la neemaba tun be lanin i bee xan.³⁴ Bulutoxulun si tun nte i to, bawo duguxulolu nin luwolu be mennu kun, wolu tunnu be wolu fiirila, xa na i sonjo ti,³⁵ x'a dun kiladinjolu bulu; walasa x'a tala tala, x'a ben bee la maakuwo ma.³⁶ Awa, xe do keta je, a toxo xo Yusufu. Kiladinjolu x'a toxola xo Baranabasi, wo xoto xo «tonbennibaxo». Lewikundango do le mu. A be bola Sipere.³⁷ Duguxulo do tun be wo kun, a x'a fiiri xa na a xaaliso ti, x'a bula kiladinjolu la bulo ma.

5 Awa, xe do du tun be je, a toxo xo Ananiyasi. A nin a musu Safira xa duguxulo do fiiri.² A xa do bo wo sonjo la. A musu tun be wo xalama. Wo xo, a taxata a to dun kiladinjolu bulu.³ Piyere xo a pen xo: «Ananiyasi, mun x'a tu Sentane xa í xonotosuruxu x'é bula do bola pin duguxulu in sonjo la, x'a mara, xa faniya fo Ni Senunjo pen?»⁴ Jannin í xa duguxulu in fiiri, í ta le nte ba? A fiiri xo, í ta le nte a xaaliso ti ba? Mun na í xa pin miiriya jaxu in ta? Í man faniya fo moxolu pen, í x'a fo Ala le pen.»⁵ Ananiyasi xa wo xumo me tumo men, a boyita, a sata. Mennu xa wo kuwo xibaro me, wolu bee silabeteta.⁶ Xamarindinjolu wulita x'a kasanke, xa taxa a lasi.⁷ Leere saba noxon tanbininjo xo, Ananiyasi musu nata. Kuwo men tun keta, a tun nte wo xalama folo.⁸ Piyere x'a njinxaxo: «Alu x'alu la duguxulo fiiri pin sonjo in ne la ba?» Muso x'a jaabi xo: «Iyo, n x'a fiiri wo le la.»⁹ Piyere xo a pen xo: «Mun na alu benta a to ten xa Marigi Niyo xotobo? Awa, moxo mennu xa í xe lasi, i fele innu ti da la; i je taxa le í du ti.»¹⁰ Wo no bee to, muso boyita Piyere xoto, xa sa. Xamarindinjolu dunta x'a saninjo tara. I taxata a lasi a xe senbo to.¹¹ Ala la jama moxolu, anin moxo mennu xa wo me, wolu bee silata fo xa danmatanbi.¹² Kiladinjolu xa taagumanseedo nin kawakuwo kiika ke jama temo to. Lannayabaxolu bee kamarininjo tun be mansaxe Sulemani la biire xoto.¹³ Moxo tolu korita fatiyala xa dun i to. Wo bee nin a ta, moxolu tunnu be i bunjala bete.¹⁴ Xelu nin musolu jamaba tun b'a ma xa la Marigi la xa taxa a fe, xa kafu lannayabaxolu la jama ma.¹⁵ Moxolu tunnu be taxala i la jangarutolu tila xaraxolu nin laranjolu xan, x'e bula bedolu to, walasa Piyere tanbito niiniyo xa la i dolu xan, x'e kendeya.¹⁶ Jama tun be bola Yerusaleme senbefegallo dulu to, xa na i la jangarutolu nin i la jinnetolu ti. I bee tun be kendeyaxan.¹⁷ Wo to, sadaxalasibaxa kuntigiba nin a nofemoxolu bee, nin wo mu

Sadusen diino moxolu ti, wolu diminbeteta kiladinjolu xanma.¹⁸ I wulita xa kiladinjolu muta, xa taxa i bula kasobunba xono.¹⁹ Bari suwo to, Marigi la melekiyo do nata kasobunjo dalu yele, xa kiladinjolu labo x'a fo i pen xo:²⁰ «Alu taxa Alabatusuba xono, xa nilamaya kuto kuwolu bee fo moxolu pen.»²¹ I xa wo xumo me tumo men, i sorita xa taxa Alabatusuba xono, xa moxolu laxaran. Sadaxalasibaxa kuntigiba nin a nofemoxolu xa Yahudiyalu la Kiititegekafo, anin Banisirayila moxobalu bee kamari dula kilin. I xa garado dolu ki kasobunjo la, xo i xa na kiladinjolu ti.²² Garadolu sininjo kasobunjo xono, i x'a tara kiladinjolu nte je. I x'e koppa xa taxa wo xibaro fo Yahudiyalu la Kiititegekafo pen.²³ I xo: «N xa kasobunjo da tara soxonin a na ma. Dakantabaxolu be lonin da la. Bari n xa da yele tumo men, n man moxo si tara a xono.»²⁴ Alabatusuba korosibaxolu la kuntigo nin sadaxalasibaxa kuntigolu xa wo xumo me tumo men, wo x'e xonotolafilu. I x'e noxo njinxaxo mun si tara kela.²⁵ Wo to, moxo do nata a fo i pen xo: «Alu xa xe mennu bula kaso la, i fele innu ti lonin Alabatusuba xono, xa moxolu laxaran.»²⁶ Wo tumo la, Alabatusuba korosibaxolu la kuntigo nin garadolu taxata xa na kiladinjolu ti. I man wo ke barako la, bawo i silata moxolu xana i fannu bun kurolo la.²⁷ I nata kiladinjolu ti tumo men, x'e lalo Yahudiyalu la Kiititegekafo na xoto. Sadaxalasibaxa kuntigiba xo i pen xo:²⁸ «N man alu kaba ba, xa moxolu laxaran Isa toxo la tugun? Bari a fele in ti, alu xa Yerusaleme bee daben alu la xaranjo la. Atelu kennu b'a fe xa pin xe in faxo haxxo den ntelu la.»²⁹ Piyere nin kiladin tolu x'a jaabi xo: «Jannin í be moxolu sago kela, Ala le sago ke.³⁰ Alu xa Isa men gengen yiro ma, x'a faxa, n mamaxelu la Ala xa wo lakuni.³¹ Ala x'a xotota, xa taxa a lasigi a kininbulo xoto, x'a ke Mansaxe nin Kisibaxo ti, walasa Banisirayila moxolu xa tuubi, xa junubeyafo soto ate barako to.³² Ntelu keta wo kuwolu seedolu ti, ntelu nin Ni Senunjo. Ala xa wo Ni Senunjo di a foxanjolu labatubaxolu bee ma.»

³³ Yahudiyalu la Kiititegekafo moxolu xa wo xumolu me tumo men, i juso bota. I tunnu b'a fe xa kiladinjolu faxa.³⁴ Bari Farisiya do tun be i to, a toxo xo Gamaliyeli, sariya karanmoxo do le mu. Jama bee tun be wo bunjanin. Wo wulita x'é lo Yahudiyalu la Kiititegekafo temo to. A xa yanmaro di, xo xa kiladinjolu labo je waxatindin xono.³⁵ Wo xo, a x'a fo i pen xo: «Banisirayila moxolu, alu b'a fe xa men ke pin xe innu la, alu i korosi wo kuwo to de!»³⁶ A man me folo, Tudasi wulita, x'a fan ke moxoba ti. Xe keme naani x'a lo a nofe. Bari a faxata. Moxo mennu x'a lo a nofe, wolu jenjenta. Wo kuwo banta.³⁷ Ate tanbo xo, Galile Yudasidu wulita, toxosafe waxato. A xa moxo kiika kili x'a lo a nofe. Ate du faxata. A nofemoxolu bee jenjenta.³⁸ Wo to, saasa nte b'a fola alu pen xo alu xana alu fannu sege pin xe innu la kuwolu nofe tugun. Alu i bula i xa

taxa, bawo nin i miiriya nin i la baaro wulita moxo lelu la, a si tija. ³⁹ Bari nin a wulita Ala le la, alu me a tija no. Alu i korosi alu xana ke Ala kelebaxolu ti.» Yahudiyalu la Kiiitegekafo sonta Gamaliyeli la fo ma. ⁴⁰ I xa kiladinṅolu kili, x'e gaṅa. I x'a xoleya i ma xo i xana Isa toxo fo moxo ṅen tugun. Wo xo, i x'e bula xa taxa. ⁴¹ Kiladinṅolu bota kiiitegedula xa taxa. I ṅaxalita, bawo xa doxoya Isa toxo nofe, wo mu itelu bulu kunnawulo le ti. ⁴² Lun wo lun, i tunnu b'a ma xa moxolu laxaran Alabatusuba nin moxolu la luwolu xono, xa xibaru Dimanṅo fo moxolu ṅen, xo Isa le mu Kirisita ti.

6 Wo waxato, lannayabaxolu tunnu be siyaxan. Yahudiya mennu be gerekixanṅo fola, wolu tunnu be Yahudiya heburuxan folalu maxumala bawo i la musujaxelu tunnu nte jaatela lun wo lun domoli tala to. ² Kiladin tan nin fulo xa lannayabaxolu jama kamari x'a fo i ṅen xo: «A man xan, n xa Ala la xumo folo dabula domolipabo xanma. ³ Wo xanma, n badinṅolu, alu xe woorowula sugandi alu to, mennu toxoṅuma be fola, mennu be fanin Ni Senunṅo la, anin nin hakilitigiya be i fe. N si wolu bula ṅin baara in na. ⁴ Ntelu kennu si tu Alamatara nin Ala la xumo waajulo la.» ⁵ Jama bee sonta wo fo ma. I woman innu xa Ecenin sugandi, ate la lannaya tun xa bun, a tun be fanin Ni Senunṅo la; anin Filipe nin Porokore nin Nikanore; nin Timon; nin Paramenasi; anin Antiyosingo do xo Nikola, ate men tun dunta Yahudiyalu la diino to. ⁶ I xa wolu yita kiladinṅolu la. Kiladinṅolu xa Ala matara, xa i bulolu la i xan. ⁷ Ala la xumo tun be jenjena xa taxa a fe. Lannayabaxolu tunnu be siyabetela Yerusalem. Sadaxalasibaxolu kiikaba tun be sonna xa lannaya ke. ⁸ Ala la neemaba nin a la sintigiyaba tun be Ecenin xan. A tun be kawakuwolu nin taagumansedebala kela jama tema. ⁹ Moxo dolu bota Alabatusuwo do la, men toxo xo «Hooroyaninṅolu la Alabatusuwo». Sireningolu nin Alekisandiringo lelu mu, anin Silisi nin Asi maro moxo dolu. Wolu wulita xa Ecenin sooso. ¹⁰ Bari i korita Ecenin la xumolu xoxatila, bawo a tun be xumala hakilitigiya la, Ni Senunṅo barako to. ¹¹ Wo to, i xa moxo dolu xonotosoli xo wolu x'a fo xo: «A be xumala xa Musa nin Ala toxo tija. N fannu xa wo me a da la.» ¹² Wo ṅa ma, i xa jama nin moxobalu nin sariya karanmoxolu juso lawuli Ecenin xanma. Wolu nata Ecenin ma, x'a muta x'a lasi Yahudiyalu la Kiiitegekafo ma. ¹³ I nata seede fano dolu ti. Wolu xo: «ṅin xe in ken b'a ma le doron xa xuma jaxo fo n na Alabatusuba senunṅo nin Musa la sariya ma. ¹⁴ N x'a me a da la xo Isa Nasaretinga in si Alabatusuba te, Musa xa laadolu mennu di n ma, a si wolu yeleva.» ¹⁵ Moxo fen fen tun be siginin kiititegedula, wolu bee tun ṅa be bennin Ecenin ma. I x'a je xo a pada tun be i xo mekiyo pada.

7 Sadaxalasibaxa kuntigiba xa Ecenin ṅininxa xo: «Moxolu be men fola, tonṅa le mu ba?» ² Ecenin x'a jaabi xo: «ṅi falu anin ṅi badinṅolu, alu ṅi name!

Noorotigi Ala x'é yita n mamaxe Burehima la, x'a tu Mesopotami, jannin a xa sigi Xaaran. ³ Ala xo a ṅen xo: «Bo i la jamano nin i fasuwo la, ṅi be nala jamano men yitala i la, i xa taxa non.» ⁴ Wo to, Burehima bota Kalidengolu la jamano to, xa taxa sigi Xaaran. A fa saninma, Ala nata a ti ṅin jamana in to, alu sigininṅo be ṅan men saasa. ⁵ Ala man duguxulu si di a ma ṅin jamana in xono, haali sin lodula. Bari Ala xa lahido ta a ṅen, xo a si ṅin jamana in di a nin a bonsonṅo ma, haali x'a tara din tun nte a bulu folo. ⁶ Ala x'a fo xo Burehima bonsonṅolu si ke siginfelu ti jamana xote to, xo wo moxolu s'i ke jonṅolu ti, x'e tooro keme naani san xono. ⁷ Bari xo siya men b'e kela jonṅolu ti, Ala xo, a si kiito tege wo xan. Wo xo, xo i si bo je, xa na ate batu ṅin dula in. ⁸ Wo xo, Ala xa Kafuxanṅo sigi a nin Burehima te, xa ṅaxo ke wo Kafuxanṅo taagumanseedo ti. Wo to, Burehima xa Nsiyaxa ṅaxa a wuluwo tili sago. Nsiyaxa xa Yaxuba bange, a x'a ṅaxa, Yaxuba xa n mamaxe tan nin fulo bange, a x'e ṅaxa. ⁹ «N mamaxelu xa i badinxe Yusufu faxakilinjaxuya, x'a fiiri Misira taxalalu ma. Bari Ala tuta a senbo to, ¹⁰ x'a bo toorokuwolu bee xono. Ala xa hakilitigiya di a ma, x'a kudiya Misira mansaxe Farawuna ṅen. Farawuna xa Yusufu lasigi Misira jamano nin a fan na luwo bee kunna. ¹¹ Wo to, xonxoba nata Misira jamano nin Kanan jamano bee to. Wo jaxuyata fo n mamaxelu tunnu nte fen sotola tugun x'a domo. ¹² Kabirin Yaxuba x'a me xo baluwo be Misira, a xa n mamaxelu ki xa taxa je sinṅa kilin folo. ¹³ I la taxa fulananṅo to, Yusufu x'a fan yita a badinxelu la. Wo keninṅo, Farawuna xa Yusufu siya lon. ¹⁴ Wo xo, Yusufu xa kila bula a fa Yaxuba nin a la dinbaya bee ma, xa na i ti a bata. Wolu tunnu mu moxo tan woorowula nin luulu le ti. ¹⁵ Yaxuba nin a la dinbaya taxata Misira. Saya sita a nin n mamaxelu ma non. ¹⁶ I furelu tata xa taxa Sikemu. Burehima tun xa xaburukedula men san xaalisi xoyimanṅo la, Hamore dinxelu ma, i lasita non. ¹⁷ «Ala tun xa lahido men ta Burehima ṅen, wo dafawaxato sutiyaninma, Banisirayila moxolu siyata, xa jiidi Misira xono. ¹⁸ I tuta siyaxan, xa jiidi, fo mansaxe kuto do nata sigi Misira kunna, men tun man Yusufu lon. ¹⁹ Wo mansaxe xa sila jaxo taxama n na siya ma, xa n mamaxelu tooro, fo x'e diyakuwa x'e labo i la deenanolu la, walasa i xa sa. ²⁰ Wo waxato, Musa bangeta. A tun xa bete; a ku tun xa di Ala ṅen. A xa xaru saba ke a fa bata. ²¹ Wo xo, bo keta Musa la. Wo keta tumo men, Farawuna dinmuso x'a ta, x'a labunṅa i xo a fan dinṅo. ²² Musa xaranta Misirangolu la hakilitigiya bee ma. Barako tun be a la xumolu nin a la kebaarolu to. ²³ Musa xa tan naani sanji soto tumo men, a x'a latege xa taxa bo a badin Banisirayilangolu ma. ²⁴ A xa Misirango do je a badin Banisirayilango do toonola. A x'a badinṅo lafaasa, xa wo Misirango faxa. ²⁵ Musa la miiro tun na, xo a badinṅolu s'a faamu, xo Ala be i bola bulu to ate le

sabaabo la. Bari i man a faamu. ²⁶ Wo lun do, Musa x'a badin fula je i noxo la. A tun b'a fe x'e laben. A xo: "Mun na alu be i noxo toonola, atelu mennu mu badin ti?" ²⁷ Bari men tun b'a badinno ma x'a toono, wo xa Musa lapori, x'a fo a pen xo: "Jon x'é ke n na kuntigo nin n na kiititegebaxo ti?" ²⁸ Í xa Misirango faxa na men, í b'a fe xa nte du faxa wo na in ba?" ²⁹ Wo xumo xa Musa labori, xa taxa a ti Madiyan jamano xan. A xa dinxe fula soto non. ³⁰ «Tan naani sanji tanbita. Wo xo, melekiyo do x'é yita Musa la fuxo la, Turusinna kuro senbo to, fitaare mananinno to. ³¹ Musa xa wo je tumo men, a dabaro banta. A xo tumo men xo a b'é sutiyala xa wo mafele, a xa Marigi xumaxanno me xo: ³² "Nte mu í benbalu la Ala le ti, Burehima nin Nsiyaxa nin Yaxuba la Ala." Musa jarajarato man fatiya x'a mafele. ³³ Marigi x'a fo a pen xo: "Í la samatolu bo í sinno to, bawo í be dula senumannno le. ³⁴ Nte la moxo mennu be Misira, nte xa wolu la tooro je, x'e nuntanxanno me. Nte jigita xa na i bo bulo to. Saasa n b'é kila í xa taxa Misira." ³⁵ «Wo Musa men nin Banisirayila dinno x'e ban a to, x'a fo a pen xo: "Jon x'é ke n na kuntigo nin n na kiititegebaxo ti?", Ala xa wo ki x'a ke kuntigo nin kunbobaxo ti, melekiyo la deemalo fe. Wo melekiyo le tun x'é yita a la, fitaaro to. ³⁶ Wo Musa le x'e labo Misira jamano xono, xa kawakuwolu nin taagumansedolu ke non, anin Xooxoji Wulennno da la, anin fuxo la, tan naani sanji xono. ³⁷ Wo Musa le x'a fo Banisirayila dinno pen xo: "Ala si nte noxon kila labo alu la siya moxolu to." ³⁸ Xa Banisirayila dinno kamarininno tu fuxo la, ate Musa le tun be n mamaxelu nin melekiyo te, men tun be xumala a pen Turusinna kuro to. A xa wo xuma palamalu soto Ala la, x'e di n ma. ³⁹ Bari n mamaxelu man son x'a lame. I x'e ban a to. I tunnu b'a fe x'e koppa Misira. ⁴⁰ I xo Haruna pen xo: "Bolibatuta dolu dara n pen, walasa wolu xa bula n na, bawo nin Musa in men xa n nabo Misira, n man a kepa lon." ⁴¹ Wo lunno, i xa sano dara pinsirininno ti, x'a ke bolibatuta ti, xa sadaxo bo wo bolo pen, xa paxali i buluno la. ⁴² Bari Ala x'é xodi i la, x'e bula i xa sanxulo loololu batu, í xo a be safenin kilalu la kitaabo to na men xo: "Banisirayila dinno, alu xa marafen sadaxolu nin sadaxa xotelu bo tan naani sanji xono, fuxo la, alu xa wo ke nte le pen ba?" ⁴³ Ayi! Bari alu xa bolibatuta Moloku la batusu tillisima ta, xa alu la loolo batuta Ranfan taagumansedo ta, xa taxa i ti, alu xa wo men nu dara x'e batu. Wo xanma, n si taxa alu ti fo Babilone gallo jefen." ⁴⁴ «Xa n mamaxelu tu fuxo la, Alabatusuba tillisima do tun be i bulu, men b'a yitala xo Ala b'e bata. Ala xumata Musa pen, xo a xa wo faanusuwo dara x'a ke í xo men yitata a la be na men. ⁴⁵ Wo xo, n mamaxelu xa wo faanusuwo di i dinno ma. Yosuwe le keta i namoxo ti, xa taxa i ti siya dolu la jamano xan. Ala tun xa siya dolu xoyi xa bo non. Wo faanusuwo tuta je fo Dawuda tilo. ⁴⁶ Dawuda la kuwo tun xa di Ala pen, a xa

Ala matara xo a xa bunno lo Yaxuba la Ala pen. ⁴⁷ Bari Sulemani le xa wo bunno lo Ala pen. ⁴⁸ Wo bee nin a ta, Ala Xototaninba nte sigila moxo la bun lonin xono, í xo kila do x'a fo na men xo: ⁴⁹ "Sanxulo le mu nte la mansasigilanno ti. N Marigi xo ten. Duguxulo mu n sinxoto korondome ti. Atelu si mun bun lo no nte pen? Nte lafiyadula si ke minto ti?" ⁵⁰ Nte bulo le man wo bee ke ba?" ⁵¹ «Moxo murutininno nin moxo jusukun xolenno nin tulu xolenno! Alu be Ni Senunno soosola tuma bee, alu nin alu mamaxelu bee. ⁵² Kila joman nata nin alu mamaxelu man men tooro? Mennu xa Ala la moxo Tilininno la nalo fo x'a tara a man si, i xa wolu faxa. Saasa atelu keta wo janfabaxo ti, x'a faxa. ⁵³ Atelu mennu xa Ala la sariya soto melekiyolu la, alu man wo sariya labatu!» ⁵⁴ Kiititegelalu xa wo me tumo men, wo x'e juso labo, i x'e dafato kin Ecen xanma. ⁵⁵ Xa Ecen faninno tu Ni Senunno la, a xa sanxulo mafele. A xa Ala nooro je, xa Isa loninno je Ala kininno xoto. ⁵⁶ A xo: «A fele, n na be sanxulo dayeleninno la, Moxo Dinxe be lonin Ala kininno xoto.» ⁵⁷ I xuurebete ta, x'e tulolu sukki, i bee kafuninno gidita a xan. ⁵⁸ I x'a xoyi, xa taxa a ti gallo xo ma, x'a bun kurolo la. Wo kebaxolu x'e la faanolu la xamarininno do senbo to xo Soli. ⁵⁹ X'e tu a bunna, Ecen xa Marigi matara ten xo: «Marigi Isa, n xa n niyo tu í bulu.» ⁶⁰ Wo xo, a x'é pongi xa xuure xo: «Marigi, í xana i la nin junube in jaate i pen.» Wo xumolu xo, a sata.

8 Ecen la saya benta Soli ma. Wo lun kilinno, tooroba wulita Ala la jama xanma Yerusaleme. Lannayabaxolu bee jenjenta xa taxa Yude nin Samari marolu dulalu bee to, x'a tu kiladinno doronnu ma Yerusaleme. ² Alapasilanxabaxo dolu xa Ecen lasi, x'a xasi bete. ³ Soli ken tun b'a sinkuwo ma x'a ke, walasa xa Ala la jama silatunu. A tun be dunna luwolu bee xono, xa lannayabaxolu musuma nin xema saba, x'e bula kaso la. ⁴ Awa, wo lannayabaxa jennininno taxata dula bee, xa xibaru Dimanno fo moxolu pen. ⁵ Filipe taxata Samari galluba do to, xa Kirisita la kuwo waajulo ke je moxolu pen. ⁶ Jama xa Filipe lame, x'a la taagumansede keninno je tumo men, i bee x'e tulo lo bete x'a lame. ⁷ I xa wo ke, bawo a tun be jinneto kiika la jinnolu xoyila. Wo jinnolu boto tun be xuurela. A xa muruxuntelu nin sin kilinno kiika lakendeya. ⁸ Wo kuwo keta paxalikuba ti wo gallo moxolu bulu. ⁹ Xe do tun be wo gallo to kabirin waxati jan, a toxo xo Simon. A tun be doomaya kela, xa Samari moxolu dabaro ban, x'a fan ke moxoba ti. ¹⁰ Dindin nin moxoba, bee tun b'a lamenin bete x'a fo xo: «Nin ken mu Ala la sintigiya le ti, Ala la sintigiyaba.» ¹¹ I tunnu b'a lamela, bawo a x'e dabaro ban a la doomaya la kabirin tuma jan. ¹² Bari Filipe xa Xibaru Dimanno fo i pen tumo men, men be Ala la Mansaya nin Isa Kirisita xan, wo moxolu sonta a la xumo ma. Musu nin xe, a bee nata xa batise. ¹³ Haali Simon fan sonta Ala la xumo ma. A batiseta tumo

men, a tuta Filipe nofe. Filipe tun be taagumanseedolu nin sintigiya kuba mennu kela, wolu x'a dabaro ban haali. ¹⁴ Kiladinḡolu x'a me x'e tu Yerusaleme, xo Samaringolu sonta Ala la xumo ma. Wo to, i xa Piyere nin Yaya ki wolu ma. ¹⁵ Piyere nin Yaya sininḡo Samari, i xa Ala matara lannayabaxolu nen, walasa i xa Ni Senunḡo soto. ¹⁶ I xa wo ke, bawo Ni Senunḡo tun man jigi i si xan folo. I tunnu batiseta le doron Marigi Isa toxo la. ¹⁷ Wo tumo la, Piyere nin Yaya x'e bulolu la i xan, i xa Ni Senunḡo soto. ¹⁸ Simon x'a je tumo men xo lannayabaxolu xa Ni Senunḡo soto kiladinḡolu la bululanxanḡo fe, a nata xaaliso ti, x'a fo Piyere nin Yaya nen xo: ¹⁹ «Alu pin sintigiya in di n du ma, walasa nin n xa n bulo la moxo men xan, wo xa Ni Senunḡo soto.» ²⁰ Bari Piyere x'a jaabi xo: «Í nin í la xaaliso alu fulo bee xa halagi, bawo í x'a miiri xo Ala la nilifenḡo si soto xaaliso la. ²¹ Nidula nin sotofen nte í kun pin ku in to, bawo í jusukunḡo man tilin Ala na xoto. ²² Wo to, nimisi í la ku jaxo la, xa Marigi matara a xa yaafa í ma, nin wo si ke no, í la nin miiriya in xanma. ²³ Bawo n na b'a la xo í jusukunḡo be fanin pangoya la. Í be junubo la jonḡa la.» ²⁴ Simon xo Piyere nin Yaya nen xo: «Alu fannu xa Marigi matara nte nen walasa alu xa mennu fo, wolu si xana n soto.» ²⁵ Piyere nin Yaya xa seede ya bo tumo men, xa Marigi la xumo fo, i x'e koppa xa taxa Yerusaleme. I taxato xa Xibaru Dimanḡo fo Samari galu kiika to. ²⁶ Marigi la melemiyo do xumata Filipe nen xo: «Wuli í xa taxa banbugu mafanḡo. Silo men be bola Yerusaleme xa taxa Gasa, nin wo mu sila ti men nte taxamala bete, í xa taxa wo fe.» ²⁷ Filipe wulita xa taxa. X'a tu silo fe, a xa xe do je. Ecopi mansamusu Kandasi la kuntigiba do le mu. Ate le tun b'a la naafulo kunna. Wo xe tun taxata Yerusaleme, xa Ala batu. ²⁸ A koppato, x'a sigininḡo tu a la wuturo xono, a tun b'a ma xa ki-la Esayi la kitaabo xaran. ²⁹ Ni Senunḡo xo Filipe nen xo: «Si pin wuturu in ma, í nin a xa taxa i ḡoxo la.» ³⁰ Filipe x'é bori xa wuturo soto. A xa Ecopingo xanme kila Esayi la kitaabo xaranna. A xo a nen xo: «Í be men xaranna, í b'a faamula ba?» ³¹ A x'a jaabi xo: «N si wo faamu na di nin moxo man a xoto fo n nen?» A xo Filipe nen xo a xa ye le xa sigi a bata. ³² A tun be Kitaabo dula men xaranna, wo fele: «A keta í xo saaxo men be taxanin a faxadula; a be í xo saaxandinḡo, men nte xunbola a tiyo xabaxo bulu; a man a da ye le muume. ³³ A la majigo xono, a la tonḡa man di a ma. Jon si xuma a bonsonḡo xan; bawo a siyo banta duguxulo xan?» ³⁴ Kuntigi in xa Filipe nininxa xo: «N b'é matarala, kila be xumala jon ma ten? A fan ba, walla do xote?» ³⁵ Wo to, Filipe xa xumo ta, a x'a damuta Kitaabo wo xumolu ma, xa Isa la xibaru Dimanḡo fo a nen. ³⁶ X'e tu taxanin nafe silo to, i sita jiyo ma. Kuntigo xo: «Jiyo fele, mun na n me batiseta jan?» [³⁷ Filipe xo: «Nin í xa lannaya ke í jusukunḡo bee la, í si batiseta.» Kuntigo x'a jaabi xo: «N lata a la xo Isa mu Ala Dinxe le ti.»] ³⁸ A xa

yanmaro di xo wuturo xa lalo. Filipe nin kuntigo fulo bee jigita jiyo to. Filipe woman in xa kuntigi in batiseta. ³⁹ I yeleninma xa bo jiyo to, Marigi Niyo xa Filipe ta xa taxa. Kuntigo man a je wo xo. A papaninḡo x'a la silo muta xa taxa. ⁴⁰ Filipe taxata a fan tara Asoti. A x'é tu non, xa taxa fo Sesare gallo to. A tanbito bota gallo fen fen na, a xa Xibaru Dimanḡo fo wolu bee to.

9 Wo waxato, Soli tuta a ma xa faxalo lahenne Marigi la xarandinḡolu ma. Wo to, a taxata sadaxalasibaxa kuntigiba bata, ² xo a xa safelu di a ma, mennu si a yanmaru xa taxa i di Damasi Alabatusuwolu moxolu ma; walasa nin a xa Marigi la silo taxamabaxo dolu soto je, musu nin xe, a x'e muta x'e siti, xa taxa i ti Yerusaleme. ³ Xa Soli tu Damasi silo to, fo a sutiyata gallo la, nakun kilin, keneya do bota sanḡo to, xa mana a boxo bee. ⁴ Soli boyita dugo ma. A xa xumaxanḡo do me xo: «Soli, Soli, mun na í be nte toorola?» ⁵ A xo: «Ite mu jon ti, Marigi?» A xo: «Nte mu Isa le ti, í be men tooroxan. ⁶ Wuli í xa dun gallo xono. Í xa xan xa men ke, wo si fo í nen.» ⁷ Soli taxamaḡoxolu ja tegeginḡo tuta lonin. I korita fen fola. I tulo be xumaxanḡo la, bari i na nte moxo la. ⁸ Soli wulita dugo ma. Haali x'a palu yeleninḡo tu, a tun na nte dula la. I x'a muta a bulo ma xa taxa a ti Damasi. ⁹ Tili saba xono, a man fuyi je, a man domoli ke, a man ji min. ¹⁰ Isa la xarandinḡo do tun be Damasi, a toxo xo Ananiyasi. Marigi x'é yita a la, a xo: «Ananiyasi.» A xo: «N Marigi, n x'é lamuta!» ¹¹ Marigi xo a nen xo: «Wuli í xa taxa bedo fe, men be kilila xo Bede Tilinninḡo. Í xa taxa Yudasi la luwo ma, xa Tarasingo do maḡininxa; a toxo xo Soli. A be Ala matarala pin waxati in. ¹² X'a tu wo Alamatara la, Ala x'a yita a la, xo xe do dunta a bata, men toxo xo Ananiyasi. Wo xe x'a bulolu la a xan, walasa a xa dula je.» ¹³ Ananiyasi x'a jaabi xo: «Marigi, nin xe in xa ku jaxo mennu bee ke í la moxo senumanḡolu la Yerusaleme, moxo kiika xa wolu fo nte nen. ¹⁴ A xa fango soto sadaxalasibaxa kuntigolu la xa na jan, x'é toxo kilibaxolu bee siti.» ¹⁵ Marigi xo Ananiyasi nen xo: «Taxa, bawo nte xa pin xe in sugandi le, x'a ke n na baarakedinḡo ti, nin a si nte toxo yita siya tolu nin i la mansaxelu la anin Banisirayila dinḡolu la. ¹⁶ A xa xan xa tooro fen fen soto nte toxo nofe, nte fan si wolu yita a la.» ¹⁷ Wo to, Ananiyasi taxata. A sininma luwo ma, a x'a bulolu la Soli xan. A xo: «N badinxe Soli, Marigi Isa men x'é yita í la silo to, wo xa n ki í ma, walasa í xa dula je tugun, anin í xa fa Ni Senunḡo la.» ¹⁸ Wo no bee to, fen dolu wasema butunta xa bo a palu la. A xa dula je tugun. A wulita xa batiseta. ¹⁹ Wo xo, a xa domolo ke, xa barako soto. Soli tuta Damasi xarandinḡolu bata tili dantalu xono. ²⁰ Wo waxato fan, a xa waajulo ke Alabatusuwolu xono, xo Isa mu Ala Dinxe le ti. ²¹ Moxo fen wo fen x'a lame, wolu bee dabaro banta, x'a fo xo: «Nin xe in ne tun nte Isa toxo fobaxolu tooroxan Yerusaleme? A man na wolu sitilo le xanma ba, xa taxa

i di sadaxalasibaxa kuntigolu ma Yerusaleme?»²² Bari do le tun be kafuxan Soli barako ma xa taxa a fe waa-julo to. A tun b'a yitaxan xo Isa le mu Kirisita ti. Yahudiya mennu be siginin Damasi tunnu man a lon i s'a jaabi men na tugun.²³ Waxati keta, wo xo Yahudiyalu benta a to xo xa Soli faxa.²⁴ Bari a lasobita i la janfo la. Su nin tili, i tunnu be gallo dundalu korosinin walasa i s'a faxa na men.²⁵ Bari lun do suwo to, Soli la xarandinjolu x'a bula sinso xono, x'a lajigi julo la, tato xo ma.²⁶ Soli sininma Yerusaleme, a x'a njinin kafo xa dun a nin lannayabaxolu te. Bari i bee silata a na, bawo i man la a la xo a keta lannayabaxo ti soobeya la.²⁷ Wo to, Baranabasi nata Soli ti kiladinjolu bata. A x'a fo i pen xo Soli xa Marigi je Damasi silo xan, xo Marigi xumata a pen. Soli xa Isa la kuwo waajulo ke xoleya to na men Damasi, Baranabasi xa wo du na fo i pen.²⁸ Wo xo, Soli nin i tuta xa taxa anin xa na Yerusaleme. A tun nte silala xa waajulo ke Marigi toxo la.²⁹ Yahudiya men tunnu be gerekixanjo fola, Soli tun be xumala wo dulu pen; a nin i tunnu be tula i noxo soosola. Bari wo tunnu be na njinna a faxana la.³⁰ Lannayabaxolu xa wo lon tumo men, i taxata Soli ti Sesare gallo to. Wo xo, i x'a bula xa taxa Tarasi.³¹ Wo tumo, Ala la jama tun be heero xono Yude nin Galile nin Samari jamanolu bee to. A tun be barako sotoxan, x'é taxama Marigi nasilanja to, xa bunja Ni Senunjo la jusudunno fe.³² Awa xa Piyere tu jamano bee yaalala, a sita Lide lannayabaxolu dulu ma.³³ A xa xe do tara non, a toxo xo Ene. Wo xe tun be lanin bariyo to sanji sagi. A tun be muruxunin.³⁴ Piyere xo a pen xo: «Ene, Isa Kirisita be nala í kendeyala. Wuli í x'é la laranno toben.» Wo no bee to, Ene wulita.³⁵ Lidengolu nin Saron keneba xan sigibaxolu xa wo je tumo men, i bee tuubita Marigi pen.³⁶ Musu lannayabaxo do tun be Jope, a toxo xo Tabita. Wo toxo gerekixanjo to xo «Dorokasi». Wo xoto xo «tanxonjo». A tun be ku puma kela tuma bee, xa bulutoxulunjolu deema.³⁷ Wo waxato, a jangaruta xa sa. I x'a ku tumo men, i x'a bula bunjo do xono, sankansuwo sanjo to.³⁸ Jope lannayabaxolu tunnu x'a me xo Piyere be Lide. Non tun nin Jope te tun man jan. I xa xe fula ki a ma xa nin xuma in dun i da xo: «N b'é tarala, xo í xa í tariya xa na n bata.»³⁹ Wo no bee to, Piyere nin i taxata. A sininma je, i taxata a ti wo sankansuwo sanjo to. Musujaxelu bee xasito x'e sodun a la. Dorokasi nilama xa dorokexotobulolu nin dorokeba mennu xara, i xa wolu yita Piyere la.⁴⁰ Piyere xa moxo bee labo banto to, x'é pongi, xa Ala matara. Wo xo, a x'é padi fure la, x'a fo xo: «Tabita, wuli!» Tabita x'a palu yele. A xa Piyere je tumo men, a wulita x'é sigi.⁴¹ Piyere x'a bulo muta, x'a deema wulila. Wo xo, Piyere xa lannayabaxolu nin musujaxelu kili, xa Dorokasi nilama yita i la.⁴² Jopengolu bee xa wo kuwo lon, i kiika lata Marigi la.⁴³ Piyere xa waxati jan ke Jope, gulubaarala do bata, xo Simon.

10 Xe do tun be Sesare gallo to, a toxo xo Koroneyi. Rome sorodasi jalatigiba do le mu. A tun be siginin sorodasi jama men kunna, wo tun be kilila xo Itali sorodasi jama.² Wo xe tun mu Alanasilanjabaxo le ti, a nin a la lumamoxolu bee tunnu be Ala batula i noxo fe. A tun be fen kiika dila Yahudiya segebaxantunjolu ma, xa Ala matara tuma bee.³ Lun do wura la, Ala la melekiyo do x'é yita a la, keno xan. A dunta a bata x'a fo a pen xo: «Koroneyi!»⁴ Koroneyi silaningjo x'a na lo melekiyo to x'a fo a pen xo: «Marigi, mun keta?» Melekiyo x'a jaabi xo: «Í xa taralo mennu ke, anin í xa deema mennu ke segebaxantunjolu pen, Ala xa wolu muta, anin a hakilo be í kun.»⁵ Saasa, moxolu bula xa taxa Jope, xa taxa Simon toxo do nofe je, men be kilila du xo Piyere.⁶ A be jiginin gulubaarala Simon bata, wo la luwo be xooxojida la.»⁷ Melekiyo x'é soto xumo la a pen tumo men xa taxa, Koroneyi x'a la kujabobaxa fula kili, anin a la xotosigi sorodaso do. Wo tun mu Alanasilanjabaxo le ti.⁸ Men keta, a xa wo na bee laxali i pen. Wo xo, a x'e ki xa taxa Jope.⁹ Wo lun do, xa wolu tu taxanin, fo i nata sutiya Jope la, Piyere yeleta bilo kun, tilinkunte waxato, xa taxa Ala matara.¹⁰ Xonxo x'a muta. A tun b'a fe xa domolo ke. X'a la domolo tu daraxan, Ala xa fen do yita a la.¹¹ A xa sanxulo je dayelenin, xa fen do jigito je bola sanjo to, a be í xo faanuba. A kun naano be tomutanin, a jigito be nanin duguxulo xan.¹² Piyere x'a je xo sinnaanimafen sifa bee nin fenjo mennu b'e fuufula duguxulo xan, nin xonolu sifa bee, mennu b'e baxan sanna, wolu tunnu be wo faano xono.¹³ A xa xumaxanjo do me a fola a pen xo: «Piyere, wuli í xa fen do faxa x'a domo.»¹⁴ Bari Piyere xo: «Ayi, Marigi! Bawo fen wo fen domo nte dagenin, walla fen wo fen be noxonin, nte bada man wolu si domo.»¹⁵ Wo xumaxanjo xo a pen tugun xo: «Ala xa men senuya, í xana wo jaate fen noxonin ti.»¹⁶ Wo kuwo keta í xo sinja saba. Wo no bee to, fen in nakoppata xa taxa sanjo to.¹⁷ Piyere hakilo naxamininjo tun b'a fan njinxala Ala la wo yitalifenjo xoto si ke men ti. Wo xono, Koroneyi la kiladinjolu xa Simon na luwo manjinxala. I tunnu sita da la xa ban.¹⁸ I xa kililo ke, xa njinxalo ke xo: «Simon men be kilila xo Piyere, wo be jiginin jan ne ba?»¹⁹ Xa Piyere tu í miirila wo yitalifenjo xoto ma, Ni Senunjo xo a pen xo: «Moxo saba fele í njinna.»²⁰ Wuli í nin i xa taxa, í xana sikka, bawo nte le x'e ki í ma.»²¹ Wo to, Piyere jigita xa na wo moxolu bata, x'a fo i pen xo: «Alu be men njinna, nte le mu. Alu nata mun na?»²² I xo: «Sorodasi jalatigiba men toxo xo Koroneyi le xa n ki. Moxo tilininjo le mu; a be silala Ala na du. Yahudiyalu bee b'a toxonuma fola. Ala la meleke senumanjo do x'é yita a la, x'a fo a pen xo a xa kila bula í ma, xo í xa taxa a bata, xo xumo do b'é bulu x'a fo a pen.»²³ Piyere x'e jigiya, x'e lasi. Wo lun do, a nin i taxata. Jope lannayabaxo dolu kafuta i ma, xa taxa.²⁴ Wo lun do, i sita

Sesare gallo to. Koroneyi tun b'e laxononin. A tun x'a badinḡolu nin a xanuntelu kili. ²⁵ Piyere dunto luwo xono, Koroneyi nata í buti a xoto x'a batu. ²⁶ Piyere x'a lawuli, x'a fo a pen xo: «Wuli, nte du mu í joxon hadamadin gansan ne ti.» ²⁷ X'e tu xumo la i joxo fe, i dunta luwo xono, xa moxo kiika kamarinḡo tara je. ²⁸ Piyere xo i pen xo: «Alu x'a lon xo ntelu Yahudiyalu la sariya la, a nte dagenin n nin siya xote xa kafu, walla xa dun a la luwo xono. Bari Ala x'a yita nte la, xo n' xana moxo si jaate xo a man senu, walla xo a be noxonin. ²⁹ Wo le x'a tu, alu xa nte kili tumo men, nte man soosoli dun a to, n' nata. Awa, alu xa nte kili kunḡo men na, n' b'a fe xa wo lon.» ³⁰ Koroneyi x'a jaabi xo: «Bi mu a tili naano le ti, nte tun be Alamatara la n' na bunḡo xono, wuralataralo waxato. Nakun kilin, xe do nata í lo nte na xoto, a la faanolu be manala. ³¹ A xo n' pen xo: «Koroneyi, Ala x'é la taralolu jaabi. Í xa segebaxantunḡolu deema na men, Ala hakilo tuta wo la. ³² Moxo dolu ki i xa taxa Jope, xa taxa Simon kili a xa na, wo men be kilila du xo Piyere. A be siginin gulubaarala Simon bata, xooxojida la.» ³³ Wo no bee to, nte xa moxo dolu bula i xa taxa í nofe. Í la na benta. Saasa, Ala xa kuwo mennu bee yita í la xo í x'e fo n pen, n bee kamarinḡo fele in ti Marigi na xoto, xa wolu lame.» ³⁴ Piyere xa xumo ta xo: «Tonḡa la, nte x'a faamu saasa xo Ala nte moxo bola moxo to: ³⁵ Bari siya wo siya to, nin men je sila a na, xa ku tilinḡo ke, wo le la kuwo xa di a pen. ³⁶ Ala x'a la xumo bula Banisirayila moxolu ma, nin wo mu xibaru Dimanḡo ti, men be heero dila moxolu ma, Isa Kirisita barako to. Ate le mu moxolu bee Marigi ti. ³⁷ Kuwo men keta Yude maro bee xono, alu be wo xalama. A damutata Galile, Yaya la waajulo nin a la batiselo xofe. ³⁸ Alu x'a lon Ala xa Nasareti Isa fa Ni Senunḡo la na men, xa sintigiya di a ma. Alu x'a lon du xo Isa xa jamano yaala, xa ku numa ke, xa moxolu bee kendeya, men tunnu be Sentane la fango bulu; bawo a tun nin Ala be i joxo fe. ³⁹ A xa ku wo ku ke Yahudiyalu la jamano xan, anin Yerusaleme dugo xono, ntelu mu wolu bee seedolu ti. I x'a gengen yiro ma, x'a faxesa. ⁴⁰ Bari Ala x'a lakuni a sa tili sabo. Ala x'a tu a x'é yita moxolu la. ⁴¹ Bari moxolu bee la nte, fo ntelu, Ala xa ntelu mennu sugandi wo xanma kabirin waxati jan. Nteli nin a xa domolo ke anin x'e min, a ku niyo xofe xa bo furelu to. ⁴² Isa x'a xoleya n ma xo n xa moxolu waaju, x'a yita i la x'a laxoyiya i ma, xo Ala xa men nasigi x'a ke kendolu nin furelu la kiito tegebaxo ti, wo mu ate le ti. ⁴³ Kilalu bee xumata a la kuwo to. I xo, xo moxo wo moxo je la a la, wo si junubeyafo soto a toxo barako to.» ⁴⁴ Xa Piyere tu wo xumo la, Ni Senunḡo jigita a lamebaxolu bee xan. ⁴⁵ Yahudiya lannayabaxolu mennu xa Piyere dandan, wolu dabaro banta, xo Ala xa Ni Senunḡo lajigi siya tolu dulu xan. ⁴⁶ Bawo i x'a je xo moxolu tunnu be xan xotelu ma x'e fo, xa Ala bunḡa. Wo tumo la, Piyere xo: ⁴⁷ «N si jin

moxo innu bali no tugun i xa batise jiyo la ba; bawo i xa Ni Senunḡo soto í xo ntelu x'a soto na men?» ⁴⁸ Wo to, Piyere xa yanmaro di x'e xa batise Isa Kirisita toxo la. Wo xo, i xa Piyere matara xo a xa tili dantalu ke i bata.

11 Kiladinḡolu nin lannayabaxo mennu be Yude maro xono, wolu x'a me xo siya tolu dulu sonta Ala la xumo ma. ² Piyere naninma Yerusaleme, Yahudiya lannayabaxolu mennu be jaxo kenin waajibo ti, wolu x'a sooso. ³ I xo: «Í dunta siya jaxabalolu bata, í nin i xa domolo ke!» ⁴ Wo to, fen fen keta, Piyere xa wo na bee laxali i pen xo: ⁵ «Xa nte tu Alamatara la Jope, Ala xa fenḡo do yita nte la. Wo fenḡo tun be í xo faanuba. A kun naano tun be tomutanin. Wo jigita xa bo sanḡo to, xa na jigi nte xoto. ⁶ Nte x'a mafele bete. N' xa duguxulo sinnaanmafenḡolu je, anin wulaxonosubolu nin fenḡo mennu b'e fuufula, anin xonolu, mennu b'e baxan sanna. ⁷ N' xa xumaxanḡo do me a fola n' pen xo: «Piyere, wuli í xa fen do faxesa x'a domo.» ⁸ Bari nte x'a jaabi xo: «Ayi Marigi! Bawo fen wo fen domo nte dagenin, walla fen wo fen be noxonin, nte bada man wolu si bula n' da folo.» ⁹ Xumaxan in bota sanḡo to tugun xo: «Ala xa men senuya, í xana wo jaate fen noxonin ti.» ¹⁰ Wo kuwo keta í xo sinḡa saba. Wo xo, wo fenḡolu bee lakoppata xa taxa sanḡo to. ¹¹ Wo waxato fan, nte be luwo men xono, xe saba nata i lo wo luda la. I tunnu kita nte ma xa bo Sesare gallo to. ¹² Ni Senunḡo xo nte pen xo n' nin i xa taxa, n' xana sikka. Nin badinxe innu moxo wooro nin nte taxata Sesare. N bee dunta Koroneyi la luwo ma. ¹³ A x'a fo n pen a xa melekiyo je a la bunḡo la na men, men xumata a pen xo: «Moxo ki Jope, a xa taxa Simon nofe, men be kilila du xo Piyere. ¹⁴ Wo si xumolu fo í pen, mennu si kisilo di í nin í la dinbaya ma.» ¹⁵ Nte xa xumo damuta i pen doron, Ni Senunḡo jigita i xan, í xo a jigita alan xan na men folofolo. ¹⁶ Wo xa nte hakilo lajigi Marigi la jin xuma in kun xo: «Yaya xa batiselo ke jiyo la, bari atelu kennu si batise Ni Senunḡo la.» ¹⁷ Ala xa nilifenḡo men di ntelu ma, bawo n lata Marigi Isa Kirisita la, nin a xa wo nilifen kilinḡo di i dulu ma, nte mu jon ti, nin n' si n' ban Ala sago ma?» ¹⁸ I xa wo xumolu me tumo men, bee x'e de xa Ala tantu xo: «Sikka nt'a to, Ala xa tuubilo sinḡo di siya to dulu ma, walasa i xa nilamaya soobe soto.» ¹⁹ Eteni faxo xo, i xa lannayabaxolu tooro bete. Lannayabaxo mennu jenjenta wo tooro xanma, wolu dolu taxata fo Fenisi nin Sipere marolu to. Dolu taxata Antiyosi gallo to. Wolu man Ala la xumo fo moxo si xote pen, nin Yahudiyalu doronnu nte. ²⁰ Wo bee nin a ta, Sipere nin Sireni lannayabaxo dolu taxata Antiyosi, xa Marigi Isa la xibaru Dimanḡo fo Gereko dulu pen. ²¹ Marigi la sintigiya tun b'e xan, fo moxo kiika xa lannaya ke, xa tuubi Marigi pen. ²² Ala la jama men be Yerusaleme xa wo kuwolu xibaro me tumo men, i xa Baranabasi bula xa taxa Antiyosi. ²³ Baran-

abasi sita Antiyosi tumo men, xa Ala la neemo no je, a nanata. A x'e bee jusudun xo i xa tu notonin Marigi la, i jusukunjo bee la. ²⁴ Baranabasi tun mu moxo puma le ti; a be fanin Ni Senunjo la, anin a la lannaya du xa bun. Jamaba sonta Marigi ma. ²⁵ Wo xo, Baranabasi taxata Tarasi, xa Soli njinin. ²⁶ A x'a je tumo men, a taxata a ti Antiyosi. I fulo bee xa san kilin dafaninjo ke lannayabaxolu bata, xa moxo kiika laxaran. Xa lannayabaxolu kili xo "kerecenjolu", wo damutata Antiyosi le. ²⁷ Wo waxato, kila dolu bota Yerusaleme, xa na Antiyosi. ²⁸ Wolu to kilin, a toxo xo Agabusi, wo wulita x'a fo Ni Senunjo barako to xo dondin, xonxoba si na ke duguxulo bee xan. Wo keta mansaxe Kulode tilo. ²⁹ Lannayabaxolu x'a latege, xa deemalo do ki Yude maro badinjolu ma, x'a la i bee kilin kilin sinkuwo xan. ³⁰ I xa nilifenjolu toben, x'e ki Yude lannayabaxolu la moxobalu ma, x'e dun Baranabasi nin Soli bulu.

12 Wo waxato, mansaxe Herode xa Ala la jama moxo dolu muta x'e tooro. ² A xa Yaya xotoxe Yaxuba faxes fannjo la. ³ A x'a je tumo men xo wo diyata Yahudiyalu nen, a x'a latege xa Piyere du muta. Wo keta Buurufuunulantan sallo to. ⁴ Piyere mutaninjo x'a bula kaso la, mansaxe Herode x'a dun sorodasi naani sigidulama naani bulu, xo i x'a korosi. Herode tun b'a fe x'a lalo jama na xoto kiito xanma, Tanbinxansallo xofe. ⁵ Xa Piyere tu kaso la, Ala la jama moxolu balaninjo tuta Alamatara la a nen. ⁶ Herode tun b'a fe xa Piyere lalo jama na xoto kiito xanma lunjo men, wo suwo, Piyere tun be sinnoxonin sorodasi fula te. A tun be sitinin negejoloxo fula la. Dakantabaxolu tunnu be lonin kasobunjo da la. ⁷ Wo na in, Marigi la melesiyo do nata. Keneyaba keta kasobunjo xono. Melesiyo xa Piyere konkon a toxo to, x'a lakuni. A xo a nen xo: «Wuli tariya!» Wo no bee to, joloxolu butunta xa bo a bulolu la. ⁸ Wo xo, melesiyo xo Piyere nen xo: «Í te tosi ti, x'é la samatolu dun.» Piyere xa wo ke. Wo xo, melesiyo x'a fo a nen xo: «Í la dorokeba dun x'a lo n'nofe.» ⁹ Piyere bota x'a lo melesiyo nofe. Melesiyo xa men ke, Piyere tun man la a la xo wo mu tonja ti. A tun nen xo a je siiboxan ne. ¹⁰ A nin melesiyo tanbita dakantabaxa fololu nin fulananjolu la, xa na si negedama, moxo be bola men fe xa si banto to, xa taxa gallo xono. Wo da yeleta a fan ma i na. I bota xa taxa na dondin bedo to. Nondin kilin to, melesiyo taxata xa Piyere tu non. ¹¹ Piyere xa hakili soto tumo men, a xo: «A xoyiyata nte ma saasa xo Marigi x'a la melesiyo ki xa na n'bo Herode la fango bulu, anin xa n' kisi Yahudiyalu la tooro njaneyaninjolu bee ma.» ¹² A xa wo kuwolu faamu tumo men, a taxata Mariyama la luwo ma. Yaya men be kilila xo Maraka, wo na le mu Mariyama ti. Moxo kiika tun be kamarinin non xa Ala matara. ¹³ Piyere xa luwo da konkon. Baaradinmuso do nata da la, walasa xa da konkonbaxo je. Wo baaradinmuso toxo xo Roda. ¹⁴ Wo baaradinmuso xa Piyere

xanjo mategeninjo lon tumo men, a njinata dayelo kun, najo bulu. A x'é bori xa taxa luwo xono, x'a fo xo Piyere be lonin keno ma, da la. ¹⁵ I xo a nen xo: «Fa le b'é to!» Bari a x'a lahenne i ma xo tonja le mu. I xo: «A la melesiyo le mu.» ¹⁶ Wo bee to, Piyere tuta da konkonna. I xa da yeke x'a je tumo men, i dabaro bee banta. ¹⁷ A x'a bulo xotota i nen, xo i x'e de. Marigi x'a labo kaso la na men, a xa wo na fo i nen. A xo i nen du xo: «Alu xa jin xibaru in fo Yaxuba nin badin tolu nen.» Wo xo, a bota je, xa taxa dula xote. ¹⁸ Saxo yeleninma, sorodasolu ja wulita, bawo i man Piyere keja lon. ¹⁹ Herode xa Piyere njinin. A man a je tumo men, a xa dakantabaxolu tosegesege wo kuwo to, xa yanmaro di xo wolu xa faxes. Wo xo, Herode bota Yude maro la, xa taxa Sesare gallo to, xa waxati ke non. ²⁰ Herode tun be diminnin bete Tire nin Sidon moxolu xanma. Wolu benta a to xa taxa a bata. I nin mansaxe xotosigibaxo x'e noxo faamu wo kuwo to. Wo toxo le xo Bulasitusi. Wo xo, i taxata benjo njinin Herode la, bawo i la baluwo be bola mansaxe la jamano le to. ²¹ Lunjo men fota, Herode x'a la mansadoroko dun, x'é sigi a la mansasigilango xan, xa xuma jama nen. ²² Jama keta ma xa feten xo: «Moxo xan nte jin ti, ala do le xan mu.» ²³ Bari wo no bee to, Marigi la melesiyo x'a tego maxa Herode la; bawo Ala nin bunja men xa xan, a xa wo la a fan xan. Tunbolu dunta a to, a sata. ²⁴ Wo bee nin a ta, Ala ken na xumo tun be taxala na, a tun be jenjena xa taxa a fe. ²⁵ Baranabasi nin Soli la baaro banninma Yerusaleme, i x'e koppa, i nin Yaya, men be kilila xo Maraka.

13 Kilalu nin karanmoxolu tunnu be Ala la jama xono Antiyosi: Baranabasi, Simeyon men kilita xo Finmanjo, Lusiyusi men be bola Sireni, anin Manayen men nin jamana kuntigi Herode labunjata i noxo fe, anin Soli. ² Lun do, x'e tu Marigi batulo nin sunjo la, Ni Senunjo xo i nen xo: «Nte xa Baranabasi nin Soli kili baaro men xanma, alu i bula i xa wo ke nte nen.» ³ Wo keninma, i sunta, xa Ala matara, x'e bulolu la i xan. Wo xo, i x'e bula xa taxa. ⁴ Ni Senunjo xa Baranabasi nin Soli ki tumo men, i taxata Selusi. I x'e tu non, xa batonjo ta xa taxa Sipere sutto to. ⁵ I sininma Salamine, i xa Ala la xumo fo Yahudiyalu la Alabatusuwolu xono. Yaya men be kilila xo Maraka tun be i bata x'e deema. ⁶ I xa wo sutto tokutun, fo xa si Pafosi. I xa doomaxe do je non, a toxo xo Bara Yesu. Yahudiya le mu. A tun b'a fan kenin kila ti. ⁷ A tun be Goferenere Serejusi Polusi bata. Goferenere in tun mu moxo hakilima le ti. A xa kila bula Baranabasi nin Soli ma, bawo a tun b'a fe xa Ala la xumo lame. ⁸ Bari doomaxe Elimasi, nin wo mu Bara Yesu toxo ti gerekixanjo to, wo xa Baranabasi nin Soli sooso. A tun be na njinna, xa goferenere bali xa lannaya ke. ⁹ Wo tumo la, Soli men be kilila xo Poli, wo tun be fanin Ni Senunjo la, a x'a na lo doomaxe to, x'a fo a nen xo: ¹⁰ «Nanbaramanso nin

moxo jaxo, Sentanemoxo, ku beto bee jaxo! Í si fata Marigi la sila tilinningolu ladogila ba? ¹¹ Saasa Marigi s'a tego maxa í la. Í si fiyonpa. Í si waxati ke í man tilo je.» Wo no bee to, Elimasi fiyonpata. Dibo dunta a na la. A x'a boxo bee moomo fo a si moxo je, men si a bu-lo muta. ¹² Goferehero xa wo kuwo je tumo men, a xa lannaya ke. A xa xaranjo men me Marigi la kuwo to, wo x'a dabaro ban bete. ¹³ Poli nin a tojoxolu xa batonjo ta Pafosi, xa taxa Pereje, men be Panfili jamano xan. Yaya Maraka nin i talata non. Ate x'é koppa xa taxa Yerusaleme. ¹⁴ Poli nin Silasi bota Pereje, xa taxa Antiyosi men be Pisidi maro la. Tofopolunjo, i dunta Alabatusuwo xono x'e sigi. ¹⁵ Musa la sariya nin kilalu la kitaabolu xaranjo xo, Alabatusuwo kuntigolu xa moxo bula a fola i pen xo: «N badinjo, nin xuma be alu kun x'a fo jama pen, x'a jusudun, waxato be alu bulu saasa.» ¹⁶ Poli wulita, x'a bulo xotota jama pen xo: «Banisirayila moxolu, anin alu tolu mennu be silala Ala na, alu i tulo lo. ¹⁷ Banisirayila dinjolu la Ala xa n mamaxelu sugandi. A x'e la siya labugi, x'e tu siginfelu ti Misira. Wo xo, a x'a la sintigiyaba yita, x'e labo Misira. ¹⁸ A mujata i xoto fuxo la, tan naani sanji xono. ¹⁹ A xa siya woorowula halagi Kanan jamano to. Wo xo, a xa wolu la jamano di n mamaxelu ma, x'a ke i ta ti. ²⁰ Wo bee keta san keme naani nin bi luulu xono. «Wo xo, a xa kuntigolu lasigi i kunna, fo xa taxa si kila Samuyeli tilo ma. ²¹ Wo xo, i xa mansaxe do njinin Ala la. A xa Kise dinxe Sawuli lasigi i kunna. Wo bota Bensamen bonsonjo to. Wo sigita i kunna tan naani sanji xono. ²² Ala xa Sawuli labo mansaya la tumo men, a xa Dawuda lasigi i kunna mansaxe ti. Ala xo Dawuda la kuwo to xo: "N' xa Yese dinxe Dawuda soto. Nte sago-lamoxo le mu. A si nte sago bee ke." ²³ Ala xa Dawuda bonsonjo do ke Banisirayila Kisibaxo ti, x'a la a la lahido xan. Wo mu Isa le ti. ²⁴ Jannin Isa tun xa na, Yaya tun be Banisirayila moxolu bee waajula, xo i x'e xodi i la junubolu la, xa batise. ²⁵ Yaya tun b'a fola a la baaro bantumoxo xo: "Alu pen, nte mu jon ti? Alu be men naxnonin, nte nte wo ti. Bari a si na nte xofe. Haali xa ke a la samatajulufirinna ti, nte nin wo man xan." ²⁶ «N badinjo, ate mennu bota Burehima to, anin alu tolu men dulu be silala Ala na, nin kisili xuma innu kita n bee le ma. ²⁷ Yerusaleme moxolu nin i la kuntigolu kennu man a lon Isa mu men ti. Kilalu la xumolu men dulu be xaranna tofopolunjo, i man wo dulu faamu, bari i xa wo xumolu dafa, i xa kiito tege Isa xan tumo men. ²⁸ Haali x'a tara i man faxalikun je Isa la, i x'a njinin Pilate la xo a x'a faxesa. ²⁹ Mennu safeta Kitaabo xono a la kuwo to, i xa wo bee ke tumo men, i x'a lajigi xa bo gengenyiro xan, x'a bula xaburo xono. ³⁰ Bari Ala x'a lakuni xa bo furelu to. ³¹ Men tunnu nin Isa bota Galile, xa taxa Yerusaleme, a x'é yita wolu la tili kiika xono. Saasa, wolu mu a seedolu ti, xa xuma Banisirayila moxolu pen a la kuwo to. ³² Ntelu be pin xibaru Diman

in fola alu pen, xo Ala tun xa lahido men ta n mamaxelu pen, ³³ a xa wo latimme n pen bi, alan ntelu mennu keta i bonsonjo ti. A xa Isa lakuni í xo a be safenin Jaburu fulanango xono na men xo: "Ite le mu n Dinxeti; kabirin bi, nte keta í Fa ti." ³⁴ Ala tun x'a fo xo a si a lakuni xa bo furelu to, xo a me sa tugun, a me toli. A tun x'a fo ten xo: "Nte xa lahido senumanjo mennu ta Dawuda pen, sikka si nt'a to, nte si wolu ke alu pen." ³⁵ Wo le x'a tu, a xo dula xote du xo: "Í me son, í la senumanjo xa toli xaburo xono." ³⁶ Dawuda ken xa Ala la kulategeningolu dafa a la waxato, wo xo, a sata. A lasita a mamaxelu senbo to, a toli. ³⁷ Bari Ala xa men nakuni xa bo furelu to, wo man toli. ³⁸ N badinjo, alu a lon xo alu si junubeyafo soto xa jaate moxo tilinningo ti Isa le barako to. Alu man sin xa jaate moxo tilinningo ti Musa la sariya la. ³⁹ Isa le barako to, moxo wo moxo xa lannaya ke, wo si jaate moxo tilinningo ti. ⁴⁰ Wo xanma, alu i korosi, walasa kilalu xa xumo mennu fo, wolu xana alu lasoto. Kilalu xo: ⁴¹ "Alu a mafele, atelu mennu be Ala la kuwolu mafeyaxan, alu dabaro xa ban, xa halagi. Bawo nte be nala kuwo do kela alu la waxato, nin moxo x'a laxali alu pen, alu me la a la." » ⁴² Poli nin Baranabasi boto Alabatusuwo xono, moxolu x'e matara xo i xa xuma wo kuwolu xan tugun tofopolun nata. ⁴³ Jama jenjenjo xo, Yahudiyalu anin moxo mennu tuubita xa dun Yahudiyalu la diino to, wolu kiika x'a lo Poli nin Baranabasi nofe. I xa wo moxolu tonben, xo i xa Ala la neemo mutasoobe. ⁴⁴ Wo tofopolunjo noxon kun, gallo tala bee kamarita x'e be Marigi la xumo lamela. ⁴⁵ Yahudiyalu xa wo jama je tumo men, i kiiliyata. I xa Poli sooso, x'a nani. ⁴⁶ Poli nin Baranabasi hakilo lasigininjo xumata i pen xo: «Waajibo le tun mu Ala la xumo xa fo alu fololu pen. Bari alu x'e ban a to, xa kiito tege alu fannu xan, x'a yita xo alu nin nilamaya banbalo man xan. Wo le x'a tu saasa, n si i patilin siya tolu la. ⁴⁷ Bawo Marigi xa kuwo men waajibiyi n ma, wo fele xo: "N' x'é lasigi xo í xa ke keneya ti siyalu pen, walasa í xa kisilo lasi duniya bee ma." » ⁴⁸ Siya tolu xa wo xumolu me tumo men, i papata, xa Marigi la xumo bunpa. Ala xa i fen wo fen sugandi nilamaya banbalo xanma, wolu bee xa lannaya ke. ⁴⁹ Marigi la xumo jenjenta wo jamano dula bee to. ⁵⁰ Bari Yahudiyalu xa gallo musu toxoma Alabatubaxolu nin gallo moxobalu xonotosoli Poli nin Baranabasi xanma; i x'e tooro, x'e xoyi x'e labo i la jamano to. ⁵¹ Poli nin Baranabasi x'e sinnabanxo konkon x'a bo i sinjolu la i xanma, wo xo, i taxata Ikone gallo to. ⁵² Antiyosi lanayabaxolu kennu papabeteta, xa fa Ni Senunjo la.

14 Poli nin Baranabasi sininjo Ikone, i dunta Yahudiyalu la Alabatusuwo xono non du. I xumata fo Yahudiyalu nin Gerekolu moxo kiika xa lannaya ke. ² Bari Yahudiyalu mennu man son lannaya ma, wolu xa siya tolu moxolu xonotosoli badin lanayabaxolu xanma. ³ Wo bee nin a ta, Poli nin Baran-

abasi meta Ikone. I ja sigininjo tun be xumala je, x'e gigo tu Marigi xan. Marigi xa barako di i ma, xa taagumansedolu nin kawakuwolu ke, mennu s'a yita xo i be men waajula Ala la neemo barako to, xo wo mu tonja le ti. ⁴ Gallo moxolu talata xan ma. Dolu nin Yahudiyalu keta boxo, dolu nin kiladinjolu keta boxo. ⁵ Yahudiyalu nin siya tolu nin i la kuntigolu benta a to, xa ku jaxo ke Poli nin Baranabasi la, x'e bun kuro la x'e faya. ⁶ Wolu xa wo me tumo men, i x'e bori xa taxa Likawoni maro la, xa taxa Lisitere nin Derebe gallolu to. ⁷ I xa xibaru Dimanjo fo non dulu. ⁸ Xe do tun be Lisitere, a tun be siginin tuma bee, bawo a namatama le wuluta. A bada man í taxama. ⁹ A tun be Poli la xumo lamexan. Poli x'a mafele, a x'a je xo lannaya b'a la xa kendeya. ¹⁰ A xo a nen barako to xo: «Wuli í x'é latilin í sinjolu da!» Xe x'é ba x'é lo a sin fulo da, x'é taxama. ¹¹ Jama xa Poli la kebaaro je tumo men, i fetenta x'a fo Likawonixanjo to xo: «N na bolibatutalu x'e ke moxolu ti, xa jigi n xan.» ¹² I xa Baranabasi kili xo i la bolibatuta Susi, xa Poli kili xo i la bolibatuta Heremesi, bawo ate le tun mu xumala ti. ¹³ Bolibatuta Susi batusuwo do tun be gallo dunda la. A la sadaxalaxibaxo nata tuura dolu ti wo dula. Wolu tunnu be masitinin yirifirolu la. A tun nin jama keta a fe xa sadaxo bo Baranabasi nin Poli nen. ¹⁴ Bari kiladin fula in, Baranabasi nin Poli xa wo lon tumo men, i x'e la dorokolu tofara, x'e bori taxanin jama ma, xa feten xo: ¹⁵ «He! Mun na alu be pin kela? Ní xo, ntelu dulu mu alu joxon hadamadin nelu ti! N nata Isa la xibaru Dimanjo fo alu nen, walasa alu xa pin bolibatuta fu innu bula, x'e padi Ala nilama la, wo men xa sanxulo nin duguxulo nin xooxojiyo nin i to fenjolu bee da. ¹⁶ Waxato mennu tanbita, a xa siyalu bee tu je, i xa taxa i fannu la silolu fe. ¹⁷ Haali wo, a x'é yita tumo bee a la numayalu la. A be sanjiyo dila alu ma xa bo sanjo to, xa senefenjolu di i waxato. A be baluwo dila alu ma, x'alu lanana.» ¹⁸ Haali kiladinjolu xumata ten, i tunnu si kori jama balila tuura sadaxala i nen. ¹⁹ Yahudiya dolu nata xa bo Antiyosi nin Ikone. Wolu xa jama hakilo yelema fo i xa Poli bun kurolo la xo i b'a faxala. Wo xo, i x'a saba x'a labo gallo xono. I tunnu nen xo a sata le. ²⁰ Bari lannayabaxolu nata a laminin tumo men, a wulita, xa dun gallo xono. Wo lun do, a nin Baranabasi taxata Derebe. ²¹ Poli nin Baranabasi xa xibaru Dimanjo fo Derebe gallo moxo nen. I xa lannayabaxa kiika soto. Wo xo, i x'e koppa xa na Lisitere, xa bo non xa taxa Ikone, wo xo xa na Antiyosi. ²² I tunnu be lannayabaxolu sinsinna, x'e jusudun, xo i xa tu lannaya to. I tunnu b'a fola i nen du xo: «Waajibo le mu tooro kiika xa n soto jannin n be dunna Ala la Mansaya xono.» ²³ I xa moxobalu lasigi Ala la jamalu kilin wo kilin kunna. I sunta, xa Ala matara. Wo xo, i x'e xarifa Marigi ma, i lata wo men na. ²⁴ Wo xo, Baranabasi nin Poli xa Pisidi jamano tokutun, xa si Panfili jamano to. ²⁵ I xa Ala la xumo fo Pereje. Wo xo, i taxata Atali. ²⁶ I xa

batonjo ta non, xa taxa Antiyosi, i tunnu xarifata Ala la neemo ma dula men. Wo keta baaro men xanma, i xa wo ke x'a dafa. ²⁷ I sininma Antiyosi, i xa Ala la jama kamari. Ala xa sinjo di i ma xa fen wo fen ke, i xa wo bee dantege i nen. Ala xa da yeke siya to dulu nen na men, walasa i xa lannaya ke, i xa wo na du laxali i nen. ²⁸ Poli nin Baranabasi tuta lannayabaxolu bata non waxati jan xono.

15 Moxo dolu bota Yude maro la, xa na Antiyosi, x'e badin lannayabaxolu laxaran xo: «Nin alu man naxa í xo Musa la sariya x'a fo na men, alu me kisi no.» ² Poli nin Baranabasi man son wo xumo ma fewu. Wo kuwo keta soosoliba ti i nin wo moxolu te. A lategeta xo Poli nin Baranabasi anin moxo dantalulu xa taxa Yerusaleme, walasa i nin kiladinjolu nin moxobalu xa xuma wo kuwo xan. ³ Wo to, Ala la jama x'e ki xa taxa. I taxato, i xa Fenisi jamano nin Samari jamano tokutun. Siya tolu tuubita na men, i tunnu be wo na foxan. Wo xa badin lannayabaxolu bee nitodiya bete. ⁴ Poli nin Baranabasi sita Yerusaleme tumo men, Ala la jama nin kiladinjolu anin moxobalu x'e mutakubete. Ala xa sinjo di i ma xa fen wo fen ke, i xa wo bee na fo i nen. ⁵ Farisiya dolu, mennu xa lannaya ke, wolu wulita x'a fo xo: «Waajibo le mu, siya tolu moxolu mennu xa lannaya ke, xo wolu xa naxa, anin i xa Musa la sariya labatu.» ⁶ Kiladinjolu nin moxobalu x'e joxo tara, xa wo xumo segesege. ⁷ Wo xumo keta joxoma-soosoba ti tumo men, Piyere wulita x'é lo. A xo: «Ní badinjolu, alu x'a lon xo Ala xa nte sugandi alu to kabirin tuma jan, walasa nte xa xibaru Dimanjo fo siya tolu nen, nin i si a me xa lannaya ke. ⁸ Ala men xa moxolu bee jusukunna kuwolu lon, ate x'a yita xo a sonta siya tolu ma, a xa Ni Senunjo di wolu ma tumo men, í xo a x'a di ntelu ma na men. ⁹ Ala man faranfansi si ke ntelu Yahudiyalu nin siya tolu te. A x'e jusukunjolu senuya i la lannaya le koso. ¹⁰ Mun na saasa, alu be Ala xotobola? N benbalu nin n fannu korita dono men xoto, mun na alu b'a fe xa wo dono la lannayabaxolu kun? ¹¹ Ní be saagila a ma tugun xo, n be lanin a la xo n kisita Marigi Isa la neemo le barako to, í xo itelu dulu.» ¹² Wo to, jama bee x'e de xa Baranabasi nin Poli lame. Ala xa sinjo di i ma xa taagumansedolu nin kawakuwolu mennu ke siya tolu to, i xa wolu bee fo. ¹³ I x'e soto wo xumo la tumo men, Yaxuba xa xumo ta xo: «Ní badinjolu, alu n name. ¹⁴ Ala hakilo tuta siya tolu kun na men kabirin folofolo, xa moxo dolu sugandi i to, x'e ke a ta ti, Simon xa wo fo. ¹⁵ Wo nin kilalu la xumolu benta i joxo ma, bawo a be safenin Kitaabo xono xo: ¹⁶ "Marigi xo: Wo xo, nte si n koppa. Dawuda la bunjo men boyita, nte si wo tolo. Dula mennu kutunta, n si wolu lawuli, x'e latilin. ¹⁷ Wo to, hadamadin tolu bee si Marigi njinin, nte xa siya mennu bee kili x'e ke n talu ti. Marigi xo ten, ate men x'a tu wo kuwolu ¹⁸ lonta kabirin waxati jan." ¹⁹ Yaxuba

xo: Wo le x'a tu, nte hakilo la, siya tolu mennu x'e nadi Ala la, n man xan xa xoleya bula wolu sinjo xoto. ²⁰ Bari, alan xa safe ki i ma x'a fo i pen xo i xana boliso-subu noxonin domo. I xa i fannu tanga jadoya ma. I xana jifo domo walla jelo. ²¹ Sabula kabirin folofolo, waajulo be kexan Musa la sariya xan gallubalu bee to, a be xaranna Alabatusuwolu xono tofopolun wo tofopolun.» ²² Wo to, kiladinjolu nin moxobalu anin Ala la jama bee benta a to xa moxo dantalu sugandi i fannu to. I xa wolu la Poli nin Baranabasi xan, x'e ki Antiyosi. I xa Yudasi nin Silasi sugandi. Yudasi be kilila du xo Barasabasi. Lannayabaxolu la bunja tun be lanin wolu xan. ²³ Safe men dunta i bulu, wo xono xumolu fele: «N badin lannayabaxo mennu bota siya tolu to, alu mennu be siginin Antiyosi gallo xono, anin Siri jamano to, anin Silisi jamano to: Kiladinjolu nin moxobalu anin alu badinjolu be alu xontonna. ²⁴ N x'a me xo moxo dolu bota n bata jan, xa taxa alu bata, xa xumo dolu fo alu pen, mennu x'alu hakilo paxami, x'alu xonotolafilili. Moxo man i bula wo la. ²⁵ Wo le x'a tu, n benta a to xa moxo dolu sugandi, x'e ki alu ma, x'a kafu n badin xanuningjolu ma, nin wo mu Poli nin Baranabasi ti, ²⁶ wo mennu bota i niyo la, n Marigi Isa Kirisita la baaro xanma. ²⁷ N fele Yudasi nin Silasi kila alu ma, n xa xumo men fo safe xono, i si wo fo alu pen. ²⁸ Ni Senunjo nin ntelu fannu x'a latege, xo n xana doni xote la alu kun fo jinnu, mennu be waa-jibiyani. ²⁹ Alu xana bolisosubu domo, walla jelo, walla jifo. Al'alu fannu tanga jadoya ma. Nin alu si alu fannu korosi no wo kuwolu ma, wo le xa nin. X'alan n ben!» ³⁰ Wo kilalu labulaninjo xo, i taxata Antiyosi xa Ala la jama kamari xa wo safe d'i ma. ³¹ Wolu xa wo xaran tumo men, i najata, bawo jusudunni xumo kiika tun b'a to. ³² Yuda nin Silasi fan tunnu mu kila lelu ti. Wolu xa lannayabaxolu jusudun i la xuma kiika fe, x'e la lannaya sinsin. ³³ I tuta i bata waxati la. Wo xo, lannayabaxolu x'e labula walasa i x'e koppa i kilabaxolu ma. I duwata i pen xo i numa xa si. [³⁴ Bari Silasi x'a latege xa tu Antiyosi.] ³⁵ Poli nin Baranabasi tuta Antiyosi. I nin moxo kiika xotelu tunnu be moxolu laxaranna, xa Marigi la xibaru Dimanjo fo i pen. ³⁶ Waxati tanbita, wo xo, Poli xo Baranabasi pen xo: «N tunnu taxata gallo mennu to, xa Marigi la xumo fo, n x'e koppa xa taxa bo n badinjolu ma wo dulalu, x'a mafele i be na men lannaya to.» ³⁷ Baranabasi tun b'a fe i nin Yaya xa taxa, ate men be kilila du xo Maraka. ³⁸ Bari Poli xo, xo a man xan xa taxa i nofe. Bawo a x'e fata i ma Panfili jamano xan, a man son a nin i xa baarolu laban i noxo fe. ³⁹ Mankanba dunta Poli nin Baranabasi te fo i talata. Baranabasi xa Yaya Maraka ta. I dunta batonjo do xono xa taxa Sipere. ⁴⁰ Poli ken xa Silasi le sugandi, i taxata i noxo la. Lannayabaxolu x'e xarifa Marigi Ala la neemo ma. ⁴¹ A xa Siri nin Silisi jamano bee yaala, xa Ala la jamalu sinsin lannaya to.

16 Poli taxata Derebe, wo xo, a taxata Lisitere. Lannayabaxo do tun be non, men toxo xo Timote. A na tun mu Yahudiya le ti, men xa lannaya ke. Bari a fa tun mu Gereko le ti. ² Lisitere nin Ikone lannayabaxolu tunnu be Timote toxopuma fola. ³ Poli tun b'a fe a xa ke a taxamajoxo ti. A xa Timote paxa wo jamano Yahudiyalu koso, bawo i bee tun x'a lon xo a fa mu Gereko le ti. ⁴ Poli nin a taxamajoxo taxata galluba wo galluba to, kiladinjolu nin moxobalu xa kuwo mennu latege Yerusaleme, i xa wolu fo lannayabaxolu pen anin x'a fo i pen xo i xa wo silo taxama. ⁵ Ala la jamalu tunnu be sinsinxan lannaya to. Lun wo lun, do tun be kafuxan lannayabaxolu ma. ⁶ Poli nin a taxamajoxolu xa Firiji nin Galasi marolu tofara, bawo Ni Senunjo tun x'e bali xa Ala la xumo fo Asi maro xono. ⁷ I sita Misi jamano dunda la tumo men, i x'a mafele xa taxa Bitini, bari Isa Ni Senunjo x'e bali xa taxa non. ⁸ Wo keta tumo men, i xa Misi jamano tofara xa taxa Torowasi. ⁹ Wo suwo to, Ala xa kuwo do yita Poli la. A xa Maseduwane xe do je lonin, wo x'a matara xo: «Na Maseduwane jamano to, xa n deema!» ¹⁰ Poli xa wo je doron, n x'a njinin xa taxa Maseduwane jamano xan, bawo n x'a lon xo Ala xa n kili xa taxa xibaru Dimanjo fo wo jamano moxolu pen. ¹¹ N xa batonjo ta Torowasi, x'e tilin xa taxa Samotarasi. Wo lun do, n taxata Neyapolisi. ¹² N bota non xa taxa Filipe, nin wo mu Maseduwane jamano galluba do ti. Non be Romengolu la maro xono. N xa tili kiika ke wo galluba to. ¹³ Tofopolunjo, n bota gallo xono, xa taxa xoda la, n tunnu hakilo la xo n si Alamataradula tara non. N x'e sigi wo dula. N xa xumo dolu fo musolu pen, men tunnu kamarita je. ¹⁴ Muso do tun be i to xo Lidi, Tiyatirengo le mu. A tun be faanu wulen bete fiiro le la. Ala batubaxo le tun mu. A tun be n namela. Marigi x'a jusukunjo dayele walasa a xa Poli la xumolu lame bete. ¹⁵ Lidi nin a la luxonomoxolu batiseta tumo men, a xa n matara xo: «Nin alu b'a jaatenin xo nte be lanin Marigi la, alu na jigi nte bata.» A x'a ke n bulu waajibo ti n xa son. ¹⁶ Lun do, n taxato Alamataradula, n nin jonmuso do benta: Jinno le b'a to, a tun be felelo kela wo le barako la. A tun be xaalisi kiika lasixan a marigilu ma wo felelo to. ¹⁷ Wo musu jinneto x'a lo ntelu nin Poli nofe xa feten xo: «Nin xe innu mu Ala Xototaninba la jonjo lelu ti. I be kisilo silo le pafoxan alu pen.» ¹⁸ Jidinmuso xa wo ke tili kiika xono. Labanjo la, Poli diminta, a x'e koppa x'a fo jidinmuso la jinno pen xo: «Isa Kirisita toxo barako to, bo muso to.» Jinno bota wo no bee to. ¹⁹ Wo jonmuso marigilu x'a lon tumo men xo i la xaalisisotoda tinjata, i xa Poli nin Silasi muta xa taxa i ti kiititegelalu bata, gallo dakeno la. ²⁰ I sita non tumo men, jonmuso marigilu x'a fo Rome kiititegelalu pen xo: «Nin moxo innu be n na gallo paxamila; Yahudiya lelu mu. ²¹ I be laado dolu fola a nte dagenin ntelu Romengolu xa son mennu ma, walla x'e ke.» ²² Jama

du wulita Poli nin Silasi xanma. Kiititegelalu xa yanmaro di, xo Poli nin Silasi la dorokolu xa bo i xanna, x'e gaja. ²³ I buwobeteta tumo men, i x'e bula kaso la, x'a xoleya garado ma xo a x'e lakorosi bete. ²⁴ A xa wo yanmaro soto tumo men, garado xa Poli nin Silasi bula kasobunjo jooxe to, x'e sinjolu dun kutunjo la.

²⁵ Dugutala ma, Poli nin Silasi tun be Ala matarala, xa Ala tantu donkilolu la. Kasolamoxo tolu tunnu be i lamela. ²⁶ Wo dulandin kilinjo, duguxulu jarajaraba ke-ta. Kasobunjo jusigilanjolu jarajarata. Kasobunjo dalu bee yeleta. Kasolamoxolu bee la joloxolu firinta.

²⁷ Garado kunita. A xa kasobunjo dalu je yelenin tumo men, a x'a la fanjo boosi xo a be a fan faxala. A tun hakilo la xo kasolamoxolu bee x'e bori. ²⁸ Bari Poli fetenbeteta xo: «Í xana fusi ke í fan na, n bee be jan.»

²⁹ Wo tumo, garado xo x'e xa na lanpo ti. A x'e tariya xa dun kasobunjo xono. Silanjo kujaxo bulu, a jarajarato taxata í boyi Poli nin Silasi xoto. ³⁰ Wo xo, a x'e labo keno ma, x'e njinxa xo: «N batufalu, nte xa xan xa mun ke walasa n xa kisi?» ³¹ I x'a jaabi xo: «La Marigi Isa la, í si kisi, í nin í la dinbaya.» ³² I xa Marigi la xumo fo a nin a la dinbaya bee jen. ³³ Wo suwo waxati kilinjo fan, garado xa Poli nin Silasi la joogilidalu ku. Wo xo, a nin a la luxonomoxolu bee batiseta. ³⁴ Wo bee xo, a taxata Poli nin Silasi ti a la luwo ma, xa domolo di i ma. Wo xe nin a la dinbaya bee jajata bete; bawo i lata Ala la. ³⁵ Saxo yeleninma, kiititegelalu xa moxo dolu ki garado ma xo a xa wo xe innu bula. ³⁶ Garado nata x'a fo Poli jen xo: «Kiititegelalu xa kila bula xo x'alu bula. Awa, alu bo xa taxa heero to.» ³⁷ Bari Poli x'a fo kiladinjolu jen xo: «Ntelu mennu mu Romenga yerewuluwolu ti, i xa n buwo moxolu bee pala x'a tara kiito man tege, wo xo, i xa n bula kaso la. Saasa, i b'a fe ba xa n mundin bula? Ayi. I fannu xa na n nabo.» ³⁸ Kiladinjolu taxata wo xumolu fo kiititegelalu jen. Wolu x'a lon tumo men xo Romengo lelu mu, i silata. ³⁹ I nata yafo njinin Poli nin Silasi fe, wo xo, x'e labo, x'e matara xo i xa bo wo gallo to. ⁴⁰ Poli nin Silasi bota kaso la tumo men, i taxata Lidi la luwo ma. I xa badin lannayabaxolu je, x'e jusudun. Wo xo, i taxata.

17 Poli nin Silasi tanbita Anfipolisi nin Apoloni la, xa taxa si gallo do to xo Tesalonike. Yahudiyalu la Alabatusuwo do tun be non. ² Poli dunta wo xono í xo a dalita a kela ja men. A xa moxo mennu tara je, a xa tofopolun saba ke a be xumala wolun jen x'a la Kitaabo xumaxanjo xan. ³ Poli tun b'a yitala x'a laxoyiya i ma xo waajibo le tun mu Kirisita xa tooro, xa sa; wo xo, a xa kuni xa bo furelu to. A tun b'a fola xo: «Nte be Isa men na xumo fola alu jen, wo le mu Kirisita ti.»

⁴ Yahudiya dolu, nin Gereki Ala batubaxo kiika anin musu toxobonin kiika lata Isa la, xa kafu Poli nin Silasi ma. ⁵ Bari wo kuwo xa Yahudiyalu lakiliya. I xa gallo moxo kuntanjo dolu kamari men tunnu be bedolu fe, x'e bula sonxo kela, xa gallo jajami. I taxata Jason na

luwo ma, xa Poli nin Silasi njinin, xo i be taxala i tila jama ja xoto. ⁶ I man wolu tara non tumo men, i xa Jason nin lannayabaxo dolu muta xa taxa wolu ti gallo fankamalu bata. I tunnu be fetenna xo: «Nin xe in mennu xa duniya bee jajami, i fele innu ti jan saasa. ⁷ Jason x'e jigiya a bata. I bee be Rome mansaxe la sariya soosola x'a fo xo mansaxe xote be je, nin wo mu Isa ti.» ⁸ Galluxonomoxolu nin fankamalu xa wo xumolu me tumo men, i hakilo jajamita. ⁹ Jason nin a topoxolu tunnu xa xan xa xalisi jaate do sara fankamalu ma, walasa i xa bula. ¹⁰ Suwo kuta doron, badin lannayabaxolu xa Poli nin Silasi bula xa taxa Bere. I sita gallo xono tumo men, i taxata Yahudiyalu la Alabatusuwo xono. ¹¹ Bere Yahudiya tunnu xa nin Tesalonike Yahudiyalu ti. I xa Ala la xumo lame nitodiya to. I tunnu be Kitaabo xaranna lun wo lun, x'a mafele nin Poli la xumolu mu tonja le ti. ¹² I kiika xa lannaya ke. Gerekele to, faamamusolu nin xebalu dulu kiika xa lannaya ke. ¹³ Bari Tesalonike Yahudiyalu x'a lon tumo men xo Poli be Ala la xumo foxan Bere du, i nata non du xa jama jajami, x'a xonotosoli. ¹⁴ Wo no bee to, badin lannayabaxolu taxata Poli ti xooxojiyo mafan, bari Timote nin Silasi tuta Bere. ¹⁵ Poli bulasilabaxolu taxata a ti fo Atene. Wo xo, i x'e koppa Bere. Poli x'e ki Silasi nin Timote ma, xo i xa i tariya xa na a tara Atene. ¹⁶ Xa Poli tu Silasi nin Timote laxononin Atene, a x'a je xo gallo be fanin bolibatutalu la. Wo kuwo x'a tooro bete. ¹⁷ Wo xanma, a tun be xumala Alabatusuwo xono, Yahudiyalu nin siya xotelu jen, mennu be Ala batula. Lun wo lun, a tun be taxala dakeno la, xa xuma non taxabaxolu bee jen. ¹⁸ Moxo hakilitigolu mennu be kilila xo Epikure la xarandinjolu nin Sitoyisenjolu, wolu dolu tunnu nin Poli be xumaxan. Dolu b'a fola: «Nin xuma fufola in b'a fe xa mun fo?» Do xotelu xo: «I s'a fo xo: A be bolibatuta xote lelu la xumo fola.» Poli ken tun be xumala Isa nin furekuniyo le xan. ¹⁹ I xa Poli kili i nin a xa taxa gallo Ayeropasi la, nin wo mu hakilitigolu nin kiititegelalu la dula ti. I xo a jen xo: «Í be xaran kuto men fola, ntelu si do me no wo xan ba?» ²⁰ Bawo í be xumo mennu fola, ntelu man wolu joxon me abada, n b'a fe xa wolun faamu.» ²¹ Atenengolu bee, anin siginfelu mennu b'e bata, wolun tunnu be i la waxato tala bee kela xibaruya kutolu tofolo nin i lamelo le la. ²² Poli wulita x'e lo jama tema, Ayeropasi la, x'a fo xo: «Atenengolu, nte x'a korosi xo alu be tetositinin Alanjininjo to ja bee do ma. ²³ Bawo nte yaalayaalato alu la gallo xono, n xa alu la batulidulalu kiika je. N x'alu la sadaxajanidula do je, a be safenin wo xan xo: "Ala men nte lonnin, wo la sadaxajanidula." Awa, alu be men batula x'a tara alu man a lon, nte be nala wo le la kuwo fola alu jen. ²⁴ Ala men xa duniya nin a xono fenjo bee da, sanxulo nin duguxulu Marigi, wo sigidula nte moxolu la batusu loninjo ti. ²⁵ Ala maaku nte a la du xo moxo x'a la baaro ke, a be í xo nin a haajo le

tun be fen do ma; katugala ate fan ne be nilamaya nin nilakiliyo nin fen bee dila moxo bee ma. ²⁶ A xa siyalu bee da x'e labo moxo kilin to, x'e lasigi duguxulo dula bee. A xa danjo sigi i la waxatolu nin i sigidulalu ma. ²⁷ A xa wo ke walasa i xa Ala njinin x'a je moomolo la, nin wo tun si ke no. Tonja la, Ala man jan n si la. ²⁸ Bawo: "Ate le barako to, n be i nila, n be i lamaxala anin n be je." Alu la njaara do dulu x'a fo xo: "N mu Ala dinjolu ti." ²⁹ N mu Ala dinjolu ti, wo xanma, n man xan x'a mi-iri xo Ala be le í xo sano walla xalisixoyo walla kuro, moxo xa men dara a fan na hakilitigiya nin a sinkuwo bee la. ³⁰ Bari Ala nte wo waxato lonbaliya kuwolu jaatela tugun, bari saasa a be moxolu bee kilila dula bee xo i x'e xodi i la junubolu la. ³¹ A xa lunjo do latege a si kiiti tilinningo tege duniya xan lun men. Wo kiito tegebaxo si ke moxo do ti, Ala fan xa men sugandi. A xa taagumanseede lankenemaningo di moxo bee ma wo la kuwo to; bawo a xa wo lakuni xa bo furelu to.» ³² I xa furekuniyo me Poli la tumo men, dolu jeleta a ma, dolu xo: «N si í lame wo kuwo to sinja xote.» ³³ Wo to, Poli bota i bata xa taxa. ³⁴ Bari haali wo, dolu nin Poli tuta. Wolu xa lannaya ke. Mennu xa lannaya ke, Denisi be wolu to, ate mu Ayeropasi moxo do ti, anin muso do, xo Damarisi, anin do xotelu.

18 Wo xofe, Poli bota Atene xa taxa Korente. ² A xa Yahudiya do tara je, a toxo xo Akilasi. Wo be bola Pon maro la. A nanin kuto le tun mu xa bo Itali jamano xan, a nin a musu Pirisiye. Wo keta bawo mansaxe Kulode tun x'a fo xo Yahudiyalu bee xa bo Rome. Poli nin i kafuta. ³ A tuta i bata i xa baaro ke i joxo fe, bawo i fulo bee tun be baara sifa kilin ne kexan. Tillisidarala le tunnu mu. ⁴ Poli tun be xumo tala Alabatusuwo xono, tofopolun wo tofopolun. A tun b'a njinina xa Yahudiyalu nin Gerekolu bee lason. ⁵ Kabirin Silasi nin Timote nata xa bo Maseduwane jamano xan, Poli x'a la waxato bee ke waajulo la, x'a yita Yahudiyalu la xo Isa le mu Kirisita ti. ⁶ Yahudiyalu xa Poli sooso, x'a nani. Wo to, a x'a la faanolu banxo gjigiji i xanma x'a fo i pen xo: «Nin alu man kisi, wo mu alu fannu no le ti. Jalagi nte nte ma. Kabirin saasa, nte be taxala siya tolu bata.» ⁷ Poli bota non xa taxa Ala batubaxo do bata xo Titiyusi Yusitusi. Wo tun na luwo be Alabatusuwo senbo to. ⁸ Alabatusuwo kuntigo Kirisipusi nin a la dinbaya bee lata Marigi la. Korentengo mennu dalita Poli la xumo lamela, wolu kiika xa lannaya ke xa batise. ⁹ Lun do suwo to, Marigi x'é yita Poli la, x'a fo a pen xo: «Í xana sila. Tu xumala haalibi, í xana í de, ¹⁰ bawo nte be í senbo to. Moxo si me kujaxu ke no í la, katugala nte la moxo xa sa nin gallu in to.» ¹¹ Poli tuta Korente xa san kilin nin xaru wooro ke je. A tun be moxolu laxaranna Ala la xumo ma. ¹² Galiyon tun mu Rome la goferenere ti tumo men, Akayi maro kunna, Yahudiyalu benta ku to Poli xanma. I x'a lasi ki- ititegedula. ¹³ I xo: «Nin xe in b'a njinina xa moxolu

hakilo yeleva, xo i xa Ala batu ja do ma, ja men be n na sariya soosola.» ¹⁴ Poli xo x'a be xumo tala tumo men, Galiyon xo Yahudiyalu pen xo: «Atelu Yahudiyalu, nin a tun fota xo pin xe in xa kujaxuba do le ke walla ku benbalo do, nte tun si alu lame bete. ¹⁵ Alu be i joxo soosola xumolu nin toxolu nin alu fannu la sariya kuwo lelu to, wo xanma, wo jabo be alu fan nelu ma. Nte nte sonna xa wo kuwolu kiito tege.» ¹⁶ Wo to, Galiyon x'e xoyi xa bo kiititegedula. ¹⁷ Wo keninma, i bee xa Alabatusuwo kuntigo Sositene muta x'a buwo kiititegedula, bari Galiyon man wo jaate. ¹⁸ Poli tuta Korente xa waxati jan ke je. Wo xo, a bota badin lannayabaxolu bata. A nin Pirisiye nin Akilasi xa batonjo ta xa taxa Siri jamano xan. Poli tun x'a kunjoli Sankere, bawo a tun taguta kuwo do la Ala pen. ¹⁹ I sita Efesi gallo to. Poli nin a taxamajoxolu talata non. A taxata Alabatusuwo xono, a nin Yahudiyalu xa xuma. ²⁰ Wolu x'a matara xo a xa waxati ke i bata, bari Poli man son. ²¹ A bota i bata, x'a fo i pen xo: «N si í koppa alu bata ma, nin Ala sonta.» Wo xo, a dunta batonjo xono Efesi xa taxa. ²² A jigita Sesare gallo to, xa taxa Yerusaleme, xa Ala la jama moxolu xonton non. Wo xo, a taxata Antiyosi. ²³ Poli xa waxato do ke non, wo xo, a taxata. A xa Galasi maro bori, wo xo, a xa Firiji jamano bori, xa lannayabaxolu bee jusudun lannaya to. ²⁴ Yahudiya do sita Efesi. A toxo xo Apolosi. A wuluta Aleksandiri gallo le to. A tun si sin xumo la bete. A tun xa Kitaabo xono xumolu lon bete. ²⁵ Wo xe tun be xarannin Marigi la silo la. Juso tun b'a la xa Isa la kuwo fo, anin xa moxolu laxaran x'a xoyiya. Bari a tun xa Yaya la batiselo doron ne lon. ²⁶ Apolosi xa waajulo damuta Alabatusuwo xono a hakilo lasiginingo. Pirisiye nin Akilasi x'a la xumolu me tumo men, i nin a taxata i bata, x'a laxaran Ala la silo la, x'a toxoyiya bete a pen. ²⁷ Wo xo, a diyata Apolosi pen xa taxa Akayi. A badin lannayabaxolu x'a jusudun, xa safe do ki non lannayabaxolu ma xo i x'a mutakubete. A sita non tumo men, a xa moxolu deema bete, men tunnu keta lannayabaxolu ti Ala la neemo barako to. ²⁸ A la xumolu xa sinjo soto Yahudiyalu la xumolu xan moxolu bee nala. A x'a yita Kitaabo xumaxanjolu la, xo Isa le mu Kirisita ti.

19 Xa Apolosi tu Korente, Poli xa jamano kuru- madulalu tofara, xa taxa si Efesi. A xa lannayabaxo dolu tara non. ² Poli xa wolu njinina xo: «Alu xa lannaya ke waxato men, alu xa Ni Senunjo soto ba?» I x'a jaabi xo: «Ntelu bada man Ni Senunjo toxo me.» ³ Poli xo: «Alu dunnu batiseta batiselija joman ma?» I x'a jaabi xo: «Batiselila Yaya la ja.» ⁴ Poli xo: «Yaya tun be batiselo men kela, wo b'a yitala xo moxolu nimisita i la junubolu la. A tun b'a fola xo men be nala ate xofe, nin wo mu Isa ti, xo Banisirayila moxolu xa la wo la.» ⁵ I xa pin xuma innu me tumo men, i batiseta Marigi Isa toxo la. ⁶ Poli x'a bulo la i xan tumo

men, Ni Senunjo jigita i xan. I xa xan xotelu fo, xa kila ke. ⁷ Wolu moxo tun be taxala i lola tan nin fula ma. ⁸ Poli tun be taxala Alabatusuwo xono xa xuma moxolu pen. A hakilo lasigininjo xumata i pen Ala la Mansaya xan, xaru saba xono. A x'e balan x'a lamebaxolu lason. ⁹ Bari dolu x'e tulo xoleya, i man son xa lan-naya ke. I tunnu be xuma jaxolu fola, xa Marigi la silo toxosi jama pala. Wo tumo, Poli x'e tu je, a nin lan-nayabaxolu xa taxa i danna x'e laxaran lun wo lun Tiranusi la xarandula. ¹⁰ A xa wo ke san fula xono, fo Asi maro moxolu bee, Yahudiyalu anin Gerekolu, xa Marigi la xumo me. ¹¹ Ala barako to, Poli tun be kawakubalu kexan, ¹² fo haali faano walla misooro men tunnu je maxa Poli balo la, moxolu tunnu si wolu ta xa taxa wolu la jangarutolu xan. Wolu tunnu si kendeya, jinnolu tunnu si bo jinnetolu to. ¹³ Yahudiya dolu, men tunnu b'e yaalala xa jinnolu xoyi xa bo moxolu to, wo dulu x'a mafele xo i be jinnolu xoyila Marigi Isa toxo la. I xo jinnolu pen xo: «Poli be waajulo kela Isa men toxo la, n b'a fola alu pen wo toxo la, alu bo nin moxo innu to!» ¹⁴ Men tunnu be wo baaro kela, wolu mu Yahudiyalu la sadaxalasibaxa kuntigo do le dinxe woorowulo ti, men toxo xo Sewa. ¹⁵ Bari jinno x'e jaabi xo: «N xa Isa lon, n xa Poli du lon, bari atelu mu jonnu ti?» ¹⁶ Wo jinneto x'e ke i xan. A kilin x'e bee mano. A x'e buwo bete fo i x'e bori xa bo a la luwo ma, i balamaxulunjo nin i joogininjo. ¹⁷ Yahudiyalu nin Gerekolu men tunnu be siginin Efesi, wolu bee xa jin me. I bee silata, xa Marigi Isa toxo bunja. ¹⁸ Mennu xa lannaya ke, wolu kiika nata i lo i la kujaxu keninjo la moxolu bee pala. ¹⁹ Doomalu kiika nata i nin i la doomaya bukkolu, xa wolu jani moxolu bee pala. Wo bukkolu sonjo jaate be bennin xalisixoyo tan luulu wulu le ma. ²⁰ Wo ja ma, Marigi barako to, Ala la xumo jenjenta, xa sinjo soto. ²¹ Wo kuwolu keninjo xo, Poli x'a latege xa tanbi Maseduwane nin Akayi jamanolu la, xa taxa Yerusaleme. A tun b'a foxan xo: «Nin n taxata je tumo men, n xa xan xa taxa Rome du.» ²² A x'a deemabaxolu to moxo fula, Timote nin Erasite ki xa taxa Maseduwane. Bari a fan tuta Asi folo xa waxati ke je. ²³ Wo waxato, murutiliba do wulita Marigi la silo koso. ²⁴ Siyaxo do tun be je xo Demetiriyusi. Efesingolu la bolibatuta musuma men tun be je xo Aratemisi, ate tun be wo la batusuwo noxon nelu darala xalisixoyo la. Wo tun be nafaba lasila wo baaro kebaxolu ma. ²⁵ Lun do, Demetiriyusi xa wolu nin i siyaxepoxolu kamari x'a fo i pen xo: «Awa, alu x'a lon xo ntelu be nafaba sotola jin baara in ne to. ²⁶ Bari kuwo men b'e son, nin alu ja nte a la, alu tulo b'a la. Nin Poli toxo in b'a foxan xo moxolu la bolibatuta daraninjo nte fusi ti. A xa moxo kiika lason Efesi jan. Jan kilin nte, a be njinin xa Asi maro bee lason. ²⁷ Nin kuwo si son xa n na baaro tjna. X'a kafu wo ma, n na bolibatutaba musuma Aratemisi la batusuwo si mafele fuwo ti. Asi maro bee,

anin duniya moxolu bee be wo bolibatuta musuma in men batula, tango si bo wo xan.» ²⁸ Wo moxolu xa wo xumo me tumo men, i diminbeteta xa ke a ma xa feten xo: «Efesingolu la Aratemisi le mu fenba ti!» ²⁹ Wo mankanjo xa gallo bee najami. Poli taxam-ajoxo fula tun be je. I toxo xo Gayusi nin Arisitarake, wolu tunnu mu Maseduwanengo lelu ti. I gidita wolu xan, x'e muta, i nin i xa taxa jama kamaridula. ³⁰ Poli tun b'a fe xa taxa wo dula, bari lannayabaxolu x'a bali xa taxa je. ³¹ Asi maro kuntigiba dolu tunnu mu Poli xanunte lelu ti. Wolu xa kila bula Poli ma x'a matara xo a xana taxa jama kamaridula. ³² Wo waxato, jama tun be najamo xono. Si nin si la xumo nte kilin ti. Bee be kulela x'e ta fo. I tala si tun man haali i noxotara kunjo lon. ³³ Moxo dolu xa wo kuwo naxo xe do pen xo Aleksandere. Yahudiyalu xa ate bula i ja. A x'a bulo xotota xo a b'a fe xa xuma jama pen. ³⁴ Bari jama x'a lon tumo men xo Yahudiya le mu, i xa leere fula noxon ke i bee be fetenna xo: «Efesingolu la Aratemisi le mu fenba ti!» ³⁵ Gallo safelila sinta xa jama lade, a xo: «Efesingolu, bee x'a lon xo Efesi gallo le mu Aratemisiba la batusuwo korosibaxo ti anin a nataliye men butunta xa bo sanjo to. ³⁶ Soosoli nte wo kuwo to. Wo le x'a tu, alu i mafaxa, alu xana fusi ke alu kunfe. ³⁷ Alu bagata jin xe fula innu ma, xa na i ti x'a tara i man fusi suuna batusuwo xono, i man xuma jaxu du fo n na bolibatuta musuma ma. ³⁸ Awa nin ku benbalo do dunta Demetiriyusi nin a baarakepoxolu nin moxo do te, kiititege bunjolu be je, kiititegela dulu be je i si wo ja fo men-nu pen. ³⁹ Nin ku xote be alu ma, wo si nabo sariya la kiititegekafo fe. ⁴⁰ Murutilo men keta bi, n si sin no xa jalagi wo to. Kun si tun nte n na noxotaro la. N me sin no xa kun jonjon soto x'a fo n na nin noxotara in na.» ⁴¹ Gallo safelila xa wo fo, wo xo, a xa jama labula.

20 Mankanjo mafaxata tumo men, Poli xa lannayabaxolu kamari x'e jusudun. Wo xo, a x'e sara i la xa taxa Maseduwane. ² Poli xa wo jamano tokutun, xa badin lannayabaxolu jusudun xuma kiika la. Wo xo, a taxata Geresi jamano xan, ³ xa xaru saba ke non. A tun b'a fe tumo men xa batonjo ta, xa taxa Siri jamano xan, a x'a me xo Yahudiyalu xa janfo siti a ma. Wo to, a x'a latege xo a be i koppala Maseduwane fe. ⁴ A nin Sopatere taxata i noxo fe, nin wo mu Pirusi dinjo ti xa bo Bere, wo nin Arisitarake nin Sekundusi xa bo Tesalonike, anin Gayusi xa bo Derebe, wo nin Timote nin Tisike nin Torofime, wolu moxo fulo bota Asi maro la. ⁵ Wolu bulata n ja xa taxa n naxono Torowasi. ⁶ Ntelu kennu xa batonjo ta Filipe, Buurufuunulantan sallo tanbo xo. A tili luulo, n x'e tara Torowasi, xa loxokun kilin ke non. ⁷ Tofopolunjo, n tunnu be kamarinin Marigi la domolo xanma; Poli tun xa xan xa taxa wo lun do. Wo xanma, a xumata lannayabaxolu pen, xa me, fo dugutala. ⁸ N tunnu be kamarinin sankansuwo bunjo men xono, lanpa kiika tun be non. ⁹ Xamarindingo do

tun be siginin foloda la, a toxo xo Etikose. Ate sinnoxota bete; katugala Poli meta xumo la. Sinnoxo kujaxo bulu, a boyita dugo ma, xa bo wo sankansuwo sigi sabanango la. Moxolu nata a ta, bari i x'a tara a sata.

¹⁰ Poli jigita xa taxa í buti a kunna, x'a muta a bulu fulo to xo: «Alu xana sila, a be í nila.» ¹¹ Wo xo, Poli yeleta tugun. A xa buuro tokutun, x'a domo. A xumata i pen xa me, fo xa saxo yele. Wo xo, a taxata. ¹² I nin xamarindin in nilama taxata. Wo kuwo xa lannayabaxolu juso sumaya. ¹³ N bulata Poli na, xa batonngo ta xa taxa Asosi. N tunnu xa xan xa Poli ta wo gallo to. Ate tun b'a fe xa taxa non dugumasilo la, í xo a fan tun x'a latege na men. ¹⁴ A xa n tara Asosi tumo men, n x'a ta xa taxa Mitilene. ¹⁵ N bota non xa taxa, xa si Kiyosi wo lun do. Wo tili fulanango, n sita Samosi. Wo lun do, n sita Mile.

¹⁶ Poli tun x'a latege xa tanbi Efesi gallo la x'a tara i man lo je, walasa a xana me Asi maro xan. A tun be kepenin. A tun b'a fe nin a benta, Pantekoti lunngo x'a tara Yerusaleme. ¹⁷ Poli x'é tu Mile, xa kila bula Efesi Ala la jama moxobalu ma, xo i x'a tara Mile. ¹⁸ I sita a bata tumo men, a xo i pen xo: «N' badinngolu, kabirin nte xa n sinngo bula Asi maro xono lun men, fo xa na a bula bi la, nte bosilo keta men ti alu ma, alu xa wo lon. ¹⁹ Nte xa baaro ke Marigi pen majigo to, xa tooro fo xa najiyo bo. Yahudiyalu xa janfo siti nte ma tuma kiika, xa tooro kiika lasi nte ma. ²⁰ Alu x'a lon xo n man fusi tu dugunin alu ma, men si alu nafa. Nte x'alu waaju, x'alu laxaran jama to, anin alu la luwolu ma. ²¹ N' x'a fo Yahudiyalu nin Gereko dulu pen xo i xa nimisi i la junubolu la, xa tuubi Ala pen, xa la n Marigi Isa la.

²² Saasa, nte be taxala Yerusaleme, katugala Ni Senunngo xa wo waajibiya n' ma. Men be nala nte sotola je, n' man wo lon. ²³ N' x'a lon doron xo n' be tanbila gallo wo gallu la, Ni Senunngo si n' nasobi xo kasoladunngo nin toorolu be nte na. ²⁴ Bari nte nte n' fan na nilamaya jaatela. N' be men jaatela, wo mu le xa n' na baaro lasi a danngo ma. Marigi Isa xa baaro men xarifa n' ma xa wo ke x'a dafa. Wo baaro mu le, xa xibaru Dimanngo fo, men be Ala la neemo yitala. ²⁵ «Awa, x'a ta bi ma, n' xa Ala la Mansaya waajulo ke atelu fen wo fen bata, nte x'a lon xo atelu si na me la nte xan tugun. ²⁶ Wo le x'a tu, nte b'a fola alu pen bi x'a xoyiya xo: Nin men sankota, wo nte nte no ti. ²⁷ Katugala nte xa Ala sago bee yita alu la, nte man fusi tu dugunin alu ma. ²⁸ Al'alu fannu korosi, anin xa saaxagoore muume korosi, Ni Senunngo x'alu lasigi men kunna. Alu i hakilo tu Ala la jama la, Ala xa men ke a ta ti, a fan Dinxe la saya fe.

²⁹ Nte x'a lon, xo nte taxo xo, moxo jaxo dolu si dun alu to, í xo turuma be dunna saaxolu to na men xa tinalo ke. ³⁰ Alu fannu to jan, moxo dolu si wuli i nin faniya xumolu, xa lannayabaxolu lafili, x'e lalo i nofe. ³¹ Wo le x'a tu, al'alu fannu korosi. Al'alu hakilo tu a la xo san saba xono, nte najiyo boto man alu kilin wo kilin tonbeno dabula. ³² «Awa saasa, nte be alu xarifala Ala ma,

anin a la neemo xumo ma. Ate le si sin no x'alu barako bunna lannaya to, anin xa fen numalu di alu ma, a xa mennu sigi a la moxo senuyaninngolu bee na. ³³ Nte man jabo moxo si la xalisi nin sanu nin faanu fe.

³⁴ Alu fannu x'a lon xo nte xa baaro ke n' fan bulolu la, xa n' nin n' taxamajoxolu haajolu nina. ³⁵ Nte x'a yita alu la na bee ma, xo n xa xan xa baaro ke ten walasa xa segebaxantunngolu deema, xa n hakilo lajigi Marigi Isa fan na xumo la xo: «Heero be dilo le to, xa tanbi sotolo xan.» » ³⁶ Wo xumolu foninngo xo, Poli nin wolu bee x'e pongi xa Ala matara. ³⁷ Lannayabaxolu bee xasita. I x'e sappi Poli ma, x'a baataya sixonton. ³⁸ I la jusuxaso kunba tun mu men ti, wo mu le, bawo Poli tun x'a fo i pen xo i me a je bitugun. Wo xo, i taxata a bulasila fo batondanngo la.

21 N nin lannayabaxolu fatata tumo men, n xa batonngo ta x'e tilin xa taxa Kosi. Wo lun do, n sita Rode. N bota non xa taxa Patara. ² N xa batonngo do tara non men be taxala Fenisi. N dunta wo xono xa taxa. ³ N sutiyata Sipere sutto la. N xa wo sutto tu n numanngo xoto, xa taxa Siri jamano mafan. Batonngo lota Tire danxanngo la, katugala batonxonodono xa xan xa lajigi non. ⁴ N xa lannayabaxo dolu tara non. N xa loxokun kilin ke wolu bata. Ni Senunngo la lasobilo fe, wolu xo Poli pen xo a xana taxa Yerusaleme. ⁵ Bari loxokunngo dafata tumo men, n bulata n na taxamasilo xan tugun. Lannayabaxolu nin i musulu nin i dinngolu bee taxata n bulasila fo gallo xo ma. N x'e pongi xooxojida la xa Ala matara. ⁶ N xa i joxo sixonton tumo men, n dunta batonngo xono. Wolu x'e koppa xa taxa i bata. ⁷ N bota Tire xa taxa Potolemaysi. Wo le keta n na xooxojixantaxamo danngo ti. N xa badin lannayabaxolu xonton non, xa tili kilin ke i bata. ⁸ Wo lun do, n bota non xa taxa Sesare gallo to. N dunta xibaru Dimanfola Filipe la luwo ma, xa jigi non. Moxo woorowulo men tunnu sugandita Yerusaleme, ate tun mu wolu to kilin ne ti. ⁹ Dinxarafa naani tun be Filipe kun, wolu tunnu be kilaya kela. ¹⁰ N xa tili kiika ke non. Wo xo, Ala la kila do nata xa bo Yude maro xono, a toxo xo Agabusi. ¹¹ Wo nata n ma. A xa Poli la tetositilango ta x'a fan bulo nin a sinngolu siti wo la. A xo: «Ni Senunngo xa men fo wo fele xo: "Nin tetositilan in mu moxo men ta ti, Yahudiyalu si wo tigi muta Yerusaleme x'a siti ten, x'a dun Alalonbalolu bulu." » ¹² N xa wo xumo me tumo men, n nin non badin lannayabaxolu xa Poli matara xo a xana taxa Yerusaleme. ¹³ Wo to, Poli xa n jaabi xo: «Mun na alu be xasila, xa nte juso xasi? Nte tobenninngo le mu xa siti. Wo doron nte, n' tobenninngo le mu du xa sa Yerusaleme, Marigi Isa toxo nofe.» ¹⁴ Ntelu korita taxo bola Poli juso ma tumo men, n x'a tu je. N xo: «Men mu Marigi sago ti, wo xa ke.»

¹⁵ Tili dantalulu tanbo xo, n x'e toben xa taxa Yerusaleme. ¹⁶ Sesare lannayabaxo dolu xa n dandan xa taxa n ti Siperenga Manason na luwo ma, n xa xan

xa jigi jan men. Ate tun xa lannaya ke kabirin waxati jan. ¹⁷ N sita Yerusaleme tumo men, badin lannayabaxolu xa n jigiya najo to. ¹⁸ Wo lun do, Poli nin n taxata Yaxuba la luwo ma. Ala la jama moxobalu tunnu bee du kamarita non. ¹⁹ Poli x'e xonton. Wo xo, a xa xumo ta, Ala xa kuwo fen wo fendin ke siya tolu to, ate la baaro fe, a xa wo bee kilin kilin najo i nen. ²⁰ I xa wo me tumo men, i xa Ala tantu. Wo xo, i x'a fo Poli nen xo: «N badinxe, í na b'a la xo Yahudiyalu moxo wulu kika le xa lannaya ke. Wolu bee mu sariya batubaxa soobe lelu ti. ²¹ A nata fo wolu nen xo Yahudiya mennu be siya tolu to, í be wolu ma x'e laxaran xo i xa Musa la sariya bula. Í x'a fo i nen xo i xana i dinjolu naxa, xo i xana Yahudiyalu la adolu labatu. ²² Awa, n si mun ke? A keta na wo na, i s'a lon xo í nata. ²³ Wo le x'a tu, n be nala men fola í nen, wo ke. Awa, xeba naani be n bata jan, mennu taguta Ala nen. ²⁴ Í nin wolu xa taxa x'alu senuya i noxo fe. Í xa xaaliso bo walasa i kunjõ xa li. Wo na in, moxolu bee si a lon xo i xa xumo mennu me í la kuwo to, xo wolu si nte tonja ti, bari xo ite fan be sariya silo taxamala. ²⁵ Awa, siya tolu mennu lata Isa la, n xa safe ki wolu ma xo i xana bolisosubu domo, walla jelo, walla jifo. I xa xan xa i fannu tanga jadoya ma.» ²⁶ Poli taxata wo xe naano ti. Wo lun do, a nin i x'e senuya i noxo fe. Wo xo, a taxata Alabatusuba xono xa senuyalilunjõlu dafawaxato fo, wo xoto, i bee kilin kilin na sadaxo xa xan xa bo lun men. ²⁷ Tili woorowulo tun be njin xa dafa tumo men, Asi maro Yahudiyalu xa Poli je Alabatusuba xono. I xa jama bee xonotosoli xa Poli muta. ²⁸ I fetenta xo: «Banisirayila dinjõlu, alu na n deema! Xe men be moxolu bee laxaranna dula bee, Banisirayila moxolu nin Musa la sariya, anin Alabatusuba xanma, wo fele. X'a kafu wo ma, a nata Gereko dolu ti Alabatusuba xono xa nin dula senuman in noxo.» ²⁹ I tunnu be wo fola, bawo Torofime men be bola Efesi, i xa wo nin Poli je i noxo fe gallo xono. A keta i nala xo Poli x'a ladun Alabatusuba xono. ³⁰ Gallo bee naxamita. Moxolu gidita xa bo dula bee xa taxa je. I xa Poli muta x'a saba x'a labo Alabatusuba xono, xa dalu taxun wo no bee to. ³¹ I tunnu b'a fe xa Poli faxa tumo men, a taxata fo sorodasi kuntigiba nen xo Yerusaleme gallo bee be naxaminin. ³² Wo no bee to, a nin sorodasi kuntigo dolu nin sorodaso dolu x'e bori xa taxa jama mafan. Jama xa sorodasi kuntigiba nin sorodasolu je tumo men, i xa Poli buwolo dabula. ³³ Sorodasi kuntigiba x'é sodun Poli la x'a muta, xa yanmaruya di x'a siti negejõloxo fula la. Wo xo, a xa Poli njinxa xo: «Ite mu jon ti? Í xa mun ke?» ³⁴ Dolu tunnu be kulela xa xumo do fo, do xote tunnu be xuma xote fola. Sorodasi kuntigiba man fusi faamu i la wo xuma naxamininjõlu to tumo men, a xa yanmaro di x'e xa taxa Poli ti sorodasolu la bunba xono. ³⁵ I sita yelellanjo ma tumo men, sorodasolu xa Poli ta jama la fatiya koso, ³⁶ katugala jama bee tun b'a nofe, i tunnu

be kulelan xo: «A xa faxa!» ³⁷ Sorodaso tunnu be Poli ladunna bunba xono tumo men, a xo sorodasi kuntigiba nen xo: «Nte si sin no xa xumo do fo í nen ba?» Sorodasi kuntigiba xo: «Jaxa í be gerekixanjo mela. ³⁸ Wo tuma, Misirango men murutita laban in na, xa taxa moxofaxala wulu naani ti wulo xono, ite nte wo ti de?» ³⁹ Poli x'a jaabi xo: «Nte mu Yahudiya le ti. Tarasi men be Silisi jamano xono, n wuluta non ne. Non mu gallu toxoma le ti. N b'é tarala í x'a tu n xa xuma jama nen.» ⁴⁰ Sorodasi kuntigiba sonta. Xa Poli loninjo tu yelellanjo xan, a x'a bulo xotota moxolu nen. I bee x'e de. Poli xumata i nen heburuxanjo to xo:

22 «N badinjõlu nin n falu, alu n name. Nte be nala xumala saasa xa n fan naxoyiya.» ² I x'a me xo a be xumala i nen heburuxanjo to tumo men, i xa do kafu i la de ma. Poli xo: ³ «Nte mu Yahudiya le ti, xa wulu Tarasi men be Silisi. Bari n bunjata Yerusaleme jan fan ne. Gamaliyeli le xa n naxaran n benbalu la sariya ma x'a xoyiya. Nte tun be tetositinin Ala kuwo to bete, í xo atelu bee be na men bi. ⁴ Moxo men tunnu be wo silo taxamaxan, nte tun be wolu tooroxan fo xa dolu faxa. Nte xa xelu nin musolu muta x'e bula kaso la. ⁵ Sadaxalasibaxa kuntigiba nin moxobalu la kafo bee mu nte seedolu ti wo kuwolu to. Wolu xa safe dolu di nte ma xo n x'e di n badin Yahudiyalu ma Damasi gallo xono. N tun taxata non xo n be non lannayabaxolu mutala xa na i sitininjo ti Yerusaleme jan, x'e tooro.» ⁶ «Awa, xa nte tu silo to, fo n sutiyata Damasi la, nakun kilin, tilinkunte waxato, keneyaba bota sanjo to xa mana n boxo bee. ⁷ N boyita dugo ma, n xa xumaxanjo do me xo: "Soli, Soli, mun na í be nte toorola?" ⁸ Nte x'a jaabi xo: "Í mu jon ti, Marigi?" A xo nte nen: "Nte mu Nasreti Isa le ti, í be men tooroxan." ⁹ N taxamanoxolu xa wo keneya je, bari men xumata n nen, i man wo tigi xumaxanjo me. ¹⁰ Wo to, nte xa njinxalo ke xo: "Marigi, nte xa xan xa mun ke?" Marigi xo n nen xo: "Wuli, í xa taxa Damasi gallo xono. Ala b'a fe í xa men ke, wo si fo í nen non." ¹¹ Wo keneya naxamitaxo xa nte fiyõna. Wo xanma, nte taxamanoxolu xa n bulo muta xa taxa n ti Damasi. ¹² «Xe do tun be non, a toxo xo Ananiyasi, Alajasilanjabaxo le tun mu. A tun be sariya silolu bee taxamala. Damasi Yahudiyalu bee tun be a toxo dimanjo fola. ¹³ A nata nte ma, x'e lo n senbo to, x'a fo n nen xo: "N badinxe Soli, í nalu xa yeletugun!" Wo no bee to, nte nalu yeleta, nte xa Ananiyasi je. ¹⁴ A xo: "N benbalu la Ala x'é sugandi, walasa í x'a sago lon; anin men kilin be tilinnin, í xa wo je; anin x'a fan xumaxanjo me. ¹⁵ Katugala í xa kuwo mennu je, x'e me, í si ke a seedo ti wo kuwolu to, hadamadinjõlu bee nen. ¹⁶ Í be mun naxonola tugun? Wuli xa batise, í la junubolu xa yaafa í ma, Marigi Isa toxo barako to." ¹⁷ «Nte xa n koppa Yerusaleme, xa nte tu taralo la Alabatusuba xono, Ala xa ku do yita n na. ¹⁸ N xa Marigi je, a xo n nen xo: "Í tariya xa bo Yerusaleme, katugala

je moxolu nte nala sonna í la seedeyalo ma nte la kuwo to.”¹⁹ Nte xo: “Marigi, i fannu x’a lon xo nte tun be dunna Alabatusuwolu xono xa lannayabaxolu muta x’e bula kaso la, x’e buwo.”²⁰ I x’é seede Eteni faxa tumo men, nte du tun be je. Nte tun sonta Eteni faxalo ma. Nte le keta a faxabaxolu la dorokolu lakorosibaxo ti.”²¹ Bari Marigi xo: “Taxa, katugala nte be nala í kila xa taxa dulajan, siya tolu bata!”²² Jama tun be Poli la xumo lamela fo xa taxa si jin xuma in ma. Wo tumo, i fetenta x’a fo xo: «Nin moxo sifa in xa xan xa faxa xa bo duguxulo xan. A man xan xa tu í nila.»²³ I kuleta x’e la dorokolu bo i xanna, x’e firifiri, xa buruxallo ko x’a sari sanjo la.²⁴ Sorodasi kuntigiba xa yanmaro di x’e xa Poli bula bunba xono, x’a buwo nin a si xuma, walasa a xa lon kunjo men x’a tu jama be kulela a xanma ten.²⁵ I xa Poli siti tumo men, xo i b’a buwola, sorodasi kuntigo do tun be je, Poli x’a fo wo jen xo: «Sariya be alu bulu ba xa Romenga yerewuluwo do buwo, x’a tara haali kiito man tege a xan?»²⁶ Sorodasi kuntigo xa wo xumo me tumo men, a taxata a fo sorodasi kuntigiba jen xo: «Í be nala mun kela ten? Nin xe in mu Romenga yerewuluwo le ti de.»²⁷ Sorodasi kuntigiba taxata Poli dula, x’a njinxa xo: «A fo n’ jen, í mu Romenga yerewuluwo le ti ba?» Poli x’a jaabi xo: «Iyo.»²⁸ Sorodasi kuntigiba xo: «Nte xa xalisiba le sara, walasa n’ xa ke Romengo ti.» Poli xo: «Nte mu a yerewuluwo le ti!»²⁹ Wo no bee to, men tunnu xa xan xa Poli buwo, walasa a xa xuma, wolu x’e soobo a la. Sorodasi kuntigiba x’a lon tumo men xo Romengo le mu, a silata; bawo ate le xo xo i x’a siti.³⁰ Yahudiya tunnu be Poli jalagila men to, sorodasi kuntigiba tun b’a fe xa wo jonjonjo lon. Wo le x’a tu, wo lun do, a xa negejolo xo bo Poli la, xa sadaxalasibaxa kuntigolu nin Yahudiyalu la Kiititegekafo bee kamari. Wo xo, a nata Poli ti, x’a lalo i na xoto.

23 Poli x’a na lo Yahudiyalu la Kiititegekafo moxolu to x’a fo xo: «N’ badinjololu, nte jusukunjo senumanjo le xa Alasilo taxama fo xa na si bi ma.»² Sadaxalasibaxa kuntigiba Ananiyasi xa yanmaro di Poli senbetomoxolu ma xo i x’a te a da to.³ Wo to, Poli xo a jen xo: «Ala s’í du buwo, ite men be í xo tato men naxuuruta! Í be siginin jan xa kiito tege nte xan, x’a ben sariya le ma. Bari í xa sariya sooso, xa moxolu bula nte buwola.»⁴ Poli senbetomoxolu xo a jen xo: «Í be Ala la sadaxalasibaxa kuntigiba le nanila ten!»⁵ Poli x’a jaabi xo: «N’ badinjololu, nte tun man a lon xo sadaxalasibaxa kuntigiba le mu. Bawo, a be safenin Kitaabo to xo: “Í xana xuma jaxu fo í la jamana dinjololu la kuntigo ma.”»⁶ Poli tun x’a lon xo Yahudiyalu la Kiititegekafo tala kilinjo tun mu Sadusenjo lelu ti, tala do tun mu Farisiyalu ti. Wo le x’a tu, a fetenta Yahudiyalu la Kiititegekafo to xo: «N’ badinjololu, nte mu Farisiya le ti. N’ na nin n’ fa dulu mu Farisiya lelu ti. Nte gigo be furekuniyo le xan, wo le x’a tu, kiito be tegela nte xan.»⁷ A xa

wo xumolu fo tumo men, Sadusenjololu nin Farisiyalu sonxota fo jama talata.⁸ Katugala Sadusenjololu b’a folala, xo furekuni nte kela, xo meleke nte je, xo ni xote du nte je; x’a tara Farisiyalu be lanin wo kuwolu bee la.⁹ Mankanjo tun be bunjala bete, Farisiyalu to, sariya karanmoxo dolu xa xumo ta barako to xo: «N man kujaxu si soto jin xe in na. Í s’a tara niyo do walla melekiyo do le xumata a jen.»¹⁰ Sonxo bunjata kujaxu fo sorodasi kuntigiba silata, i xana taxa Poli joroxi. Wo le x’a tu, a x’a la sorodaso dolu bula xa jigi xa taxa Poli muta i la, xa taxa a ti sorodasolu la bunba xono.¹¹ Wo suwo to, Marigi x’é yita Poli la x’a fo a jen xo: «Í timinadiya, í xa n’ seedeya Yerusaleme na men, waajibo le mu í xa wo seedeyalo noxon ke Rome du.»¹² Wo lun do saxo ma, Yahudiya dolu xa janfo siti Poli ma. I x’e xali xo i me domoli ke, walla x’e min, jannin i xa Poli faxa.¹³ Wo janfasitibaxo tunnu xa sa tan naani moxo ti.¹⁴ I taxata sadaxalasibaxa kuntigolu nin moxobalu bata x’a fo i jen xo: «N x’e xali xo n me fusi domo, jannin n xa Poli faxa.»¹⁵ Wo to, alu nin Yahudiyalu la Kiititegekafo bee xa ben a to x’a njin sorodasi kuntigiba fe saasa, a xa Poli lasi alu ma, x’a ke í xo nin alu b’a fe x’a la kupa le lon x’a xoyiya. Ntelu kennu be tobennin x’a faxa jannin a xa si jan.»¹⁶ Bari Poli mamusuwo dinxe xa i la janfo xumo me. Ate taxata sorodasolu la bunba xono xa wo fo Poli jen.¹⁷ Wo to, Poli xa sorodasi kuntigo do kili x’a fo a jen xo: «Taxa jin xamarindin in ti sorodasi kuntigiba bata, xumo do b’a bulu x’a fo a jen.»¹⁸ Sorodasi kuntigo nin xamarindin in taxata sorodasi kuntigiba bata, x’a fo a jen xo: «Poli men be kaso la xa nte kili xa n’ matara xo nte xa na jin xamarindin in ti í bata, xo xumo do b’a bulu x’a fo í jen.»¹⁹ Sorodasi kuntigiba xa xamarindinjo bulo muta xa taxa a ti senbo to, x’a njinxa xo: «Í b’a fe xa mun fo nte jen?»²⁰ A x’a jaabi xo: «Yahudiyalu benta a to xo i b’a njinna í la, í xa taxa Poli ti i la Kiititegekafo na xoto sinin, x’a ke í xo nin i b’a fe x’a la kupa le lon x’a xoyiya.»²¹ Bari í lason, bawo i moxo men be nala i lala a na, wo xa sa tan naani moxo ti. I x’e xali xo i me domoli ke, walla x’e min nin i man Poli faxa. Saasa, i be tobennin, i nte fusi laxononin nin í la jaabo nte.»²² Sorodasi kuntigiba x’a fo wo xamarindinjo jen x’a xoleya xo: «Í xana a fo moxo si jen xo í xa jin janfa in fo nte jen.»²³ Wo xo, sorodasi kuntigiba x’a bula xa taxa.²⁴ Wo xo, sorodasi kuntigiba xa sorodasi kuntigi fula kili x’a fo i jen xo: «Alu sorodasi keme fula, nin sutigi tan woorowula, anin tanbatigi keme fula kamari. Alu bee x’e toben xa taxa Sesare gallo to, suwo leere xonontonango.»²⁵ Alu suwo dolu toben walasa Poli xa taxa, a puma xa si Goferenere Felikisi bata.»²⁶ Wo xo, a xa safe do ke xo: «Nte Kulode Lisiyasi be Goferenereba Felikisi xontonna.»²⁷ Yahudiyalu tunnu xa jin xe in muta. I tunnu b’a fe x’a faxa. Nte x’a me tumo men xo Romengo le mu, nte nin n’ na sorodasolu wulita, x’a bo

bulu to. ²⁸ A tun xa kuwo men ke nin Yahudiyalu b'a jalagila, nte tun b'a fe xa wo lon. Wo le x'a tu, n taxata a ti i la Yahudiyalu la Kiititegekafo na xoto. ²⁹ Nte x'a tara xo i b'a jalagila kuwo men to, wo mu i fannu la sariya kuwo le ti. Bari a tun man fusi ke men s'a tu a si faxa walla x'a bula kaso la. ³⁰ A fota nte pen tumo men xo i dolu xa janfo siti Poli ma, wo no bee to, nte x'a latege x'a bula xa taxa í bata. N' x'a fo a janfabaxolu pen xo i xa taxa a jalagikunjo fo í fan pen.» ³¹ Sorodasolu taxata Poli ti suwo to, fo Antipatirisi, í xo a fota i pen na men. ³² Wo lun do, sorodaso men tunnu be i sinjo la, wolu x'e koppa bunba ma. Men tunnu be suwo xan, wolu nin Poli taxata. ³³ Sutigolu sita Sesare tumo men, i xa safe di goferenere ma xa Poli la kuwo dun a bulu. ³⁴ Goferenere xa wo safe xaran tumo men, a xa Poli njinxa xo a be bola mara joman xan? A x'a lon tumo men xo a be bola Silisi le, ³⁵ a xo Poli pen xo: «Nin í jalagibaxolu sita jan tumo men, nte si í lame.» A xo x'e xa Poli bula mansaxe Herode la xube xono, x'a korosi.

24 Tili luulu tanbininjo xo, sadaxalasibaxa kuntigiba Ananiyasi nata Sesare, a nin moxoba dolu anin woka do xo Teretulusi. Kuwo mennu dunta i nin Poli te, i nata wo nafo Goferenere Felikisi pen. ² I taxata Poli kili xa na. I tunnu b'a jalagila kuwo men to, Teretulusi dunta a na to x'a fo goferenere pen. A xo: «Goferenereba, n be heeraba men to bi, ite le barako to n xa wo soto. Í la hakilitigiya du x'a tu yeleva kiika keta jamana in xono. ³ N be í walejnumalonna wo kuwolu bee la, waxato bee anin dula bee. ⁴ Bari nte nt'a fe x'e lasigi xa me. Wo le x'a tu, n be í tarala í xa beteya nte ma, xa n name nin waxatindin in xono. ⁵ N x'a je xo nin xe in be moxolu toorola kujaxu. A be Yahudiyalu bee lamurutila duniya fanjo bee. Ate le mu Nasaretingolu la diina kuntigo ti. ⁶ A tun b'a fe xa haali Alabatusuba noxo. Wo le x'a tu, n x'a muta. [N tunnu b'a fe x'a la kiito tege x'a ben n na sariya ma. ⁷ Bari sorodasi kuntigiba Lisiyasi nata a muta n na, barako la. ⁸ Wo xo, Lisiyasi x'a fo Poli jalagibaxolu pen, xo i xa na ite Goferenere bata.] Nin í fan xa nin xe in njinxa, n b'a jalagila kuwo mennu to, í s'a lon xo wolu mu tonja le ti.» ⁹ Yahudiyalu xa wo xumolu seedeya, x'a fo xo wo kuwolu keta ten ne. ¹⁰ Wo to, goferenere xa taagumansedo ke Poli pen xo xumo b'a bulu. Poli xa xumo ta xo: «Nte x'a lon xo í mu n na siya la kiititegela ti kabirin san kiika. Wo le x'a tu, nte nte silala xa n fan naxoyiya í na xoto. ¹¹ Í fan si sin no x'a lon, xo nte la nalo Yerusaleme xa Ala batu, wo man tanbi tili tan nin fula la folo. ¹² Moxo man n tara soosoli la Alabatusuba xono, walla xa n tara jama lamurutila Alabatusuwolu xono, walla gallo dula xote. ¹³ Nin moxo innu me fusi fo no, men si a yita xo i be nte jalagila kuwo mennu to, xo wolu mu tonja le ti. ¹⁴ Awa, nte ken be n lola men na í na xoto, wo mu le xo: Nte be baaro kela n benbalu

la Ala le pen silo do xan, wolu xa silo men ke faniya ti. Kuwo mennu safeta Musa la sariya nin kilalu la kiitaabolu to, nte lata wolu bee la. ¹⁵ Nte gigo be lanin Ala xan, í xo i dulu gigo b'a xan na men, xo furelu si kuni, moxo tilinningolu anin moxo tilinbalolu bee. ¹⁶ Wo le x'a tu, nte be n balanna tuma bee, n jusukunjo xa senuya Ala anin moxolu na xoto. ¹⁷ «Awa, san kiika tanbininjo xo, nte nata Yerusaleme, xa n na siya moxolu deema xaaliso la, anin xa sadaxo bo x'a di Ala ma. ¹⁸ I nata nte tara wo kuna lelu la Alabatusuba xono. Nte tun be senuyanin. Jama tun nte n nofe je, je tun nte naxaminin du. ¹⁹ Bari Asi Yahudiya do tunnu be je. Wo lelu tunnu xa xan xa ke í na xoto jan xa nte jalagi, nin a x'a tara xo nte tun xa ku jaxo do ke wolu la. ²⁰ Nin wo nte, nte la kiito tegeta tumo men Yahudiyalu la Kiititegekafo fe, nin nte xa ku jaxo do le ke, moxo mennu be jan, i si wo fo í pen. ²¹ Xa nte loninjo tu i nafe, nte xumata barako to xa nin xuma kilin in ne fo xo: "Nte be lanin furekuniyo la, wo le x'a tu nte la kiito be tegela alu na xoto bi!" » ²² Awa, Felikisi tun xa lannaya kuwo lon bete, wo to, a xa kiito bula waxati xote ma. A xo: «Nin sorodasi kuntigiba Lisiyasi nata, nte si alu la kuwo kiito tege.» ²³ Wo xo, a xa yanmaro di sorodasi kuntigo do ma, xo a xa Poli tu kaso la je, x'a korosi, xo a xana a degu, xo nin a xanunte dolu b'a fe xa na bo a ma, xa fen do di a ma, a xa son wo ma. ²⁴ Tili dantalu tanbininjo xo, Felikisi nin a musu Durusile nata. Wo muso tun mu Yahudiya le ti. Felikisi xa kila bula xa taxa Poli kili xa na. Poli tun be xumo mennu fola lannaya kuwo to, Isa Kirisita xan, a xa wolu lame. ²⁵ Bari Ala be moxo jaatela moxo tilinningo ti na men, anin moxo xa xan x'e fan muta junubo ma na men, anin kiiti labanjo kuwo, Poli tun be xumala wo kuwolu xan tumo men, Felikisi silata. A xo Poli pen xo a xa taxa folo; xo nin a xa waxati xote soto, a si na a kili tugun. ²⁶ A tun hakilo la du, xo Poli be nala xaaliso le dila a ma. Wo le x'a tu, a tun be Poli kilila tuma kiika i xa xiidefata. ²⁷ San fula tanbininjo xo, Porosiyusi Fesitusi sigita Felikisi no to. Felikisi tun b'a fe x'a fan maadiya Yahudiyalu ma, wo le x'a tu, a xa Poli tu kaso la.

25 Fesitusi sininjo wo maro xono, wo tili sabanango, a bota Sesare gallo to xa taxa Yerusaleme. ² Sadaxalasibaxa kuntigolu nin Yahudiyalu la namoxo dolu xa Poli sindun a pen. I xa Fesitusi matara, ³ xo a xa Poli lana Yerusaleme. I xa wo fo, bawo i tunnu xa janfo siti a ma xo i b'a faxala silo to. ⁴ Fesitusi x'e jaabi xo Poli be kaso la Sesare le, xo dondin ate fan be í koppala je. ⁵ A xo: «Alu la kuntigo dolu xa taxa n dandan Sesare. Nin i sita je, i xa nin xe in jalagi nin a x'a tara a xa ku jaxo do le ke.» ⁶ Fesitusi man tanbi tili sagi, walla tili tan xan Yerusaleme, wo xo, a x'e koppa Sesare. Wo lun do, a x'e sigi kiititegedula, xa kila bula xo xa na Poli ti. ⁷ Poli sininma, Yahudiya mennu bota Yerusaleme, wolu xa Poli laminin, xa kujaxuba ki-

ika fo a ma, i me a yita no xo mennu mu tonja ti. ⁸ Poli x'a da la a fan xan. A xo: «Nte man dun fen gasi to, Yahudiyalu la sariya wo, Alabatusuba wo, Rome mansaxe wo, n' man dun i fen si gasi to.» ⁹ Fesitusi tun b'a fe x'a fan maadiya Yahudiyalu ma. Wo xanma, a xa Poli njinxaxo: «Í b'a fe ba xa taxa Yerusaleme, walasa í la kiito xa tege nte na xoto jin ku in to?» ¹⁰ Poli x'a jaabi xo: «Nte be lonin Rome mansaxe la kiititegedula, nte la kiito xa xan xa tege jan ne. N' man kujaxu si ke Yahudiyalu la, ite fan xa wo lon pere. ¹¹ Nin jalago tun be nte ma, nin nte tun xa ku jaxo do le ke, men nin faxalo xa xan, nte me n' ban faxalo ma. Bari i be n' jalagila kunjo men na, nin tonja si nte wo to, moxo si man xan xa nte dun i bulu. Nte b'a fe Rome mansaxe le xa n' na kiito tege.» ¹² Fesitusi nin a tonbenbaxolu xumata wo kuwo la tumo men, a xa Poli jaabi xo: «Í xa Rome mansaxe bata taxo le fo. Awa, í si taxa mansaxe bata.» ¹³ Tili dantalu tanbininjo xo, mansaxe Agiripa nin a mamusuwo Berenise nata Sesare gallo to. I taxa-ta Fesitusi xonton. ¹⁴ I xa tili kiika ke Sesare. Lun do, Fesitusi xa Poli la kuwo nafo mansaxe pen. A xo: «Felikisi xa xe do tu kaso la jan. ¹⁵ Nte taxa-ta Yerusaleme tumo men, sadaxalasibaxa kuntigolu nin Yahudiyalu la moxobalu xa wo xe sindun, x'a njinin nte kun xo nte xa kiito tege a xan, x'a yita xo a nin faxalo xa xan. ¹⁶ Nte x'e jaabi xo Romengolu man xan xa moxo dun bulo to, jannin wo tigo nin a jalagibaxolu x'e noxo je na nin ja, xa wolu jaabi. ¹⁷ Wo moxolu nin nte nata i noxo fe jan. Nte man wo kuwo bula a xa me. Wo lun do, nte xa n' si-gi kiititegedula xa kila bula xo i xa na wo xe ti. ¹⁸ A jalagibaxolu wulita xa xuma. Bari nte tun x'a miiri xo i be nala a jalagila ku jaxo mennu to, a man tara wolu si ti. ¹⁹ I tunnu nin Poli be i noxo soosola i la diino kuwo le to, anin xe do la kuwo to xo Isa. Wo tun sata, bari Poli xo, xo a nilama le mu saasa. ²⁰ Nte tun man a lon n' si a nalabo na men, wo le x'a tu, nte xa Poli njinxaxo nin a si son xa taxa Yerusaleme, a la kuwo kiito xa tege non. ²¹ Bari Poli x'a njinin xo a la kuwo nabo xa tu Rome mansaxe fan ma. Wo tumo, nte xa yanmaro di, xo i x'a tu kaso la, fo nte x'a bula tumo men xa taxa Rome mansaxe bata.» ²² Agiripa xo Fesitusi pen xo: «Nte fan b'a fe xa jin xe in name.» Fesitusi x'a jaabi xo: «Sinin, í s'a lame.» ²³ Wo lun do, Agiripa nin Berenise nata faamaya to. I nin sorodasi kuntigibalu nin gallo pamoxolu dunta i noxo fe bunjo xono. Wo xo, i nata Poli ti x'a la Fesitusi la yanmaro xan. ²⁴ Fesitusi xa xumo ta xo: «Mansaxe Agiripa, anin alu mennu bee fele jan, alu na be jin xe in na, Yahudiyalu bee x'e la diminjo yita n' na ate la kuwo to Yerusaleme, anin jan du, xa feten xo a xa xan xa faxesa le. ²⁵ Nte ken bulu, a man kujaxu si ke, men s'a tu a si faxesa. Bari ate fan xo x'a la kupa xa tu Rome mansaxe bulu. Wo le x'a tu, nte x'a latege x'a bula xa taxa je. ²⁶ Nte man xuma xoyiman si soto x'a safe, x'a ki marigi ma a la kuwo to. Wo le x'a tu, nte nata a ti

alu na xoto, sakuta ite fan mansaxe Agiripa na xoto, walasa a njinxalo xo, nte xa fen soto n' si men safe.

²⁷ Bawo xa kasolamoxo do bula xa taxa Rome, a jalagikunjo man fo x'a xoyiya, wo nte bennin.»

26 Agiripa xo Poli pen xo: «Í si sin no xa xuma í la kuwo xan.» Wo to, Poli x'a bulo xotota xa xuma, x'a fan naxoyiya ten xo: ² «Mansaxe Agiripa, a diyata nte pen xa n' fan tara ite na xoto bi, x'a yita í la xo Yahudiyalu be n' jalagila kuwo mennu bee to, xo wolu si nte tonja ti. ³ Bawo ite fan xa Yahudiyalu la laada kuwolu nin i la soosoli kuwolu bee lon. Wo le x'a tu, n' b'é matarala í xa muja xa n' name. ⁴ «Kabirin nte dindinjo, nte bosilolu keta men ti, n' na siya to anin Yerusaleme, Yahudiyalu bee xa wo lon. ⁵ I xa nte lon kabirin tuma jan. I si sin no xa nte seedeya nin a xa di i pen, xo nte tun be n na diino sila xolemanjo le taxamala, nin wo mu Farisiyalu la silo ti. ⁶ Ala xa lahido menta n benbalu pen, nte gigo be wo xan, wo le x'a tu, kiito be tegela nte xan saasa. ⁷ N na xabiile tan nin fulo bee gigo b'a xan xo wo lahido si latimme. Wo le x'a tu, i b'e balannin xa Ala batu, suwo nin tilo. Mansaxe Agiripa, wo gigo le x'a tu Yahudiyalu be nte jalagila. ⁸ Mun na atelu Yahudiyalu b'a miirila xo Ala me sin no, xa furelu lakuni? ⁹ Nte fan tun x'a miiri xo nte tun xa xan xa kuwo bee ke xa Nasareti Isa toxo kele. ¹⁰ N' xa wo le ke Yerusaleme. Sadaxalasibaxa kuntigolu xa fango di nte ma tumo men, n' xa lannayabaxo kiika bula kaso la. Nin i jalago tun keta faxalo ti, wo tun be diyaxan nte pen. ¹¹ Tuma kiika, nte tun si taxa Alabatusu nin Alabatusu, x'e tooro, x'e diyakuwa, xo i xa Isa toxo tija. N' diminkujaxo i xoto, nte tun be taxala fo gallu xotelu to, xa taxa i tooro.» ¹² «Wo na ma, sadaxalasibaxa kuntigolu xa fango di n' ma, xa n' ki xa taxa Damasi. ¹³ Mansaxe Agiripa, xa n' tu silo to, tilinkunte ma, n' xa keneya je xa bo sanjo to. Wo keneya tun be paranin tilo ta ti. A manata xa nte nin n' taxamapoxolu laminin. ¹⁴ N bee boyita dugo ma. Nte xa xumaxanjo do me, men x'a fo n' pen heburuxanjo to xo: "Soli, Soli, mun na í be nte toorola? Í la xoleya nte fen panna, í xo nin sarituura murutita xo a be senekela la guma tanna, wo nte fen panna tuura pen na men." ¹⁵ N' xa njinxalo ke xo: "Ite mu jon ti, Marigi?" Marigi xa n' jaabi xo: "Nte mu Isa le ti, í be men tooroxan. ¹⁶ Bari wuli í x'é lo. Nte xa n' yita í la, walasa í xa ke n' na baaradinjo ti. Í si ke n' seedo ti, x'a fo moxo xotelu pen í xa n' je na men bi. N' be nala men yitala í la tugun, í si ke wo laxalibaxo ti. ¹⁷ N' s'í lakanta Yahudiyalu nin siya tolu ma, n' be í kila wo mennu ma. ¹⁸ N' be í kila walasa í xa i na yele, x'e bo dibo to, x'e bula keneya la, x'e labo Sentane la fango xoto, x'e bula Ala la fango xoto. Nin i lata nte la, i si junubeyafo soto, xa sigidula soto Ala la moxo senuyaninjo to." » ¹⁹ Poli x'é soto wo xumolu la tumo men, a xo mansaxe pen xo: «Wo le x'a tu, Agiripa, kuwo men yitata nte la xa bo sanjo to, nte man n' ban

wo ma. ²⁰ Bari n̄ xa Damasi nin Yerusaleme moxo lelu waaju folo; wo xo, Yude maro bee, anin siya tolu. N̄ xo i pen xo i xa nimisi i la junubolu la x'e koppa Ala ma, xa kewale numalu ke, mennu s'a yita xo i nimisita tigi tigi. ²¹ Wo le x'a tu, Yahudiyalu xa nte muta Alabatusuba xono, i tunnu b'a njinna xa nte faxesa. ²² Bari Ala xa n̄ nakanta fo xa si bi ma. N̄ be jan haalibi, xa n̄ na seede ya ke moxolu bee pen, moxondin nin moxoba. Kilalu nin Musa xo, xo kuwo mennu be nala kela, n̄ man xuma xote fo nin wolu nte. ²³ Wolu tunnu x'a fo xo Kirisita si tooro, xo a si ke folo ti xa kuni xa bo furelu to, anin xo a si kisilo xoyiya n̄ na siya nin siya tolu pen.» ²⁴ Xa Poli tu a fan naxoyiyala ten, Fesitusi fetenbeteta xo: «Poli, fa le be i to! Í xaranta fo í janxa fatorya!» ²⁵ Poli x'a jaabi xo: «Fa nte n̄ to, Fesitusiba. Nte be tonja xumo nin hakilitigiya xumo lelu fola. ²⁶ Mansaxe Agiripa be nin ku innu bee xalama; wo koso nte si sin no xa xuma hakililasigo to a pala. Nte be lanin a la xo ate xa wo kuwo bee lon, bawo a man ke dugu to. ²⁷ Mansaxe Agiripa, kilalu xa men fo, í be lanin wo la ba? Nte x'a lon xo í be lanin a la.» ²⁸ Agiripa xo Poli pen xo: «Í hakilo la x'é si nte ke no kerecenjo ti nin waxatindin in xono?» ²⁹ Poli x'a jaabi xo: «A keta saasa ti wo, a keta lun xote ti wo, n̄ be Ala matarala a xana dan ite kilin doron ma, bari ate mennu bee be nte lamenin bi, x'alu dulu xa ke í xo nte be ja men, bari alu xana siti nin negejolo xo innu la, í xo nte.» ³⁰ Wo tumo, mansaxe anin goferenere, nin Berenise, anin moxo fen wo fen tun be i bata je, wolu bee wulita. ³¹ I bota tumo men, i xo i joxo pen xo: «Nin xe in man kujaxu si ke men nin faxalo xa xan, walla kasolabulo.» ³² Agiripa xo Fesitusi pen xo: «Nin xe in tun si sin no xa bula nin a tun man a la kuwo dun Rome mansaxe bulu.»

27 A lategeta tumo men xo n xa dun batonjo xono xa taxa Itali, Poli nin kasolamoxo do xotelu dunta sorodasi kuntigo do bulu xo Yulusi. Wo tun mu Rome mansaxe la sorodasi jama kuntigo le ti. ² Batonjo do tun be nala bola Adaramite, xa taxa Asi baton danxanjo la. N dunta wo xono xa taxa. Arisitarake tun be n to, Tesalonikengo le mu xa bo Maseduane jamano xan. ³ Wo lun do, n sita Sidon. Yulusi tun be Poli mutakubetela. A sonta xo Poli xa taxa bo a xanuntelu ma, walasa a maakuwolu xa jipa. ⁴ N bota non tumo men, n tanbita Sipere sutto senbo fe, katu-gala fojo tun be n kumbenna. ⁵ N xa xooxojiyo tege xa tanbi Silisi nin Panfili senbo to, xa si Mira, Lisi jamano xan. ⁶ Sorodasi kuntigo xa batonjo do tara non. Wo batonjo bota Alekisandiri, a be taxanin Itali jamano xan. A xa n nadun wo xono. ⁷ N xa tili kiika ke jiyo xan, batonjo tun be taxala dondin dondin. N segeta bete jannin n xa si Kinidi gallo xoto. Fojo tun be n balila xa taxa jafe; wo xanma, n tanbita Salamoni mafanjo la, xa taxa Kereti sutto senbo la, fojoba nte sila jan men.

⁸ N xa xoleyaba soto xa tanbi wo sutto senbo fe. Wo xo, n sita dula do xo "Batondan Numalu". Wolu nin Lase gallo te man jan. ⁹ N tunnu xa waxati jan ke taxamo la xa ban. Jixantaxamo tun keta faaratu kuwo ti, bawo neno tun sita. Yahudiyalu tunnu be sunna waxato men, wo tun tanbita xa ban. Wo le x'a tu, Poli x'e lasobi xo: ¹⁰ «N̄ xanuntelu, nte ja b'a la xo nin jixantaxama in mu faaratu kuwo le ti: A me laban nin tinalo man bo a to. A me dan batonjo nin donolu doronnu ma, bari n fannu si sin no xa tu a to.» ¹¹ Bari sorodasi kuntigo tun be lanin batonborila nin batontigo la xumolu la xa tanbi Poli la xumolu xan. ¹² Wo batondanjo tun man nin neno latanbo xanma. Wo le x'a tu, i kiika x'a latege xo i be bola je xa taxa Fenikisi, nin wo si ke no, Kereti jamano batondanjo la, walasa xa neno latanbi non. Wo dula be jatilinnin banbugu tiliboyo nin saheli tiliboyo ma. ¹³ Fojo dondin tegeta xa bo banbugu mafanjo tumo men, i tunnu hakilo la xo i xa men natege xo wo si sin xa ke. I wulita xa tanbi Kereti senbo fe. ¹⁴ Bari a man me wo xo, fojoba do wulita xa bo sutto to, nin wo be kilila xo "saheli kotonjo fojo", wo nata ke i xan. ¹⁵ Wo fojoba xa batonjo ta. N tunnu me fusi ta no fojo kun. N xa n fannu tu a bulu. ¹⁶ N tanbita suttendinjo do banbugu mafanjo la, wo toxo xo Koda. Wo dula xa n kisi fojo ma. Xulunjo men be n bulu lakisilo xanma, n sinta xa wo bo jiyo to, bari a man diya. ¹⁷ I xa xulunjo layele, x'a bula batonba xono tumo men, i xa batonba siti julo la. I tunnu be silala fojo xana taxa batonba lasigi kepo xan Libi jamano mafan. Wo to, faano mennu be batonjo lataxala, i xa wolu lajigi, x'e fannu tu fojo bulu. ¹⁸ Bari fojoba tun be n na batonjo lamaxaxan bete haalisa fo wo lun do, i xa batonxonodono dolu fili jiyo to. ¹⁹ A tili sabananno, i fannu bululu xa batonmiranjo la ta xa wolu fili xooxojiyo to. ²⁰ Tili kiika keta, tili wo, loolu wo, a si man bo. Fojoba men joxon man sa, wo tuta jaxuyanin. Kisilo gigo bee bota n na xa ban pewu. ²¹ Batonxonomoxolu tunnu man domoli ke kabirin waxati jan. Wo to, Poli wulita x'é lo i temo to x'a fo i pen xo: «N̄ xanuntelu, ate tunnu xa xan xa nte la xumo lame xa tu Kereti. Wo to, n tunnu si kisi nin tooro in nin nin tinali in ma. ²² Bari saasa, nte b'a fola alu pen xo alu x'e ja sigi. Alu si niyo me tu a to, batonjo doron ne be tula a to. ²³ Ala men ta mu nte ti, nin n̄ be baaro kela a pen, wo la melekiyo do x'é yita nte la, nin su in to. ²⁴ A xo n̄ pen xo: "Poli, í xana sila. Waajibo le mu í xa lalo Rome mansaxe ja xoto. Wo le koso, í nin moxo wo moxo be batonjo xono, Ala be nala í nin wolu bee kisila a la numaya koso ite la kuwo xanma." ²⁵ Wo le x'a tu, n̄ xanuntelu, alu i ja sigi, bawo nte be lanin Ala la. A fota nte pen ja men, a si ke wo ja ma. ²⁶ Bari waajibo le mu, n xa taxa fili sutto do to.» ²⁷ Wo suwo tun mu n su tan nin naaninjo le ti jiyo xan. Fojo tun be n nataxaxan xooxojiyo do xan xo Adiriyatike. Dugutala waxato, a keta ba-

tonnaborilalu nala xo n sutiyata xooxojidango la. ²⁸ I xa sumannilango bula jiyo to. I x'a tara xo a dinoya mu metere tan saba nin woorowula le ti. I xa sumannilango fili jiyo to nafe dondin tugun, i x'a tara xo dinoya mu metere muxan nin sagi le ti. ²⁹ I tunnu be silala batonjo xana taxa xosi kuro dolu la. Wo le x'a tu, negeba men be batonjo lalola jiyo xan, i xa wo naani bula jiyo to, batonjo xofe. I kepeninjo tun be saxuyelo laxononin. ³⁰ Batonnaborilalu tunnu b'a fe x'e bori xa bo batonjo xono. I xa baton doxomandinjo lajigi. Negeba mennu be batonjo lalola jiyo xan, i x'a ke i xo nin i be taxala wo lelu bulala jiyo to, batonjo nafe. ³¹ Bari Poli xo sorodasi kuntigo nin sorodasi tolu nen xo: «Nin nin xe innu man tu batonba xono, alu me kisi no.» ³² Wo to, sorodasolu xa baton doxomandinjo julolu tege, x'a bula xa taxa. ³³ Saxuyelo sutiyandinjo, Poli x'e bee kili domolo ma. A xo i nen xo: «Bi mu a tili tan nin naano le ti, alu hakilo man sigi, alu man domoli ke. ³⁴ Wo le x'a tu, nte be alu tarala x'alu xa domolo ke, bawo alu maakuwo be wo la, walasa alu xa kisi. Haali alu si kunsina kilin me sanko.» ³⁵ Wo xumo foninjo xo, Poli xa buuro ta xa barako bula Ala nen i bee nala, wo xo, a x'a kutun kutun, xa domolo damuta. ³⁶ Wo to, i bee ja sigita, i dulu xa domolo ke. ³⁷ N moxo keme fula nin tan woorowula nin wooro le tun be batonjo xono. ³⁸ I xa domolo ke tumo men x'e fa, i xa alixaamo fili xooxojiyo to, walasa batonjo xa feya. ³⁹ Saxo yeleninma, batonnaborilalu tunnu man a lon i be dula men. I xa xooxojiyo bulo do je, kepo tun be wo dula. I xo xo i nin batonjo be taxala wo dula nin a si ke no. ⁴⁰ Wo to, negeba mennu be batonjo lalola jiyo xan, i xa wolu firin x'e bo a la, x'e tu jiyo to, xa batonnaborilango julo firin. Wo xo, i xa batonjo nafela faano lawuli, walasa fojo xa tege. I x'e natilin kepo ma xa taxa. ⁴¹ Bari batonjo taxata sigi kepo to, jiwoyo fula temo to. Batonjo nafela tun dunta kepo to, a korita bola a no to. Wo x'a tara fanfebalu be ma x'a xofela xosi, fo x'a tija. ⁴² Sorodasolu tunnu b'a fe xa kasolamoxolu bee faxa, walasa i xana i newu x'e bori xa taxa. ⁴³ Bari sorodasi kuntigo tun b'a fe xa Poli kisi. Wo le x'a tu, sorodaso tunnu b'a fe xa men ke, a x'e bali wo kela. A xa yanmaro di moxolu ma, mennu xa newulo na lon, xo i fololu x'e bula jiyo to xa taxa xooxojixanjo la. ⁴⁴ Tolu tunnu xa xan x'a lo i nofe xa yeke yirikutunjo xan, walla batonjo yiro dolu xan, xa taxa. Wo na ma, i bee numa sita xooxojixanjo la.

28 N kisininjo xo, n x'a me xo wo sutto toxo xo Malite. ² Non moxolu xa n mutakubete. I xa taba lamana xa n bee kili xa na wo la, bawo sanjiyo tun be naxan, neno du tun b'a to. ³ Poli xa loxo jaro kiika ta xo a b'a bulala ta to. Tafuntano koso, fofoono do bota x'e nelen a bulo la, x'a kin. ⁴ Sutto to moxolu xa sa je tumo men a be nelennin Poli bulo la, i xo i noxo nen xo: «Sikka nt'a to, nin xe in mu moxofaxala le ti; bawo a kisita

xa bo xooxojiyo to, wo bee nin a ta, n na bolibatuta tilinjinjo man son a xa tu balunin.» ⁵ Bari Poli xa sa gigiji ta to. Fusi man ke a la. ⁶ Wo moxo tunnu nala xo Poli bulo tun si fuunu, walla xo a si boyi xa sa wo no to. Bari i meta laxonolo la tumo men, x'a je xo fusi man ke Poli la, i la miiriyalu yelemata. I xo, xo Poli mu bolibatuta do le ti. ⁷ Wo sutto namoxoba men toxo xo Pubilusi, wo la dula tun xa sutu non na. A xa n mutakubete, xa n jigiya a la luwo xono tili saba xono. ⁸ Pubilusi fa tun man kende. Xando nin xonotodiminjo le tun b'a la. Poli taxata a bata xa Ala matara a nen x'a bulo la a xan, x'a lakendeya. ⁹ Wo keningjo, wo sutto moxo to mennu man kende, wo dulu bee nata Poli bata. I kendeyata. ¹⁰ I bee xa n bunna bete. N be nala batonjo tala tumo men, n maakuwo tun be fen wo fen na, i xa wo bee di n ma. ¹¹ Xaru saba tanbo xo, n xa Aleksandiri batonjo do ta, xa taxa. Wo batonjo be kilila xo: "Funelu". Wo batonjo tun xa neno waxato ke sutto batondango do la. ¹² N sita Sirakusi gallo to, xa tili saba ke non. ¹³ N boninjo wo gallo to, n xa batonjo bori dandanda la xa si Resiyo. Wo lun do, fojo do tegeta xa bo banbugu mafanjo. Tili fulananjo, n sita Pusoli. ¹⁴ N xa badin lannayabaxo dolu tara wo gallo to, mennu x'a njin n fe, xo n xa loxokun kilin ke i bata. N sita Rome nin na in ne ma. ¹⁵ Badin lannayabaxolu mennu be Rome, wolu xa n xibaruya me tumo men, i nata n kunben fo Apiyusi Saxa to. Dolu nata n kunben dula do du, men toxo xo "Luntanjigidula Sabo." Kabirin Poli x'e je, a xa barako bula Ala nen, do kafuta a juso ma. ¹⁶ N sita Rome gallo xono tumo men, fankamalu sonta xa Poli bula dula do a danna, a nin sorodasi kilin, men b'a lakorosila. ¹⁷ Tili saba tanbininjo xo, Poli xa Rome Yahudiyalu la namoxolu kili xa na a bata. I kamarita tumo men, a xo i nen xo: «N badinjo, haali x'a tara nte man fusi ke n na siya la, anin n benbalu la laada kuwolu la, i xa nte muta Yerusaleme xa n dun Romengolu bulu. ¹⁸ Wolu xa nte njinxo tumo men, i tunnu b'a fe xa n bula, bawo i man fusi tara nte la kuwo to, men nin faxalo xa xan. ¹⁹ Bari Yahudiyalu man son wo ma. A keta n du ma waajibo ti x'a kuwo dun Rome mansaxe bulu. Bari wo nt'a yitala xo nte tun b'a fe xa n na siya moxolu jalagi. ²⁰ Wo le x'a tu, nte x'alu kili walasa x'alu je, xa xuma alu nen; bawo Banisirayila moxolu gigo be men xan, nte be sitinin negejoloxo la wo le koso.» ²¹ I xa Poli jaabi xo: «N man safe si soto xa bo Yude maro la i la kuwo to. Badin si du man bo je xa xibaru jaxu fo i la kuwo to. ²² Bari n b'a fe x'e lame, i x'e hakililata fo, bawo n x'a lon xo i be kafo men to, moxolu wulita wo xanma dula bee.» ²³ I nin Poli benta lunjo do to. Wo lunjo, moxo kiikaba nata a tara a jatigila to. Poli xa kunnafirinjo dolu di i ma, kabirin saxo ma, fo wura la. A xa Ala la Mansaya kuwo fo i nen. A tun b'a njinna x'e lason Isa la kuwo ma. Wo to, a tun be xumala Musa la sariya nin kilalu la kitaabolu

xan i jɛn. ²⁴ Poli la xumolu xa dolu lason; bari dolu x'e ban xa lannaya ke. ²⁵ Wo moxolu man ben kilin to. Jan nin i xa taxa, Poli xa jɛn xuma kilin in fo i jɛn xo: «Kila Esayi tun xa men fo alu benbalu jɛn, Ni Senunjo barako to, wo tun mu tonja le ti. ²⁶ A tun x'a fo xo: "Taxa a fo jɛn siya in jɛn xo: Alu si melo ke ja wo ja, alu me faamuyali ke, alu si felelo ke ja wo ja, alu me jeli ke. ²⁷ Bawo jɛn siya in x'a jusukunjo xoleya, i x'e tulolu sukki x'e jalu taxun walasa i jalu xana jeli ke, i tulolu xana meli ke, i xana faamuyali ke i jusukunjolu la, i xana taxa i yelema nte Ala ma nin nte si i kendeya x'e

kisi." ²⁸ Wo to, Poli x'a fo i jɛn xo: "Alu xa xan x'a lon xo Ala la kisilo kita siya tolu ma. Wolu kennu s'a lame!" » [²⁹ Poli xa wo xumolu fo tumo men, Yahudiyalu taxata. I tunnu be i joxo soosoxan bete.] ³⁰ Poli xa san fula dafaningo ke bunjo do xono Rome, a tun be men sarala. Moxo men tunnu bee be taxala bola a ma, a tun be wolu lamutala. ³¹ A tun be waajulo kela Ala la Mansaya xan, xa moxolu laxaran Marigi Isa Kirisita la kuwo to, x'a hakilo lasigininjo tu, moxo si tun nte a balila xa wo ke.

ROMENGOLU

1 Nte Poli, men mu Isa Kirisita la jonngo ti, n be jin safe in kila alu ma. Ala xa n kili xa n ke a la kiladinngo ti. A xa n sugandi x'a la xibaru Dimanngo fo. 2 Ala tun xa wo Xibaru Dimanngo lahido ta a la kilalu da la, Kitaabu senumanngolu to kabirin waxati jan. 3 Xibaru Diman in be Ala Dinxe le xan, nin wo mu n Marigi Isa Kirisita ti: Hadamadinnga silo la, a bota mansaxe Dawuda to. 4 Ni Senunngo fe, Ala x'a yita xo a Dinxe barake ma le mu, a kunita tumo men xa bo furelu to. 5 Isa barako to, n xa Ala la neemo soto xa ke a la kiladinngo ti, walasa siyalu bee xa lannaya ke, xa Ala foxanngo muta. 6 Atelu Romenga lannayabaxolu, Isa Kirisita xa atelu mennu kili, alu dulu keta wo siyalu do ti. 7 Ala la xanuninngo fen wo fen be Rome, a x'alu kili walasa alu xa ke a ta ti. N Fa Ala, anin Marigi Isa Kirisita xa neemo nin heero ke alu jen. 8 N be folola xa barako bula Ala jen Isa Kirisita barako to alu bee jen, bawo alu la lannaya xibaro meta duniya bee xono. 9 Nte be Ala men batula n jusukunngo la, x'a Dinxe xibaru Dimanngo fo, wo mu nte seede ti, xo nin n b'a matarala tuma bee, n hakilo be tula alu kun. 10 Nte be Ala tarala tuma bee, xo nin a sago le mu, a x'a tu nte xa taxa bo alu ma. 11 A loxoba be n na x'alu je, walasa n xa Ni Senunngo la solifenngo do lasi alu ma, nin do si kafu alu barako ma lannaya to. 12 Wo xoto xo n bee xa xan lannaya men to, n s'i noxo jusudun wo lannaya to. 13 N badinngolu, n b'a fe alu x'a lon xo sinnga kiika ti, n x'a nne xa taxa alu je, bari haalibi, n man taxa no. A diyata n jen n na baaro no xa je alu dulu bata, i xo a no jeta siya tolu bata na men. 14 Moxo bee la julo be nte la, bawo n xa xan xa Xibaru Dimanngo lasi bee ma: Dugubaxono moxolu anin wulaxono moxolu, moxo xaranninngolu nin xarabalolu. 15 Wo xanma, a xa di nte jen bete xa Xibaru Dimanngo fo atelu Romengo dulu jen. 16 xibaru Dimanngo fo maluya nte nte la, bawo sintigiya le mu Ala bulu, men be lannayabaxolu bee kisila; Yahudiyalu folo, wo xo siya tolu. 17 Xibaru Dimanngo b'a yitala Ala be moxolu jaatela moxo tilinnginngo ti na men. A be sotola lannaya doron ne fe kabirin folofolo fo labanngo la, i xo Kitaabo x'a fo na men xo: «Moxo men xa tilinnginnga soto lannaya fe, wo si nilamaya.» 18 Ala b'e tunin sanngo to x'a la diminngo yita moxolu la, i la Alapasilanngabaliya nin i la tilinbaliyakuwolu bee xanma, wo mennu be ku tilinbalolu kela xa tonnga tu duguwo to. 19 Bawo moxo xa xan xa men lon Ala kuwo to, wo be xoyiyanin i ma. Ala

fan ne xa wo yita i la. 20 Kabirin duniya da tumo, Ala la mansabunnga kuwo mennu mu jebalo, wolu si lon a la kebaarolu ma. Wolu mu a la sintigiya banbalo nin a la Alaya le ti. Wo xanma, jalago me bo no hadamadinngolu ma. 21 Bawo i xa Ala lon, bari i man a bunnga i xo a xa xan xa bunnga na men. I man barako du bula a pen. I xa miiriya kuntanngo lelu ta. I la hakilintannga xa dibo bula i sondonmo la. 22 I be i fannu jaatenin hakili ma ti, x'a tara hakilintanngo lelu mu. 23 Jannin i xa Noorotigi Ala batu, wo men nte sala, i xa wo tu je, xa yiri moxoma lelu batu, mennu mu moxo sata mununngo ti, anin xonolu nin sinnaanima fenngolu nin fenngo mennu b'e fuufula mununngo. 24 Wo le xanma, Ala x'e tu je, i xa ku noxoninngolu ke, x'a la i jusukunngolu diyannxo xan, fo i xa tango bo i noxo balo xan. 25 I xa Ala la tonnga falin faniya la, xa dafenngolu batu xa baaro ke i jen, xa Dabaxo tu je, tanto be ate men jen fo abada. Amiini! 26 Wo xanma, Ala x'e tu i maluku negolu bulu. I la musolu xa musu nin xeya silo bula x'e noxo ninin. 27 Xe dulu xa musolu tu je xa fendun i noxo nofe. Xe nin xe kafuta xa kukebalo ke. I fannu x'e la fendunngo sara soto. 28 I man son xa Ala lon. Wo xanma Ala x'e tu i la miiriya jaxolu xono walasa i xa ku kebalolu ke. 29 I xono be fanin tilinbaliya sifa bee la, anin jaxuya nin wasabaliya, nin feere jaxo. I jusukunngo be fanin kiiliya nin moxofaxo nin kelejaliya nin nanbaranteya nin korojugaya nin naafigiya la. 30 I be i noxo toxojaxo fola. Ala jaxo lelu mu. Xumakumanfo nin fanbunnga nin wasubaxanteya xa di i jen. I be ku jaxo sifa bee feero darala. I man xulu i wulubaxolu jen. 31 Hakili nte i la, xantigilu nte, i xa xole, hinnaye nte i la. 32 I xa Ala la kiito lon tigi tigi wo kuwolu xan. I x'a lon xo i kebaxolu nin saya le xa xan. Bari haali wo, i be wo kuwolu kela. Wo doron nte, men dulu b'e kela i be wolu jusudunna.

2 Ite moxo wo moxo, nin i be tolu jalagila, jalago be i ma. X'e tu tolu jalagila, i be i fan jalagila, bawo i be tolu jalagila kuwo mennu to, i fan be wolu kela. 2 N x'a lon xo Ala be kiito tegela wo ku sifalu kebaxolu xan x'a la tonnga le xan. 3 Ite men be wo kuwolu kebaxolu jalagila, x'a tara i fan b'e kela, i la miiro to xo i si kisi Ala la kiito ma ba? 4 I be Ala la pumayaba nin a la mupo nin a la sabaro mafelela fuwo ti ba? I man a lon ba, xo Ala la pumaya le si i bula i xodila i la junubolu la? 5 Bari i tulo xa xole. I nte a fe xa tuubi. Wo xanma, i be Ala la

diminba sigila í fan ña, x'a la kiiti tilinningo lunjo nin a la diminba lunjo laxono. ⁶ Ala si moxo bee sara i la kebaarolu la. ⁷ Mennu man sege ñumako la, i man sege nooro nin bunña nin sabaliya ñininno la, a si wolu sara nilamaya banbalo la. ⁸ Bari mennu be Ala soosola, x'e ban tonña ma, xa son tilinbaliya ma, a la diminjo nin a la juso si boyi wolu to. ⁹ Tooroba nin silanñaba si boyi kujaxukelalu bee to: Yahudiyalu folo, wo xo siya tolu. ¹⁰ Bari nooro nin bunña nin heero si di kumakelalu bee ma: Yahudiyalu folo, wo xo siya tolu. ¹¹ Bawo Ala bulu, moxo man fisa moxo ti. ¹² Mennu xa junubo ke, x'a tara i man Musa la sariya lon, wolu si halagi x'a tara wo sariya silo la nte. Mennu xa junubo ke, x'a tara i xa sariya lon, kiito si tege wolu xan sariya la. ¹³ Sariya lamebaxa gansanñolu nte tilinnin Ala ña xoto. Mennu b'a lamela x'a latimme, wo lelu be tilinninga sotola. ¹⁴ Siya tolu mennu man Musa la sariya soto, wolu be sariya latimmela i fannu ma. Wo b'a yitala xo sariya be i xono, x'a tara i man Musa la sariya soto. ¹⁵ Wo la, i b'a yitala xo sariya la sila foninñolu be safenin i sondonmo la. I jusukunjo du be wo seedeyala, anin i miiriyalu. Tuma dolu i miiriyalu si i jalagi, tuma dolu i si boloxo di i ma. ¹⁶ Nin ku in nelu be bola keno xan lun do. Lunjo men, nin Ala b'a fola Isa Kirisita ñen, xo a xa kiito tege moxolu la ku duguninñolu xan, i be lankenemala wo lun ne, í xo nte be xibaru Dimanjo men fola x'a yita ña men. ¹⁷ Ite men be í fan kilila xo Yahudiya, xa í gigo la sariya xan, xa í fan xutu Ala kuwo to, ¹⁸ í xa Ala sago lon. Í xaranta sariya la, x'a lon men xa ñin. ¹⁹ Ite men be í fan jaatenin fiyontolu la guma sababaxo nin keneya ti dibitomoxolu ñen, ²⁰ í xo xo í mu ku lonbalolu xaranbaxo ti, anin dindinñolu karanmoxo, bawo í xa lonjo nin tonña dafaningo soto sariya xono. ²¹ Ite men be tolu laxaranna, mun na í nte í fan naxaranna? Í be waajulo kela xo suupalo xana ke, mun na í fan be suupalo kela? ²² Ite men b'a fola xo jadoya xana ke, mun na í fan be jadoya kela? Ite men xo, xo boliku man di í ñen, mun na í be i batusuwolu xono fenñolu tala? ²³ Ite men be í fan bunñala sariya kuwo to, mun dun na í be wo sariya tñala xa Ala doxoya? ²⁴ A be Kitaabo xono xo: «Ala toxo be tñanin siya tolu to alu Yahudiyalu nofe.» ²⁵ Naxo men, nin Musa la sariya x'a waajibiyi Yahudiyalu ma, nin í be Musa la sariya latimmela, wo xa bete. Bari nin í be sariya tñala, í la ñaxo keta fuwo ti. ²⁶ Nin ñaxabalo be sariya silo taxamala, Ala me a la ñaxabaliya jaate ñaxalo ti ba? ²⁷ Men man ñaxa fate-subo la, a dun be sariya silo taxamala, wo si ite jalagi, bawo ite be sariya tñala, x'a tara sariya safe be í bulu anin í be ñaxanin. ²⁸ Men mu Yahudiya ti a banto to, wo nte Yahudiya soobe ti. Naxo men keta balasubo la, wo nte ñaxa soobe ti. ²⁹ Bari men mu Yahudiya ti a jusukunjo la, wo le mu Yahudiya soobe ti. Ni Senunjo xa ñaxo men ke jusukunjo la, wo le mu ñaxa soobe ti. Wo tigo la tantulo man bo moxolu to, a bota Ala le to.

3 Yahudiyaya diya mu mun ti? Nafa joman be ñaxo la? ² A nafa xa bun ña bee ma. A folo, Ala x'a la xumo xarifa Yahudiya lelu ma. ³ I to dolu man ke xantigilu ti. Bari wolu la xanbulalo si Ala la xantigiya tñala ba? ⁴ Abada! Ala ken mu tonñatigo le ti, haali x'a tara hadamadinjo bee mu faniyante ti, í xo a be safenin Kitaabo to ña men xo: «Nin í be xumala, í la tonñatigiya xa lon; nin í be kiitila, í xa sewo.» ⁵ Dolu b'a fola xo: «Nin n na tilinbaliya x'a yita xo Ala be tilinnin, nin a xa n ñangi wo to, n si mun fo no? Ala si mafele no tilinbaloti ba, bawo a be n ñangila?» ⁶ Ní be xumala hadamadinñolu la miiriyala le to. ⁶ Abada! Ala nte tilinbali ti. Nin Ala tun mu tilinbaloti ti, a si sin no xa kiito tege duniya xan ña di? ⁷ Nin nte la faniya xa do kafu Ala la tonñatigiya ma anin xa bunña la a xan, mun na nte si jalagi tugun xo í mu junubekela ti? ⁸ Moxo dolu si a fo xo: «Mun na n me ku jaxo ke, walasa a xa falin ku ñuma la?» Dolu be nte toxo tñaxan xo nte b'a ma xa moxolu laxaran wo la. Bari wo moxolu si jalagi, i nin a xa xan du. ⁹ A be di! Alan ntelu Yahudiyalu xa fisa moxo tolu ti le ba? Abada! Bawo í x'a yita xa ban xo Yahudiyalu nin siya tolu bee be junubo fango xoto. ¹⁰ A be ten, í xo a be safenin Kitaabo to ña men xo: «Moxo tilinnin nte je, haali kilin. ¹¹ Hakilima si nte je. Moxo si nte je men be Ala ñininna. ¹² I bee xa silo bula. I bee keta nafantanñolu ti i ñoxo fe. Ku ñumakela si nte je, haali kilin. ¹³ I xumaxanjo sumo xa ku í xo xaburu xono fenjo. I s'i nenjo ke xa moxolu lafilu. Xuno be i la xumolu la í xo fofoono. ¹⁴ I da be fanin dangalo nin xuma xunimanjo la. ¹⁵ I xa tari moxofaxo la. ¹⁶ Tñalo nin bone be i bosilolu fe. ¹⁷ I man heero silo lon. ¹⁸ I man Alapasilanña lon muume.» ¹⁹ N x'a lon xo sariya be fen fen fola, a b'a fola sariya xotomoxo lelu ñen; walasa moxo bee xa í da muta anin duniya bee xa jalagi Ala ña xoto. ²⁰ Moxo si me jaate moxo tilinningo ti Ala bulu Musa la sariya silo taxamo xanma. Sariya b'a tula le doron, moxo xa junubo lon. ²¹ Bari saasa, Ala x'a yita n na, a be moxo jaatela moxo tilinningo ti ña men, x'a tara sariya silo la nte. Musa la sariya nin kilalu be wo seedeyala: ²² Ala be moxo jaatela moxo tilinningo ti lannaya le xanma, Isa Kirisita la. A be wo kela moxo bee ñen, mennu je la Kirisita la. Moxo man bo moxo to, ²³ a bee xa junubo ke. I bee be sinbonin Ala nooro to. ²⁴ Ala la neemo barako to, i si tilinninga soto fu, bawo Isa Kirisita xa i kunbo junubo ma. ²⁵ Ala xa Kirisita ke sadaxo ti, walasa a la saya fe, mennu lata a la, a la diminjo xa ban wolu xanma. Ala x'a la tilinninga yita ña men, wo fele: Xotonin, Ala muñata, a man moxolu sara i la junubolu la. Bari bi, a b'a yitala, a be tilinninga dila moxolu ma ña men; bawo a b'a fe x'a yita xo a fan be tilinnin, anin mennu lata Isa la, a be wolu bee jaatela moxo tilinningolu ti. ²⁷ Fanbunña kun be moxolu bulu tugun ba? Wo nte je! I s'i fan bunña x'a la dalile joman xan? Xo i be sariya latimmela ba? Ayi! I s'i

fannu bunna lannaya le doron xanma. ²⁸ N na jaate la, moxo nte Ala la tilinningna sotola sariya latimmelo la, bari a b'a sotola a la lannaya le xanma. ²⁹ Walla Ala mu Yahudiya lelu kilinnu la Ala ti ba? A nte siya to dulu la Ala ti ba? Siya to dulu la Ala mu le; ³⁰ bawo Ala kilin ne be je. A be Yahudiyalu jaatela moxo tilinningnolu ti lannaya le xanma, xa siya to dulu jaate moxo tilinningnolu ti lannaya xanma. ³¹ N be sariya kela fuwo ti ba, lannaya xanma? Ayi de! N x'a bunna le a na ma.

4 Burehima men mu n fa ti hadamadinna silo la, n si a fo x'ate xa mun soto? ² Nin Burehima tun xa Ala la tilinningna soto a fan na kebaaro lelu xanma, a tun si a fan bunna. Bari a me a fan bunna no Ala na xoto. ³ Kitaabo xo di? A xo: «Burehima lata Ala la. Wo xanma, Ala x'a jaate moxo tilinningno ti.» ⁴ Nin moxo xa baaro ke, i s'i sara soto. Wo sara nte jaatela dinmalifen ti, bari i nin a xa xan ne. ⁵ Nin moxo do lata Ala la doron, x'a lon xo a si a la tilinningna di junubekela ma, haali nin a man kebaara ke, Ala si wo tigo la lannaya jaate, xa tilinningna di a ma. ⁶ Ala xa moxo men jaate moxo tilinningno ti, x'a tara a la kebaarolu xanma nte, mansaxe Dawuda xumata wo la heero xan, a xo: ⁷ «Marigi xa moxo mennu la tilinbaliyakuwolu yaafa, xa i la junubolu lafafa, heero be wolu jen. ⁸ Marigi nte moxo men na junubolu jaatela, heero be wo jen!» ⁹ Wo heero mu naxaninngolu kilin nelu ta ti ba, fo naxabalolu dulu ta le mu? N x'a fo xo: «Burehima la lannaya xanma, a jaateta moxo tilinningno ti.» ¹⁰ Bari wo keta tuma joman? Jannin a xa naxa le mu ba, walla a naxaninngolu xo le mu? A naxaninngolu xo nte; jannin a xa naxa le mu. ¹¹ Wo xo le mu, nin a naxata. Wo naxalo keta Burehima la tilinningna soto taagumanseedo ti. A xa wo tilinningna soto a la lannaya xanma, x'a naxabalo tu. Wo na ma, Burehima keta lannayabaxa naxabalolu bee mamaxe ti, walasa i xa tilinningna soto. ¹² A keta naxaninngolu dulu mamaxe ti, wo mennu man naxa doron, bari i be i taxamala lannaya silo xan, i xo n mamaxe Burehima taxamata na men, jannin a xa naxa. ¹³ Ala xa lahido men ta Burehima nin a bonsonngo jen, xo a si duniya di i ma ke ti, wo man ke sariya koso. A keta le bawo Ala x'a jaate moxo tilinningno ti a la lannaya koso. ¹⁴ Nin wo ke soto tun be dennin sariya labatulo le la, nafa tun me ke lannaya la; lahido du bota a ma. ¹⁵ Sariya be nala Ala la diminngo le tila doron, bawo moxo me sariya latimme no. Bari sariya nte dula men, sariya sooso du nte non. ¹⁶ Wo na ma, ke be sotola lannaya le xanma, walasa ke xa ke Ala la nilifengno ti, lahido xa ke Burehima bonsonngolu bee ta ti. Mennu be i taxamala sariya la, anin mennu be lannaya kela, i xo Burehima x'a ke na men, lahido mu i bee ta le ti. Burehima mu n bee le mamaxe ti, i xo Kitaabo x'a fo na men xo: ¹⁷ «Nte xa i ke siya kiika mamaxe ti.» N mamaxe le mu a ti Ala bulu, a lata wo men na, Ala men be furelu nilamayala, xa fen bangebalolu bange. ¹⁸ Bure-

hima xa lannaya ke xa gigo soto, x'a tara gigisoto ku nte je. Wo na ma, a keta siya kiika mamaxe ti, i xo Ala tun x'a fo a pen na men xo: «I bonsonngo si siya ten.» ¹⁹ A me miiri a la xoto ma, bawo a siyo tun be taxala san kema ma. A musu Sarandu tun dinsoto waxato tanbita. Bari wo bee nin a ta, a la lannaya man doxoya. ²⁰ A la lannaya man tina, a man sikka Ala la lahido to, do le kafuta a la lannaya ma, fo x'a bula barako bulala Ala pen. ²¹ A tun be hennenin bete a ma, xo a sinngo be Ala pen x'a la lahido latimme. ²² Wo le x'a tu, a fota Burehima la kuwo to xo: «A la lannaya xanma, Ala x'a jaate moxo tilinningno ti.» ²³ Nin xuma innu xo: «Ala x'a jaate moxo tilinningno ti», wolu man safe ate kilin jen. ²⁴ I safeta ntelu dulu jen, ntelu mennu xa xan xa jaate moxo tilinningnolu ti, ntelu mennu lata n Marigi Isa lakunibaxo la. ²⁵ Isa dunta bulo to xa fafa n na junubolu xanma; bari a kunita xa bo furelu to, walasa n xa ke moxo tilinningnolu ti Ala na xoto.

5 Wo na ma, Ala xa n jaate moxo tilinningnolu ti lannaya le xanma. Wo koso, heero dunta n nin Ala te, n Marigi Isa Kirisita barako to. ² Isa Kirisita xa silo di n ma nin n si Ala la neemo soto. N be wo neemo sotola lannaya xanma. N sinsinningno be tula wo neemo xono. N be naxalinin, bawo n gigo be Ala la nooro soto xan. ³ Wo doron nte, haali xa n tu tooro xono, n be naxalinin, bawo n x'a lon xo tooro si na timinadiya ti. ⁴ Timinadiya si n na lannaya xoxo. Wo xoxoninna si na gigo ti. ⁵ Gigo me moxo neene; bawo Ala x'a la xanuya lajigi n jusukunngolu la Ni Senunngo fe, a xa men di n ma. ⁶ Xa n barakentango tu, Kirisita sata ntelu Alanasilanngabalolu jen, xa ben Ala la waxati lategeninngoma. ⁷ Moxo men si son xa sa moxo tilinningno do jen, wo moxo soto man di. A do to, moxo do tun si son xa sa moxo numa jen. ⁸ Bari Ala b'a la xanuya yitala n na pin na: Kirisita sata ntelu jen, x'a tara ntelu mu junubekela lelu ti. ⁹ A keta sadaxo ti x'a jelo bon. Wo xanma, n xa Ala la tilinningna soto. Nin n sinta xa Ala la tilinningna soto, sikka si nte a to, n si kisi Ala la diminngo du ma. ¹⁰ Xa n tu Ala jaxolu ti, n nin Ala te tobenta a Dinxe saya barako to. Sakuta n nin a te tobenta, n si kisi du a Dinxe la nilamaya barako to. ¹¹ Xa tanbi wo bee xan, n be naxalila Ala la kuwo la n Marigi Isa Kirisita barako to, wo men xa n nin Ala te laben. ¹² Moxo kilin sabaabo x'a tu junubo dunta duniya xono. Junubo nata saya ti, x'a lasi duniya bee ma; bawo moxo bee xa junubo ke. ¹³ Jannin Ala xa sariya di Musa ma, junubo tun be le duniya to. Bari Ala tun man a jaate, bawo sariya tun man di folo. ¹⁴ Wo bee nin a ta, saya xa barako soto moxolu bee xan, kabirin Adama la waxato, fo Musa la waxato; haali mennu man Adama la junubo noxon ke, wo men x'e ban Ala la fo ma. Men tun xa xan xa na, nin wo mu Isa ti, Adama keta wo payito ti. ¹⁵ Bari Ala be nilifengno men dila, anin Adama la junubo, wolu me la no i noxo ma. Tonna le mu, moxo

kiika sata ate kilin na junubo nofe. Bari Ala la neemo xa bun bete wo junubo ti. A xa nilifenjo men di moxo kiika ma gansan moxo kilin barako to, nin wo mu Isa Kirisita ti, wo du xa bun bete. ¹⁶ Wo nilifenjo be men kela, wo nin moxo kilin na junubo xa men ke, wolu nte kilin ti: Moxo kilin na junubo nata jalagilo ti; bari Ala xa nilifenjo men di junube kiika ko xofe, wo nata jalagibaliya le ti. ¹⁷ Tonja le mu, moxo kilin na junubo le x'a tu saya fango sita bee ma. Bari moxo kilin barako to, nin wo mu Isa Kirisita ti, n si fen soto men xa bun bete bete: Ala x'a la neemaba di moxo mennu ma, xa i jaate moxo tilinningolu ti, wolu si nilamaya kuto soto xa ke mansolu ti Kirisita barako to. ¹⁸ Moxo kilin na junubo xa jalagilo lasi hadamadinjo bee ma ja men, wo ja ma, Isa Kirisita kilin na kewale tilinningo be bee kela moxo tilinningolu ti, xa nilamaya kuto di i ma. ¹⁹ Moxo kilin na xanbulalo x'a tu ja men moxo kiika keta junubekela ti, wo ja ma, kilin na xantigiya xanma, moxo kiika si tilinninga soto. ²⁰ Sariya dita walasa junubolu xa siyaya; bari junubo siyata dula men, Ala la neemo siyabeteta non xa tanbi junubo xan. ²¹ Folofolo, n tunnu be junubo le fango xoto; wo le xa saya lasi moxo bee ma. Bari saasa, n be Ala la neemo fango xoto; wo le b'a tula Ala be n jaatela moxo tilinningolu ti, xa nilamaya banbalo di n ma n Marigi Isa Kirisita barako to.

6 Wo to, alan si a fo no ba xo n xa tu junubo kela, walasa Ala la neemo xa tosiyaya? ² Abada! Ntelu mennu sata xa n nin junubo tala, alan si tu junubo kela ja di tugun? ³ Walla alu man a lon ba xo alan mennu bee batiseta xa ke Isa Kirisita kafupoxo ti, xo alan nin a xaapanta a la saya to? ⁴ Batiselo xa n nin a lasa i poxo fe, anin xa n nin a lasi i poxo fe. Wo keta, walasa n dulu xa i taxama nilamaya kuto xono, i xo Kirisita kunita xa bo furelu to Fa Ala la sintigiya fe ja men. ⁵ Nin n nin ate keta kilin ti xa sa i xo ate sata ja men, n nin a si ke kilin ti xa kuni i xo ate kunita ja men. ⁶ Alan xa xan xa jin lon xo alan moxo xoto nin a jigo nin Kirisita genga i poxo fe xa sa. Wo keta, walasa wo bala junubema xa tija, nin n me tu a la jonja la tugun. ⁷ Moxo men sata, wo hooroyata xa bo junubo la jonja la. ⁸ Nin alan nin Kirisita sata i poxo fe, n be lanin a la du xo n nin a si nilamaya i poxo fe. ⁹ N x'a lon xo Kirisita kunningo xo xa bo furelu to, a nte sala tugun. Saya la julunte a la bitugun. ¹⁰ Nin i x'a je sala, a sata le x'e tala junubo ma, sinja kilinpe doron. Bari saasa, a be i nila, a be i nila Ala le pen. ¹¹ Wo ja ma, alu dulu x'alu fannu jaate xo alu sata, alu nin junubo talata, x'alu fannu jaate nilama ti Ala bulu, Isa Kirisita kafupoxoya xanma. ¹² Alu xana alu bala satalu tu junubo bulu tugun, x'e ke a la jonjo ti. Alu xana alu balo bula a diyanjolu bulu tugun. ¹³ Alu xana alu balo dulalu dun junubo bulu tugun, xa i ke tilinbaliya la baarakemiranjolu ti. Al'alu fannu di Ala ma, i xo moxo nilamalu, mennu kunita xa

bo saya to, x'alu balo dulalu di Ala ma, x'e ke tilinninga la baarakemiranjolu ti. ¹⁴ Alu me ke junubo la jon ti tugun, bawo kila Musa la sariya la julunte alu la tugun, alu be Ala la neemo le xono. ¹⁵ A dun be di? N si junubo ke ba xo bawo sariya la julunte n na tugun, xo n be Ala la neemo le xono? Abada! ¹⁶ Alu man a lon ba xo nin alu be baaro kela moxo do pen, xa xulu a pen, alu be kela wo tigo la jonjo le ti? Nin alu be junubo le la jonja la, wo labanjo mu saya le ti. Nin alu dunnu be Ala sago le kela, wo labanjo mu tilinninga le ti. ¹⁷ Bari barako xa la Ala pen; alu tunnu mu junubo la jonjolu ti, bari alu laxaranta men ma, alu xuluta wo pen alu jusukunjo bee la. ¹⁸ Alu hooroyata xa bo junubo la jonja la, xa ke tilinninga la jonja la. ¹⁹ N be xumala alu pen hadamadinja xonjo to, x'a la alu la barakentanja xan. Xotonin, alu x'alu fannu muume bula kunxoninko nin jaxumango la jonja la, wo mennu be moxo lamurutila Ala ma. Wo ja ma, saasa al'alu muume bula tilinninga la jonja la, wo men labanjo mu senuya ti. ²⁰ X'alu tu junubo la jonjolu ti, alu tunnu hooroyaninjo le mu tilinninga boxo la. ²¹ Wo xa mun dun alu la? Bi alu be maluyala wo kuwolu la; bawo i labanjo mu saya le ti. ²² Bari saasa, alu hooroyaninma xa bo junubo bulu, xa ke Ala la jonjolu ti, wo xa senuya di alu ma, x'alu labanjo ke nilamaya banbalo ti. ²³ Junubo sara mu saya le ti; bari Ala la nilifenjo mu nilamaya banbalo le ti, n Marigi Isa Kirisita kafupoxoya xanma.

7 N badinjolu, n be nala men fola alu pen, alu xa wo lon xa ban, bawo alu xa Musa la sariya lon. Sariya la julo be hadamadinjo la, x'a nilama tu. ² Awa sariya ken na, musu futuningo be sitinin a xe la, fo a xe xa sa. Bari nin a xe sata, sariya men tun b'a sitinin a xe la, wo la julunte a la tugun. ³ Nin a sigita xe xote kun x'a xe nilama tu, a xa jadoya le ke. Bari nin a xe sata, sariya la julunte a la. Wo to, nin a sigita xe xote kun, a man jadoya ke. ⁴ N badinjolu, wo be ja men, alu dulu la kuwo be ten. Sariya silo la, alu sata, x'a la Kirisita la saya xan; walasa alu xa ke do xote ta ti, nin wo mu Kirisita ti, wo men kunita xa bo furelu to. Wo to, alu si kewale numalu ke Ala pen. ⁵ Xa n tu i taxamala n fannu nidiyanjo la, sariya xa nege jaxo mennu lawuli, wolu tunnu be baaro kela n balo dula bee to, xa saya lasi n ma. ⁶ Bari saasa ken, n hooroyata xa bo sariya bulu; bawo n tunnu be men bulu jonja la, saya xa n nin wo fata. Wo ja ma, n si sin xa baaro ke Ala pen ja kuto ma, Ni Senunjo barako to. N nte a kela i xo n x'a ke ja men xotonin, xa n tu sariya safe fango xoto. ⁷ Alan si mun fo sa? Sariya man jin ba? Abada! Bari n xa junubo lon sariya le ma. Nabonfe mu fenjo men ti, n tun me wo lon nin sariya tun man a fo xo: «I ja xana bo moxo la fen fe.» ⁸ Junubo xa wo sariya ta xa nege sifa bee ke nte la. Nin sariya nte je, junubo mu fen saninjo le ti. ⁹ Xotonin, sariya nte je tumo men, nte tun nilama mu. Bari sariya naninma, junubo xa sinjo soto,

¹⁰ nte sata: Sariya men be nilamaya lasila moxo ma, wo keta sabaabu ti xa saya lasi nte ma. ¹¹ Bawo junubo xa sariya ke xa nte lafili, xa n' faxa ate sariya kilin in na. ¹² Wo to, sariya xa senu. A be men fola, wo xa senu. A be tilinnin, a xa nin. ¹³ Men xa nin, wo keta nte la saya sabaabo ti ba? Abada! Junubo le keta a sabaabo ti. A x'a la junubeya yita nin fe, xa saya lasi nte ma fen puma la. Junubo x'a la jaxuya yita bete na men, sariya dinmalo fe, wo na le felenti. ¹⁴ N x'a lon xo sariya niyo la fenjo le ti, bari nte ken mu dafen balasubuma le ti. N' be sannin junubo ma i xo jonjo. ¹⁵ Nte be men kela, n' man wo faamu. Men xa di n' nen, n' nte wo kela, bari men man di n' nen, n' be wo le kela. ¹⁶ Nin nte be n' kuwanjo le kela, wo to, n' sonta sariya nen, x'a lon xo a xa nin. ¹⁷ Wo to, n' be jaxumanjo men kela, wo kebaxo nte nte ti. Junubo men be siginin n' to, wo le b'a kela. ¹⁸ Nte x'a lon xo, nte xono, wo xoto nte balasubo to, betemanjo nte je. Numako nego be n' na, bari barake nte n' na x'a ke. ¹⁹ N' b'a fe xa ku puma men ke, n' nte wo kela. N' nte a fe xa ku jaxo men ke, n' be wo le kela. ²⁰ Nin nte nte men fe, n' be wo le kela, wo kebaxo nte nte ti. Junubo men be siginin nte to, wo le mu a kebaxo ti. ²¹ N' xa nin ku in korosi n' fan bata xo: Nte b'a fe xa ku puma le ke. Bari n' x'a je xo ku jaxo le ko barako be n' na. ²² Ala la sariya xa di n' niyo nen. ²³ Bari barake xote be n' to, men be nte fan hakililata kelela. Wo barako be n' kela junubo la jonjo ti, men be siginin n' to. ²⁴ Nte be n' kuwa de! Jon si nte bo nin bala in bulu, men be saya lasila n' ma? ²⁵ Tanto be Ala nen, wo men be n' bola a bulu, n Marigi Isa Kirisita barako to! N' si a fo xo, nte be baaro kela Ala la sariya nen n' hakilo la, bari balasubo boxo la, n' be junubo la sariya la jonja la.

8 Saasa, mennu nin Isa Kirisita kafuta, jalagi si nte wolu ma. ² Bawo Ni Senunjo men be nilamaya di la Isa Kirisita la kafupoxoya fe, wo Niyo la sintigiya xa n' hooroya xa n' bo junubo la sintigiya bulu, wo men be nala saya tila. ³ Sariya tun me men ke no, x'a la a xan balasubo x'a ke barakentanjo ti, Ala xa wo ke: Junubo xanma, a x'a fan Dinxe ki xa n balasubo junubema joxonjo ta. Wo na ma, a xa junubo jalagi balasubo to. ⁴ Ala xa wo ke, walasa sariya xa men fo, ntelu xa sin xa wo dafa, ntelu mennu nte i taxamala n fannu nidiyanjo la, fo Ni Senunjo diyanjo la. ⁵ Moxo mennu be i taxamala i nidiyanjo la, wolu be hanmela i nidiyanjekuwo lelu la; bari mennu be i taxamala Ni Senunjo diyanjo la, wolu hanmo mu Ni Senunjo diyanjekuwo lelu ti. ⁶ Xa hanme i nidiyanjo la, wo be falinna saya le la. Bari xa hanme Ni Senunjo diyanjo la, wo be falinna nilamaya nin heero le la. ⁷ Moxo nidiyanjekuwolu mu Ala tano le ti; bawo moxo nidiyanjo nte sonna Ala la sariya ma. A me Ala la sariya dafa no fan. ⁸ Moxo mennu be i taxamala i nidiyanjo la, wolu ku me diya no Ala nen. ⁹ Atelu kennu nte i

taxamala alu nidiyanjo la; alu be i taxamala Ni Senunjo le diyanjo la, bawo Ala Niyo be siginin alu son-donmekunjo la. Nin Kirisita Niyo nte moxo men to, wo nte a ta ti. ¹⁰ Nin Kirisita be alu niyo to, haali nin alu balo labanjo mu saya le ti junubo xanma, Ni Senunjo si nilamaya di alu ma, bawo alu xa tilinninjo soto Ala na xoto. ¹¹ Ala men xa Isa lakuni xa bo furelu to, nin wo Niyo be alu to, a si nilamaya di alu bala satalu ma, i xo a xa Isa Kirisita lakuni xa bo furelu to na men. A si wo ke a Niyo barako la, wo men be alu to. ¹² Wo na ma, n' badinjo, julo be n na. Bari n nidiyanjo la julo nte de. N man xan x'ate diyanjekuwolu ke tugun. ¹³ Nin alu be i taxamala alu nidiyanjo la, alu si sa. Bari nin alu xa nidiyanjolu faxa Ni Senunjo la, alu si nilamaya. ¹⁴ Moxo wo moxo be i taxamala Ala Niyo barako la, wolu bee mu Ala dinjo lelu ti. ¹⁵ Ala xa Niyo men di alu ma, wo nte alu kela jon ti, a n'ta kela alu xa sila. Wo Niyo be alu kela Ala dinjo lelu ti. Wo Niyo barako la, n be Ala kilila xo «Baaba!» ¹⁶ Ni Senunjo fan b'a yitala n niyo la xo n mu Ala dinjolu ti. ¹⁷ Nin n mu Ala dinjolu ti, a xa ke men lahido ta a la jama nen, n si n nidula soto wo du to. N nin Kirisita si wo nidula soto i joxo fe; bawo nin n nin a toorota i joxo fe, n nin a si ke a la nooro du xono. ¹⁸ Nte b'a jaatela xo n be tooro men jela bi, wo nte fusi ti, men si xaanan Ala la nooro ma, a be nala men yitala n na sinin. ¹⁹ Ala b'a dinjolu yitala lunjo men, dafenjolu bee be kepenin wo lunjo ma. ²⁰ Bawo dafenjolu bee bulata nafantanjo fango xoto. Dafenjolu fannu no nte, Ala le fan x'a ke. Bari haali wo, gigo be je. ²¹ Wo gigo fele xo: Lun do, Ala si a la dafenjolu bee bo saya la jonja la, anin i si i nidula soto Ala dinjolu la hooroya nin i la nooro to. ²² Alan x'a lon xo haalibi, dafenjolu bee be njuntanna tooro bulu, i xo musu tinto. ²³ Wolu kilinnu nte, bari Ni Senunjo di-ta ntelu mennu ma Ala la nilifen folo ti, n dulu be njuntanna n xonoto, xa lunjo laxono, Ala be nala n kela a dinjolu ti lunjo men, xa n balasubo bo jonja la pewu. ²⁴ Ala xa n kisi. Bari n na man la wo kisilo xan folo, n yilo le b'a ma. Nin i na x'e yilibenma fenjo je, i yili nte wo ma tugun. Moxo na be men to xa ban, i s'i yilo la wo ma tugun ba? ²⁵ Nin n yilo be fen ma, n na man men je folo, n si wo laxono mujo to. ²⁶ Ni Senunjo du be n deemala x'a la a xan n barako xa doxo. N xa xan xa Ala matara kuwo men na, n man wo lon. Bari Ni Senunjo fan be Ala matarala n nen njuntanjolu la, da me men naxali no. ²⁷ Ala men na be jusukunna kuwolu la, wo x'a lon Ni Senunjo be taralo kela men na, bawo Ni Senunjo be taralo kela Ala la moxo lelu nen, x'a la Ala sago xan. ²⁸ N x'a lon xo kuwo bee si falin Ala xanubaxolu nen puma la, a keta wo mennu kililo lategebaxo ti. ²⁹ Ala xa mennu sugandi kabirin duniya man da, a x'a latege du kabirin folofolo xo i si ke a Dinxe joxonjo ti, walasa a Dinxe xa ke badin kiika la sooma ti. ³⁰ Ala xa mennu sugandi kabirin folofolo, a xa wolu kili; a xa

mennu kili, a xa wolu ke moxo tilinningolu ti. A xa mennu ke moxo tilinningolu ti, a x'a la nooro la wolu xan. ³¹ Alan si mun fo x'a la wo xan? Nin Ala be n pen, jon si ke no xo a me ke n pen? ³² Ate men man a fan Dinxe faxabalo tu je, bari a bota a la a xa faxa n bee pen, a si tu ja di a man fen bee di ntelu nin a Dinxe ma? ³³ Jon si Ala la moxo sugandininolu jalagi no? Moxo si, bawo Ala fan ne xa i jaate moxo tilinningolu ti. ³⁴ Jon s'i jalagi no? Moxo si, bawo Isa Kirisita le sata. Wo doron nte, a kunita du, a be Ala kininjo fe xa Ala matara n pen. ³⁵ Jon si a no xa Kirisita la xanuya tege n na? Naano me a no, xonotohanmo me a no, moxolu la tooroli me a no, xonxo me a no, sege me a no, masiibo me a no, faxalo me a no. ³⁶ A be í xo Kitaabo x'a fo ja men xo: «Ala, ite la kuwo xanma, i be n njinina xa n faxa tuma bee. I be n mafelenin saaxa faxatalu ti.» ³⁷ Bari wo bee xan, n be kunnawuli dafaninjo sotola n xanubaxo barako to. ³⁸ A be hennenin n ma xo fusi me Ala la xanuya tege no n na: A keta saya ti wo, a keta nilamaya ti wo, a keta melekoyolu ti wo, a keta kuntigiya xote ti wo, walla sintigiya mennu be sanjo to, walla bi, walla sinin, ³⁹ walla sanjo to fangolu, walla duguxulo xan fangolu, walla dafen xote, fusi me a no xa Ala la xanuya tege n na, a xa men yita n na n Marigi Isa Kirisita barako to.

9 N be men fola, tonja le mu, faniya nte; x'a la a xan n mu Kirisita ta le ti. N jusukunjo du mu n seede ti Ni Senunjo barako to, xo n be men fola, wo nte faniya ti. ² Jusuxasiba be nte la, n be xonotoxasinin tuma bee. ³ Don ne xa di n pen Ala xa nte fan danga, n nin Kirisita xa fata n badinolu pen, nin wolu mu n na siya moxolu ti. ⁴ I mu Banisirayila dinjolu ti. Ala xa i sugandi xa i ke a dinjolu ti, x'a la nooro la i xan. A xa kafuxanolu dun a nin i te, x'a la sariyalu nin a batuja di i ma, xa lahidolu ta i pen. ⁵ I bota n mamaxelu to. Kirisita du bota ite lelu to balasubo boxo la. Ate le be fen bee kunna. Ala le mu. Tanto be a pen tuma bee, fo abada. Amiini. ⁶ Bari wo xoto nte don ti xo Ala la lahido man ke. Bawo mennu bota Banisirayila to, wolu bee nte Banisirayila din soobe soobelu ti. ⁷ Mennu bota Burehima to, wolu bee du tun nte Burehima din soobe soobelu ti. Ala x'a fo Burehima pen xo: «N xa bonsonjo men lahido ta i pen, wo be bola Nsiyaxa le to.» ⁸ Wo xoto xo: Dinjo mennu wuluta hadamadinja silo la, wolu nte Ala dinjolu ti; bari mennu wuluta Ala la lahido silo la, wo lelu doronnu be jaatela bonsonjolu ti. ⁹ Ala xa lahido ta ten xo: «Bi xo san kilin, nte si na, wo tumo, Saran si dinxe soto.» ¹⁰ A man dan Saran ta ma, Rebeka du ta keta ten ne. A xa xono ta funelu la n mamaxe Nsiyaxa pen. ¹¹ Ala be moxolu sugandila x'a la a la kulatego xan. A la sugandilo be lala a la kililo le xan; a nte lanin kewale xan. Walasa x'a la xantigiya yita wo to, Ala xumata Rebeka pen, x'a tara a dinjo tunnu man wulu folo, i man puma ke, i man jaxuman ke. A xo

Rebeka pen xo: «Xoto si ke doxo la jonjo ti.» ¹³ A be í xo Kitaabo x'a fo ja men xo: «N xa Yaxuba le sugandi, xa Esawu tu je.» ¹⁴ Alan si mun fo wo to sa? Tilinbaliya be Ala la ba? Abada! ¹⁵ Bawo Ala x'a fo Musa pen xo: «Nte b'a fe xa makari men na, n si makari wo la, n b'a fe xa hinna men na, n si hinna wo la.» ¹⁶ Wo nte moxo fan sago ti, walla moxo la baaro, bari Ala la hinno kilinpe le b'a kela. ¹⁷ Kitaabo xono, Ala xumata Farawuna pen xo: «N x'e ke mansaxe ti, walasa x'e ke xa n na sintigiya yita, anin, nin n toxo si me duguxulo bee xan.» ¹⁸ Wo ja ma, a diyata Ala pen xa hinna men na, a si hinna wo la. A je diya a pen xa men sondonmo xoleya, a si wo sondonmo xoleya. ¹⁹ Dolu si a fo xo: «Mun dun na Ala be moxolu jalagila tugun? Jon si sin no x'a sago bali?» ²⁰ Awa, ite men mu hadamadin gansanjo ti, i mu jon ti nin i be Ala soosola? Daxo men data banxo la, wo si a fo a dabaxo pen no ba xo: «Mun na i xa n da ten?» ²¹ Daxadala sago le nte a la banxo xan ba? A si daxa nafamaba da a la banxo to, a si daxa xote da a to, men nte nafaba jan na. ²² Ala tun b'a fe x'a la diminjo nin a la sintigiya yita. A la diminjo tun xa xan xa boyi mennu to x'e halagi, a mujabeteta wolu xoto folo. ²³ Bari a x'a la makaro yita mennu la, x'e toben kabirin waxati jan xo i si a la nooro soto, a diyata a pen x'a la noorotigiya yita wolu la. ²⁴ Nte lelu mu wo ti, a xa ntelu mennu kili xa bo Yahudiyalu to, bari wo doron nte, a xa kililo ke xa bo siya to dulu to. ²⁵ A xa wo le fo kila Ose la kitaabo to xo: «Siya men tun nte n na siya ti, n si wo kili xo n na siya. Xabiilo men tun man kili xo xanuninjo, n si wo kili xo xanuninjo. ²⁶ A tun fota i pen jan men xo: "Alu nte n na moxo ti", i si kili non fan xo Ala nilama dinjolu.» ²⁷ Kila Esayi du xa jin fo Banisirayila la kuwo to xo: «Haali nin Banisirayila bonsonjo siyata i xo xooxojida la kepo, i totuningo doron nelu be kisila. ²⁸ Bawo Marigi si a foxanjo ke, x'a latimme junna junna duguxulo xan.» ²⁹ Kila Esayi tun x'a fo du xo: «Nin Kelebulolu tigo Marigi tun man n dolu ke siyo ti, n tunnu si jani xeru i xo Sodome gallo keta ja men. N tunnu si ke Gomore gallo noxonjo ti.» ³⁰ Saasa, alan si mun fo? Siya tolu men tunnu nte Ala la tilinninga njinina, wolu xa Ala la tilinninga soto lannaya xanma. ³¹ Banisirayila dinjolu men tunnu be Ala la tilinninga njinina sariya silo la, wolu dasata sariya silo taxamala. ³² Mun na i man tilinninga soto? Bawo i man a njinin lannaya la, bari i x'a njinin kewalolu fe. A be í xo i takkita kuro la xa boyi, ³³ i xo a be safenin Kitaabo to ja men xo: «N fele kuro do lala Siyon, men si moxo latakki, kuro men si moxo laboyi. Bari moxo wo moxo je la a la, wo tigo me malu abada.»

10 N badinolu, men be n niyo ma, nin n be Ala matarala Yahudiyalu pen wo la, wo mu le xo i xa kisi. ² N s'i seedeja, xo i be jjanin Ala kuwo to. Bari i man a ja lon. ³ I man a faamu Ala be a la tilinninga di la moxolu ma ja men. I xa tilinninga njinin i fannu

barako la. Wo la, Ala be tilinningna dila moxolu ma na men, i man son wo na ma. ⁴ Kirisita le keta sariya dafa ti; walasa moxo wo moxo lata a la, wo xa Ala la tilinningna soto. ⁵ Moxo si Ala la tilinningna soto sariya la na men, kila Musa xa wo safe ten xo: «Moxo men je sariya la folu latimme, wo si nilamaya wolu fe.» ⁶ Ala si tilinningna di moxo ma lannaya la na men, wo na safeta ten xo: Í xana a fo í xonoto xo: «Jon si yele xa taxa sanjo to n pen?» Wo xoto le, xa Kirisita lajigi. ⁷ Walla xo: «Jon si jigi duguxulo xoto n pen?» Wo xoto le, xa Kirisita lawuli xa bo saya to. ⁸ Ala la xumo be mun ne fola? A xo: «Xumo be í senbo to, a be í da la, a be í jusukunjo la.» Wo xumo mu lannaya xumo le ti, n be men waajula. ⁹ Nin í x'a fo í da la xo Isa le mu Marigi ti, anin nin í lata a la í jusukunjo la xo Ala x'a lakuni xa bo furelu to, í si kisi. ¹⁰ Bawo nin í xa lannaya ke í jusukunjo la, í si Ala la tilinningna soto. Nin í x'a la kuwo fo í da la, í si kisi. ¹¹ A be í xo Kitaabo x'a fo na men xo: «Moxo wo moxo je la Marigi la, wo tigo me malu abada.» ¹² Faranfansi nte Yahudiyalu nin siya tolu te. I bee be Marigi kilin ma. Moxo wo moxo je a toxo kili, a si a la numaya yita wo tigo la. ¹³ Bawo Kitaabo b'a fola xo: «Moxo wo moxo je Marigi toxo kili, wo si kisi.» ¹⁴ Bari i si a toxo kili na di, x'a tara i man la a la? I si la a la na di, x'a tara i man a toxo me? I si a toxo me na di, nin moxo man i waaju? ¹⁵ I si waajulo ke na di, nin i man ki? A be í xo a be safenin Kitaabo to na men xo: «Mennu be nala xibaru dimanjo fola, wolu la samataxanjo xa di.» ¹⁶ Bari moxolu bee man son xibaru Dimanjo to. Kila Esayi xa wo le fo xo: «Marigi, n xa xumo men fo, jon lata wo la?» ¹⁷ Wo na ma, lannaya be sotola Xibaru Dimanjo lamelo le fe. Wo Xibaru Dimanjo mu Kirisita la xumo le ti. ¹⁸ Nte be njinixalo kela xo: Yahudiyalu man wo xibaro me ba? I x'a me le de! Kitaabo b'a fola xo: «I xanmeta duguxulo dula bee. I la xumolu sita duniya danjo ma.» ¹⁹ N be njinixalo kela tugun xo: Banisirayila dinjolu man a faamu le ba? Kila Musa folo xa jaabo men di wo to, wo fele: Ala xo: «Siya men man jaate, n si wo ke x'alu lakiiliya. N si siya hakilintanjo ke, x'alu ladimin.» ²⁰ Wo xo du, kila Esayi fatiyata x'a fo Ala la xan to xo: «Men tunnu nte n njininna, wolu xa n je. Men tunnu nte nte la kuwo marjinxala, nte xa n yita wolu la.» ²¹ Bari a xo Banisirayila la kuwo to xo: «N xa tilo ban n bulo lola siya murutininjo nin siya banninjo pen.»

11 Wo tumo la, Ala x'e ban a la moxolu to le ba? Ayi de! A man í ban i to. Bawo nte fan mu Banisirayila dinjo do le ti. N mu Burehima bonsonjo do le ti. N bota Bensamen xabiilo to. ² Ala x'a la moxo mennu sugandi kabirin folofolo, a man í ban wolu to. Kila Eli x'a la jusuxaso fo Ala pen Banisirayila la kuwo to tumo men, Kitaabo be men fola non xan, alu hakilo nte wo la ba? ³ A xo: «Marigi, i xa í la kilalu faxa, xa í la sadaxajanidulalu tija. Nte kilinpe le tuta. I b'a fe xa nte du

faxa.» ⁴ Bari Ala x'a jaabi mun na? A x'a jaabi xo: «N xa xe wulu woorowula mara n fan pen, mennu man i pongi bolibatuta Baali xoto.» ⁵ Wo be na men, a be ten bi du, i totuninjo be je, Ala xa mennu sugandi a la numaya xanma. ⁶ A xa i sugandi a la numaya le xanma. A man i sugandi i la kebaara xanma; nin wo nte, Ala la numaya tun me ke numaya ti tugun. ⁷ Wo falinta mun na? Banisirayila dinjolu xa men njinin, i man wo soto. Ala la sugandininjo doron nelu x'a soto. I tolu jusukunjo xoleyata, ⁸ í xo Kitaabo x'a fo na men xo: «Ala xa i hakilo dataxun, xa i palu bali xa jelo ke, xa i tulolu sukki i xana meli ke, fo xa si bi ma.» ⁹ Mansaxe Dawuda du x'a fo xo: «I la domololu xa ke i pen kalanjo ti, xa ke i pen jala ti, men s'i laboyi, xa ke i la ku jaxolu sara ti. ¹⁰ Ala mu dibo kela i palu la, walasa i xana dula je. I xo xutuninjo xa tu tuma bee.»

¹¹ Yahudiyalu takkininma, i boyimumeta le ba? N be alu njinxala. Ayi de! Bari i la filo x'a tu siya tolu xa kisi-lo soto, walasa i na xa bo siya tolu fe. ¹² Nin i la filo keta duniya ma nafaba ti, nin i la majigo le keta sabaabu ti xa nafaba lasi siya tolu ma, nin i bee x'e koppa Ala ma dun? Wo nafa me bunja bete bete ba xa tanbi folo xan? ¹³ Ate mennu nte Yahudiya ti, n be men fola silan, n b'a fola alelu pen. Ala xa nte ke siya tolu la kiladinjo ti. Nte be najalila wo baaro xanma, ¹⁴ walasa xa n siya moxolu lakiiliya, nin dolu si kisi i to. ¹⁵ Ala xa Yahudiyalu bula senbo to, wo le nata benjo ti a nin duniya to te. Awa, nin Ala x'a xofele i ma, mun si ke wo to? Wo si ke sabaabu ti furelu xa kuni xa bo saya to. ¹⁶ Nin buurukun folo dita Ala ma sadaxo ti, buuro to bee du xa senu. Nin yiro lillolu dita Ala ma, a bulo dulu xa senu. ¹⁷ Banisirayila be le í xo yiri tutuninjo do, nin wo be kilila xo oliwejuwo. Ala xa bulo dolu tege xa bo a la, xa ite noto wolu no to, ite men nte Yahudiya ti. Ite be le í xo wulaxono oliwejuwo bulo. Jiyo men be bola oliwejuwo lillolu to xa yele, í du be do sotola wo to saasa. ¹⁸ Í xana í fan fisiya wo bulolu ti, mennu tegeta. Nin í be í fan xutula, a lon de xo lilli nte dennin ite la; ite le be dennin lillolu la. ¹⁹ N x'a lon í si don fo no n pen xo: «Wo bulolu tegeta le, walasa nte xa noto i no to.» ²⁰ Tonja le mu, i tegeta i la lannayabaliya le xanma. Ite notota wolu no to í la lannaya le xanma. Bari í xana í wasu i la; sila le! ²¹ Bawo nin Ala man oliweju tutuninjo fan bulolu tu je, a me ite du tu je. ²² A jaate muta, Ala b'a la numaya nin a la fatiya yitala i noxo la na men: Mennu boyita, a xa fati wolu ma. A xa pin ite ma. Bari fo í yilo xa tu a la numaya ma le; nin wo nte, a s'í du tege í xo yiribulo. ²³ Nin Banisirayila dinjo dulu man tu lannayabaliya xono, i si noto i no to tugun, bawo a sinjo be Ala pen x'e noto tugun. ²⁴ Ite men tegeta xa bo wulaxono oliwejuwo la, xa na í noto oliweju soobe ma, x'a tara í nin wo nte kilin ti; wo mennu mu oliwebulu soobelu ti, wolu noto me diya i fannu juwo ma ba? ²⁵ N badinjo, n nte a fe pin gulle in xa tu alu

ma duguwo to, walasa alu xana alu fannu jaate hakilitigolu ti: Banisirayila moxo dolu jusukunŋo si tu xoleyanin fo siya tolu to moxo kisitalu xa dafa tumo men. ²⁶ Wo to, Banisirayila dinŋolu bee si kisi, í xo Kitaabo x'a fo ŋa men xo: «Kisibaxo si na xa bo Siyon. A si lannayabaliya bo Yaxuba bonsonŋo to. ²⁷ Ń be nala Kafuxanŋo men kela ŋ nin i te, nin ŋ x'e la junubolu bo je tumo men, wo le fele.» ²⁸ xibaru Dimanŋo boxo la, i keta Ala jaxolu ti, bawo i xa i ban a to. Wo keta alu siya tolu ma nafa ti. Bari Ala la sugandilo boxo la, Ala b'e fe i maxaxelu la kuwo xanma. ²⁹ Bawo Ala je fenŋo men di, a nte í yelemala wo ma tugun x'a ta. Nin a xa moxo kili ku do xanma, a nte wo bola a ma. ³⁰ Xotonin, alu tunnu nte Ala foxanŋo mutanin, bari saasa alu xa Ala la hinno lon, bawo Yahudiyalu x'a foxanŋo bula. ³¹ Wo ŋa ma, saasa i dulu xa Ala foxanŋo bula, walasa alu xa Ala la hinno men soto, wo xanma, hinno xa ke i dulu la. ³² Bawo Ala xa moxolu bee tu je i x'e ban folo, walasa xa hinna i bee la. ³³ Ala la fenbeetigiya nin a la hakilitigiya, nin a la lonŋo danŋo me je no. Jon si a la ku lategeninŋolu ŋa fo no? Jon si a la silolu faamu no? ³⁴ Í xo Kitaabo x'a fo ŋa men xo: «Jon xa Marigi miiriya lon? Jon keta a tonbenbaxo ti? ³⁵ Jon folo xa fen di a ma, nin a be wo bululasaagila?» ³⁶ Bawo fenŋo bee bota ate le bulu. Fenŋo bee be je ate le barako to. Fenŋo bee be ate le ŋen. Barako xa la Ala ŋen fo abada! Amiini.

12 Ń badinŋolu, Ala x'a la hinnayeba yita n na ŋa men, wo xanma ŋ be alu tonbenna xo alu x'alu fannu bee di Ala ma sadaxa nilama ti, men xa senu, men xa di Ala ŋen. Alu xa xan xa Ala batu ŋa men tigi tigi, wo ŋa le fele. ² Alu xana ŋin duniya in kepa ta, bari alu a tu Ala x'alu yelemala, xa hakili kuto di alu ma. Nin wo keta, alu si Ala sago lon: Men xa bete, men xa di a ŋen, anin men be dafanin. ³ Ala x'a la so men xarifa nte ma a la neemo xanma, ŋ b'a fola alu bee ŋen xo: Alu xana alu fannu ke fen ti, x'a tara alu nte men ti. Bari alu kilin wo kilin xa í fan majigi x'é ben Ala la lannaya dinmaninŋo ma alu ma. ⁴ N mu bala kilin ne ti. Bari dula kiiika be dennin wo la. Wo dula bee nin a lodula le mu. ⁵ Wo be ŋa men, haali x'a tara n lannayabaxo xa siya, n mu bala kilin ne ti n nin Kirisita la kafo fe. N bee du be dennin i poxo la, í xo bala kilinŋo dulalu be dennin i poxo la ŋa men. ⁶ Solifenŋo mennu dita n bee kilin kilin ma, x'a la Ala la neemo xan, wolu nte kilin ti. Nin do la so keta kilaya ti, wo tigo xa xan xa wo ke lannaya to. ⁷ Nin do xote la so keta don ti xa moxolu haajo ŋiŋa, wo xa wo ke. Men na so mu moxolaxarannŋo ti, wo xa laxaranno ke. ⁸ Men na so mu xa moxo tolu tonben, wo xa moxolu tonben. Men be nilo kela, wo xa bo a bulo la. Men be ŋamoxoya kela, wo xa í jija wo ma. Men be segebaxantunŋolu deemala, wo xa wo ke ŋapo to. ⁹ Xanuya xa ke x'a tara fulankafuya nte a to. Alu i ban jaxumanŋo to, x'e noto ku ŋuma la. ¹⁰ Alu i poxo xanu bete í xo badinmalu. Alu i jija x'e poxo

bunŋa. ¹¹ Alu ke baarala ti, alu xana ke salabaxantun ti. Alu baaro ke Marigi ŋen alu jusukunŋo bee la. ¹² Gigo men be alu la, alu ŋaxali wo xanma. Alu muŋa tooro xono, x'alu timinadiya Alamatarala la. ¹³ Alu badin lannayabaxolu deema sege xono, xa luntanŋolu jigiya. ¹⁴ Alu duwa alu toorobaxolu ŋen. Alu duwawo ke, alu xana dangali ke. ¹⁵ Alu ŋaxali ŋaxalibaxatolu fe, xa xasi xasibaxatolu fe. ¹⁶ Benŋo xa ke alu nin i poxo te. Alu xana alu fannu bunŋa. Bari alu son baara doxomandinŋolu ma. Alu xana alu fannu jaate moxo hakilitigolu ti. ¹⁷ Alu xana moxo la jaxuman sara jaxuman na. Alu a ŋinin xa puma ke moxo bee ŋa xoto. ¹⁸ Nin alu fannu sinku b'a to, alu i jija benŋo xa ke alu nin moxo bee te. ¹⁹ Ń na xanuningŋolu, alu fannu xana alu la julolu sara, bari alu a tu Ala x'a la diminŋo yita, í xo a be safenin Kitaabo to ŋa men xo: «Nte le mu tasarabaxo ti, nte si alu ta sara; Marigi xo ten.» ²⁰ «Nin xonxo be í jaxo la, domolo di a ma. Nin mindoxo b'a la, jiyo di a ma a x'é min. Nin í xa wo ke, a be le í xo í xa takenbo jurumi a kunŋo xan.» ²¹ Jaxumanŋo xana í mano; bari jaxumanŋo mano puma la.

13 Moxo bee xa xulu fangolu ŋen, bawo fanga nte je men man bo Ala la. Fango mennu be siginin, i sigibaxo mu Ala le ti. ² Wo le x'a tu, moxo men je fango sooso, wo xa Ala la ku lategeninŋo sooso. Mennu be i banna a ma, wolu si kiito lasi i fannu ma. ³ Nin í be puma kela, í silaku nte fankamalu ŋa, bari nin í be jaxumanŋo le kela, í xa xan xa sila i ŋa. Nin í nte a fe xa sila fango ŋa, puma ke. Nin í xa puma ke, í si a la toxo diminŋo soto. ⁴ Fango be Ala la baaro le la, walasa a x'é bula xa puma ke. Nin í be jaxumanŋo kela, sila de; bawo fanŋo nt'a bulu gansan xa ŋangilo ke: A be Ala la baaro le la, walasa x'a la diminŋo yita kujaxukela la. ⁵ Wo le x'a tu, alu xa xan xa xulu fango ŋen. A xana ke Ala la diminŋo ŋasilanŋa doron xanma, bari a xa ke jusukunŋumaya du xanma. ⁶ Wo le du b'a tula, alu be sagallo sarala. Mennu be wo sagallo mutala, Ala le x'e bula wo baaro la, xo i x'a ke a ŋa ma. ⁷ Moxo bee nin men xa xan, alu wo di wo ma. Alu sagallo di sagalletigo ma, xa sagallendingŋo di a mutabaxo ma. Alu xa xan xa sila men ŋa, alu sila wo ŋa. Alu xa xan xa men bunŋa, alu wo bunŋa. ⁸ Moxo la jululu xote xana ke alu la fo poxoxano kilin. Katugu moxo men be a moxopoxo xanula, wo xa sariya dafa. ⁹ Sariya mennu b'a fola xo: «Í xana jadoya ke, í xana moxo faxa, í xana sunpali ke, í ŋa xana bo moxo la fen fe.» Anin wo tolu bee be ŋin sariya in ne xono xo: «Í xa í moxopoxo xanu í xo í fan.» ¹⁰ Nin í b'é moxopoxo xanula, í me ku jaxu ke a la. Wo le xanma, moxo men b'a moxopoxo xanula, wo xa sariya muume le dafa. ¹¹ Alu wo xumo jaate bete, bawo alu fannu x'a lon xo n be waxato men to bi, wo xa xole: Alu kunitumo sita xa bo sinnoxo to. Alan nin kisilo xa sutu saasa xa tanbi n na lannaya ketumo xan. ¹² Suwo janfayata, saxuyelo sutiyata. Wo xanma,

alan xa dibo kuwolu dabula, xa keneya kuwolu ta xa i ke n na kelekemiranḡolu ti. ¹³ Alan x'e taxama taxam-apa beto ma, í xo a xa xan xa ke ḡa men. Alan xa n fan-nu tanga domolibajaxo nin dolobaminḡo nin jadoya nin ku kabaninke nin kelo nin kiiliya ma. ¹⁴ Alu Marigi Isa Kirisita jigolu dun alu la, í xo alu xannadoroko. Alu xana a lo alu fannu sago nofe tugun, x'alu fannu ni-diyanjekuwolu ke.

14 Í badinḡolu, moxo mennu be alu to, nin i barako xa doxo lannaya to, alu wolu mutaku-bete. Alu xana son x'e la miiriyalu sooso. ² Do be je, a la lannaya si a bula fenḡo bee domola. X'a tara do be je, a la lannaya la doxoya xanma, a me subu domo. ³ Men si fenḡo bee domo no, wo xana subudomobalo doxoya. Subudomobalo du xana fenḡo bee domobaxo jalagi, bawo Ala x'a lamuta. ⁴ Ite mu jon ti nin í be do xote la baarakedinḡo jalagila? A loninḡo tuta wo, a boyita wo, a marigi le kunku mu. A si tu lonin fan, bawo a sinḡo be Marigi ḡen x'a tu lonin. ⁵ Do bulu, lunḡolu xa fisa i ḡoxo ti. Do xote bulu, i bee kilin. Bee xa ke í miiriyala ti. ⁶ Men be lunḡo do bunḡala, a b'a bunḡala Marigi le ḡen. Men be fen bee domola, a b'a domola Marigi le ḡen, bawo a be barako bulala Ala ḡen xa wo domo. Men nte fen bee domola, a be wo kela Marigi le ḡen. A du be barako bulala Ala ḡen. ⁷ Alan si nte í nila n fannu ḡen. Alan si du nte sala n fannu ḡen. ⁸ Nin alan be i nila, n be i nila Marigi le ḡen. Nin n sata, n sata Marigi le ḡen. N be i nila wo, n sata wo, n mu Marigi le ta ti. ⁹ Bawo Kirisita sata le xa kuni, walasa a xa ke furelu nin nilamalu Marigi ti. ¹⁰ Wo ḡa ma, mun na ite be í badinḡo jalagila? Mun na ite du be í badinḡo doxoyala? Alan bee si lo Ala ḡa xoto kiito xanma. ¹¹ Bawo a be safenin Kitaabo to xo: «Nte Marigi Nilama xo: Moxo bee si ḡongi nte ḡen. Nenḡo bee si Ala tantu.» ¹² Wo ḡa ma, alan bee fan si í ta laxali Ala ḡen. ¹³ Wo xanma, alan xa fata i ḡoxo jalagila, bari alu a latege xo alu me fusi ke, men si alu badinḡo latakki, walla x'a laboyi. ¹⁴ Í x'a lon, Marigi Isa x'a lahenne í ma, xo fen si nte je, nin a be noxonin a fan ma. Bari nin moxo do be fenḡo do jaatela xo a be noxonin, wo fenḡo be noxonin wo tigo le ḡen. ¹⁵ Nin í la fen domota xa í badinḡo ladimin, wo xoto xo í nte í taxamala xanuya silo xan tugun. Kirisita sata moxo men ḡen, í la fen domota xana ke sabaabu ti xa wo sanko. ¹⁶ Atelu be fenḡo men mafelela xo a xa ḡin atelu ḡen, wo xana ke jalagifen ti tolu bulu. ¹⁷ Bawo Ala la Mansaya nte domoli nin minni ti, bari tilinḡa nin heero nin ḡaxalo le mu, Ni Senunḡo barako to. ¹⁸ Moxo men be baaro kela Kirisita ḡen ten, wo la kuwo xa di Ala ḡen. A si moxo dulu la toxoḡuma soto. ¹⁹ Kuwo mennu si na heero ti, nin i si n bee lataxa ḡa lannaya to, alan x'a ḡinin xa wo lelu ke. ²⁰ Í xana Ala la baaro ḡiḡa domolifenḡo nofe. Tonḡa, fenḡo bee xa senu. Bari nin moxo do la domolifenḡo si ke sabaabu ti xa do lafili, wo xa jaxu. ²¹ A xa

ḡin í xana subu domo, í xana dolo min, í xa fenḡo bee tu je, men si ke sabaabu ti xa í badinḡo lafili. ²² Lannaya men b'é la wo kuwolu to, wo xa tu í nin Ala te. Moxo men jusukunḡo nte a jalagila a la ku ketalu to, heero be wo ḡen. ²³ Bari moxo men be sikkala a la fen domotalu to, jalago be wo ma, bawo a man wo ke x'a la lannaya xan. Fen wo fen man ke x'a la lannaya xan, wo mu junubo le ti.

15 Ntelu mennu barako xa bun lannaya to, alan xa xan xa barakentanḡolu la dono ta. N xana n fan-nu diyannḡo ke. ² Alan bee xa í moxoḡoxo diyanjekuwolu ke a nafa xanma, walasa a xa taxa ḡa lannaya to. ³ Haali Kirisita man a fan diyannḡo ḡinin, bari í xo a be safenin Kitaabo to ḡa men xo: «Ala, í nanibaxolu la nanilolu lata nte xan.» ⁴ Fen wo fen safeta Kitaabo to xa tanbi, a safeta le xa n naxaran, walasa muḡo nin Kitaabo be hakililasigo men dila, wo x'a tu n xa gigo soto. ⁵ Ala, muḡo nin hakililasigo Mansaxe, xa benḡo ke alu te, í xo a xa di Isa Kirisita ḡen ḡa men. ⁶ Nin wo keta, alu bee kafuninḡo xanbenningḡo si n Marigi Isa Kirisita Fa Ala tantu. ⁷ Alu i ḡoxo muta bete í xo Kirisita x'alu muta ḡa men, walasa bunḡa xa la Ala xan. ⁸ Í b'a fola alu ḡen xo, Kirisita keta Yahudiyalu la baaradinḡo ti, walasa Ala xa lahido mennu ta i mamaxelu ḡen, wolu xa dafa. Wo ḡa ma, a xa Ala la xantigiya yita. ⁹ Kirisita la na xa siya to dulu bula barako lala Ala ḡen a la hinno xanma, í xo a be safenin Kitaabo to ḡa men xo: «Wo xanma, í be í tantula duniya siyalu to, xa donkilolu la xa í toxo bunḡa.» ¹⁰ A be safenin du xo: «Siyalu, alu nin Ala la moxolu xa ḡaxali i ḡoxo fe.» ¹¹ Anin du xo: «Siyalu, alu bee xa Marigi tantu. Moxolu bee x'a tantu.» ¹² Kila Esayi du x'a fo xo: «Moxo do si bo Yese to. A si wuli xa siyalu mara. Siyalu s'í gigo la a xan.» ¹³ Gigisigibaxo Ala xa ḡaxaliba nin heeraba di alu ma lannaya xono, walasa alu gigo xa bunḡa bete bete, Ni Senunḡo barako to. ¹⁴ Í badinḡolu, men mu alu la kuwo ti, í fan be lanin a la xo ḡanneya betolu be alu la. Alu xa lonḡo bee soto. Alu s'a no du xa i ḡoxo tonben. ¹⁵ Wo bee nin a ta, nte xa í ja xoleya xa fenḡo dolu safe alu ḡen, walasa x'alu hakilo lajigi. Í xa wo ke, bawo Ala x'a la neemo di í ma, ¹⁶ nin í si ke Isa Kirisita la baaradinḡo ti siya tolu to. Í be Ala la sadaxalasibaxaya baaro la, nin wo mu Ala la xibaru Dimanḡo folo ti. Í be wo baaro la, walasa siya tolu xa ke í xo Ala diyannḡesadaxo, anin i xa ke a ta ti, Ni Senunḡo barako to. ¹⁷ Wo to, nte be baaro men na Ala ḡen, í si í kunḡo xotota wo xanma, Isa Kirisita barako to. ¹⁸ Í me fatiya xa fusi fo xo í x'a ke, fo Kirisita barako xa í bula men kela, nin wo mu xa siya tolu lason Ala ma. Kirisita xa wo ke í na xumolu la, anin í na kewalolu la, ¹⁹ anin taagumanseedolu nin kawakuwolu nin Ala Ni Senunḡo barako to. Wo ḡa ma, x'a damuta Yerusaleme ma, fo xa taxa a bula Iliri jamano la, í xa Kirisita Xibaru Dimanḡo fo wo bee to, x'a dafa. ²⁰ Kirisita toxo man fo

dula mennu folo, nte tun nte a fe xa Xibaru Dimanjo fo dula xote nin non nelu nte. ¹ Ní xa wo ke walasa n xana suwo lo do xote la damuto xan. ²¹ Wo ja ma, men be safenin, n xa wo dafa xo: «A la kuwo xibaro man fo mennu jen, wolu s'a je. Men tunnu man a la kuwo me, wolu s'a faamu.» ²² Wo le xa n bali sinja kiika ti xa taxa alu bata. ²³ Saasa, n xa n soto n na baaro la jin jamana innu xono. A si san kiika bo saasa, a xa di n jen xa taxa bo alu ma. ²⁴ Nin n be taxala Esipape jamano xan tumo men, n b'a fe xa taxa alu je, walasa nin n xiide bota i joxo la tumo men, alu xa n deema xa taxa je. ²⁵ Bari saasa n be taxala Yerusaleme, lannayabaxolu haajo njina xanma. ²⁶ Bawo Maseduwane jamano nin Akayi jamano lannayabaxolu fannu x'a latege xa i bulu kafu i joxo ma, x'a di Yerusaleme lannayabaxa segebaxantunjolu ma. ²⁷ I fannu xa wo latege. I xa xan xa wo ke du, bawo Ala xa neemo men ke Yahudiya lannayabaxolu jen, itelu siya tolu xa do soto wo neemo to. Wo to, a xa xan i dulu xa Yahudiyalu deema i bulufenjolu la. ²⁸ Nin n xa wo kuwo jabo tumo men, xa wo nilifenjo di, n si taxa Esipape. N taxato si bo alu bata la. ²⁹ N x'a lon xo nin n be taxala alu bata, n nin Kirisita la duwawo dafaninjo le be taxala. ³⁰ N badinjolu, n be alu matarala n Marigi Isa Kirisita nin Ni Senunjo la xanuya xanma, alu n faasa, xa Ala matara n jen. ³¹ Alu Ala matara walasa n xa kisi Yude maro lannayabalolu ma, anin n be taxala nilifenjo men dandanna Yerusaleme, wo xa diya je lannayabaxolu jen. ³² Wo ja ma, nin Ala sonta, nte jaxalininjo si si alu ma, xa n tofopo alu bata waxati la. ³³ Heeratigi Ala xa ke alu bee fe. Amiini.

16 N be alan badinmusu Febe la kuwo xoleyala alu ma. Ala la jama men be Sankere, wo la baarala le mu. ² Alu a tomuta Marigi toxo la, x'a bunja i xo Ala la moxo xa xan xa bunja ja men. A maakuwo keta alu la ku wo ku to, alu x'a deema. A xa badin kiika deema. A xa nte fan deema. ³ Alu xa Pirisiye nin Akilasi xonton. Wolu mu nte baarakejoxolu ti, Isa Kirisita la baaro to. ⁴ I bota i niyo la, walasa xa nte niyo kisi. Nte kilin nte i walejnumalonna, bari Ala la jama mennu be siya tolu to, wolu bee be i walejnumalonna. ⁵ Ala la jama men be kamarila i la luwo ma, alu xa wo dulu xonton. Alu xa n badin bete Epayineti xonton. Ate le folo xa lannaya ke Kirisita la, Asi maro xono. ⁶ Alu Mariyama xonton, wo men xa baara kiika ke alu jen. ⁷ Alu n badinjolu xonton: Andoronikusi nin Yuniyasi. N nin wolu tunnu be

kasola. Kiladin soobe lelu mu. I lata Kirisita la nte ja. ⁸ Alu Anpiliyasi xonton. A la kuwo xa di bete nte jen Marigi la silo la. ⁹ Alu Uruben xonton. N baarakejoxo le mu Kirisita jen. Alu n badin xanuningjo Sitasi du xonton. ¹⁰ Alu Apele xonton. Ate la lannaya tuta siginin Kirisita la. Alu Arisitobuli la lumamoxolu xonton. ¹¹ Alu n badin Herodiyon xonton. Alu Narisisi la lumamoxolu xonton, mennu be Marigi la silo xan. ¹² Alu Tirifene nin Tirifose xonton, mennu segeta Marigi la baaro la. Alu n badinmusu soobe Pereside xonton. Ate segebeteta n Marigi jen. ¹³ Alu Rufusi xonton, Marigi la moxo soobe le mu, anin a na. A na mu n na le ti. ¹⁴ Alu Asenkirite nin Fulegon nin Heremesi nin Patorobasi nin Heremasi xonton, anin badinjolu mennu be i bata. ¹⁵ Alu Filologe nin Juli xonton, anin Nere nin a badinmuso anin Olinpasi nin Ala la moxolu mennu be i bata. ¹⁶ Alu i joxo xonton baatayalixontonna senunjo la. Kirisita la jama moxolu bee be alu xontonna. ¹⁷ N badinjolu, n be alu lasobila: Alu i korosi moxolu ma, mennu be nala soosolo tila, xa lannayabaxolu lafili. Alu xa xarango men soto, i si wo sooso. Alu i soobo wo moxolu la. ¹⁸ Bawo wo moxo sifalu nte baaro kela n Marigi Kirisita jen. I be baaro kela i fannu xonobato le jen. I si kulonbalolu lafili i la xuma dimanjolu nin i la tulutodiya xumolu la. ¹⁹ Bee x'a lon xo alu be xulunin Marigi jen. Alu la wo kuwo be nte jaxalinin. N b'a fe alu xa hakilitigiya soto xa ku juma ke, xa ku jaxo tu je. ²⁰ Dondin, heeratigi Ala si Sentane tojonxo alu sinjo xoto. N Marigi Isa la neemo xa ke alu fe! ²¹ N baarakejoxo Timote be alu xontonna, a nin n badinjolu: Lusiyusi nin Jason nin Sosipatere. ²² Nte Teretiyusi men xa pin letere in safe Poli jen, n be alu xontonna Marigi toxo la. ²³ N jatigi Gayusi, anin Ala la jama bee jatigi, be alu xontonna. Dugo xalisimarala Erasite be alu xontonna. N badinxe Karitusi du be alu xontonna. [²⁴ N Marigi Isa Kirisita la neemo xa ke alu bee fe. Amiini!] ²⁵ Alan xa Ala tantu! Nte be xibaru Dimanjo men waajula Isa Kirisita la kuwo xan, sinjo be Ala jen x'alu la lannaya sinsin wo la. Wo Xibaru Dimanjo gullo yitata. A tun be dugunin kabirin folofolo. ²⁶ Bari saasa, Ala x'a la keno xan kilalu la kitaabolu la. Siyalu bee lalonta a la, i xo badabanjo Ala x'a latege ja men. Wo keta walasa moxo bee xa la a la, xa xulu a jen. ²⁷ Tanto be Ala kilinpe jen, men mu hakilitigo ti, Isa Kirisita toxo la, fo abada. Amiini!

1 KORENTENGOLU

1 Nte Poli, men kilita xa ke Isa Kirisita la kiladinjo ti Ala sago fe, anin n badinxé Sositene, ² be pin safe in kila Ala la jama ma, men be Korente, mennu keta senumanᅇolu ti Isa Kirisita la kafuᅇoxoya xanma, mennu kilita xa ke a la senumanᅇolu ti, anin fen wo fen be Isa Kirisita toxo kilila dula bee, nin wo mu i Marigi nin ntelu Marigi ti. ³ N Fa Ala anin Marigi Isa Kirisita xa neemo nin heero ke alu pen. ⁴ N be barako bulala Ala pen tuma bee alu la kuwo la, Ala la neemo xanma, men dita alu ma Isa Kirisita barako to. ⁵ Alu nin ate kafuᅇoxoya fe, alu xa fen bee soto xa jiidi, xumo to anin lonᅇo to, ⁶ bawo seedeya men keta Kirisita xan, wo sigibeteta alu to. ⁷ Wo na ma, Ni Senunᅇo la solifen fusi dibali nte alu pen xo tugun, atelu mennu be n Marigi Isa Kirisita yitalunᅇo laxononin. ⁸ Ate le du be alu sinsinna fo xa labanᅇo si, walasa alu xa ke jalagibalo ti Marigi Isa Kirisita la lunᅇo. ⁹ Ala mu xantigo le ti. Ate le x'alu kili alu xa ke a Dinxe Isa Kirisita, n Marigi la kafuᅇoxoya xono. ¹⁰ N badinᅇolu, n be alu tarala Marigi Isa Kirisita toxo la, x'alu xa ben, benbaliya xana ke alu te. Kilinᅇa dafaninᅇo xa ke alu te, x'alu ᅇannelu nin alu miiriyalu ke kilin ti. ¹¹ N badinᅇolu, n badinᅇusu Kolowe la moxo dolo xa nte lalon a la, xo benbaliya dolo be alu te. ¹² Nte b'a fe xa men fo, wo fele xo: «Alu do b'a fola xo: "Nte mu Poli le ta ti." Do xote xo: "Nte mu Apolosi le ta ti." Do du xo: "Nte mu Piyere le ta ti." Do xote xo: "Nte mu Kirisita le ta ti." ¹³ Kirisita be tala talanin ne ba? Poli le gengenta yiro ma alu pen ba? Alu batiseta Poli le toxo la ba?» ¹⁴ Nte be barako bulala Ala pen bawo nte man alu si batise nin Kirisipusi nin Gayusi doronnu nte. ¹⁵ Wo na ma, moxo si me a fo xo a batiseta nte toxo la. ¹⁶ Iyo, n xa Sitefanasi du la luwo moxolu batise. Nte hakili nte a la nin nte xa moxo xotelu batise wolu tanbo xo. ¹⁷ Kirisita man nte ki moxo batise la de! A xa nte ki xibaru Dimanᅇo waajulo le la. Nte nte wo kela x'a la hadamadinᅇolu la hakilitigiya xumolu xan, walasa Kirisita la saya gengenyiro xan, wo xana ke fu ti. ¹⁸ Kirisita la saya gengenyiro xan, wo waajulo mu nalumayakuwo le ti halagibaxatolu pen; bari ntelu mennu be kisilo silo xan, wo mu Ala la sintigiya le ti, ntelu pen. ¹⁹ Kitaabo xono, a be safenin xo: «Nte si hakilitigolu la hakilitigiya tija, xa lonnalula lonᅇo ke fuwo ti.» ²⁰ Wo to, hakilitigo be min? Sariya karanmoxo be min? Nin waxati in soosolila be min? Ala man nin duniya in hakilitigiya ke nalumaya ti ba?

²¹ Awa duniya ken nin a la hakilitigiya bee, a korita Ala lonna Ala la hakilitigiya fe. Wo le x'a tu, duniya be xibaru Dimanᅇo waajulo men jaatenin nalumaya ti, Ala x'a latege xa lannayabaxolu kisi wo waajulo le barako to. ²² Yahudiyalu be taagumansedolu ᅇininna x'e je, Gerekolu be hakilitigiya ᅇininna. ²³ Ntelu kennu be waajulo kela xo Kirisita gengenta yiro ma. Wo waajulo xa Yahudiyalu lamuruti, a keta nalumaya ti siya tolu pen. ²⁴ Bari Ala xa mennu kili, Yahudiyalu nin siya tolu to, wolu bulu, Kirisita mu Ala la sintigiya nin Ala la hakilitigiya le ti. ²⁵ Bawo hakilitigiya be Ala la nalumaya la, xa tanbi moxolu la hakilitigiya xan. Barako be Ala la barakentanᅇa la, xa tanbi moxolu barako xan. ²⁶ N badinᅇolu, alu i miiri alu kilija ma. Moxo mennu be jaatela hakilitigolu ti hadamadinᅇolu bulu, anin baraketigolu nin moxo toxomalula, wolu man sa alu to. ²⁷ Bari nin duniya in xa fenᅇo mennu mafele nalumayakuwo ti, Ala xa wo lelu sugandi, walasa xa hakilitigolu lamalu. Nin duniya in xa fenᅇo mennu jaate barakentanᅇolu ti, Ala xa barako dun wo lelu to, walasa xa barakemalu lamalu. ²⁸ Duniya be fenᅇo mennu jaatela paxuntofeno nin maakumanᅇo ti, fenᅇo mennu nte fen ti a pala, Ala xa wo lelu sugandi, walasa mennu be jaate to, xa wolu ke fuwo ti. ²⁹ Wo na ma, moxo si me a fan bunᅇa no Ala na xoto. ³⁰ Bari Ala x'alu nin Isa Kirisita lakafu, x'ate Kirisita ke n na hakilitigiya ti. Kirisita fe, n keta moxo tilinningᅇolu ti Ala na xoto, n senuyata, anin n kunbota. ³¹ Wo keta walasa, i xo Kitaabo x'a fo na men xo: «Men b'a fan bunᅇala, wo x'a fan bunᅇa Marigi la kuwo xanma.»

2 N badinᅇolu, nte taxata alu bata tumo men xa Ala la gullo fo alu pen, nte man a yita alu la xumanalonᅇo la, walla hakilitigiyaba xumolu la. ² Xa nte tu alu bata, nte tun x'a latege xo nte xana fusi xote lon, fo Isa Kirisita doron, nin wo mu a la saya ti gengenyiro xan. ³ Wo le x'a tu, nte barakentanᅇo anin n silaninᅇo jarajarato tun be alu bata. ⁴ Nte la xaranᅇo anin nte la waajulo man ke hadamadinᅇolu la hakilitigiyaxuma dimanᅇolu la; bari a keta Ni Senunᅇo la sintigiya le la. ⁵ Wo keta, walasa alu la lannaya xana sigi hadamadinᅇolu la hakilitigiya xan, bari a xa sigi Ala la sintigiya xan. ⁶ Bari wo bee nin a ta, n na waajulo mu hakilitigiya le ti lannayabaxa moninᅇolu pen. Wo hakilitigiya nin duniya la hakilitigiya nte kilin ti. A nin duniya kuntigolu dulu la hakilitigiya nte kilin ti; wolu si tija.

⁷ N be Ala la hakilitigiya le xarango ma x'a di, men mu gulle duguninjo ti moxolu ma. Ala tun x'a latege kabirin folofolo n na bunja xanma. ⁸ Nin duniya in kuntigolu si man wo hakilitigiya lon, bawo nin i tunnu x'a lon, i tunnu me noorotigi Marigi gengen yiro ma. ⁹ Bari í xo Kitaabo x'a fo ja men xo: «Moxo ja man men je, a tulo man men me, moxo si bada man men miiri, Ala xa wo toben a xanubaxolu jen.» ¹⁰ Awa, Ala ken x'a yita nte lelu la, Ni Senunjo fe; bawo Ni Senunjo be fenjo bee segesegela x'a lon, haali Ala la ku duguninbalu. ¹¹ Moxo joman xa moxo xonokuwo lon nin a fan niyo nte? Wo be ja men, moxo si me Ala la kuwolu lon no nin Ala Niyo nte. ¹² Ntelu kennu man jin duniya in niyo soto; bari n xa Niyo soto men bota Ala la, walasa Ala xa fenjo mennu di n ma fu, n xa wolu lon. ¹³ N be wo kuwolu fola xumo mennu la, wolu nte sotola moxolu la hakilitigiya xarango fe, fo Ala Niyo la xarango fe. Wo ja ma, n be Ni Senunjo la kuwo dolu nafola moxolu jen, wo Niyo be siginin mennu to. ¹⁴ Bari Ala Niyo nte siginin moxo men to, wo me son Ala Niyo la kuwolu ma. A be wolu mafelenin nalumakuwo lelu ti; a me wo kuwolu faamu no fan, bawo moxo si wolu faranfansi no Ni Senunjo le doron barako la. ¹⁵ Ni Senunjo be siginin moxo men to, wo tigo le si sin no xa kuwo bee faranfansi x'a lon; bari moxo si me kiito tege no wo tigo xan. ¹⁶ A be í xo Kitaabo x'a fo ja men xo: «Jon xa Marigi miiriya lon? Jon si a fo no xo í be ate tonbenna?» Bari ntelu kennu, Kirisita miiriya be ntelu xono.

3 N badinjo, tonja la nte man sin xa xuma alu jen í xo moxo mennu be i taxamala Ni Senunjo sago la, n xumata alu jen ne í xo moxolu mennu b'e taxamala i nidiyanjo la. N xumata alu jen í xo moxo mennu mu dindinjo ti lannaya to. ² Nte xa nono le di alu ma x'a min, n man domoli xulin di alu ma, bawo alu tunnu me sin no xa wo domo. Haalibi, alu me sin no xa wo domo. ³ A be ten bawo haalibi, alu be i taxamala alu nidiyanjo le la. Faxakilinpalu nin kelolu be alu te; wo nte a yitala ba xo alu be i taxamala xa ben jin duniya in sago ma? Alu taxamaja nin hadamadin tolu taxamaja man ke kilin ti ba? ⁴ Nin alu do b'a fola xo: «Nte mu Poli le ta ti», do xote xo: «Nte ken mu Apolosi le ta ti», wo nte hadamadin gansanjo jigo ti ba? ⁵ Apolosi mu mun ti, fo Poli mu mun ti? N mu Ala la baaradinjo doron nelu ti, alu xa lannaya ke mennu sabaabo la, x'a la Marigi la so xan i kilin wo kilin ma. ⁶ Nte xa tutulo ke, Apolosi x'a majiibi, bari Ala le x'a labunja. ⁷ Wo ja ma, tutulila nin majiibilila nte fusi ti. Ala le mu fen ti, wo men b'a labunjala. ⁸ Men b'a tutula, anin men b'a majibila, wolu bee xa xan. Ala si bee kilin kilin baraaji x'a la bee fan na baara keninjo xan. ⁹ Bawo n mu Ala baarakepoxo lelu ti. Ate lelu mu Ala la fuuto ti, anin Ala la bunjo. ¹⁰ Ala x'a la neemo men di n ma, n xa bunjo juwo sigi wo barako to, í xo sulola hak-

ilima. Moxo xote be bunjo loxan wo juwo xan. Bari bee kilin kilin xa xan xa í hakili tu a la lolija ma wo ju sigininjo xan. ¹¹ Bawo ju folo men sigita, nin wo mu Isa Kirisita ti, moxo me ju xote sigi no wo xo. ¹² Nin moxo do xa lolo ke wo ju sigininjo xan, sano la, walla xaaalixoyo la, walla kuru daxolennolu la, walla yiro la, walla binjo la, walla bita la, ¹³ i bee kilin kilin xa baara sifa men ke, wo si lon. Kiito lunjo si wo yita, bawo wo lunjo be í yitala ta le fe. Ta si moxo bee la baara keninjo xotobo x'a sifa lon. ¹⁴ Nin moxo men na baara keninjo man jani, wo tigo si baraajo soto. ¹⁵ Bari nin moxo men na baara keninjo janita, wo tigo si bono a la baraajo to. Wo bee nin a ta, a tigo si kisi, bari a be í xo nin a sabata xa bo ta to. ¹⁶ Alu man a lon ba, xo alu mu Ala la batusuba le ti, anin xo Ala Niyo be siginin alu xono? ¹⁷ Nin do xa Ala la batusuba tija, Ala si wo tigo tija; bawo Ala batusuba xa senu. Alelu mu a la batusuba ti. ¹⁸ Moxo si xana a fan nafili. Nin moxo do hakilo la xo a mu hakilitigo ti jin duniya in jen, wo tigo xa ke naluma ti, walasa a xa hakilitigiya soobe soto. ¹⁹ Bawo jin duniya in hakilitigiya mu nalumaya le ti Ala bulu. A be safenin Kitaabo to xo: «A be hakilitigolu mutala i fannu la kewuya la.» ²⁰ A be safenin du xo: «Marigi xa hakilitigolu la miiriyalu lon. A x'a lon xo wolu mu fuwo le ti.» ²¹ Wo le x'a tu, moxo si xana a fan bunja moxolu koso, bawo fenjo bee mu alu ta le ti. ²² Poli wo, Apolosi wo, Piyere wo, duniya wo, nilamaya wo, saya wo, saasa fenjolu wo, fen natalu wo, fenjo bee mu alu ta le ti. ²³ Bari atelu kennu mu Kirisita ta lelu ti. Kirisita mu Ala ta ti.

4 Wo to, alu ntelu jaate Kirisita la baarakelalu ti anin Ala la gullolu marabaxolu. ² Men njininta Ala la gullolu marabaxolu fe, wo mu xantigiya le ti. ³ Nte ken, atelu xa kiito tege nte xan wo, jin duniya in ki- ititegelalu xa kiito tege nte xan wo, nte la jaateba nte wo xan. Nte fan du nte kiito tegela n fan xan. ⁴ Tonja le mu xo nte man jalagi si lon n fan na. Bari wo nte a yitala xo nte be tilinnin. Men be kiito tegela nte xan, wo mu Marigi le ti. ⁵ Wo le x'a tu, alu xana kiiti tege moxo si xan jannin a waxato xa si, jannin Marigi xa na. Ate le be nala dibitoku duguninjo bee bulala keno xan, xa moxo bee xonokuwo yita. Wo tumo la, bee kilin kilin nin tantulo men xa xan, Ala si bee tantu wo la. ⁶ N badinjo, nte xa wo kuwolu fo alu jen, xa Apolosi nin nte fan ke misaalo ti, alu xarango xanma, walasa alu x'a faamu n na payito fe, xo kuwo mennu safeta, moxo xana tanbi wolu xan. Alu si du xana alu fannu bunja xa ke do jen do xanma. ⁷ Mun xa í nin tolu tala? Mun be í bulu men man di í ma? Nin a dita í ma le, mun na í be í fan bunjala, a be í xo nin a man di í ma? ⁸ Alu be fen wo fen fe, wo be alu kun xa ban. Alu fentigiyata xa ban. Alu keta mansolu ti ntelu xo. N b'a fe alu xa ke mansolu ti soobeya la, walasa n dulu xa mansaya ke alu fe. ⁹ N b'a miirila xo Ala xa ntelu kiladinjo lelu ke

xofemoxolu ti. N be le í xo moxo mennu nin saya xa xan. Bawo n keta felefenjo ti duniya bee nen, melekiyolu fara hadamadinjolu xan. ¹⁰ N keta nalumalu ti Kirisita koso; bari atelu keta hakilitigolu ti Kirisita kafupoxoya xono. Ntelu keta barakentanjolu ti; bari atelu keta barakemalu ti. Alu be bunja sotola; ntelu be doxoya sotola. ¹¹ Fo xa na si saasa ma, ntelu be tooronin xonxo nin mindoxo bulu. Feeto be n na, n be buwola. Basigiradula kilin nte n na. ¹² N be baaro kela n bulo la, xa sege xa n fannu labalu. Moxolu be n nani-la, ntelu be duwala i nen. I b'a lola n nofe xa n tooro, n b'a mupala. ¹³ I be n toxo tinala, ntelu be xuma puma fola i nen. N be jaatenin duniya la pagama bonningjo ti, xa ke bee la fen noxoninjo ti, fo xa na si saasa ma. ¹⁴ Nte man jin fen innu safe walasa x'alu lamalu, bari nte x'alu lasobi le í xo nte dinjolu, n be mennu xanula. ¹⁵ Haali nin karanmoxo wa tan ne keta alu kun Kirisita la kafupoxoya la, fa kiika ken nte alu kun. Nte le x'alu bange Kirisita la kafupoxoya la, xibaru Dimanjo fe. ¹⁶ Wo xanma, nte be alu tarala x'alu xa ke nte ladi-gibaxolu ti. ¹⁷ Wo le x'a tu, n be Timote kila alu ma, nin wo mu n dinxe xanuninjo nin xantigo ti Marigi kafupoxoya to. Ate si alu hakilo lajigi nte taxamaña la, Kirisita la kafupoxoya xono, í xo n be Ala la jamalu xaranna na men dula bee. ¹⁸ Alu dolu xa i fan bunja, x'a miiri xo nte me taxa alu bata tugun. ¹⁹ Bari nin a keta Marigi sago ti, dondin nte si taxa alu bata. Nin nte sita je, n si fantobalu la sintigiya lon, men nte i la xumolu ti. ²⁰ Bawo Ala la Mansaya nte xuma gansan ti; sintigiya kuwo le mu. ²¹ Mun xa di alu nen? N nin guma xa taxa alu ma ba, walla n nin xanuya nin xonotodiya le xa taxa?

5 A meta dula bee xo jadoya be alu tema, haali jadoya men noxon nte kela Alalonbalolu bata. Wo mu jin ne ti xo: Alu do x'a fa musu ta. ² Haalibi, alu dunnu be alu fannu bunpala! Alu tunnu xa xan xa nitokuwa bete le, walasa men xa jin ku in ke, wo xa xoyi alu to. ³ Haali nin nte xunturo nte alu bata, n be alu bata n niyo la. Men xa jin kujaxu in ke, n Marigi Isa toxo la, nte xa kiito tege wo tigo xan xa ban, í xo nin n tun be le alu bata. Nin alu kamarita, alu nin nte, niyo la, n Marigi Isa la sintigiya si ke n fe. ⁵ Wo to, alu wo moxo di Sentane ma, a balasubo tinalo xanma, walasa a niyo xa kisi Marigi nalunjo. ⁶ Alu la fanbunja kunjo man jin. Alu xa don lon xo: «Farinfuunulanjo dondin si mungo bee lafuunu.» ⁷ Alu i senuya, xa farinfuunulan xoto bo alu to, walasa alu xa ke farin nooninin kuto ti, x'a la a xan farinfuunulan nte alu to. Bawo n na Tanbinxansallo sadaxo faxata, nin wo mu Kirisita ti. ⁸ Wo to, n xa wo sallo ke, n nin farinfuunulan xoto xana a ke, nin wo mu jaxuya nin jigojaxuya ti, bari n nin buuru fuunubalo le x'a ke, wo xoto: Senuya to, anin tonja la. ⁹ Nte xa safe men ki alu ma, nte x'a fo alu nen xo alu nin jado xana ku kafu. ¹⁰ Nte nte jin duniya in jadolu

nin a wasabalolu nin a sunjolu walla a bolibatulalu ma. Nin wo le tun mu, alu tunnu si bo le duniya xono. ¹¹ N tun b'a fe xa men fo alu nen, wo mu jin ne ti xo: Alu nin moxo xana ku kafu moxo men, nin lan-nayabaxo toxo be lanin a la, bari jado nin wasabalo, nin bolibatula, nin naafigo, nin dolominnaba, walla sunjo le mu. Alu nin wo moxo sifa man xan xa haali kafu xa domoli ke. ¹² A xa bantatomoxolu la kiito bo nte nen ba? Ala le be nala wolu la kiito tegela. Bari alu man xan ba xa kiito tege alu la jama moxolu xan? Í xo Kitaabo b'a fola na men xo: «Alu kujaxukela xoyi alu to.»

6 Nin benbaliya dunta alu do nin do te, alu si son na di lannayabalolu xa wo kiito tege, xa Ala la jama moxolu tu je? ² Alu man a lon ba xo Ala la jama moxolu si kiito tege duniya xan? Nin alu xa xan xa kiito tege duniya xan, alu si kori jin bataraku innu kiito tegela na di? ³ Alu man a lon ba xo n si kiito tege melekiyolu xan? Xuma ken nte jin duniya in kuwolu ma! ⁴ Awa nin wo noxon kulu be alu te, mun na alu be taxala kiititegelalu tala, Ala la jama nte mennu jaatela? ⁵ N be wo fola nin alu si malu. Wo tuma haali moxo hakilima kilin me soto alu to ba, men si sin no xa kiito tege a badinjo te? ⁶ A xa bete ba lannayabaxa fula xa i noxo kili kiito la, sakuta kiititegela lannayabalolu bata? ⁷ A ken, alu nin i noxo te kiitolu be alu la daso le yitala xa ban. Mun na alu me tilinbaliyakuwo muña? Mun na alu me alu bulufenjo talo muña? ⁸ Bari atelu fan nelu be tilinbaliyakuwolu kela. Alu fan nelu be talo kela. Alu be wo kela alu badin lannayabaxo lelu la de! ⁹ Alu man a lon ba xo tilinbalolu me Ala la Mansaya soto? Alu xana alu fannu lafili. Jadolu wo, bolibatulalu wo, fuyanjolu wo, xebalu mennu be i xebapoxolu njinna wo, ¹⁰ sunjolu wo, wasabalolu wo, dolominna-balu wo, naafigolu wo, boyinxannilalu wo, wolu si me Ala la Mansaya soto. ¹¹ Alu dolu tunnu be ten ne; bari alu kuta, alu senuyata. Ala be alu jaatenin moxo tilin-ninjo lelu ti Marigi Isa Kirisita toxo koso, anin n na Ala Ni Senunjo barako to. ¹² «Fenjo bee be dagenin n ma.» Iyo, bari nafa nte kuwo bee la. «Fenjo bee be dagenin n ma», bari nte me son xa ke fen si la jonjo ti. ¹³ Domolifenjolu mu xonodaxo le ta ti, xonodaxo du mu domolifenjolu ta ti. Wo mu tonja le ti. Wo bee nin a ta, Ala si i fulo bee tija. Bari moxo balo man ke jadoya xanma. Balo mu Marigi le ta ti, Marigi mu balo ta ti. ¹⁴ Ala xa Marigi lakuni xa bo furelu to. Ate si n du-lu lakuni xa bo furelu to, a la sintigiya fe. ¹⁵ Alu man a lon ba xo alu balo mu Kirisita balo dula do le ti? N si Kirisita balo dula do ke jadamuso balo dula do ti ba? Ayi de! ¹⁶ Alu man a lon ba xo xe men nin jadamuso be kafula, a nin wo be kela bala kilin ne ti? Bawo Kitaabo b'a fola xo: «I fulo si ke kilin ti.» ¹⁷ Bari moxo men nin Marigi je kafu, a nin a keta ni kilin ti. ¹⁸ Alu i bori jadoya ma. Moxo be junube sifa wo sifa xote kela, wo be a ba-

lo xoxan ne, bari men be jadoya kela, wo b'a fan balo haxxo tala. ¹⁹ Alu man a lon ba xo alu balo mu Ni Senunjo la batusuba le ti? Wo Ni Senunjo be siginin alu to; alu x'a soto Ala la. Alu ta nte alu fannu ti de! ²⁰ Bawo, Ala x'alu san songoba le la. Wo xanma, alu Ala bunja alu balo to.

7 Awa, alu xa safe ki nte ma kuwo mennu la, saasa alan xa si wolu ma. A xa jin, xe ba xana musu futu. ² Bari x'a la a xan jadoya be fuumanin; wo xanma, a xa jin xo xe bee kilin kilin xa muso ta, anin xo muso bee kilin kin xa ke a xe kun. ³ Xeba xa xan xa men ke a musu jen, a xa wo ke; muso du nin men xa xan a xe jen, a xa wo ke. ⁴ Muso me a fan balo ke no a sago ti; a balo mu a xe le ta ti. Wo ja ma, xe ba du me a fan balo ke no a sago ti; a balo mu a musu le ta ti. ⁵ Alu xana ladula tege i joxo la, fo nin alu benta a to, xa wo ke waxati la, x'a bula Alamata xanma. Wo xo, alu saagi i joxo ma, walasa Sentane xana alu neene, x'alu lakori alu fannu tomutala. ⁶ N be men fola alu jen jan, waajibi nte; yitannalo le mu. ⁷ A xa di nte jen moxolu bee xa ke futubalo ti i xo nte; bari Ala xa solifen mategeninjo do le di bee kilin kilin ma. A xa kuwo do sinjo di do ma, xa ku xote sinjo di do xote ma. ⁸ Mennu man futu, anin muso mennu xe sata, n b'a fola wolu jen xo a xa jin i kilinno xa tu i xo nte. ⁹ Bari nin i x'a je xo i me i fannu muta no, i xa futuwo ke. Bawo futuwo xa fisa nego fuumaninjo ti. ¹⁰ Mennu be futuwo xono xa ban, nte be men waajibiyala i ma, nte la fo nte, bari Marigi la fo le mu, xo muso man xan xa bo a xe kun. ¹¹ Nin a bota a xe kun, a futubalo le xa xan xa tu, walla a nin a xe xa i koppa i joxo ma. Xe du man xan x'a musu bula. ¹² Nte be men fola alu tolu jen saasa, wo nte Marigi la fo ti, nte la fo le mu: Nin musu lannayabalo be badinxo do kun, a dun sonta xa tu a kun, a xana a bula. ¹³ Wo ja ma, nin lannayabaxa muso do be xe lannayabalo kun, nin wo xe sonta a xa tu a kun, a xana bo a kun. ¹⁴ Xe lannayabalo senuyata a musu lannayabaxo koso. Musu lannayabalo du senuyata a xe lannayabaxo koso. Nin wo nte, alu dinjolu tunnu si ke moxo noxoninjo ti, bari tonja, i xa senu. ¹⁵ Bari nin xe, walla muso men nte lannayabaxa ti xo, xo a be bola, alu a tu a xa bo. Wo to, julu nte lannayabaxo la tugun; bawo Ala xa n kili xo n xa ke heero le xono. ¹⁶ Ite muso men keta lannayabaxo ti, i x'a lon ba fo i si ke sabaabu ti i xe xa kisi? Ite xe men keta lannayabaxo ti, i x'a lon ba fo i si ke sabaabu ti i musu xa kisi? ¹⁷ Wo bee nin a ta, Marigi xa bee kilin wo kilin so men na, anin Ala x'e kili x'e tu ja men ma, bee kilin kilin xa tu wo ja ma. Nte be wo le lawaajibiyaxan Ala la jamalu bee ma. ¹⁸ Nin Ala xa moxo do kili x'a tara a be jaxanin, wo tigi xana wo dugu. Nin Ala xa do kili x'a tara a nte jaxanin, a tigo jaxabalo xa tu. ¹⁹ Naxa nin jaxabaliya nte ku ti; nafa be men na, wo mu Ala la sariyalu labatulo le ti. ²⁰ Ala xa moxo bee kili x'e tu ja men, bee xa tu ten. ²¹ Nin Ala

x'e kili x'e tu jonja la, xana hanme wo la. Bari nin ja be i jen xa hooroya, wo ke. ²² Bawo Marigi xa men kili x'a tu jonja la, wo tigi hooroyata Marigi jen. Marigi xa hooro men du kili, wo keta Kirisita la jonjo ti. ²³ Ala x'alu san songoba le la, wo xanma, alu xana ke hadamadinjolu la jonjolu ti. ²⁴ N badinjo lu, Ala x'alu bee kili x'alu tu ja men, bee xa tu ten Ala ja xoto. ²⁵ Men mu futubalolu la kuwo ti, Marigi man yanmaru di n ma wo la; bari n si n fan na miiriya di, nte men, Marigi la jumaya xanma, n nin lannamoxoya xa xan. ²⁶ Bi waxato la xoleya xanma, men xa jin nte pala, wo mu le xo moxo bee xa tu a ja folo ma. ²⁷ Nin musu be men kun, wo xana a njin x'a musu bula. Nin musu nte men kun, wo xana a njin xa musu futu. ²⁸ Bari haali wo, nin i xa muso futu, i man junube ke wo ti. Nin xarafa fututa, a man junube ke wo ti. Bari mennu je futuwo ke, wolu si toorokuwolu soto i la nilamaya xono. Nte b'a fe alu xa kisi wo lelu ma. ²⁹ N badinjo lu, n be men fola wo fele: Waxato sutiyata. Kabirin saasa musu be mennu kun, wolu xa ke i xo nin musu nte i kun. ³⁰ Mennu be xasila, wolu xa ke i xo nin i nte xasila. Mennu be jaxalinin, wolu xa ke i xo nin i nte jaxalinin. Mennu be sanno kela, xa ke i xo nin fen nte i bulu. ³¹ Mennu be jin duniya in diyaboxan, wolu xa ke i xo nin i nte a diyaboxan; bawo n ja be jin duniya in men na ten, wo be tanbila le. ³² N b'a fe le, hanme fusi xana ke alu la. Men man futu ke, wo be hanmela Marigi la kuwolu la, walasa a la kuwo si diya Marigi jen ja men. ³³ Bari men xa futuwo ke, wo be hanmela duniya kuwo lelu la. Wo b'a njinna, a la kuwo si diya a musu jen ja men. ³⁴ A miiro be talanin. Wo ja ma, xe nte muso men kun, wo nin xarafa be hanmela Marigi la kuwo lelu la, walasa i xa senuya i balo nin i niyo to. Bari musu futuninjo, wo be hanmela duniya kuwo lelu la; walasa a la kuwo si diya a xe jen ja men. ³⁵ Nte be wo fola alu fannu la nafa le xanma. N man wo fo alu fitigali xanma; a fokunjo mu le, walasa men xa fisa, alu xa wo ke; nin alu notoninjo si tu Marigi la muume. ³⁶ Nin xe do mamutamuso loxoba b'a la, xo a si son xa dun a gaso to, a b'a fe le x'a futu. Men xa di a jen a xa wo ke. A nte junube kela, i xa futu i joxo ma. ³⁷ Bari moxo men xa don natege a jusukunjo bee la, xo a b'a la xarafa futubalo tula, x'a tara diyakuwa nte, nin a ta le mu a sago ti, wo tigo xa ku bete ke. ³⁸ Wo ja ma, men je a mamutaxarafa futu, wo xa ku bete ke; bari men man a ta futu, wo le joxon nte. ³⁹ Futuwo xa muso siti a xe la, a xe la nilamaya bee xono; bari nin a xe sata, xe men xa di a jen, a si futu wo ma no. Bari a xa ke lannayabaxa futuwo ti doron. ⁴⁰ Bari haali wo, nte pala nin a tuta ten, wo le xa fisa a ma futuwo ti. N be lanin a la xo Ala Niyo be nte du to.

8 Awa, saasa n badinjo lu, n be nala alu jaabila bolisosubolu la kuwo to. Tonja le mu n x'a lon xo lonjo be n bee la. Bari lonjo xa tari le xa moxo bula a

fan bunjala, x'a tara xanuya si do kafu n barako ma. ² Nin moxo men b'a miirila xo a xa ku lon, wo man lonjo ke folo í xo a tun xa xan x'a ke ja men. ³ Bari moxo men be Ala xanula, Ala xa wo tigo lon. ⁴ Awa, n si bolisosubo domo no ba? N x'a lon xo boli fusi nte duniya to, anin xo ala xote nte je, nin a bota Ala kilinpe ma. ⁵ Haali nin sanxulo to fenjo dolu anin duguxulo xan fenjo dolu be kilila xo ala, anin xo wo joxon ala kiika nin marigi kiika be je, ⁶ ntelu bulu, Ala kilinpe le ken be je, nin wo mu n Fa ti. Ate le xa fen bee da; n be i nila ate le du pen. Marigi kilinpe le du be je, nin wo mu Isa Kirisita ti. Fenjo bee be je ate le barako to; anin n be i nila ate le barako to. ⁷ Bari bee man wo lon. Moxo dolu tunnu be dalinin bolikuwo la, haalibi nin i be wo subolu domola, i b'a jaatenin xo wo subo sadaxata bolu lelu pen tonja la. X'a la a xan i jusukunjo barako xa doxo, wo domolo be i jusukunjo noxola. ⁸ Domolifen ken nte n nin Ala te sutiyala. Nin n man wo domo, wo me fen bo n na. Nin n xa wo domo du, wo nte fen kafa n ma. ⁹ Bari wo bee nin a ta, alu i korosi; walasa yanmaro men be n bulu xa n diyanjo ke, wo xana ke sabaabu ti xa barakentanjo bula junubo xono. ¹⁰ Awa, ite men xa lonjo ke, nin í badin barakentanjo do xa ite je siginin bolibatusuwo xono í b'a subo ma x'a domo, a du me a ja xoleya ba xa bolisosubu in domo? ¹¹ Wo to, í la lonjo keta sabaabu ti, barakentanjo xa halagi, Kirisita sata wo badinjo men pen. ¹² Nin alu x'alu badinjo haxxo ta ten, xa i jusukun barakentanjo joogi, alu be Kirisita fan ne haxxo tala. ¹³ Wo le x'a tu, nin domolifenjo do le si ke sabaabu ti xa nte badinjo do bula junubo xono, nte me subu si domo tugun; walasa nte xana ke sabaabu ti xa n badinjo bula junubo xono.

9 Awa, n badinjo, nte hooroyaninjo nte ba? Nte nte kiladinjo ti ba? N man n Marigi Isa je ba? Nte xa baaro men ke Marigi pen, atelu fan nelu nte wo baarano ti ba? ² Haali nin dolu man son nte la kiladinja ma, n ken mu a ti atelu bulu; bawo ate lelu mu n na kiladinja taagumansedo ti, Marigi kafujoxoya la. ³ Nte be n segegegebaxolu jaabila men na wo fele: ⁴ Ntelu nin domolo nin minno man xan ba, n na baaro xanma? ⁵ Ntelu nin a man xan ba xa lannayabaxa muso do ta, n nin wo xa taxa í xo kiladin tolu nin Marigi badinxelu anin Piyere b'a kela ja men? ⁶ Walla nte nin Baranabasi fulo doron ne xa xan ba xa baaro ke, xa n fannu labalu? ⁷ Jon si son xa taxa sorodasiya to, xa saagi a fan dono tanin? Jon si resenfuuto bo x'e me a dinjo domo? Jon xa negaani la je xo a me a la marafen negaanitalu nono min? ⁸ A xana ke alu pen xo nte la jin xuma innu be siginin hadamadinjo la ketalu doron nelu xan. Kila Musa la sariya du be wo lelu fola. ⁹ A be safenin wo sariya xono xo: "Tuura men be jo tojonxola x'a keso bo, í xana fen siti wo da ma." Ala xa wo fo tuuralu hanmo koso ba? ¹⁰ Tonja la, a man xu-

ma ten nte lelu pen ba? Sikka nte a to, wo xumo safeta nte lelu pen. Senekela nin senefenjo xosibaxo xa xan xa i la baaro ke don gigo xan, xo i si fen soto i la baaro to. ¹¹ Nin ntelu xa Ni Senunjo la siyo dolu lan alu to: A si ke danmatanbi ku ti ba n x'alu bulufenjo dolu soto, x'a ke n na fen tegetalu ti? ¹² Nin dolu be wo waa-jibiyenin alu xan, ntelu nin a man xan ba xa tanbi wolu la? Haali wo, n nin men xa xan, n man wo njinin alu la. Bari n be kuwo bee mujala walasa n xana fusi ke, men si Kirisita la xibaru Dimanjo bali xa taxa ja. ¹³ Alu man a lon ba xo moxo mennu be baaro kela Alabatusuba xono, xo wolu la baluwo be bola Alabatusuba fenjo lelu to, anin xo mennu be sadaxolu lasila sadaxajandula, xo wolu be i nidula sotola wo sadaxolu to? ¹⁴ Wo be ja men, Marigi x'a latege xo Xibaru Dimanjo fobaxolu xa balu wo baaro la. ¹⁵ Bari nte nin wo fenjo mennu xa xan, n man a lo wolu si nofe. Nte nte jin safe in du kila alu ma walasa alu xa wo ke nte pen. Saya xa di nte pen don ti moxo xa soto xa nte la jin wasuku in tija. ¹⁶ Fanbunja kun nte nte pen Xibaru Dimanjo fo to; bawo a keta waajibo le ti nte ma. Nin nte man Xibaru Dimanjo fo, bone be nte pen. ¹⁷ Nin nte fan sago le xa n bula Xibaru Dimanjo fola, nte si n sara soto. Bari nte fan sago nte, baara le mu, men xarifata n ma. ¹⁸ Wo to, n na sara mu mun ti? Xa Xibaru Dimanjo fo moxolu pen fu, x'a tara n nin men xa xan wo Xibaru Dimanjo fo to, n buruta wo to. ¹⁹ Nte nte moxo si la jonjo ti. Wo bee xan, nte xa n fan majigi xa ke bee la jonjo ti, walasa xa moxo kiika soto Kirisita pen. ²⁰ Xa nte tu Yahudiyalu to, n keta Yahudiya ti, walasa n x'e soto. Mennu be sariya xoto, nte keta wolu bata í xo nin nte du be sariya xoto, haali x'a tara nte nte wo xoto, walasa nte xa sariya xoto moxolu soto. ²¹ Wo ja ma, sariya nte mennu bulu, nte keta wolu bata í xo nin sariya nte nte bulu; walasa sariya nte mennu bulu, nte xa wolu soto. Wo bee nin a ta, a nte í xo nin Ala la sariya nte nte bulu; bawo nte be Kirisita la sariya xoto. ²² Mennu barako xa doxo lannaya to, nte keta wolu bata í xo nin nte du barako xa doxo; walasa xa barakexonjo soto. Nte be n fan kela fenjo bee ti bee pen; walasa ja wo ja ma, nte xa i dolu lakisi. ²³ Nte be wo bee kela Xibaru Dimanjo koso; walasa nte xa n nidula soto a to. ²⁴ Alu x'a lon xo borikeno xan, joxodanborilalu bee b'e borila; bari kilin ne be a bandeero tala. Wo ja ma, alu dulu x'e bori bete fo alu si bandeero ta. ²⁵ Noxodanborilalu be i fannu tangala ku kiika ma. Wolu be wo kela walasa i xa kunnawulijala soto, men si tija. Bari ntelu be wo kela walasa n xa kunnawulijala soto, men nte tinjala fo abada. ²⁶ Wo xanma, nte be n borila, xa n ja loninjo tu n borikunjo to. N be í xo kutubonnila, men nte a bulo fayila a kunfe. ²⁷ N be deguba lala n balo xan, x'a xulu; walasa nte men xa moxolu waaju, n xana taxa sinbo.

10 ¹ Ní badinṅolu, kuwo mennu xa n mamaxelu soto, n'á fe alu hakilo xa jigi wolu la. I bee xa i taxama xababa xoto; anin i bee xa i taxama xa Xooxoji Wulenṅo tege. ² I bee batiseta xa i tu Musa la kafuṅoxoya xono, wo xababa nin wo xooxojiyo to. ³ I bee xa Ni Senunṅo la domolifen kilinṅo domo. ⁴ I bee x'e min Ni Senunṅo la minfen kilinṅo la; bawo Ni Senunṅo la fataxulo men tun b'e nofe, i bee x'e min wo jiyo la. Wo fataxulo tun mu Kirisita le ti. ⁵ Bari wo bee nin a ta, i kiika la kuwo man diya Ala nen; bawo i fure tun be fili filinin fuṅo la. ⁶ Wo kuwolu keta ntelu nen misaali ti, walasa n na xana bo jaxumanṅo fe, í xo itelu na bota a fe na men. ⁷ Alu xana son bolibato ma í xo i dolu xa wo ke na men; í xo Kitaabo x'a fo na men xo: «Moxolu x'e sigi xa domolo ke, x'e min, wo xo, i wulita x'e tulun.» ⁸ Alan xana jadoya ke í xo i dolu xa wo ke na men. Mennu xa wo ke, moxo wulu muxan nin saba le sata wolu to tili kilin xono. ⁹ Alan xana a fo xo n be Marigi xotobola í xo i dolu x'a ke na men, fo salu x'e kin x'e faxa. ¹⁰ Alu dudu xana daxotoxumo ke í xo i dolu x'a ke na men, nita-melekiyo xa i bee faxa. ¹¹ Wo kasaarolu xa wolu soto walasa wolu xa ke misaali ti moxo xotelu nen. I safeta le xa n nasobi; bawo n be waxato men to saasa, labanṅo tumo sutiyata. ¹² Wo xanma, a be moxo men nen xo a mu lannayabaxa loninṅo ti, wo tigo x'é korosi a xana boyi. ¹³ Xotoboli man alu soto men ṅoxon man dali xa moxo soto. Ala mu xantigo le ti a la lahidolu xono. A me son alu xa xotobo fo xa tanbi alu barako danṅo la; bari nin xotobolikuwo nata alu ma, a si barako di alu ma, xa wo mupa anin xa bondanṅo di alu ma. ¹⁴ Wo le x'a tu, nte badin xanuninṅolu, alu i bori bolibato ma. ¹⁵ Nte be xumala alu nen x'a jaate xo hakilo be alu la. Ní be men fola alu nen, alu fannu xa jaatemuta ke wo la. ¹⁶ N be barako bulala Ala nen duwawo jipoto men xanma, wo nte n nin Kirisita la kafo ti ba a jelo fe? N be buuro men tokutunna, wo nte n nin Kirisita la kafo ti ba a balo fe? ¹⁷ Buurukun kilin ne be je. Wo xanma, nte mennu xa sa, n mu bala kilin ne ti; bawo n bee be kafula buurukun kilin ne to. ¹⁸ Alu Banisirayila moxolu la kuwo mafele: Mennu be sadaxafenṅolu domola, kafuṅoxoya nte wolu nin sadaxajandula te ba? ¹⁹ Nte be men fola, wo xoto mu mun ne ti? Xo bolisosubo walla xo bolo mu fen ti ba? ²⁰ Ayi! Bari n'á fe xa men fo, xo mennu be bololu sola, wo bolisofenṅolu nte dila Ala ma, i be dila jinno lelu ma. Nte dun nte a fe kafuṅoxoya xa dun alu nin jinnolu te. ²¹ Alu me a no x'e min Marigi la minfen jipoto la, anin x'e min jinnolu la minfen jipoto du la. Alu me a no xa Marigi la domolo ke, xa jinno dudu ta ke. ²² Walla n b'a fe ba x'a njinin xa Marigi lakiiliya? N barako xa bun a ti ba? ²³ Fenṅo bee be dagenin, bari nafa nte fenṅo bee la. Fenṅo bee be dagenin, bari fenṅo bee nte do kafula moxo barako ma. ²⁴ Moxo si xana a fan na nafa njinin, bari a xa moxo tolu ta le njinin. ²⁵ Subu wo subu be fiiri-

la saxa xono, alu wo domo. Alu xana njinxali ke wolu ma, jusukunṅo koso. ²⁶ Bawo a be safenin Kitaabo to xo: «Duguxulo nin a xan fenṅolu bee mu Marigi le ta ti.» ²⁷ Nin lannayabalo do x'alu kili domolo ma, a dun diyata alu nen xa taxa, a je fen wo fen di alu ma, alu wo bee domo; alu xana njinxali ke wo ma, jusukunṅo koso. ²⁸ Bari nin moxo do xo alu nen xo: «Nin mu bolisosubo le ti», alu xana a domo alu lasobibaxo koso anin jusukunṅo koso. ²⁹ Nte nte xumala alu jusukunṅo ma jan de! Ní be xumala do ta le ma. Awa, mun dun koso, yanmaro men be nte bulu, moxo xote jusukunṅo be dansigi kela wo la? ³⁰ Nin nte be barako bulala Ala nen n'á na domolo koso, mun na nte be jalagila wo domolo kuwo to, x'a tara nte xa barako bula Ala nen wo koso? ³¹ Wo to, alu be domoli kela wo, alu be fen minna wo, alu be fen wo fen kela, alu wo ke Ala bunṅa xanma. ³² Alu xana ke sabaabu ti xa moxo si lafili, Yahudiyalu wo, Gerekolu wo, Ala la jama wo, moxo si. ³³ Alu nte ladigi; nte be n'á balanna xa moxo bee diyannṅo le ke kuwo bee to. Nte nte n'á fan na nafa njinna; bari nte be moxo kiika la nafa le njinna walasa i xa kisi.

11 Alu ke nte ladigibaxo ti í xo nte mu Kirisita ladigibaxo ti na men. ² Nte be alu tantula bawo alu hakilo tuta nte la kuwo bee to, anin xo alu xa xaranṅolu mara í xo nte x'e lasi alu ma na men. ³ Bari n'á fe alu x'a lon xo: Kirisita le mu xe bee kuntigo ti; xe ba le mu a musu kuntigo ti, Ala le mu Kirisita kuntigo ti. ⁴ Wo le x'a tu, xe wo xe nin a be Ala matarala, walla nin a be kilaya kela, xa fen do tu a kunṅo la, a x'a kuntigo doxoya. ⁵ Bari nin fen nte muso kunna x'a tu Alamatarala, walla x'a tu kilaya la, a x'a kuntigo doxoya. Wo be le í xo nin a kunṅo lininṅo le mu. ⁶ Nin muso men nte a fe xa fen ke a kunṅo la, wo x'a kunṅo laxa. Bari nin kunnaxa walla kun liyo mu muso maluyakuwo ti, wo tumo la, a xa xan xa fen do ke a kunṅo la. ⁷ Xeba ken man xan xa fen ke a kunṅo la; bawo ate mu Ala mununṅo nin a nooro le ti. Bari muso mu xeba le nooro ti; ⁸ bawo xeba man bo muso to; muso le bota xeba to. ⁹ Xeba man da muso nen, bari muso le data xeba nen. ¹⁰ Wo le x'a tu, muso xa xan xa bunṅa taagumansedo ke a kunṅo la, melekoyolu koso. ¹¹ Bari wo bee nin a ta, n nin Marigi la kafuṅoxoya xono, muso me taxa xeba xo, xeba du me taxa muso xo. ¹² Bawo muso bota xeba to na men, wo na ma, muso le be xeba bangela. Fenṅo bee bota Ala le to. ¹³ Awa, alu fannu x'a mafele ken, nin a be bennin muso xa Ala matara, x'a kunnaxulunṅo tu Alabatudula. ¹⁴ Hadamadinṅa ke na fan nte n xaranna ba xo doxoyakuwo le mu don ti xeba kunsino xa janṅa? ¹⁵ X'a tara nin kunsinajannṅo keta muso le kun, wo mu wo bunṅa kunṅo le ti. Kunsina janṅo dita le muso ma x'a ke a la butinkunno ti. ¹⁶ Bari nin do b'a fe xa soosoli ke pin kuwo la tugun, wo tigo xa pin lon doron xo: Ala la jamalu

nin ntelu kennu man laada xote lon. ¹⁷ Ní be nala men fola alu ñen saasa, nte me alu tantu no wo la; bawo alu la kamarolu nte kela alu panno xanma, i be kela alu totija le xanma. ¹⁸ A ku folo mu ñin ne ti xo, a fota nte ñen xo nin alu kamarita Ala la jama la kafuñoxoya la, benbaliyalu be alu te. Ña do ma nte lata wo la. ¹⁹ Waajibo le mu benbaliya xa ke alu te, walasa mennu mu lannayabaxa soobelu ti alu to, wolu xa lon. ²⁰ Nin alu kamarita, wo nte Marigi la domolo xanma ti; ²¹ bawo x'alu tu domolo la, alu bee kilin kilin si gidi a fan na domolo xan xa wo domo. Wo ña ma, dolu si tara je xonxo be mennu la. Dolu be je mennu xa dolo min x'e fa. ²² Lu nte alu kun ba alu si domolo nin minno ke jan mennu? Walla alu be Ala la jama kela fuwo ti ba, anin xa bulutoxulunḡolu lamalu? Ní si mun fo alu ñen? X'alu tantu ba? Ayi, nte ken me alu tantu wo la. ²³ Awa, nte xa xaranḡo men soto Marigi la, nin n' x'a lasi alu ma, wo fele xo: Marigi Isa dunta bulo to suwo men to, a xa buuro ta, ²⁴ xa barako bula Ala ñen. Wo xo, a x'a tokutun, x'a fo xo: «Ñin mu n' balo le ti, men dita alu xanma. Alu ñin ke x'alu hakilo lajigi nte la.» ²⁵ Wo ña ma, i sotoninma domolo la, a xa minfen jipoto ta, x'a fo xo: «Ñin minfen jipoti in mu Ala la Kafuxan Kuto minfen jipoto le ti, men tata n' jelo to. Alu xa ñin min tuma wo tuma, alu a ke x'alu hakilo lajigi nte la.» ²⁶ Nin alu xa ñin buuru in domo, x'e min ñin minfen jipoti in na tuma wo tuma, alu be Marigi la saya le foxan, fo a xa na. ²⁷ Wo le x'a tu, moxo wo moxo be Marigi la buuro domola, x'e min a la minfen jipoto la, x'a tara a tigi kepa man ñin, wo tigo si jalagi Marigi balo nin a jelo ma. ²⁸ Wo le x'a tu, moxo bee xa í fan tosegesege folo, wo xo, xa Marigi la buuro domo, x'e min a la minfen jipoto la. ²⁹ Bawo moxo men be ñin buuru in domola, x'e min ñin minfen jipoti in na, x'a tara a man a jaate Marigi balo ti, wo tigo b'a fan jalagifenḡo le domola, x'a fan jalagifenḡo min. ³⁰ Wo le x'a tu, alu kiika keta jangarutolu nin barakentanḡolu ti. Wo le du x'a tu, alu dolu sa-ta. ³¹ Nin n xa n fannu tosegesege folo, n si kisi kiito ma. ³² Bari Marigi be kiito tegela n xan xa n natilin, walasa n nin duniya xana jalagi i ñoxo fe. ³³ Wo ña ma, n' badinḡolu, nin alu kamarita Marigi la domolo xanma tumo men, alu i ñoxo laxono. ³⁴ Nin xonxo be do la, wo xa domolo ke a la luwo ma, walasa alu xana kamari xa kiito lasi alu fannu ma. Nin n' taxata alu bata tumo men, n' si ku tolu nabo.

12 Saasa alan xa xuma Ni Senunḡo la solifenḡolu xan. Ní badinḡolu, n' b'a fe alu xa tonḡa lon wo solifenḡolu la kuwo to. ² Alu x'a lon xo alu tunnu mu Alalonbalolu ti waxato men, alu tunnu sabata taxanin fuwo la, boli muumuwole nofe. ³ Wo le xanma, n' b'a fola alu ñen xo Ala Niyo me ke moxo si xono, í x'a fo xo: «Isa be danganin.» Moxo si du me a fo no xo: «Isa mu Marigi ti» nin Ni Senunḡo fe nte. ⁴ Ala la neemo la solifenḡolu sifa xa sa; bari Ni kilin ne be i dila. ⁵ Baaro

du ñasifa xa sa; bari Marigi kilin ne la baaro mu.

⁶ Baarakepa sifa xa sa; bari Ala kilin in ne mu i bee ke-baxo ti bee xono. ⁷ Ni Senunḡo b'é yitala bee kilin kilin bata so do la, moxo bee nafa xanma. ⁸ Ni Senunḡo xa do so hakilitigiya xumo la; wo Ni kilinḡo xa do xote so lonniya xumo la. ⁹ Wo Ni kilinḡo xa do so lannaya la, xa do xote so sinḡo la xa jangarutolu kendeya. ¹⁰ A xa do xote so sinḡo la xa kawakuwole ke. A xa do la so ke kilaya ti. A xa do xote so lonḡo la xa niyolu faranfansi x'e bo i ñoxo to, xa do xote so sinḡo la xa xan xotelu fo. A xa do xote so sinḡo la xa wo xanḡolu xoto fo. ¹¹ Ni kilin ne mu ñin ku innu bee labaarabaxo ti. Ate le be bee kilin kilin na solifenḡo dila a ma, í xo a xa di a ñen ña men. ¹² Awa, moxo balo mu kilin ne ti, bari a dulalu xa sa. Balo dulalu nin i la siyaya bee, i kafuninḡo mu bala kilin ne ti. Wo be ña men, Kirisita du be ten. ¹³ Alan bee: Yahudiyalu, siya tolu, jonḡolu nin hoorolu, n bee batiseta xa ke bala kilin ti, Ni Senun kilin to. N bee laminta wo Ni kilinḡo le du la. ¹⁴ Moxo balo nte dula kilin ti, dula kiika le b'a la. ¹⁵ Nin sinḡo xo: «Nte nte bulu ti, wo to, nte nte balo dula ti.» Wo me a bo no balo dula do ti. ¹⁶ Nin tulo xo: «Nte nte ña ti, wo to, nte nte balo dula do ti.» Wo me a bo no balo dula do ti. ¹⁷ Nin balo dula bee tun mu ña le ti, moxo tun si melo ke ña di? Nin a bee tun mu tulo ti, moxo tun si fenḡolu sumo lon di? ¹⁸ Bari tonḡa la, Ala xa balo dulalu bee kilin kilin ke a ma, x'a la a fan sago xan. ¹⁹ Nin balo dulalu danḡo tun mu dula kilin ne ti, a tun me ke bala ti. ²⁰ Tonḡa la, balo dulalu xa sa, bari bala kilin ne mu. ²¹ Wo to, ña me a fo no bulo ñen xo: «Nte maaku nte í la.» Kunḡo du me a fo no sinḡolu ñen xo: «Nte maaku nte alu la.» ²² Bari n b'a miirila xo balo dula mennu barako xa doxo, n maakuba le be wolu la. ²³ N b'a jaatela xo balo dula mennu nte fusi ti, n be wo lelu bunḡala xa tanbi dula tolu xan. Balo dula mennu mu n maluyadulalu ti, n be i hakilo tula non nelu la xa tanbi dula tolu xan. ²⁴ Dula mennu nte n maluyadulalu ti, n maaku nte a la xa i hakilo tu nonnu la. Bunḡa nte dula mennu xan, Ala xa balo da xa bunḡaba la wo lelu xan. ²⁵ A xa wo ke walasa balo dulalu si xana tala i ñoxo ma, bari a dulalu bee kilin kilin hakilo xa tu i ñoxo kun ña kilin ma. ²⁶ Nin balo dula do be tooronin, balo dula tolu bee le nin wo dula be toorola i ñoxo fe. Nin dula do xa bunḡa soto, a dula tolu nin wo be ñaxalila i ñoxo fe. ²⁷ Alu dunnu mu Kirisita balo le ti, alu kilin wo kilin mu a balo dula do ti. ²⁸ Wo le x'a tu, Ala xa moxo dolu lasigi Ala la jama moxolu to, x'a la baaro ke. A folo keta kiladinḡolu ti; a fulanannḡo, kilalu, a sabanannḡo, karanmoxolu. Wo xo, a xa sinḡo di dolu ma xa kawakuwole ke, xa dolu so sinḡo la xa jangarutolu kendeya, xa dolu so sinḡo la xa moxolu deema, xa dolu ke ñamoxolu ti, xa sinḡo di dolu ma xa xan xotelu fo. ²⁹ Moxolu bee mu kiladin ti ba? Bee mu kila ti ba? Bee mu karanmoxo ti ba? Bee mu kawakukela ti ba? ³⁰ Jangarutolu kendeyalinḡo di-

ta bee ma ba? Bee si sin no ba xa xan xotelu fo? Bee si sin no ba xa xan xotelu xoto fo? ³¹ Alu Ala la solifengolu njinin bete, nafaba be mennu la. Bari men xa fisa wo bee ti, n be nala wo le yitala alu la.

13 Haali nin n be moxolu la xanqolu nin melekoyolu la xanqolu fola, x'a tara xanuya nte n jusukunqo la, wo to n xumaxanqo be le i xo talanqo, walla mawerenqo mennu be mankanqo bola. ² Haali nin kilaya so be n bulu, haali nin n xa fenqo bee gullo lon, anin xa lonqo bee soto, haali nin lannaya be n na fo n si kurulu labo no i nolu to, nin xanuya nte n jusukunqo la, n nte fusi ti. ³ Haali nin n xa n kun naafulo bee tala xonxotolu te, haali nin n xa n fan balasubo di a xa jani, nin xanuya nte n jusukunqo la, wo me fusi nan n pen. ⁴ Xanuya si muqa, a si moxolu deema, a na nte bola moxo la fen fe. A nte i wasula, a nte a fan bunqala. ⁵ A me kukebali ke, a nte a fan kilin na nafa njinna. A me dimin junna, a me kujaxu mara a xono. ⁶ A me napa tilinbaliyakuwo la, bari a si napa tonqa la. ⁷ A si kuwo bee kun, a si lannaya mara kuwo bee to, a si gigo mara kuwo bee to. A si kuwo bee muqa. ⁸ Xanuya me ban abada. Bari kilayalu si ban; xan xotelu fo si dabula; lonqo si ban. ⁹ Bawo n na lonqo man dafa; n na kilaya du man dafa. ¹⁰ Bari nin ku dafaningqolu nata, dafabalolu si sanko. ¹¹ N dindinqo mu tumo men, n tun be xumala i xo dindinqo; n tun be n miirila i xo dindinqo; n tun be jaatemuto kela i xo dindinqo. N keta moxoba ti tumo men, n xa dindinqakuwolu dabula. ¹² N na be men na bi, wo be le i xo n be felelo kela dujare to. N be men jela, wo nte xoyiyanin. Bari sinin, n si jelo ke, pada nin pada. Bi, n xa dondin ne lon; bari sinin, n si lon dafaningqo soto i xo Ala xa n lon na men. ¹³ Awa, saasa nin fen saba innu be tula: Lannaya, gigo, xanuya. Bari xanuya le xa bun i bee ti.

14 Alu xanuya le njinin folo. Alu Ni Senunqo la so dulu njinin bete, sakuta kilaya. ² Moxo men be xumala xan xotelu to, a nte xumala moxolu pen, a be xumala Ala le pen. Moxo si nte a faamula, bari Ni Senunqo barako la, a be ku duguninqolu fola. ³ Bari moxo men be kilaya kela, wo be xumala moxo tolu pen, walasa xa do kafu i barako ma, x'e jusudun, anin x'e hakilo lasigi. ⁴ Moxo men be xan xotelu fola, wo be do kafula a fan ne barako ma; bari men be kilaya kela, wo be do kafula Ala la jama bee le barako ma. ⁵ N b'a fe alu bee xa xuma xan xotelu to. Bari men xa di nte pen xa tanbi wo xan, wo mu le, alu xa sin xa kilaya ke. Men be kilaya kela, wo nafa xa bun xa tanbi xan xotelu fo xan, fo nin a x'a tara de moxo be je men si a xoto fo no, walasa do xa kafu Ala la jama bee barako ma. ⁶ Wo na ma, n badinqolu, n be alu njinxala, nin nte nata alu ma, xa xuma alu pen xan xotelu to, n si mun pan alu pen? N me fusi pan alu pen, fo nin n xa Ala la ku yitanninqo do laxali alu pen, walla xa lonqo do di alu ma, walla xa kilaya ke, walla xa xaranqo do di alu ma.

⁷ Alan xa misaalo ta nin folifen innu dolu ma, fule, walla kontinqo: Nin i nte xan mategenin bola, fule nin kontinqo be men fola, wo si faamu na di? ⁸ Wo be na men, nin buutuwo xanqo man bo a na ma, jon si i toben kelo xanma? ⁹ Wo be na men, nin alu dulu be xumo men fola, nin wo man xoyiya, alu la fota si faamu di? Alu la xumo nin fojo bee si xaapan. ¹⁰ Xan sifa xa sa duniya to; bari xoto be i bee la. ¹¹ Bari nin xanqo do be fola nte pen, n nte men mela, wo xanqo fobaxo mu nte pen luntanqo le ti, nte du mu luntanqo le ti wo tigo pen. ¹² Wo to, i xo a xa dibete alu pen xa Ni Senunqo la solifengolu soto, mennu si do kafu Ala la jama barako ma, alu a njinin xa wo lelu kiika soto. ¹³ Wo xanma, moxo men be xan xotelu fola, wo xa Ala matara a xa sinqo di a ma xa wolu xoto fo. ¹⁴ Nin n be Ala matarala wo xanqolu to, n niyo be Ala mataraxan, bari n hakilo nte baara la. ¹⁵ N s'a ke na di wo to? N si Ala matara n niyo la, bari n si Ala matara n hakilo du la. N si Alatan-tu donkilo la n niyo la, bari n si Alatan-tu donkilo la n hakilo du la. ¹⁶ Awa, nin i be barako bulala Ala pen i niyo la doron ne, i lamelibaxa gansanqo do, men be jama xono, wo si "Amiini" fo na di i sotoninqo i la barakebulo la? Bawo i be men fola, wo man wo lon. ¹⁷ Haali nin i la barakebulo panbeteta, do man nafa si soto a la. ¹⁸ Nte be barako bulala Ala pen, bawo nte be xan xotelu fola xa tanbi alu bee xan. ¹⁹ Bari Ala la jama to, nte xa xumakese luulu doron fo, moxolu si mennu faamu, walasa i xa laxaran, wo xa di nte pen xumakese wulu tan fo ti xan xote to. ²⁰ N badinqolu, alu la miiriya xana ke i xo dindinqolu; alu ke i xo deenanolu, ku jaxo boxo la; bari alu ke moxobalu ti, miiriya boxo la. ²¹ A be safenin sariya xono xo: «Nte be nala xumala nin moxo innu pen xan xotelu fobaxo lelu fe anin siya xotelu moxolu fe. Bari haali wo, i me nte lame, Marigi xo ten.» ²² Wo le x'a tu, xan xotelu fo nte taagumanseede ti lannayabaxolu pen; wo mu taagumanseede ti lannayabalolu pen. Bari kilaya nte taagumanseede ti lannayabaxo lelu pen. ²³ Awa, nin Ala la jama bee kamarita batulo xanma tumo men, moxolu bee xa ke a ma xa xan xotelu fo, nin lamelibaxa gansanqo dolu walla lannayabalo dolu dunta alu xan je, i me a fo ba xo alu kunqolu bota i no to? ²⁴ Bari nin lamelibaxa gansanqo walla lannayabalo dunta alu xan, x'a tara alu bee be kilaya ma x'a ke, a xa men bee me, wo si ke sabaabu ti, a xa lo a la junubo la. A xa men bee me, wo si a jalagi. ²⁵ A miiriya men tunnu be dugunin, wolu si bo keno xan. Wo tumo la, a si i boyi x'a pada buti dugo ma, xa Ala batu x'a fo xo: «Tonqa la, Ala be alu la jama xono.» ²⁶ Awa, n badinqolu, alu xa xan xa men ke wo fele xo: Nin alu kamarita, alu do si sin no xa tantuli donkilo do la, do xote si xaranqo do di no, do xote si Ala la ku yitanninqo do na fo no. Nin Ala xa xan xote bula do xono, wo xa wo fo; nin do xote si wo xanqo xoto fo no, wo x'a

fo. Bari wo bee xa xan xa ke le walasa do xa kafu Ala la jama barako ma. ²⁷ Nin xumo be kela xan xotelu to, wo xana tanbi moxo fula walla saba xan. Wolu xa xuma kilin kilin, anin moxo do xa soto du, men si i xoto fo. ²⁸ Nin moxo man soto xa i xoto fo, wo tumo la, moxo xana xan xote fo jama xono, a x'a fo í xonoto Ala kilin nen. ²⁹ Moxo fula walla saba doron xa kilaya ke, tolu xa wo xumolu segesege. ³⁰ Bari nin Ala xa ku do yita moxo sigininjo do la je, xumo tun be folo men da, wo xa xan x'é lo, walasa do in xa xuma. ³¹ Alu bee si sin no xa la i noxo da la, xa kilaya ke, walasa bee xa xaran anin bee xa jusudun. ³² Mennu be wo kilayalu kela, sinjo be wolu nen i la solifenjolu xan. ³³ Bawo Ala nte Ala ti, men be ku paxamininjo fe, bari heero Ala le mu. Awa, a be í xo a be kela senumanjolu la jamalu bee xono na men, ³⁴ musolu x'e de jamalu to. I man yanmaru xa xuma. I xa xan xa xulu í xo Ala la sariya du x'a fo na men. ³⁵ Nin i b'a fe xa kunnafirinjo do njinin, i xa i xelu njinxu luwo ma; bawo a nte bennin muso xa xuma Ala la jama to. ³⁶ A be alu nen ne ba xo Ala la xumo bota ate lelu bata? Walla xo a sita atelu doron nelu ma? ³⁷ Nin do b'a miirila xo a mu kila ti, walla xo Ni Senunjo b'a namutanin, wo tigo xa xan x'a lon xo nte xa men safe x'a ki alu ma, wo mu Marigi la xuma foninjo le ti. ³⁸ Bari nin moxo do man wo lon, wo xoto xo Ala man wo tigo lon. ³⁹ Awa, n badinjo, alu kilaya njinin bete. Nin do be xan xotelu fola, alu xana wo bali xa wo ke. ⁴⁰ Bari kuwo bee xa ke na puma ma, xalo xa ke i la.

15 N badinjo, n be alu hakilo lajigila xibaru Dimanjo la, n tun xa men fo alu nen, alu xa men muta, alu be sinsinnin men xan. ² Wo xumo si alu kisi, nin alu tuta a mutanin í xo n x'a fo alu nen na men. Nin wo nte, alu la lannaya keta fuwo ti. ³ Nte fan xa xaranjo men soto, n folota xa wo lasi alu ma. Wo xaranjo fele xo: Kirisita sata n na junubolu xanma, í xo Kitaabo x'a fo na men. ⁴ A lasita, a sa tili sabo, a kunita xa bo furelu to, í xo Kitaabo x'a fo na men. ⁵ A x'é yita Piyere la, wo xo, a x'é yita a la kiladin tan nin fulo la. ⁶ Wo xo, a x'é yita badin lannayabaxo dolu la pakun kilin, wolu xa sa keme luulu moxo ti. Wolu kiika be i nila haalibi, bari dolu sata. ⁷ Wo xo, a x'é yita Yaxuba la, wo xo, kiladinjo bee la. ⁸ Wolu bee xo, a x'é yita nte la, nte men keta í xo dinjo men man si. ⁹ Bawo nte mu kiladinjo bee to doxomandinjo le ti. Nte fan man xan xa kili xo kiladinjo; bawo n xa Ala la jama tooro. ¹⁰ Bari Ala la neemo xanma, n mu men ti, n mu wo ti. A xa neemo men di n ma, wo man ke fu ti, bawo n xa baaro ke xa tanbi kiladin tolu xan. Nte fan man wo ke; bari Ala la neemo men be n xan, wo le x'a ke. ¹¹ Wo to, a keta nte ti wo, a keta itelu ti wo, n be men waajulo kela wo le fele, alu lata men na, wo le fele. ¹² Awa, nin n be waajulo kexan xo Kirisita kunita xa bo furelu to, wo to, alu dolu si a fo na di xo furelu nte kunila? ¹³ Nin furelu nte kunila, Kirisita du man kuni. ¹⁴ Nin Kirisita

man kuni, n na waajulo mu fuwo le ti; alu la lannaya du mu fuwo le ti. ¹⁵ Xa tanbi wo bee xan, n mu seede fano lelu ti Ala la kuwo to, bawo n x'a seede xo a xa Kirisita lakuni xa bo furelu to. Nin furelu nte kunila, Ala man a lakuni. ¹⁶ Bawo nin furelu nte kunila, Kirisita du man kuni. ¹⁷ Nin Kirisita man kuni, alu la lannaya mu fuwo le ti. Alu be alu la junubolu xono haalisa. ¹⁸ Wo to, men dulu sata x'e tu Kirisita la kafupoxoya xono, wolu halagita. ¹⁹ Nin n gigo be Kirisita xan nin duniya in doron ne xono, n poxonnu mapumatomoxo nte hadamadinjo bee to. ²⁰ Bari tonja la, Kirisita kunita le xa bo furelu to; a keta furelu la kunin folo ti. ²¹ Saya nata duniya xono moxo kilin sabaabuya la na men, wo na ma, furekuniyo du nata moxo kilin ne sabaabuya la. ²² Moxolu bee be sala Adama bonsonja koso na men, i bee si kuni i nin Kirisita la kafupoxoya koso ten. ²³ Bari bee nin a la waxato le mu. Kirisita le mu folo ti; wo xo, mennu mu Kirisita talu ti, wo dulu si kuni a na lunjo. ²⁴ Wo tanbo xo, duniya labanjo si na. Kirisita si kuntigiya bee nin fango bee nin sintigiya bee ban; wo xo, a si mansaya saagi Fa Ala ma. ²⁵ Bawo waajibo le mu Kirisita xa sigi mansaya la fo a x'a jaxolu bee xulu x'e ke a sinxotofenjo ti. ²⁶ Jaxu labanjo men be silatunula, wo mu saya le ti. ²⁷ Bawo a xa fenjo bee xulu x'e bula a sinjo xoto. Bari nin a xo: "Fenjo bee" xuluta a nen, sikka nte a to, men xa fen bee xulu a nen, wo sin nte a to. ²⁸ Nin fen bee xuluta a nen tumo men, wo tumo la, Ala Dinxe du fan si xulu Ala nen, wo men xa fen bee xulu a nen; walasa Ala xa ke fen bee ti, bee xono. ²⁹ Awa, mennu be batisela furelu nen, wolu si na mun ke? Nin a x'a tara xo furelu nte kunila, mun na moxolu be batisela wolu nen? ³⁰ Alan ntelu fan dunnu? Mun na n be faaratula n niyo la waxato bee? ³¹ N badinjo, nte be n fan dila saya ma lun wo lun. Tonja le mu, tonja le mu fo nte be kunnawulinin alu la, n Marigi Isa Kirisita la kafupoxoya xono. ³² Nte xa jaxo mennu kele Efesi gallo to í xo warolu, nin a x'a tara nte xa wo ke hadamadinja kuwo lelu xanma, wo si mun dun nte la? Nin furelu nte kunila, «alan xa domolo ke x'e min, bawo sinin n si sa.» ³³ Alu xana alu fannu bula filo xono. «Kafupoxoxo si lanbe tija.» ³⁴ Alu hakili soto í xo a xa bete na men, xa junubo dabula; bawo dolu be alu to, wolu man Ala lon. Nte be wo fola, x'alu malo yita. ³⁵ Bari do si njinxalo ke xo furelu be kunila na di? I nin bala sifa joman si kuni? ³⁶ Hakilintanjo! Nin í xa fen do lan, a me falin nin a man sa folo. ³⁷ I be siyo men lanna, wo mu kese gansanjo doron ne ti, nokeso walla kese sifa xote, bari a si falin xa ke juwo men ti, wo juwo nin wo keso nte kilin ti. ³⁸ Wo xo, balo men xa di Ala nen, a be wo le dila a ma. Balo men si ben keso bee kilin kilin ma, a be wo le dila a ma. ³⁹ Nila-mafenjo bee balasubo nte sifa kilin ti. Moxolu ta nin subolu ta nte kilin ti. Xonolu ta mu sifa do ti, negolu ta mu sifa xote ti. ⁴⁰ Sanxulo balolu be je, duguxulu du

balolu be je. Sanxulo balolu nooro nin duguxulo talu nooro nte kilin ti. ⁴¹ Tilo nooro be le je, xaro du ta be je, loolo dulu ta be je. Haali loololu bee nooro nte kilin ti. ⁴² Furekuniyo du si ke ten; a tolita si lasi, a tolibalo si kuni. ⁴³ A kejaxuma si lasi, a nooroma si kuni. A barakentango si lasi, a barakema si kuni. ⁴⁴ A subuma si lasi, a nima si kuni. Nin bala subuma be je, bala nima du be je. ⁴⁵ Wo le x'a tu, Kitaabo x'a fo xo: «Moxo folo, Adama, keta dafen nilama ti.» Bari Adama labanjo, wo keta niyo ti, men be nilamaya dila. ⁴⁶ Men nima mu, wo man folo; bari subuma le x'é folo. Men nima mu, wo nata xofe le. ⁴⁷ Moxo folo mu banxuma le ti, a bota duguxulo le to. Moxo fulanango ken bota sanjo le to. ⁴⁸ Moxo men bota duguxulo banxo to, wo be ja men, banxuxanta dulu be ten. Moxo men bota sanjo to be ja men, santota dulu be ten. ⁴⁹ N keta moxo banxuma joxonjo ti ja men, n si ke moxo men bota sanjo to du joxonjo ti. ⁵⁰ N badinjo, n b'a fe xa men fo, wo fele xo: Hadamadinjo nin a subo nin a jelo me nidula soto no Ala la Mansaya xono, anin, xo fen tolita me tolibaliya soto no. ⁵¹ N be nala gullo do fola alu jen: N bee nte sala, bari n bee si yeleva ⁵² jakun kilin, ja taxun nin ja yelo, nin buutu labanjo fota tumo men. Buutuwo si fo, furelu si kuni xa ke tolibalo ti; alan bee si yeleva. ⁵³ Waajibole mu jin bala tolita in xa yeleva xa ke tolibalo ti, anin jin bala sata in xa yeleva xa ke sabalo ti. ⁵⁴ Nin jin bala tolita in yeleva xa ke tolibalo ti, anin nin jin bala sata in yeleva xa ke sabalo ti, wo tumo, jin xuma in men safeta Kitaabo xono, si dafa xo: «Sinjo sotota saya xan, x'a sanko pewu!» ⁵⁵ «Saya, í la sinjo be minto? Saya, í la bepo be minto?» ⁵⁶ Saya la bepo mu junubo le ti; junubo barako mu Ala la sariya le ti. ⁵⁷ Bari barako xa bula Ala jen, ate men be sinjo dila n ma, n Marigi Isa Kirisita barako to! ⁵⁸ Wo ja ma, nte badin xanuninjo, alu sinsin lannaya to, xa ke boyibalolu ti. Alu taxa jafe tumo bee Marigi la baaro to; x'a lon xo alu la baaro nte fu ti alu nin Marigi la kafujoxoya xono.

16 Nilifinjo men xa xan xa lakamari, x'a ke Ala la moxo senumanjo deemalilango ti, nte xa men fo Ala la jamalu jen Galasi maro xono wo kuwo to, alu dulu x'a ke wo ja ma. ² Alahadi wo alahadi, alu bee xa xaliso do bula í danna alu bata, men sinjo be alu

jen, x'a la bee la sotota xan. Alu wo ke, walasa nte la na xana laxono nilifinjo mutalo la. ³ Nin nte nata tumo men, alu xa moxo mennu sugandi, nte si safelu ke x'e di wolu ma, xa i nin alu la nilifinjo bula xa taxa Yerusaleme. ⁴ Nin a xa nte fan taxakun bo, wo moxolu si la nte xan xa taxa. ⁵ Nte si na alu bata xa tanbi Maseduwane jamano fe; bawo nte xa xan xa Maseduwane tokutun. ⁶ A do to, nte si waxato do ke alu bata, walla xa neno waxato bee ke alu bata, walasa alu xa nte deema n xa taxa ja n na taxamo la. ⁷ N nte a fe jin to x'alu je doron xa tanbi. N hakilo b'a ma xa waxati ke alu bata nin Marigi sonta. ⁸ Bari wo bee nin a ta, nte si tu Efesi fo Pantekoti sallo xa si. ⁹ Bawo Ala xa daba yele nte la baaro xanma non, haali x'a tara jaxolu xa sa je. ¹⁰ Nin Timote nata, alu a mutakubete, walasa a xana sila ku ja alu bata. Katugala a du be Marigi la baaro kela í xo nte fan. ¹¹ Moxo si xana a doxoya. Alu x'a deema a xa taxa ja a la taxamo la, heero to, walasa a xa na nte bata. Nte b'a nin badinjo laxononin. ¹² Men mu n badinje Apolosi ti, nte x'a matara ja bee ma xo a nin badinjo xa na bo alu ma. Bari a man diya a jen folo xa taxa. Bari nin a xa waxati bete soto, a si taxa. ¹³ Alu tu i jala, xa tu sinsin lannaya to. Alu i timinadiya, x'alu barako bunja. ¹⁴ Alu kuwo bee ke xanuya to. ¹⁵ N badinjo, alu xa Sitefanasi nin a la lumamoxolu lon. Alu xa don du lon xo i lelu fololu xa lannaya ke Akayi jamano xan. I x'e fannu di Ala la moxolu deemalo xanma. Nte be alu tarala, ¹⁶ x'alu xa xulu wo joxon moxolu jen, anin mennu bee be i deemala baaro la. ¹⁷ Sitefanasi nin Forotunatusi nin Akayikusi la na diyata nte jen bete. Fenjo men tun dasata nte la, x'a tara alu nte jan, wolu xa nte deema wo la. ¹⁸ I xa nte juso sumaya, x'alu dulu juso sumaya. Alu xa wo joxon moxolu walejumalon. ¹⁹ Ala la jama mennu be Asi maro xono be alu xontonna. Akilasi nin Pirisiye be alu xontonbetela Marigi la kafujoxoya xono, anin Ala la jama men be kamarila i la luwo ma. ²⁰ Badinjo bee be alu xontonna. Alu i joxo xonton baatayalixontonna senunjo la. ²¹ Nte Poli fan bulo le xa jin xontonna in safe. ²² Nin moxo do nte Marigi xanula, wo tigi xa danga! Maranata, wo xoto xo: N Marigi, na! ²³ Marigi Isa la neemo xa ke alu fe. ²⁴ Nte be alu bee xanula Isa Kirisita la kafujoxoya xono.

2 KORENTENGOLU

1 Nte Poli, men mu Isa Kirisita la kiladinño ti x'a la Ala sago xan, anin n badinxe Timote le be jin safe in kela, x'a ki Ala la jama ma Korente anin senu-manjolu bee ma, mennu be Akayi jamano bee xono. ² N Fa Ala anin n Marigi Isa Kirisita xa neemo nin heero di alu ma. ³ Tanto be n Marigi Isa Kirisita Fa Ala jen, Fa hinnatigo anin hakililasigo bee tigi Ala. ⁴ A be n hakilo lasigila n na toorokuwolu bee to, walasa mennu be tooroku sifa bee jela, n xa sin xa wolu hakilo lasigi, n fannu la hakililasigi sotoninño fe, ate Ala xa men di n ma. ⁵ N be Kirisita la tooro joxon kiika sotola ja men, wo ja kilinño ma, n be hakililasigiba du sotola Kirisita la. ⁶ Nin n be tooro xono, a kunño mu le walasa alu xa hakililasigo nin kisilo soto. Nin n be hakililasigo xono, a kunño mu le walasa alu xa hakililasigo soto, men si a tu alu si sin no xa ntelu la tooro sotoninjolu joxonnu muja. ⁷ Gigi xoyo le be n na alu la kuwo to, bawo n x'a lon xo n nin alu be xaapannin n na toorokuwolu to ja men, wo ja ma, n nin alu si xaapan n na hakililasigo du to ten. ⁸ N badinjolu, n xa tooro mennu soto xa n tu Asi maro xono, n nte a fe alu xa tu wolu lonbaliya to: Wo toorolu dono xuliyata n ma bete fo xa tanbi n barako danjo xan. N fan tunnu yili nte a ma tugun xo n si tu balunin. ⁹ A keta n fannu jen xo n na saya lategeta. Wo ja ma, n gigo me la no n fannu xan, fo Ala doron xan, ate men be furelu lakunila. ¹⁰ Ate le xa n bo wo joxon saya bulu. Ate le du be n bola a bulu tugun. N xa n gigo ke ate le ti, a si n bo wo joxon bulu tugun. ¹¹ Alu dulu si n deema alu la Alamataralu la ntelu jen, walasa Ala xa neemo men di n ma moxo kiika la Alamatarala koso, wo x'a tu moxo kiika xa barako la Ala jen ntelu koso. ¹² N si sin xa n fannu bunja kuwo men to, wo mu jin ne ti xo: N jusukunño mu n seedo ti xo n bosilo keta ja men duniya to, sakuta a keta ja men atelu ma, wo keta majigo nin xoyiya to, mennu bota Ala la. N man wo ke hadamadinño la hakilitigiya barako la, bari Ala la neemo barako la. ¹³ Alu be men xaranna x'a faamu, n nte fusi xote safela nin wo nte. Nte yilo b'a ma du xo alu si wo faamu bete, ¹⁴ i xo alu b'a faamula dondin saasa, xo Marigi Isa nalunño, ntelu si ke alu fanbunja kunjo ti, i xo alu si ke ntelu ta ti ja men. ¹⁵ Wo gigo xono, nte tun b'a fe xa na alu bata folo, walasa alu xa neemo soto i xo sinja fula. ¹⁶ Nte tun b'a fe xa bo alu bata la, wo xo xa tanbi xa taxa Maseduwane, anin x'alu je n koppato. Wo to, alu tunnu si n

deema xa taxa Yude. ¹⁷ Nte xa jin ku in natege tumo men, nte tun nte n soobe la ba? Walla nte la ku bululaninjolu mu hadamadinño fan na ku bululaninjo lelu ti ba, fo «iyo» nin «ayi» si ke nte xono i joxo la? ¹⁸ Ala mu xantigo le ti, n xa xumo men fo alu jen, wo tun nte «iyo» anin «ayi» ti i joxo la. ¹⁹ Bawo Ala Dinxe Isa Kirisita, nte nin Silifen anin Timote xa men na kuwo waajulo ke alu bata, wo man ke «iyo» nin «ayi» ti, bari a keta «iyo» le ti. ²⁰ Bawo Ala la lahidolu bee keta «iyo» ti ate le fe. Ate Isa Kirisita le du barako to, nin n be «amiini» fola xa Ala tantu. ²¹ Men be ntelu nin atelu barako bunjala Isa Kirisita la kafujoxoya to, xa n bula i dan na a fan jen, wo mu Ala le ti. ²² A x'a la taagumanseedo ke n na, xa Ni Senunño lasigi n jusukunño la folo, men b'a yitala n na xo n si Ala la fen puma to dulu soto. ²³ Ala mu nte seedo ti, a xa n faxa nin n be faniya le fola: Alu la hinno le x'a tu nte man n koppa Korente ma tugun. ²⁴ Wo xoto nte xo n mu alu kuntigolu ti lannaya kuwo to, bawo alu la lannaya sinsinningo le mu, bari n nin alu be baaro kela i joxo fe, walasa alu xa jaxali.

2 Wo le x'a tu, nte x'a latege xo n nte n koppala alu bata, walasa n xana taxa alu nitokuwa tugun.

² Bawo nin nte x'alu nitokuwa, jon si nte nitodiya tugun? Atelu nte ba, n xa atelu mennu nitokuwa? ³ Nte la safe kekunño tun mu le, walasa nin n sita alu bata, nte xana nitokuwa soto moxolu koso, men tunnu xa xan xa nte nitodiya. Men mu alu la kuwo ti, a be xoyiyanin nte ma xo nte la nitodiya mu alu bee du ta le ti. ⁴ Nte juso paxamininba nin nte nitokuwaninño nin nte paji kiika boto le xa wo safe ke x'a ki alu ma. Nte man wo ke x'alu nitokuwa, bari nte xa wo ke le, walasa nte be alu xanunin bete ja men, alu xa wo lon. ⁵ Nin moxo do xa nitokuwa kuwo ke, wo tigi man nte nitokuwa, bari ja do ma, x'a tara n man danmatanbi, a x'alu bee le nitokuwa. ⁶ Alu kiika xa jalago men naboyi wo xe xan, wo waseta. ⁷ Wo le x'a tu, saasa alu xanta le xa yaafa a ma, x'a hakilo lasigi, walasa a xana nitokuwa jaxu, fo x'a gigo xati. ⁸ Anin, n b'a njinna alu fe, xo alu xa xanuya yita a la. ⁹ Nte la safe kikunño du tun mu le x'alu xotobo, walasa x'a lon nin alu be tobennin xa xulu kuwo bee to. ¹⁰ Alu je yaafa moxo men ma, nte si yaafa wo ma. Nin nte yaafata kuwo do to, men xa nte yaafakun bo, nte yaafata alelu koso, Kirisita ja xoto; ¹¹ walasa Sentane xana sinjo soto n xan. Bawo n x'a njanneyalu lon. ¹² Awa, nte sita Torowasi gallo xono tumo men, xa

Kirisita la xibaru Dimanŋo waajulo ke, nte x'a je xo Marigi tun xa daba yele nte ŋen wo xanma. ¹³ Bari nte hakilo tun nte siginin, bawo n man n badinxe Tite je. Wo le x'a tu, nte xa n sara i la xa bo je, xa taxa Maseduwane jamano xan. ¹⁴ Tanto be Ala ŋen, ate men be n nin a la sinsoto jama lataxala i poxo fe tuma bee, Kirisita barako to. A b'a kela ntelu fe Kirisita xa lon dula bee, i xo latikolonŋo men xaso be jenjena a bee to. ¹⁵ N mu Kirisita sumadimanŋo le ti Ala bulu, moxo kisininŋolu to, anin halagibaxatolu to. ¹⁶ Dolu bulu, wo mu saya sumo le ti, men be saya lasila i ma. Do xotelu bulu, wo mu nilamaya sumo le ti, men be nilamaya lasila i ma. Jon be je nin a nin wo poxon baaro xa xan? ¹⁷ Ntelu nte i xo moxo kiika xotelu, mennu be Ala la xumo kela jaagukunŋo ti. Bari x'a la a xan xo Ala le xa n ki, n be xumala tonŋa la a ŋa xoto, xa n tu Kirisita la kafupoxoya xono.

3 N s'a damuta tugun ba xa n fannu toxoŋuma fo? Walla n maakuwo b'a la ba, i xo dolu b'a kela ŋa men xa safelu ki alu ma xa n fannu toxoŋuma fo, walla xa wo poxon safelu soto xa bo alu la? ² Atelu fan nelu mu n na safe ti, men safeninŋo be n jusukunŋolu la, moxo bee xa men lon x'a xaran. ³ Sikka nt'a to, alu mu Kirisita la safe le ti, men baaro xarifata ntelu ma. A safeninŋo nte lankaro la, bari Ala nilama Niyo la. A safeninŋo nte kuru walahalu xan, bari walaha subumalu xan, alu jusukunŋolu xan. ⁴ N xa wo lannaya le soto Kirisita barako to, Ala ŋa xoto. ⁵ N me a fo no xo n si wo poxon baara ke n fannu barako la, n na sinŋo be bola Ala le to. ⁶ Ate le xa sinŋo di n ma xa ke Kafuxan Kuto baarakelalu ti, men nte sariya safe ta ti, bari Ni Senunŋo ta. Bawo sariya safe be nala saya le tila, bari Ni Senunŋo be nilamaya le dila. ⁷ Awa, sariya men mu saya sabaabo ti, fo a xumolu safeta kuru walaholu xan, wo xa nooro soto fo Banisirayila dinŋolu tunnu me kila Musa pada mafele no wo nooro koso. Haali wo, wo nooro tun nte tuxan wo pada to. ⁸ Ni Senunŋo la baaro be nooro men sabaabula, wo me bunŋabete ba xa tanbi wo xan? ⁹ Fenŋo men si halagilo sabaabu, nooro keta wo la baaro la; fenŋo men be tilininŋa dila, nooro me ke wo la baaro la bete ba xa tanbi wo fen folo ta xan? ¹⁰ Nooro tun be men xan, nooro nte wo xan tugun, ŋin nooro maŋoxonjebali kuta in ŋa xoto. ¹¹ Nin nooro keta fen tanbita la, fenŋo men be tula, wo nooro si bunŋa bete xa tanbi wo folo ta xan. ¹² Xa wo poxon gigi tu n na, yilanyilan si nte n na. ¹³ N nte a kela i xo Musa, wo men tun be faano buurila a pada la, walasa Banisirayila dinŋolu xana a la nooro banta labanto je. ¹⁴ Bari i hakilibunda taxunta. Haalibi, nin i be Kafuxan Xoto kitaabolu xaranna, wo faanu kilinŋo be buurinin i hakilo ma. A man bo je bawo a be bola je Kirisita kafupoxoya le fe. ¹⁵ Haalibi, nin i be Musa la kitaabolu xaranna tuma wo tuma, faano do be buurinin i hakilo ma. ¹⁶ Bari xa tuubi Marigi ŋen, wo doron ne si

faanu in bo je. ¹⁷ Bawo Marigi mu Niyo le ti. Marigi Niyo be dula men, hooroya be non. ¹⁸ Ntelu mennu bee pada laxulunŋo mu, Marigi nooro be i yitala n xan, a b'e xo i xa fenŋo do mafele duŋare to. Wo ŋa ma, n be yelemala xa ke i xo Marigi. N be bola nooro do to, xa dun do xote to, men xa bun, Marigi men mu Niyo ti barako to.

4 Ala x'e tu a la numaya xono xa wo baaro xarifa n ma, wo le x'a tu, n nte segela. ² N x'e ban dibilakuwolu nin maluyakuwolu to, n nte i taxamala kewuya la. N nte Ala la xumo mayelemala, bari n be tonŋa le yitala nin moxolu bee si la n na, Ala ŋa xoto. ³ Wo bee nin a ta, nin n na xibaru Dimanŋo be dibinin, a be dibinin halagibaxato lelu ŋen. ⁴ A be dibinin lannayabalo lelu ŋen, bawo ŋin duniya in ala xa wolu hakilo fiyoŋa, walasa Xibaru Dimanŋo men be Kirisita la nooro yitala, i xana wo keneya je, ate Kirisita men mu Ala mununŋo ti. ⁵ N na waajulo nte n fannu xan, bari a be Isa Kirisita, n Marigi le xan. Men mu ntelu la kuwo ti, n b'a fola xo n mu alu la jonŋo lelu ti Isa koso. ⁶ Bawo Ala men x'a fo xo: "Keneya xa mana dibo to," ate fan ne xa keneya lamana n jusukunŋolu la, walasa n x'a la nooro keneya lon, wo men be nelenxula Kirisita pada to. ⁷ Bari wo naafulo be n kun banxudaxolu xono, walasa a xa xoyiya xo ŋin sintigiya maŋoxonjebali in be bola Ala le la, a nte bola ntelu la. ⁸ N xa tooro sifa bee je, bari n man xonotofili. N hanmeta, bari n gigo man xati. ⁹ A lota n nofe xa n tooro, bari Ala man n kilinnu bula. N buwota xa n naboyi dugo ma, bari n man halagi. ¹⁰ N be Isa la saya yitala n balo to tuma bee, walasa Isa la nilamaya du xa yita n balo to. ¹¹ N na nilamaya xono, saya be n nofe tuma bee Isa koso, walasa Isa la nilamaya du x'e yita n bala satalu to. ¹² Wo ŋa ma, saya be baaro la ntelu to, bari nilamaya be baaro la atelu to. ¹³ Kitaabo b'a fola xo: «Nte xa lannaya ke, wo le x'a tu, nte xumata.» N dulu xa lannaya ke, wo le x'a tu, n be xumala. ¹⁴ N x'a lon xo men xa Marigi Isa lakuni xa bo furelu to, wo si ntelu dulu nin Isa lakuni i poxo fe, anin xa ntelu nin atelu bula a senbo to. ¹⁵ N be kuwo fen wo fen jela, alelu ŋen mu, walasa Ala la neemo xa si moxo kiika ma xa taxa a fe, men si ke sabaabu ti tantuli kiika xa ke, xa nooro la Ala xan. ¹⁶ Wo le x'a tu, n nte segela. Haali nin n balo be tiŋala dondin dondin, n niyo be tokutayaxan ne lun wo lun. ¹⁷ Bawo n be tooro mennu sotola ŋin waxati in, wolu be nooro maŋoxonjebalo nin nooro banbalo men tobenna ntelu ŋen, wo toorolu xa fe wo nooro sinna. ¹⁸ N na nte fen jetalu to, n na be fen jebalo lelu to. Fen jetalu tanbito le mu, bari fen jebalolu be tula fo abada.

5 N x'a lon xo balo men be n ma ŋin duguxulu in xan, wo be le i xo nafa. Nin wo tiŋata, bunŋo do be n kun, men mu Ala buluno ti. Wo mu sigidula tiŋabalo le ti, sanŋo to, moxo bulu man men lo. ² Saasa, n be nuntanna, bawo bunŋo men be n kun sanŋo to, a

loxoba be n na xa wo dun í xo faano, ³ walasa fen xa tara n ma, n balamaxulunjo xana tara. ⁴ Bawo ntelu mennu be wo njafa xono, n be njuntanna, í xo nin dono be n kun. A nte xo n b'a fe x'e mawura, bari n b'a fe xa faano do le dun do in xan, walasa men mu sata ti, wo xa laxunu nilamaya fe. ⁵ Ala fan ne xa n toben wo kuwolu xanma. A xa Ni Senunjo di n ma folo, men b'a yitala n na xo n si a la fen juma to dulu soto. ⁶ Wo le x'a tu, n be jijanin bete tuma bee. N x'a lon xo xa jin bala in tu n ma, n nin Marigi dula xa jan. ⁷ Bawo n be i taxamala lannaya le la, njajo la nte. ⁸ N be jijanin bete, a xa fisa n pen xa bo jin bala in xono, xa taxa sigi Marigi bata. ⁹ Wo le x'a tu, n tuta jin bala in xono wo, n bota a xono wo, n be men njininna, wo mu le n na kuwo xa diya a pen. ¹⁰ Bawo waajibole mu n bee xa lo Kirisita na xoto a xa kiito tege n xan. Wo to, bee kilin wo kilin nin men xa xan, bee si wo soto, x'a la í la puma walla í la jaxuman keninjo xan, í la nilamaya xono duguxulo xan. ¹¹ Marigi nasilanja mu men ti, n xa wo lon, wo xanma, n b'a njininna xa moxolu lafaamu. Ala xa n lon bete, anin n hakilo la xo alu dulu xa nte lon alu jusukunjo la. ¹² N nte n fannu toxojuma fola alu pen tugun, bari n b'a fe le alu xa kunnawuli ntelu koso. Wo to, alu si na soto xa jaabilo di moxolu ma, mennu be i fannu bunjala kenema kuwolu xanma x'a tara i jusukunjo la nte. ¹³ Nin n keta hakilintanjo ti, wo keta Ala le pen; bari nin n keta hakilima ti, alelu pen mu. ¹⁴ Kirisita la xanuya be n juso lafanin nin n be i miirila jin ma xo: Kilin sata bee pen, wo to xo bee sata. ¹⁵ A sata bee pen, walasa nilamalu xana nilamaya ke i fannu pen tugun, bari men sata xa kuni i pen, i xa nilamaya ke wo pen. ¹⁶ Wo le x'a tu, n man moxo si lon tugun x'a la hadamadinja kepa xan. Haali nin n tunnu xa Kirisita lon x'a la hadamadinja kepa xan, saasa n man a lon ten bitugun. ¹⁷ Wo to, nin moxo do be Kirisita la kafujoxoya xono, a mu dafen kuto le ti. Ku xotolu tanbita, a fele, kuwo bee keta kuto ti. ¹⁸ Wo bee be bola Ala le la, ate men xa n nin a fan naben Kirisita barakoto. A xa a nin duniya te labenjo baaro xarifa ntelu ma. ¹⁹ Bawo Kirisita fe, Ala tun be baaro la, walasa x'a fan nin hadamadinjolu laben, x'a tara a man i la junubolu jaate. A xa ntelu bula wo telabenno xumo fola. ²⁰ Kirisita le toxo la, nin n be lasigidinja la, anin ntelu fe, Ala fan ne be alu kilixan. Kirisita toxo la, n be alu matarala xo alu xa son alu nin Ala te xa ben. ²¹ Kirisita tun mu junubentanjo le ti, bari Ala x'a ke junubo ti ntelu pen, walasa ate kafujoxoya fe, n xa Ala la tilinninga soto.

6 X'a la n nin Ala la baarakejoxoya xan, n be alu matarala xo: Alu xa Ala la neemomen soto, alu xana a tu wo xa ke fuwo ti. ² Bawo Ala xo: «Nte x'e lame waxati juma, N x'e deema kisilo lunjo.» A fele, saasa le mu waxati juma ti. A fele, saasa le mu kisilo lunjo ti. ³ N nte a fe na si ma xa ke takkinnafenti moxo do pen, walasa fe si xana je n na baaro la. ⁴ Bari

n be kuwo bee kela le x'a yita xo n mu Ala la baaradinjolu ti. N be mujaba yitala toorokuwolu to, bonekuwolu to, anin xonotofilikuwolu to. ⁵ N buwota xa bula kaso la, jama lamurutita n xanma. N bulata baara xolenjolu la, xa tooro sinnoxobaliya nin xonxo bulu. ⁶ N b'a yitala du xo n mu Ala la baaradinjolu ti n na senuya fe, n na lonjo fe, n na mujo nin n na jumaya fe, Ni Senunjo la baaro fe, n na xanuya soobe fe, ⁷ n na tonja waajulo fe anin Ala la sintigiya fe, tilinninga kelekemiranjolu fe, n be kelo kela anin n be n fannu lakantala mennu la. ⁸ N si bunja, n si doxoya du. N toxojaxo si fo, n toxojuma du si fo. N be jaatenin faniyantelu ti, x'a tara n mu tonpatigo lelu ti. ⁹ N be mafelenin í xo moxo mennu nte lonnin, x'a tara n be lonnin bete. N be mafelenin í xo moxo satolu, x'a tara n be i nila. N be njangila, bari n nte faxala. ¹⁰ N juso be xasila, bari wo bee nin a ta, n be njaxalinin tuma bee. N mu fangantanjolu ti, bari n be moxo kiika kela fentigolu ti. N be í xo bulutoxulunjo, x'a tara tonja la, fenjo bee be n bulu. ¹¹ N badin Korentengolu, n xa tonja le fo alu pen. N xa n jusukunjo bee le dayele alu pen. ¹² Alu la kuwo man doxo ntelu ma n jusukunjo la. Alu fan nelu x'alu jusukunjolu dataxun ntelu pen. ¹³ Saasa, nte be xumala alu pen í xo n dinjolu: Nteli xa men ke alu pen, alu dulu xa wo pojoxon ke n pen. Alu i jusukunjo muume dayele n pen! ¹⁴ Alu nin lannayabalolu xana su kilin la i xanna. Tilinninga nin tilinbaliya si kafu no na di? Keneya nin dibo si kafu no na di? ¹⁵ Kirisita nin Sentane si ben no na di? Walla sila joman be lannayabaxo nin lannayabalo te? ¹⁶ Ben joman ne si sin no xa ke Alabatusuba nin bololu te? Bawo nte lelu mu Ala nilama la batusuba ti, í xo Ala fan x'a fo na men xo: «Nte si sigi i bata, n nin i si i taxama i pojoxo fe, nte si ke i la Ala ti, i si ke nte la siya ti.» ¹⁷ Wo le x'a tu, Marigi Ala xo: «Alu bo jin moxo innu to, x'e tala i ma, alu xana maxa fen noxonin si la. Nte si alu lamuta. ¹⁸ Nte si ke alu pen fa ti, alu si ke nte pen dinxelu nin dinmusolu ti, Sinjobeetigi Marigi xo ten.»

7 N badin xanuningjolu, x'a la a xan jin pojoxon lahidulu be n bulu, alan xa n fannu senuya balo nin niyo la noxokuwolu bee ma. Alan xa n na senuya dafa Alanasilanja xono. ² Alu i jusukunjo dayele n pen. N man moxo si toono. N man moxo si tjina. N man moxo si domo. ³ Nte nte wo fola xo n be alu jalagila. Bawo n x'a fo xa ban xo, alu xanuya be n na, nilamaya nin saya bee xono. ⁴ Nte be lanin alu la bete! Nte be sewonin bete alu la. Nte xa hakililasigiba soto, n be njananin bete n na toorokuwolu bee xono. ⁵ Tonja la, kabirin n sita Maseduwane jamano xan, n man lafiya si soto. N xa tooro sifa bee je. Kelo be n namininjo to, silanja be n xono. ⁶ Bari Ala men be hakililasigo dila jusuxasininjolu ma, wo xa n hakilo lasigi Tite la na fe. ⁷ A la na doron man wo ke, bari a xa hakililasigo men du soto alu la. A x'a fo n pen xo alu b'a fe xa nte je tu-

gun. Jusuxaso men be alu la, anin alu be jijanin nte nen na men, a xa wo dulu fo n nen. Wo le xa do kafu nte la pajo ma tugun. ⁸ Awa, haali nin nte xa safe men ki alu ma, wo x'alu nitokuwa, nte nte nimisinin wo la saasa. Nte tun nimisita wo la, n' x'a je tumo men xo wo safe tun x'alu nitokuwa waxati la. ⁹ Bari saasa, nte be papanin. Nte nte papanin xo n' x'alu nitokuwa de, bari nte be papanin bawo alu la nitokuwa x'a tu alu nimisita. Alu la nitokuwa keta Ala sago ti, wo to, ntelu man leebu si lasi alu ma. ¹⁰ Bawo nitokuwa men be bennin Ala sago ma, wo be nala nimiso le tila, men xo mu kisi-lo ti. Nimisi nte wo to. Bari duniya la nitokuwa be nala saya le tila. ¹¹ Saasa, alu a mafele alu la nitokuwa men keta Ala sago ma, wo falinta men na: A x'alu jusudun. Alu x'alu fannu lafaasa bete. Alu diminbeteta, alu silabeteta, a diyata alu nen bete xa nte je. Alu juso bee tun be wo kuwo to. Alu xa jalagilo ke wo kuwo to bete. Alu x'a yita na bee ma xo alu xa xoyi wo kuwo to. ¹² Nin i x'a je nte xa safe ki alu ma, men xa ku jaxo ke, wo koso nte, men du xa wo ku jaxo soto, wo koso nte. Bari a keta walasa x'a yita alu la Ala na xoto, alu be balannin ntelu nen na men. ¹³ Wo le xa n hakilo lasigi. N man hakililasigo doron soto, do kafuta n na pajo ma, n x'a je tumo men xo Tite tun be papanin alu bee la hakililasigo la. ¹⁴ Awa, nin nte xa n wasu dondin a pen alu la kuwo la, alu man nte kunjo lajimi. Bari n xa tonja fo alu nen na men tuma bee, wo na ma, n xa tantulo men la alu xan Tite nen, wo du keta tonja ti. ¹⁵ Do le kafuta a la xanuya ma alu nen, tuma wo tuma nin a hakilo jigita alu bee la xuluwo la, anin alu la kubbennina la, silanja nin jarajaro to. ¹⁶ Nte be papala bawo n' si sin no xa n' na lannaya la alu xan kuwo bee to.

8 N' badinjololu, Ala la neemo men dita Ala la jamalu ma Maseduwane jamano xan, n b'a fe alu xa wo lon. ² Je lannayabaxolu xotobota tooroku kiika fe; bari i la pajo tun xa bun na men, fo i xa i bulolu labula bete, haali x'a tara i tunnu la fangantanja xa bun. ³ Nte mu wo seedo ti xo i xa nilo ke i sinkuwo la. I fannu tanbita i sinkuwo la, i xa wo ke i fannu ma. ⁴ I x'e balan n ma xo n xa son i dulu xa sindun wo deema bolo to, men tun xa xan xa ki Yude senumanjolu ma. ⁵ I xa men ke, wo tanbita ntelu yilibenmata xan. I xa i fannu di Marigi ma folo, wo xo, ntelu ma, x'a la Ala sago xan. ⁶ Wo le x'a tu, n xa Tite matara xo a xa wo xanuya baaro men damuta alu bata, a xa wo dafa. ⁷ Awa, x'a la a xan fenjo bee be alu kun xa fuuma: Lannaya, xuma palonjo, lonjo, jijalija bee, anin alu xa xanuya men soto ntelu la. Wo xanma, n b'a fe alu xa wo xanuya baaro du ke xa fuuma. ⁸ N' nte pin fola alu nen i xo waajibi, bari nin n' xa tolu la jijalo fo alu nen, n' be na le dila alu ma alu si a yita na men xo alu la xanuya mu tonja le ti. ⁹ Bawo alu xa n Marigi Isa Kirisita la neemo lon: Ate men tun mu fentigo ti, a x'a fan ke fangan-tanjo ti atelu nen, walasa alu xa fentigiya a la fangan-

tanja fe. ¹⁰ Nte be n' hakililata dila alu ma pin ku in to: A xa pin alu xa taxa na wo la, serun ate mennu fololu xa ku ke anin wo doron nte, alelu dulu x'a latege xa ku ke. ¹¹ Wo to saasa, alu wo baaro dafa. Alu x'a latege pajo to xa wo baaro ke, wo na ma, alu a ke pajo to, x'a la alu sinkuwo xan. ¹² Nin njanneya xa pin soobeya la, men be n bulu, wo si muta. Men nte bulu, wo nte jaatela. ¹³ Wo xoto nte xo moxo tolu deemalo x'alu fannu maakuwo sa, bari bee la xaapanjo le be nofe. ¹⁴ Bi, alu be fuumanin men na, wo si ke xa itelu be dasanin men na dafa, walasa lun do, i je fuuma men na, wo xa ke xa atelu je dasa men na dafa. Wo si na xaapanjo ti, ¹⁵ i xo a be safenin Kitaabo to na men xo: «Men xa kiika ko, wo ta man fuuma, men xa dondin ko, wo ta man dasa.» ¹⁶ Barako xa bula Ala nen, wo men xa jijalo di Tite ma alu la kuwo to, i xo men noxon be ntelu la. ¹⁷ N xa men njin a fe, a sonta wo ma. A taxata na jijalo to, fo a fan x'a latege xa taxa alu bata. ¹⁸ N be a nin n badinxe kila, Ala la jamalu bee be men jagila a la baaro koso, xibaru Dimanjo kuwo to. ¹⁹ X'a kafu wo ma, Ala la jama lelu x'a sugandi x'a xa ke n dandanbaxo ti n na taxamo to, wo xanuya baaro la. N be wo baaro kela Marigi fan na bunja xanma, anin n na njanneya beto yito xanma. ²⁰ N be i korosila walasa maxumalidula si xana soto n ma pin xalisiba in nabaarapa to. ²¹ N b'a njinna xa puma ke Ala na xoto, wo doron nte, bari moxo dulu na xoto. ²² N janxa i nin n badinxe do ki, n x'ate men na jijalo xotobo tuma kiika anin ku kiika to. A be jijalo yitanin saasa xa tanbi folo xan, bawo a be lanin alu la bete. ²³ Tite mu n' taxamanoxo nin n' baarakepoxo le ti alu bata. N badinjololu mu Ala la jamalu la kiladinjo lelu ti, mennu be baaro kela Kirisita bunja xanma. ²⁴ Wo to, alu a yita i la xo alu b'e xanunin bete, walasa a xa henne Ala la jamalu ma, anin i x'a lon xo n boloxo le mu xa sewo alu la kuwo la.

9 Men mu senumanjolu deema kuwo ti, kun nte a la nte xa safe ki alu ma wo la. ² Nte xa alu njanneya puma lon. Nte xa n' na sewo yita alu la kuwo la Maseduwanengolu nen, x'a fo xo: «Akayi jamano badinjololu be tobennin xa deemalo ke kabirin serun.» Alu la jijalo xa i tala bee jusudun. ³ Wo bee nin a ta, nte be n badinjololu kila alu ma, walasa sewo men be nte la alu la kuwo to, wo kuwo xan, wo xana ke fuwo ti. Nte b'a fe alu xa tara tobennin i xo nte tun x'a fo na men. ⁴ Nin wo nte, nin nte nin Maseduwanengo dolu nata, x'a tara alu nte tobennin, n si malu, walla atelu si malu, bawo n lata alu la ten. ⁵ Wo to, nte x'a mafele xo a xa xan nte xa pin badin innu matara i xa taxa n' na alu bata, walasa alu fannu xa nilifenjo men lahido ta xa ban, i xa wo pabo. Wo to, nte si a tara a tobenta, anin wo si a yita xo alu be nilo kela njanneya puma la, alu nte a kela njanneya jaxu la. ⁶ Alu a lon xo: Men be dondin lanna, wo si dondin tege. Men be kiika lanna, wo si kiika tege. ⁷ Bee kilin kilin xa nilo ke i xo a x'a latege a

jusukunjo la ja men. A xana ke nitokuwa nin diyakuwa la, bawo men be nilo kela jajo to, wo le la kuwo xa di Ala jen. ⁸A sinjo be Ala jen xa neemo sifa kiika bee do ke alu jen, walasa alu maakupanfenjolu xa tara alu bulu tuma bee, anin kiika xa tu alu bulu kujumako bee xanma. ⁹Í xo a be safenin Kitaabo to ja men xo: «A x'a bulo labula, a xa fangantanjolu so, a la tilinninja be tula fo abada.» ¹⁰Ala men be lan-nifenjo dila senekela ma, xa domolifenjo di baluwo ti, wo si lannifenjo di alu dulu ma, x'a labugi, walasa alu la jumaya xa nafa kiika ke. ¹¹Alu si fentigiya ja bee ma, walasa alu xa sin tuma bee xa jumaya yita. Wo ja ma, moxo kiika si Ala tantu nilifenjolu koso, n be men-nu lasila i ma alu toxo la. ¹²Bawo alu be baaro men kela wo nilifenjolu ti, wo nte danna Ala la moxo senu-manjolu maakuwo pijalo doron ma, bari wo s'a tu barakelalo kiika xa ke Ala jen. ¹³Wo baaro nafa s'a tu kiika xa Ala tantu alu la xululo xanma. Anin, a si alu la xantigiya yita Kirisita la xibaru Dimanjo jen. I s'a tantu du alu la jumaya koso, bawo alu nin itelu nin tolu bee kafuta alu bulufenjolu to. ¹⁴Ala xa neema mapox-onjebalo men ke alu jen, wo s'a tu, i xa Ala matara alu jen, xa i la xanuya yita alu la. ¹⁵Barako xa bula Ala jen a la nilifen mapoxonjebalo xanma.

10 Nte Poli fan be a njinna alu fe, Kirisita la sabaro nin a la jumaya fe, nte men be majiginin bete nin n be alu bata, pada nin pada; bari nin n dula xa jan, n xa fati alu ja, ²nte be alu matarala xo: Alu xana nte diyakuwa xa fatiya nin n taxata alu bata. Bawo mennu b'a fola xo ntelu be kuwolu kela x'a ben hadamadinjo le ma, nte b'a fe xa fatiya le yita wolu la. ³Tonja le mu, n mu hadamadinjo lelu ti, bari n nte kelo kela hadamadinjo la ja ma. ⁴N be kelo kela kelekemiranjo mennu la, wolu man bo hadamadinjo la, bari wolu barako be bola Ala le la, mennu si kelekunben bunjolu tija. N be miiriyafuwolu tijala. ⁵Sintigiya fen wo fen b'a fan xototala, xa Ala lonniya kele, n be wolu bee tijala. N be miiriyalu bee mutala walasa i xa xulu Kirisita jen. ⁶N be tobennin xa xanbulalo bee jangi, nin alu la xanmutalo dafata tumo men. ⁷Alu fenjolu jaja mafele. Nin moxo do be lanin a la xo a mu Kirisita ta ti, a tigo x'e miiri jin ma tugun xo: Ntelu dulu mu Kirisita talu ti i xo wo tigo. ⁸Bawo Marigi xa sinjo men di n ma, haali nin nte xa n wasu wo xanma dondin, nte nte maluyala wo la. Wo sinjo dikunjo mu le x'alu la kafo lataxa ja, a man di a tija xanma. ⁹Nte nt'a fe x'a yita n na safelu to xo nte be alu lasilala. ¹⁰Bawo dolu be men fola, wo fele xo: «Poli la safelu xumolu xa xole anin i xa fati; bari nin a fan be n bata, barake nte a la, a xumaja nte fusi ti.» ¹¹Moxo men be xumala ten, wo xa xan jin lon xo: N mu men ti dulajanjo n na safelu la, nin n keta alu bata tumo men, n be kela wo le du ti n na kewalolu la. ¹²Bawo ntelu me fatiya x'e suman, walla x'e xaapan moxo dolu

ma, mennu be i fannu toxojuma fola, x'e fannu ke sumannilan ti, anin xaapanma fen ti. Hakilintanjo lelu mu. ¹³Nte kennu nte nala i wasula xa danmatanbi. Ntelu si wo ke x'a ben Ala la baaro dandula ma n jen, men xa n nasi fo alu bata. ¹⁴Ntelu nte tanbila n dandula xan, a tun si ke wo ti nin n tunnu man na alu bata. Bawo nte lelu fololu nata alu bata xa Kirisita xibaru Dimanjo di alu ma. ¹⁵Wo ja ma, n nte i wasula xa danmatanbi, xa moxo xotelu la baarakeninjo ke n ta ti. Bari n yilo b'a ma xo do si kafu alu la lannaya ma, anin xo n si sin no xa baara ke alu bata, men nafa xa bun, bari x'a tara n man tanbi dula xan, dula men fota n jen. ¹⁶N si sin no wo xo, xa Xibaru Dimanjo lasi mara xotelu la, mennu be siginin atelu jefen, x'a tara n man i wasu moxo xotelu la baarakeninjolu xanma i la dula. ¹⁷Men b'a fan bunjala, wo x'a fan bunja Marigi la kuwo xanma. ¹⁸A nte xo moxo men be a fan toxojuma fola xo wo le mu toxojumatigo ti, bari Marigi be men toxojuma fola, wo le mu toxojumatigo ti.

11 Nin alu tunnu si son xa nte la hakilintanja dondin mupa! Iyo, alu mupa n xoto! ²Nte be ki-iliyanin alu to, kiiliya men be bola Ala la. N x'alu mamuta xe kilin doron ne jen, nin wo mu Kirisita ti. N b'a fe x'alu lalo a ma i xo xarafa senumanjo. ³Bari, i xo sa xa Hawa lafili a la kewuya fe ja men, n be silanin xo alu hakilo xana taxa yeleva, x'alu la xantigiya soobe tija Kirisita jen. ⁴Bawo nte x'a je xo nin moxo do nata xa Isa xote la kuwo fo alu jen, men nin ntelu ta nte kilin ti, alu si son wo ma. Nin alu xa niyo do xote soto, men nin alu la sotoninjo nte kilin ti, walla xa xibaru Diman xote soto alu tunnu man men soto, alu si mupa bete wo xoto. ⁵N hakilo la xo alu be wo mennu jaatenin kiladinbalu ti, wolu man fisa nte ti fusi to. ⁶A si ke xo nte nte xumapalonnaba ti, bari lonjo ken silo la, a nte ten. Ntelu xa wo silo yita alu la, x'a xoyiya kuwo bee to, anin ja bee ma. ⁷Nte xa Ala la Xibaru Dimanjo fo alu jen tumo men, nte xa wo ke fu. Nte xa n fan majigi, walasa x'atelu xotota. Nte xa junube ke wo ti ba? ⁸Nte sonta Ala la jama do xotelu xa nte sara, xa balu wolu la, walasa nte xa baaro ke atelu jen. ⁹Xa nte tu alu bata, nte man den moxo si la, xa nte maakuwo tu fenjo dolu la, bawo n badinjo mennu nata xa bo Maseduwane, wolu xa nte maakupanfenjolu bee sanba n ma. Kuwo bee to, nte xa n fan kisi xa ke alu ma doni ti. Nte si taxa ja xa n fan kisi wo ma. ¹⁰Kirisita la tonja men be nte to, wo xanma, nte b'a fola xo: Sewokuwo men be nte bata, moxo si me wo bo no nte la Akayi maro bee xono. ¹¹Mun na? Xo nte nte alu xanula ba? Ala x'a lon xo nte be alu xanula! ¹²Nte be men kexan, nte si wo ke tugun, walasa mennu be sabaabu njinna x'e wasu xo i mu ntelu bonjoxonkunjolu ti, n x'e bali i xa wo soto. ¹³Wo moxolu mu kiladin fano lelu ti, anin nanbarantelu mennu be i fannu kela Kirisita la kiladinjolu ti. ¹⁴Wo nte dabariban ku ti, bawo Sentane fan

b'a fan kela keneya melekiyo ti. ¹⁵ Wo to, a nte ju ku ti nin a la baaradinjo dulu x'e fannu ke tilinninga la baaradinjolu ti. Bari i la ketalu nin labanpa men xa xan, i si wo soto. ¹⁶ Nte be saagila a ma xo: Moxo si xana nte jaate xo n mu hakilintanjo ti! Walla nin nte be jaatela wo ti, alu son a ma xo nte mu hakilintanjo ti, walasa nte du xa sin xa n fan bunpa dondin. ¹⁷ Nte be nala men fola, n nte wo fola x'a ben Marigi sago ma, bari a be i xo moxo men mu hakilintanjo ti muume, bawo n be lanin a la xo fanbunpakunjo be nte bulu. ¹⁸ Bari x'a la a xan moxo kiika be i fannu bunpala hadamadinpa kuwolu xanma, nte du be nala n fan bunpala. ¹⁹ Ate mennu b'alu fannu jaatenin hakilitigolu ti, alu be sonna xa hakilintanjo la kuwolu mupa. ²⁰ Alu be sonna xa don mupa alu xa muta i xo jonjolu, alu xa domo, alu xa bulutoxulunpa, waso xa ke alu la, alu xa te alu pa xan. ²¹ Nte be men fola, nte be maluyala wo la xo: N xa barakentanpa le yita! Moxolu si son xa men fo, n be xumala i xo moxo hakilintanjo, nte du si son xa wo fo. ²² I mu Heburolu lelu ti ba? Nte du mu wo le ti. I mu Banisirayilango lelu ti ba? Nte du mu wo le ti. I mu Burehima bonsonjo lelu ti ba? Nte du mu wo le ti. ²³ I mu Kirisita la baaradinjo lelu ti ba? Nte be nala xumala a be i xo moxo men mu hakilintanjo ti muume, nte mu wo ti xa tanbi wolu xan. Nte xa baaro ke xa tanbi wolu xan, nte bulata kaso la kiika ti xa tanbi wolu xan. Nte buwota bete xa tanbi wolu xan, xa sutiya saya la sinpa kiika ti. ²⁴ Sinpa luulu, Yahudiyalu xa busa dapa tan saba nin xononto ta nte to. ²⁵ Romengolu xa nte buwo guma la i xo sinpa saba. Sinpa kilin, moxolu xa nte bun kurolu la x'e be n faxala. Xulunjo futita nte ti sinpa saba xooxojiyo xan. Nte xa tili kilin nin su kilin ke xooxojiyo to. ²⁶ Nte la dugotaxa kiika to, nte xa ba faninjo nin boyinxannilalu masiibo lon, xa n badin Yahudiyalu anin siya tolu masiibo lon. N xa masiibo je gallubalu nin wulolu xono, xa masiibo je xooxojiyo xan, xa ke masiibo xono n badin fanolu to. ²⁷ Nte xa baara xolenjo ke, xa sege mupa. N sita n pala sinpa kiika ti. N xa xonxo nin mindoxo je. N xa diyakuwa sunjo ke kiika ti. N toorota neno nin feeto bulu. ²⁸ N da nte sila a to ma, n na lun wo lun dono be je, nin wo mu Ala la jamalu bee hanmo ti. ²⁹ Nin do barako xa doxo, nte du barako xa doxo wo fe; nin do x'e xodi lannaya la, wo si nte jani i xo ta. ³⁰ Nin nte xa xan xa n fan bunpa, n si n fan bunpa n na barakentanpa le xanma. ³¹ Tanto be Marigi Isa Fa Ala men pen fo abada, wo x'a lon xo nte nte faniya fola. ³² Xa nte tu Damasi gallo xono, mansaxe Aretasi la goferenero xa garadolu bula xa gallo dundalu korosi, walasa xa nte muta. ³³ Bari dolu xa nte bula sinso xono xa n nabo foloda fe, xa n najigi gallo laminintato xofe. Nte xa n fan soto a la wo pa in ne.

12 Awa, fo nte xa n fan bunpa le haali nin nafa nte wo la. Wo bee nin a ta, saasa nte be xumala

jelifenjolu nin yitalifenjolu xan, Marigi xa mennu ke nte pen. ² Nte xa Kirisita la moxo do lon, a san tan nin naano le fele, a tata xa taxa a ti fo sanfata sabanango xan. A tun b'a moxo sawuro le to ba? N man wo lon. A tun nte a moxo sawuro to ba? N man wo lon, bari Ala x'a lon. ³ Nte xa don lon xo wo xe tata xa taxa a ti fo arajanna. A tun b'a moxo sawuro le to ba? A tun nte a moxo sawuro to ba? N man wo lon, bari Ala x'a lon. Wo xe xa xumolu me non, mennu me fo no anin a nte dagenin moxo xa saagi mennu ma. ⁵ Nte si n fan bunpa wo xe la kuwo la, bari men mu n fan ken ti, n si n fan bunpa n na barakentanpa le xanma. ⁶ Nin n tun b'a fe xa n fan bunpa, n me ke moxo hakilintan ti, bawo n tun be nala tonpa le fola. Bari nte si n fan bunpa tu je, walasa moxolu be nte jela men kela, anin i be men mexan n na, i xana taxa nte jaate xa tanbi wo xan. ⁷ Wo bee nin a ta, walasa nte xana n fan bunpa wo yitalifen mapoxonjebalolu koso, dimin njaninma do bulanta nte balasubo to, wo keta Sentane la melekiyo do bulaninjo ti nte la, xa n tooro walasa nte xana n fan bunpa. ⁸ Nte xa Marigi matara wo kuwo la i xo sinpa saba xo a xa wo bo nte la. ⁹ Bari a xa n jaabi xo: «N na neemo waseta i pen; n na sintigiya be i yitabetela barakentanpa le to.» Wo le x'a tu, a xa di nte pen xa n fan bunpa n na barakentanpala la, walasa Kirisita la sintigiya xa ke nte xan. ¹⁰ Wo le x'a tu, n be papala barakentanpala nin nanilolu nin xoleyalu nin toorokuwolu nin xonotofilikuwolu la, n be mennu sotola Kirisita koso. Bawo nte barako xa doxo tumo men, n barako xa bun wo tumo le. ¹¹ Nte be xumala i xo hakilintanjo, bari alelu xa n diyakuwa xa n bula wo la. Ate le tunnu xa xan xa n nafaasa. Bawo haali nin nte nte fusi ti, alu la wo kiladinbalu nte nte pa, pa si le ma. ¹² Taagumanseedo mennu be nte la kiladinpa yitala, wolu keta alu bata mupa dafaninjo to: Taagumanseedolu nin kawakuwolu anin sintigiyakuwolu. ¹³ Awa, nte xa mun ke Ala la jama tolu pen nin nte man wo ke atelu pen? Fo pin ku kilin in de, xo nte man den alu la! Alu wo tilinbaliya yaafa nte pen. ¹⁴ A fele, nte be tobennin saasa xa n na taxakun sabanango ke alu bata; nte nte nala denna alu la; bawo nte nte alu bulufenjolu nofe, nte be alu fan nelu nofe. Dinjolu man xan xa naafulo kamari i wulubaxolu pen, bari wulubaxo lelu xa xan xa naafulo kamari i dinjolu pen. ¹⁵ A ken si diya nte pen xa n bulufenjolu bee di anin xa n fan di alu koso. Nin nte be alu xanula xa taxa a fe, wo si do bo alu la xanuya la nte pen ba? ¹⁶ Alu si son a ma xo nte man den alu la. Bari a si fo xo nte mu kewo le ti, xo n x'alu muta kewuya la. ¹⁷ Nte xa mennu ki xa taxa alu bata, nte x'alu domo wolu do la ba? ¹⁸ Nte xa Tite matara xo a xa taxa alu bata, n x'a nin n badinxe bula. Tite x'alu domo le ba? Nte nin ate la miiriya bee man ke kilin ti ba? N bee man a lo sila kilin fe ba? ¹⁹ Kabirin tuma jan, alu b'a miirila ba xo n be xumala xa boloxo di n fannu

ma alu ɲa xoto? Ayi de, bari n be xumala Ala le ɲa xoto, Kirisita la kafuɲoxoya to. N badin xanuningolu, wo bee kunɲo mu le nin alu si taxa ɲa lannaya to. ²⁰ Nte be silala xo nin nte sita alu bata, nte xana taxa alu tara ɲa ma, men nin nte diyanɲo nte kilin ti, anin alu xa nte tara ɲa ma, men nte alu diyanɲo ti. Nte be silala ɲi xana taxa a tara xo kelolu nin kiiliya be alu te, anin diminnalu nin fadinɲalu, nin nanilolu nin ɲoxomaxumolu nin fanbunɲa anin ku ɲaxamininɲolu. ²¹ Nte be silala xo nin nte taxata alu bata sinɲa xote, nte la Ala xana taxa nte majigi alu ɲa xoto, anin xo nte xana taxa xasi moxo kiika koso, mennu be taxala ɲa xa junubo ke, í xo i x'a ke xotonin ɲa men. I man son xa nimisi i la ku noxoninɲolu nin i la jadoyalalu nin i la ku kabanin keninɲolu la.

13 Nin be kela a sinɲa sabanannɲo le ti nte xa taxa alu bata. «Kuwo bee xa xan xa ɲabo x'a la moxo fula walla saba la seedeya xan.» ² ɲi be ɲin kankeri in lala, mennu xa junubo ke xa tanbi anin moxo tolu bee ɲen. Nte tun xa wo ke ɲi na nali fulanannɲo sinfe alu bata, bari ɲi be saagila a ma saasa x'a tu nte nte je: Nin nte taxata tugun, ɲi me tanbi fusi la. ³ Alu be taagumanseedo ɲininna, men s'a yita xo Kirisita be xumala nte fe, alu si wo soto. Kirisita nte barakentan ti alu bata, bari a be a la sintigiya yitala alu to. ⁴ Tonɲa le mu, a gengenta yiro xan tumo men, a tun mu barakentanɲo

ti. Bari saasa, a be í nila Ala la sintigiya fe. N dulu mu barakentanɲolu ti ate kafuɲoxoya xono. Bari n nin a si nilamaya i ɲoxo fe, Ala la sintigiya barako la alu ɲen. ⁵ Al'alu fannu segesege, x'a mafele nin alu be lannaya silo xan. Al'alu fannu xotobo. Alu man a lon ba xo Isa Kirisita be alu to? Fo nin xotobolo da man diya alu la de. ⁶ ɲi yilo b'a ma xo alu si a lon xo xotobolo da man kuwa n na. ⁷ N be Ala matarala xo alu xana kujaxu si ke. N nte a fe x'a yita xo xotobolo da diyata n na, bari n b'a fe x'alu je ɲuma le kela, haali nin xotobolo keta í xo nin a da kuwata n na. ⁸ Bawo sin fusi nte n ɲen tonɲa xanma, sinɲo be n ɲen a ɲen ne. ⁹ Ntelu be ɲapala nin n barako xa doxo, x'a tara atelu barako xa bun. N be Ala matarala men na, wo mu le xo alu xa dafa. ¹⁰ Wo le x'a tu, xa nte nin alu te janɲaninɲo tu, ɲi be ɲinnu safela alu ɲen, walasa nin nte sita je tumo men, nte xana fatiya alu ma x'a la Marigi la sin dinmaninɲo xan nte ma. Wo sinɲo dita alu la ɲataxo le xanma, a man di alu tiɲa xanma. ¹¹ Awa saasa, ɲi badinɲolu, alu ɲaxali, alu a ɲinin alu xa dafa, alu i ɲoxo jusudun. Alu i ɲoxo faamu. Benɲo xa ke alu te. Nin wo keta, xanuya nin heero tigi Ala si tu alu fe. ¹² Alu i ɲoxo xonton baataya xontonni senumanɲo la. Senumanɲolu bee be alu xontonna. ¹³ Marigi Isa Kirisita la neemo, anin Ala la xanuya, nin Ni Senumanɲo la kafuɲoxoya xa ke alu bee fe.

GALASINGOLU

1 Nin safe in bota nte Poli le la, nte men keta kiladinjo ti. Wo kiladinjo man bo moxolu to, moxo sabaabu du la nte; bari Isa Kirisita le x'a ke anin Fa Ala, wo men x'a lakuni xa bo furelu to. 2 Badin lannayabaxo mennu bee be jan, wolu nin nte be jin safe in kila Galasi maro Ala la jamalu ma. 3 N Fa Ala, anin Marigi Isa Kirisita xa neemo nin heero ke alu pen. 4 Isa Kirisita x'a fan di xa ke sadaxo ti n na junubolu koso, walasa n xa bo jin duniya in ku jaxo bee bulu, x'a la n Fa Ala sago xan. 5 Nooro xa la n Fa Ala xan fo abada. Amiini! 6 N badinjo, Ala men x'alu kili Kirisita la neemo barako to, alu xa i xodi wo la ja men tariya, xa i jadi xibaru diman xote la, wo xa nte dabaro ban de. 7 A xoto nte xo xibaru diman xote be je; bari moxo do lelu be alu hakilo jaxamila, mennu b'a fe xa Kirisita la xibaru Dimanjo yeleva. 8 Bari haali nin ntelu fannu, walla sanxulo melesiyi do le nata xibaru diman xote fo alu pen, men nin n na folo foninjo nte kilin ti, a tigo xa danga! 9 N x'a fo alu pen xa ban, n be saagila a ma alu pen tugin xo, nin do xa xibaru diman xote fo alu pen, alu sonta men ma, men nte wo ti, a tigo xa danga! 10 Awa saasa, nte b'a fe xa n fan kudiya moxolu pen ba? Ayi, n b'a fe xa n fan kudiya Ala le pen. Nte b'a fe xa n fan maadiya moxolu ma ba? Ayi! Nin n tun b'a fe xa n fan maadiya moxolu ma, n tun me ke Kirisita la jonjo ti. 11 N badinjo, n b'a fola alu pen xo, nte xa xibaru Dimanjo men fo alu pen, wo man bo moxolu la. 12 N man a soto moxo la, moxo du man n xaran a la, bari Isa Kirisita le x'a yita n na. 13 Folofolo, nte tun be ja men Yahudiyalu la diino to, alu fannu xa wo lon. Alu x'a lon du n xa Ala la jama tooro jaxu ja men, xa n balan fo n s'a tija. 14 Yahudiyalu to, nte xa n fulan kiika dan Yahudiyalu la diino to. Nte tun be balannin n na moxobalu la laadolu to xa tanbi wolu xan. 15 Bari Ala x'e tu a la pumaya xono xa n sugandi jannin haali nte xa wulu, xa n kili a la baaro xanma. A diyata a pen tumo men x'a Dinxe yita nte la, walasa n xa taxa a la Xibaru Dimanjo fo siya tolu pen, nte man taxa moxo si jininx. 17 Men dulu keta kiladinjo ti nte ja, n man taxa Yerusaleme xa taxa wolu jininx. Bari wo no bee to, nte taxata Arabu jamano to, wo xo, n xa n koppa xa na Damasi gallo to. 18 San saba xo le mu, nin n taxata Yerusaleme walasa n nin Piyere x'e joxo lon. N tuta a bata loxokun fula xono. 19 Nte ja man la kiladin xote xan nin Marigi doxoxe Yaxuba kilin doron nte. 20 Nte be

men safela x'a ki alu ma ten, wo mu tonja le ti. Ala mu n seede ti, xo wo nte faniya ti. 21 Wo xo, n taxata Siri nin Silisi jamanolu to. 22 Bari Kirisita la jamalu mennu be Yude maro xono, wolu tunnu man nte je folo xa n lon. 23 I tunnu b'a mela doron xo: «Men tun x'a lo n nofe xa n tooro, fo a si lannaya tija, wo be lannaya silo waajula saasa.» 24 I tunnu be barako bulaxan Ala pen, nte la kuwo xanma.

2 San tan nin naani tanbo xo, n saagita taxanin Yerusaleme, n nin Baranabasi. N nin Tite du taxata. 2 N taxata, bawo Ala tun x'a yita n na xo n xa xan xa taxa. N taxaninma je, n be xibaru Dimanjo men ma x'a waaju siya tolu pen, n xa wo ja fo lannayabaxolu la pamoxolu pen i danna. N tun nte a fe n xa baaro men ke, anin n be nala men kela, xo wo xa ke fuwo ti. 3 Awa, nte taxamajoxo Tite men tun mu Gereko ti, wo la jaxo man ke waajibi ti; 4 haali x'a tara badin fanolu mennu x'e soli xa dun n to, wolu tunnu x'a la jaxo waajibiya. Wolu x'e soli xa dun n to, xa na n nasaxa, walasa n xa hooroya men soto Isa Kirisita la kafujoxoya xanma, i xa wo tija, xa n bula sariya la jonja xono tugin. 5 Bari haali waxatindin kilin, n man i lame, xa son i ta ma; walasa Xibaru Dimanjo men mu tonja ti, wo yelemabalo xa tu alu bulu. 6 Bari moxo mennu jaateta pamoxolu ti, i tunnu mu men ti, nte la jaate tun nte wo xan, bawo Ala nte kiito tegela kuwolu jena gansanjo ma. Nte be Xibaru Dimanjo men waajuxan, wo moxolu man fusi kafu wo ma. 7 Bari i fannu x'a je xo Ala xa don baaro xarifa nte ma, xa Xibaru Dimanjo fo siya tolu pen, i xo a xa wo baara kilinjo xarifa Piyere ma ja men Yahudiyalu to. 8 Awa Ala xa Piyere ke Yahudiyalu la kiladinjo ti ja men, a xa nte du ke siya tolu la kiladinjo ti ten. 9 Yaxuba nin Piyere nin Yaya men tunnu be jaatenin Ala la jama tulumalu ti, wolu x'a lon xo Ala xa wo baaro xarifa nte ma. Wo xanma, i x'e bulo dun nte nin Baranabasi bulu, x'a yita wo fe xo i nin n keta kilin ti. Wo to, n bee benta a to xo ntelu xa taxa baaro ke siya tolu to, itelu xa taxa baaro ke Yahudiyalu to. 10 I xo n pen doron xo n x'e hakilo tu i la jama lannayabaxa segebaxantunjo la. Nte du xa n jija xa wo ke. 11 Bari Piyere nata Antiyosi tumo men, n x'a sooso jama bee pala, bawo jalago tun b'a ma. 12 Moxo dolu tunnu bota Yaxuba bata xa taxa non. Jannin wo moxo tunnu xa na Antiyosi, Piyere nin siya tolu lannayabaxolu tunnu be domolo kela. Bari wo moxolu

naninma, a x'é soobo wo siya tolu la, a nin i man kafu domolo ma tugun, bawo Yahudiya lannayabaxo men tunnu b'a fe xo siya tolu xa naxa, a silata wolu ja.

¹³ Badin Yahudiya tolu dulu x'a la fulankafuya joxon ke, fo i xa Baranabasi du ladun i la fulankafuya xono.

¹⁴ N' x'a je tumo men xo i bosilo nte tilinnin, a nte lanin xibaru Dimanjo la tonja foninjo xan, n' xo Piyere jen bee jala xo: «Ite men mu Yahudiya ti, i xa siya tolu moxolu bosilo ta, xa Yahudiyalu bosilo bula. Awa, i si siya tolu diyakuwa no ja di xo i x'e taxama i xo Yahudiyalu?» ¹⁵ Tonja le mu ntelu mu Yahudiya yeerewuluwo lelu ti, n nte siya xote moxolu ti, mennu kilita xo junubekelalu. ¹⁶ Bari wo bee nin a ta, n x'a lon xo moxo si me jaate moxo tilinninjo ti Ala bulu Musa la sariya silo taxamo xanma, fo i xa lannaya le ke Isa Kirisita la. Wo le x'a tu, n dulu lata Isa Kirisita la, walasa n xa jaate moxo tilinninjo ti Ala bulu, n na lannaya xanma. Wo xana ke sariya no ti, bawo moxo si me jaate tilinninjo ti Ala bulu, sariya silo taxamo xanma. ¹⁷ Awa, xa n tu tilinninjo njinna Ala ja xoto, Isa Kirisita barako to, nin a tarata xo n dulu mu junubekelalu ti i xo siya tolu, wo xoto mu don ti ba xo Kirisita mu junubo la baarakela ti? Abada! ¹⁸ Nte fan xa men totija, nin nte fan saagita wo to daranin, wo tumo la, nte fan ne keta sariya tijabaxo ti. ¹⁹ Men mu Musa la sariya dappo ti, nte be le i xo moxo saninjo, n' nin sariya fatata. Sariya fan ne keta wo saya sabaabo ti, walasa nte xa nilamaya Ala jen. Nte nin Kirisita gengenta i joxo fe, xa sa. ²⁰ Wo ja ma, nte nte n' nila tugun, Kirisita le be i nila nte to. Bawo nte be nilamaya men xono saasa, n' be wo kela lannaya le to, Ala Dinxe la. Ate le xa n' xanu, fo a x'a niyo di xa ke sadaxo ti nte jen. ²¹ Nte nte n' banna Ala la neemo to. Nin moxo tun si jaate moxo tilinninjo ti Ala bulu, Musa la sariya silo taxamo le fe, wo to a be i xo Kirisita sata fu le.

3 He Galasinga hakilintanjo! Jontigi le x'alu kunafili ten? Isa Kirisita la saya gengenyiro xan, wo dun yitata le alu la de x'a xoyiya! ² Nte b'a fe alu xa pin njinxali kilin in ne jaabi xo: Alu xa Ni Senunjo soto sariya silo taxamo le to ba, walla alu x'a soto bawo alu xa xibaru Dimanjo lame xa la a la? ³ Alu dunnu keta hakilintanjo ti ten ja di? Alu xa kuwo men damuta Ni Senunjo barako to, saasa alu b'a fe xa wo laban alu fannu barako la ba? ⁴ Kuba mennu yitata alu la, wolu keta fuwo ti ba? Abada! Wolu me ke no fu ti. ⁵ Nin Ala b'a Ni Senunjo dila alu ma, xa kawakuwolu yita alu la, a be wo kela ba xo bawo alu be sariya la folu dafala, walla a b'a kela bawo alu be Xibaru Dimanjo lamela xa la a la? ⁶ Wo ja ma, Kitaabo b'a fola Burehima la kuwo to xo: «A lata Ala la, wo xanma Ala x'a jaate moxo tilinninjo ti.» ⁷ Alu a faamu xo mennu xa lannaya ke, wo lelu mu Burehima bonson soobelu ti. ⁸ Kitaabo folota x'a fo xo Ala be nala siya tolu jaatela moxo tilinninjo ti i la lannaya le sabaabo la. Wo le x'a tu, a folota xa pin

xibaru diman in fo Burehima jen xo: «Siyalu bee si Ala la duwawo soto ite le sabaabo la.» ⁹ Burehima xa lannaya ke, a xa Ala la duwawo soto. Wo ja ma, moxo wo moxo be lannaya kela, wolu si Ala la duwawo soto i xo ate. ¹⁰ Awa, moxo mennu la jaate to, xo xa kila Musa la sariya silo taxama, wo si a tu xo Ala s'i jaate moxo tilinninjo ti, wolu bee be dango xono; bawo Kitaabo x'a fo xo: «Fen wo fen safeta sariya Kitaabo xono, moxo wo moxo nte wo bee kela, wo tigo be danganin.»

¹¹ Awa, a xoyianinjo le fan mu, xo moxo si me jaate moxo tilinninjo ti Ala bulu sariya barako to; bawo a be safenin Kitaabo to xo: «Moxo men xa tilinninjo soto lannaya fe, wo si nilamaya.» ¹² Musa la sariya ken nin lannaya nte dennin i joxo la. Bawo a be safenin xo: «Men je sariya la folu latimme, wo si nilamaya wolu fe.» ¹³ Kirisita xa n kunbo sariya la dangalo ma. Ate fan dangata ntelu no to, bawo a be safenin Kitaabo to xo: «Moxo men je den yiro la, x'a faxa, wo dangata.» ¹⁴ A keta ten, walasa Burehima xa duwawo men soto, wo xa di siya to dulu ma, Isa Kirisita barako to. A keta ten du, walasa Ni Senunjo men lahido tata, n xa wo soto lannaya xanma. ¹⁵ N' badinjo, n' be nala misaalo do dila alu ma, moxolu be men joxon kexan. Nin moxo do xa safe ke jannin a xa sa, safe men b'a yitala a ke xa xan xa tala ja men, nin wo keta a ja ma, moxo si me a tija no, walla xa do kafu a ma. ¹⁶ Ala x'a la lahidolu ta Burehima nin a bonsonjo jen. Kitaabo man don fo xo: «anin a bonsonjo», a be i xo nin bonson kiika le mu. Kitaabo xo le: «anin i bonsonjo». Wo xoto xo moxo kilin ne mu, nin wo mu Kirisita ti. ¹⁷ N' b'a fe xa men fo, wo mu pin ne ti xo: Ala tun xa Kafuxanjo do dara folo, men me wuli. Sariya men nata sanji keme naani nin tan saba xofe, wo me wo tija no, xa Ala la lahido bo a ma. ¹⁸ Awa, Ala be fenjo men dila ke ti, nin wo be dennin sariya le la, wo to a nte dennin lahido la tugun. Bari Ala x'a la jumaya ke Burehima jen, x'a la lahido le xan. ¹⁹ Sariya dikunjo dun mu mun ti? A kafuta lahido ma le, walasa kebaaro mennu man di Ala jen, xa wolu yita n na, fo Burehima bonsonjo xa na, lahido tata wo men jen. Melekiyo lelu xa wo sariya lasi, xa moxo do ke a lasibaxo ti moxolu ma. ²⁰ Wo lasibaxo ken nte lasibaxo ti moxo kilin jen, x'a tara Ala dun mu kilinpe le ti. ²¹ Wo xoto mu ba xo Musa la sariya be Ala la lahidolu soosola? Abada! A nte i soosola. Nin sariya do tun dita, men si nilamaya soobe di no moxolu ma, wo to, moxolu tunnu si jaate no moxo tilinninjo ti Ala ja xoto, wo sariya sabaabo la. ²² Bari Kitaabo b'a fola xo duniya muume bee be junubo fango xoto, walasa Ala xa nilifenjo men lahido ta, wo xa di lannayabaxolu ma, i la lannaya xanma, Isa Kirisita la. ²³ Jannin lannaya waxato tun xa na, sariya tun be n maranin, fo xa si lannaya yitalunjo ma. ²⁴ Wo ja ma, sariya keta n korosibaxo ti, jannin Kirisita xa na; walasa n xa jaate moxo tilinninjo ti Ala ja xoto, lannaya barako to. ²⁵ Awa, lan-

naya la waxato naninma, wo korosibaxo la la nte n xan tugun. ²⁶ Katugu alu bee keta Ala dinḡolu ti lannaya le xanma, Isa Kirisita la kafuḡoxoya xono. ²⁷ Wo to, atelu mennu bee batiseta Isa Kirisita la kafuḡoxoya xono, alu xa Kirisita jigolu dun alu to í xo alu xannadoroko. ²⁸ Wo le x'a tu saasa, Yahudiya wo, siya tolu wo, jon ne wo, hooro le wo, xe wo, musu wo, faranfansi nte wolu te tugun, bawo alu bee mu kilin ne ti, Isa Kirisita la kafuḡoxoya xono. ²⁹ Nin alu mu Kirisita talu ti, wo to, alu mu Burehima bonsonḡo ti. Awa, Ala xa ke men lahido ta, alu si wo soto.

4 N' b'a fe xa men fo, wo mu pin ne ti xo: Xa ketabaxo dindinma tu, faranfansi si nte a nin jonḡo te, haali x'a tara a mu a fa la fenḡo bee tigo le ti. ² X'a dindinma tu, a be korosibaxolu nin kupabobaxolu bulu, fo xa taxa si a fa la waxati lategeninḡo ma. ³ Wo be ḡa men, n du tunnu be le í xo dindinḡolu. N tunnu be pin duniya in fenḡolu la jonḡafango xoto. ⁴ Bari waxato dafaninma, Ala x'a Dinxe ki xa na: Muso x'a bange, a bulata sariya xoto, ⁵ walasa a xa sariya xoto-moxolu kunbo, xa n ke Ala dinḡolu ti. ⁶ Alu keta Ala dinḡolu ti, wo xanma, Ala x'a Dinxe Niyo ki, nin wo mu Ni Senunḡo ti, a xa na sigi n jusukunḡolu la. Wo Niyo be fetenna xo: «Aba!» Wo xoto xo: «Baaba!» ⁷ Wo to, í nte jon ti tugun, bari Ala dinḡo. Nin í mu a dinḡo ti, awa í mu a ketabaxo du ti, ate Ala barako to. ⁸ Folofolo, alu tunnu man Ala lon tumo men, alu tunnu mu bolibatuta dolu la jonḡolu ti. Wolu nte bolibatuta soobelu ti. ⁹ Bari saasa alu xa Ala lon. Walla n' s'a fo xo Ala x'atelu lon. Alu s'í koppa no duniya la wo fen gansanḡolu nin wo batarafenḡolu ma ḡa di tugun? Alu si ke a fe xa dun wolu la jonḡa la ḡa di tugun? ¹⁰ Alu be lunḡo dolu nin xaro dolu nin waxato dolu nin sanḡo dolu jaatela xa tanbi dolu xan. ¹¹ Alu la kuwo hanmo be nte la. A fo nte xa baaro fen fen ke alu ḡen, wo bee si ke fuwo ti? ¹² N' badinḡolu, n' be alu matarala, alu ke í xo nte be ḡa men, bawo nte xa n' fan ke í xo atelu be ḡa men. Alu man jaxuman fusi lasi nte ma. ¹³ Alu hakilo b'a la, n' sinḡa folo xa xibaru Dimanḡo fo alu ḡen, wo keta x'a la kunḡo men xan: Alu x'a lon xo jangaro le xa wo ke. ¹⁴ Haali x'a tara nte la jangaro tun mu atelu xotoboli kuba ti, wo bee xan alu man nte doxoya walla xa ḡaxun n' to; bari alu xa nte tomuta í xo Ala la melekiyo do, walla Isa Kirisita fan. ¹⁵ Alu tunnu sewoninba le mu! Mun dun nata alu ma? N' si alu seedeya pin na xo: Haali nin wo tun si ke no, alu tunnu si son x'alu fannu nakesolu bo, x'e di nte ma. ¹⁶ Nte xa tonḡa men fo alu ḡen, wo le x'a tu nte keta alu jaxo ti bi ba? ¹⁷ Alu la kuwo xa di wo moxo dolu ḡen; bari i ḡanneya man pin. I be men nofe, wo mu le x'alu kunbo nte la, walasa alu x'e balan itelu la kuwo to. ¹⁸ Balanḡo ken xa pin ku ḡuma nofe tuma bee, wo xana ke nin nte be alu bata tumo men doron. ¹⁹ Nte la dindinḡolu, nte be tooroba xono tugun alu la kuwo koso, í xo musu tinta, fo Isa

Kirisita xa basigi alu xono. ²⁰ A xa di bete nte ḡen, xa ke alu bata saasa; walasa nte xa n' xumaḡa mayelema. Nte man a lon n' si men ke alu la kuwo to. ²¹ Atelu mennu b'a fe xa sariya labatu, nte xo sariya be men fola, alu man wo me ba? ²² A be safenin Kitaabo to xo Burehima xa din fula soto. Do mu a la jonmuso dinḡo ti, nin wo mu Agare ti. Do mu a la hooromuso dinḡo ti, nin wo mu Saran ti. ²³ Jonmuso dinḡo bangeta x'a la hadamadinḡo sago xan. Bari hooromuso ta bangeta x'a la Ala la lahidu taninḡo xan. ²⁴ Xoto xote be pin ku in na. Wo musu fulo mu Kafuxan fula le taagumansee-do ti. Kafuxanḡo men tata Turusinna kuro xan, Agare be wo le yitala. Ate be dinḡolu wulula jonḡa xanma. ²⁵ Agare mu Turusinna kuro le ti, men be Arabu jamano to. Wo si xaḡan Yerusaleme saasandinma ma, bawo ate nin a dinḡolu be jonḡa xono bi. ²⁶ Bari Yerusaleme kuto, men be sanḡo to, wo be hooroya xono, wo le mu alan ntelu na ti. ²⁷ Bawo Kitaabo b'a fola xo: «Muso, ite men tun man din soto, ḡaxali. ḡaxalixanḡo labo, ite men man tinḡo tooro lon; bawo muso men kilin tuta a danna, wo dinḡo si siya xa tanbi musu xetigo ta xan.» ²⁸ N' badinḡolu, atelu kennu mu dinḡolu ti, mennu wuluta x'a la Ala la lahido xan, í xo Nsiyaxa keta Ala la lahido dinḡo ti ḡa men. ²⁹ Xotonin, dinḡo men wuluta x'a la hadamadinḡo sago xan, wo xa dinḡo jaxuya, men wuluta Ala Ni Senunḡo sago la. Wo keta ḡa men, a be kela ten bi du. ³⁰ Bari Kitaabo xo di? A xo: «Nin jonmusu in xoyi, a nin a dinxe; bawo jonmuso dinxe nin hooromuso dinxe man xan xa kafu ke la.» ³¹ Wo le x'a tu, n' badinḡolu, alan nte jonmuso dinnu ti, n mu hooromuso dinḡo lelu ti.

5 Kirisita xa n bo bulo to le, nin n si hooroya. Wo xanma, alu i balan xa tu wo hooroya xono. Alu xana alu fannu bula jonḡa la tugun. ² Alu n' name! Nte Poli b'a fola alu ḡen, xo nin alu sonta xa ḡaxa, Kirisita me fen ḡiḡa alu ḡen tugun. ³ N' be saagila a ma tugun xo, nin moxo wo moxo je ḡaxa, a waajibiyandinḡo be wo tigo ma xa sariya muume bee latimme. ⁴ Atelu mennu b'a fe xa tilin Ala ḡa xoto sariya silo la, alu x'e fata Kirisita ma; alu x'alu fannu sinbo Ala la neemo to. ⁵ Ntelu kennu gigo be Ala le xan; wo men si ntelu jaate moxo tilinḡolu ti. N be wo le laxononin, Ni Senunḡo barako to, wo men be baaro la n na lannaya fe. ⁶ Katugu moxo men be Isa Kirisita la kafuḡoxoya xono, ḡaxa wo, ḡaxabaliya wo, nafa nte wo la wo bulu. Nafa be men na, wo mu lannaya le ti, men si je xanuya fe. ⁷ Alu wuliḡa tun benta! Jon x'alu lalo x'alu bali taxala ḡa tonḡa silo xan? ⁸ Men fota alu ḡen x'alu lason, wo man bo alu kilibaxa Ala la de. ⁹ A fota xo: «Farinfuunulanḡo dondin si mungo bee fuunu.» ¹⁰ Bari wo bee xan, Mariḡi xa gigo di nte ma alu la kuwo to, xo alu me sila xote ta. Bari moxo wo moxo be alu hakilo ḡaxamila, fo Ala xa kiito tege wo tigo xan. ¹¹ N' badinḡolu, nin nte la waajulo tun be ḡaxalo le waajibiyala, moxo si tun me

nte tooro bi. Wo to, n be waajulo men du la, xo Kirisita gengenta yiro xan, wo kuwo tun me digi moxo si la. ¹² Moxo mennu be alu hakilo paxamila alu la jama xono, a tun xa di nte pen, wolu xa taxa na wo kuwo to, fo x'e fannu xotofenḡolu muume tege x'e bo je. ¹³ N badinḡolu, Ala ken x'alu kili don ne xanma alu xa hooroya; bari wo xana ke sabaabu ti x'alu bula alu fannu nidiyanḡo kela, bari a xa xan x'alu bula i ḡoxo xanula le, anin x'e ḡoxo maakuwo ḡiḡa. ¹⁴ Bawo sariyalu bee be pin sariya kilin in ne xono xo: «Í xa í moxoḡoxo xanu í xo í fan.» ¹⁵ Bari nin alu keta i ḡoxo ma, x'e ḡoxo kin, x'e ḡoxo nimi, alu i korosi, nin wo nte alu s'i ḡoxo ban. ¹⁶ Awa, men be n ma x'a fo alu pen, wo fele xo: Alu i taxama Ni Senunḡo barako la. Nin wo keta, alu me alu fannu nidiyanḡekuwolu ke tugun. ¹⁷ Bawo kuwo mennu mu hadamadinḡo nidiyanḡekuwolu ti, wolu man di Ni Senunḡo pen. Kuwo mennu mu Ni Senunḡo diyanḡekuwolu ti, hadamadinḡo nidiyanḡeku nte wolu ti. I b'e ḡoxo kelela, walasa alu b'a fe xa kuwo mennu ke, alu xana wolu ke. ¹⁸ Bari nin alu bosilo be bennin Ni Senunḡo diyanḡo ma, wo tumo la, alu nte Musa la sariya xoto tugun. ¹⁹ Bee xa hadamadinḡo nidiyanḡekuwolu lon: Jadoya, kunoxoninko, fuyanḡa, ²⁰ bolibato, doomaya, jaxuya, kelejaliiya, kiiliya, jusubaya, faxakilinjaxuya, fatalo, xantala, ²¹ xonneya, dolobaminḡo, domolibajaxo, anin wo ḡoxon kulu. N be alu lasobila í xo n dalita x'a fo alu pen na men, xo wo kuwolu kebaxolu me dun Ala la Mansaya xono abada. ²² Bari Ni Senunḡo be fenḡo mennu dila moxo ma, wolu mu pin fen in nelu ti: Xanuya, ḡaḡo, heero, muḡo, hinno, ḡumaya, lannamoxoya, ²³ sabaro, fannuto. Sariya si nte je, men be wo kuwolu kabala. ²⁴ Mennu mu Isa Kirisita la moxolu ti, wolu xa i nidiyanḡekuwolu nin i negolu nin i sagolakuwolu gengen ne yiro ma. ²⁵ Nin Ni Senunḡo xa nilamaya kuto di n ma, wo to, alan dulu xa xan x'e taxama Ni Senunḡo diyanḡo la. ²⁶ Alan xana n fannu bunḡa, n xana i ḡoxo bagatege, anin xa i ḡoxo xonneya.

6 N badinḡolu, nin moxo do mutata kukebaliko la, atelu mennu b'e taxamala Ni Senunḡo sago la, alu

a latilin horomo to. Alu si alu hakilo tu alu fannu la, walasa alu dulu xana fili. ² Alu i ḡoxo deema, x'e ḡoxo kundono ta; wo na ma, alu si Kirisita la sariya dafa.

³ Nin moxo do b'a fan mafelenin fen ti, x'a tara a dun nte fusi ti, a b'a fan ne lafilila. ⁴ Moxo bee xa í fan bosilo mafele, xa jaate bo í fan xan; nin a la kebaarolu x'a kunxototakun bo, wo tumo la, a si ḡaḡa. A maakuwo me na ke a la tugun x'é suman moxo xote ma. ⁵ Bawo bee fan kilin s'í la dono ta. ⁶ Moxo men be laxaranna Ala la xumo la, wo xa xan x'a bulufenḡolu bee do di a laxaranbaxo ma. ⁷ Alu xana alu fannu lafili; moxo me jele no Ala ma. Moxo je men lan, í be wo le tegela.

⁸ Moxo men je lanno ke a fan nidiyanḡo pen, nidiyanḡo be falinna fenḡo men na, nin wo mu saya ti, a si wo tege. Men je lanno ke Ni Senunḡo pen, Ni Senunḡo be falinna fenḡo men na, nin wo mu nilamaya banbalo ti, a si wo tege. ⁹ Alan xana sege kupumako la. Nin n man sege wo la, n si tegelo ke a waxato to. ¹⁰ Wo to, xa kupumako waxato tu n bulu, alan xa ku ḡuma ke bee pen; sakuta alan badin lannayabaxolu pen. ¹¹ Alu pin safedin kunba innu mafele! Nte fan bulo le x'e safe, x'e ki alu ma. ¹² Mennu b'a fe x'alu diyakuwa x'alu bula paxala, wolu b'a fe x'e fan nelu kudiya moxolu pen. I nte a fe le moxolu x'e tooro Kirisita gengenyiro nofe.

¹³ Wo moxo mennu be paxalo labatula, wolu fannu nte sariya latimmela. I b'a fe alu xa paxa, walasa taagumanseedo xa ke alu balasubo la, men si i bula i fannu bunḡala. ¹⁴ Fanbunḡa kun xote si ken nte nte bulu, nin n Marigi Isa Kirisita gengenyiro doron ne nte. Kirisita gengenyiro barako to, duniya fenḡolu be le í xo i gengeninḡo nte pen, nte du be le í xo moxo gengeninḡo duniya fenḡolu pen. ¹⁵ Naxo nin paxabaliya si nte jaatela; xa ke dafen kuto ti, wo le be jaatela.

¹⁶ Mennu bee be pin sila in taxamala, nte b'a fola wolu pen xo: Ala la heero nin a la makaro xa ke wolu nin Ala la Banisirayila bee fe. ¹⁷ Moxo si xana nte tooro tugun; bawo joogilidaxoto mennu be n na, wolu b'a yitala xo n mu Isa ta le ti. ¹⁸ N badinḡolu, n Marigi Isa Kirisita la neemo xa ke alu bee fe. Amiini.

EFESINGOLU

1 Nte Poli le xa pin safe in ke, nte men mu Isa Kirisita la kiladinjo ti, x'a la Ala sago xan. ¹ N' b'a kila Ala la moxo senunjo ma, mennu be siginin Efesi gallo to, wo mennu mu xantigo ti Isa Kirisita la kafupoxo-oya xono. ² N Fa Ala anin Marigi Isa Kirisita xa neemo nin heero ke alu pen. ³ Tanto be n Marigi Isa Kirisita Fa Ala pen, ate men xa Ni Senunjo la duwawu sifa bee ke n pen sanjo to. N xa wo duwawolu soto n nin Kirisita la kafupoxoya le xono. ⁴ Jannin duniya xa da, Ala xa n sugandi xa ban, Kirisita barako to, walasa n xa senuya xa ke jalagibalolu ti a na xoto. A xa n xanu, ⁵ x'a latege kabirin folofolo, xo n si ke a dinjo ti, Isa Kirisita barako to. Wo le diyata a pen a la pumaya xono. ⁶ A xa wo ke, walasa n x'a tantu a la neema mapoxonjebalo xanma, a xa men ni n na, a Dinxe baato horomo to. ⁷ Ala xa n kunbo Isa le jelo barako la, men bonta. N na junubolu yaafata n ma, a la neemaba xanma. ⁸ Ala xa wo neemo di n ma, x'a siya, xa hakilitigiya nin lonniya sifa bee di n ma. ⁹ Ala x'a sago yita n na, men tun be gullo to. A xa wo latege kabirin folofolo a la pumaya le xanma, Isa Kirisita barako to. ¹⁰ Ala tun xa men natege x'a si a dafa waxati labanjo, wo mu le, xa sanxulo to fenjo nin duguxulo xan fenjo bee kamari xa kuntigi kilin nasigi i kunna, nin wo mu Kirisita ti. ¹¹ Isa Kirisita le du koso, n xa n nidula soto, x'a la ate Ala sago xan, ate men be kuwo bee lategela: N sugandita kabirin folofolo. ¹² A xa wo ke, walasa n xa ke Ala nooro tantubaxolu ti, ntelu mennu xa n gigo ke Kirisita ti xa ban. ¹³ Kirisita barako to, alu dulu xa tonja xumo me tumo men, nin wo mu alu kisilo xibaru Dimanjo ti, alu xa lannaya ke. Wo to, Ala x'a la taagumaseedo ke alu la, Ni Senunjo dinmalo fe, wo men tun lahido tata. ¹⁴ Ni Senunjo dita n ma folo, x'a yita n na, xo n si a la fen puma to dulu soto, nin Ala la moxolu kunbolo dafata tumo men. Alan xa barako bula Ala pen, a la bunja xanma. ¹⁵ Wo le x'a tu, nte x'alu la lannaya xibaro me tumo men Marigi Isa la, anin alu la xanuya Ala la moxo senunjo bee pen, ¹⁶ n' nte segela xa barako bula Ala pen alu la kuwo xanma. N' hakilo be tula alu kun n' na Alamataralu xono. ¹⁷ N' b'a njinna n Marigi Isa Kirisita la Ala fe, Fa noorama, xo a xa hakilitigiya Niyo di alu ma, men si ate yita alu la, walasa alu xa ate lon bete. ¹⁸ N' b'a tarala du, xo a x'alu hakilibunda yele, walasa a x'alu kili gigo men xanma, alu xa wo lon, anin a xa fen puma mennu toben a la moxo se-

nunjo pen, alu xa wolu nooro lon, anin x'a lon xo dan nte wolu la. ¹⁹ N' be Ala tarala du, walasa alu x'a la sintigiya danjebalo lon, a xa men nabaara ntelu lan-nayabaxolu pen. Ala xa wo sintigiya le yita barakeba to, ²⁰ a xa Kirisita lakuni tumo men xa bo furelu to, x'a lasigi a kininjo xoto, sanjo to. ²¹ A xa Kirisita lasigi kuntigiya bee nin fango bee nin sintigiya bee nin mansaya bee anin toxo bee kunna. Nin duniya in toxolu doronnu nte; bari duniya kuto men be nala du toxolu. ²² Ala xa fenjo bee xulu Kirisita pen, x'a di a xa ke Ala la jama bee kuntigo ti fen bee to. ²³ Ala la jama mu Kirisita balo le ti. Ate men be fenjo bee fanin, Ala la jama mu wo la dafaninja le ti.

2 Folofolo, alu tunnu be le i xo moxo saninjo Ala bulu, alu la tilinbaliya nin alu la junubolu xanma. ² Alu la nilamaya keja tun be ten ne folo, i xo duniya moxo tolu bee. Alu tunnu be sanxulo nin duguxulo te fen jaxolu kunnasigibaxo le sago kela, wo men niyo be baaro la Ala soosobaxolu to saasa. ³ Alan du tunnu bee be wo silo le xan folofolo. N tunnu b'a lonin n ni-dijanjo lelu nofe. N tunnu be n miiro nin n balasubo diyanjo le kela. N tunnu nin moxo tolu bee xa xan. N keja folo xanma, Ala la diminjo tun xa xan xa boyi n to i xo tolu. ⁴ Bari Ala la hinno xa bun; a xa n xanu bete na men, ⁵ haali xa n saninjo tu n na tilinbaliyalu xanma, Ala xa n nin Kirisita nilamaya i noxo fe. Ala la neemo le x'alu kisi. ⁶ N nin Isa Kirisita la kafo xanma, a xa n nin a lakuni xa bo furelu to, xa n nin a lasigi sanxulo to. ⁷ A xa wo pumaya ke n pen Isa Kirisita barako to, walasa waxati natalu bee, moxolu x'a la neema danjebalo lon. ⁸ Awa, Ala la neemo le x'a tu alu kisi, alu la lannaya sabaabo la. Wo kisilo man bo atelu fanu to; Ala la nilifenjo le mu. ⁹ Alu fannu la kebaara man wo ke; walasa moxo si xana a fan bunja. ¹⁰ Ala buluno le mu n ti. A xa n da n nin Isa Kirisita la kafo xono, walasa ate Ala fan xa ku puma mennu toben n pen kabirin folofolo, n xa ke wolu kebaxolu ti. ¹¹ Alu i miiri xo folofolo, alu tunnu mu siya xote moxo lelu ti wuluwo fe. Yahudiyalu tunnu be alu mutanin paxabalolu ti, itelu mennu x'e fannu kili xo paxaninjo, paxalo men keta i balasubo dula do tegelo ti. ¹² Wo waxato ken, alu tunnu man Kirisita lon. Nidula tun nte alu kun Banisirayila dinjo bata. Alu tunnu man jaate Ala la moxo ti. Alu sin tun nte Ala la Kafuxanjo to, mennu be siginin Ala la lahido xan. Alu tunnu gigin-

tanjo le be duniya to, anin, Ala du tun nte alu kun. ¹³ Bari saasa, atelu men tunnu nin Ala te xa jan, alu nin a te sutiyata Isa Kirisita la kafuƴoxoya xanma; bawo a jelo bonta xa ke sadaxo ti alu koso. ¹⁴ Kirisita le xa heero di n ma, xa Yahudiyalu nin siya tolu ke kilin ti. Jaxuya men tun be i te í xo tato, a xa wo te, x'a bo je a la saya barako to. ¹⁵ Kila Musa la sariya xa kuwo men- nu waajibiya, anin a man mennu waajibiya, a xa wolu bee ban; walasa xa wo siya fulo kafu x'e ke siya kuta kilin ti, x'e ladun ate la kafuƴoxoya xono, xa heero dun i te. ¹⁶ Kirisita sata gengenyiro xan xa ke sadaxo ti. Wo barako to, a xa siya fulo kafu, x'e ke moxo kilin ti, xa i nin Ala te laben, xa jaxuya ban i te. ¹⁷ Atelu siya tolu men tunnu nin Ala te xa jan, anin Yahudiyalu men tun- nu nin a te xa sutu, Kirisita nata xibaru Dimanjo fo alu ƴen, men be heero dila. ¹⁸ Ate le barako to, Ni Senun kilinjo la deemalo fe, nin ntelu bee, Yahudiyalu nin siya tolu, n bee si sin xa dun n Fa Ala la kafuƴoxoya xono. ¹⁹ Wo ƴa ma, alu nte luntan ti tugun walla sig- infe; bari alu nin Ala la moxo senumanjo lu bee keta kilin ti, xa ke Ala la luwo moxo dolu ti. ²⁰ Alu keta í xo kuro lu, xa lo Ala la bunjo la. Alu sigita jusigilanjjo men xan, wo le mu kiladinjo lu nin Ala la kilalu ti. Isa Kirisita fan mu wo bunjo kuro ti, men be kuru tolu bee tomu- tanin. ²¹ Bunjo bee be i ƴoxo mutanin ate barako to, xa janja, xa ke Alabatusuba senumanjo ti, Marigi barako to. ²² Awa, x'a la alu nin Isa Kirisita la kafo xan, alu dulu nin tolu jaateta wo bunjo dula do ti, xa ke Ala sigidula ti, Ni Senunjo fe.

3 Wo xanma, nte Poli be Ala matarala alu ƴen. Nte keta kasolamoxo ti Isa Kirisita toxo nofe, bawo n be xibaru Dimanjo fola atelu siya tolu ƴen. ² Ala la pu- maya xono, a xa baaro men xarifa nte ma, xo n x'a ke alu ƴen, sikka nte a to alu xa wo me. ³ Ala x'a la gallo yita nte la. N birin wo le safela xumakese dantalu la. ⁴ Nin alu x'e xaran, alu si a lon n xa lonjo soto ƴa men Kirisita la gullo xan. ⁵ Waxato mennu tanbita, wo gullo man yita hadamadinjo lu; bari saasa, Ala x'a yita a la senumanjo lu la, nin wo mu a la kiladinjo lu nin a la ki- lalalu ti, Ni Senunjo barako to. ⁶ Wo gullo fele xo: Xibaru Dimanjo barako to, Ala be heero men kela a la mox- olu ƴen, Yahudiyalu nin siya tolu bee xa xan wo to. I bee keta í xo bala kilinjo dulalu. I bee xa xan du Ala la lahidu taninjo to, Isa Kirisita kafuƴoxoya xono. ⁷ Nte keta Ala la baaradinjo ti a la neema dinmaninjo xan- ma, xa n bula Xibaru Dimanjo fola moxolu ƴen. A xa wo ke ten a la sintigiya to. ⁸ Nte men mu Ala la moxo senumanjo lu bee to doxomandinjo ti, Ala xa don neemo ke nte ƴen, xa Xibaru Dimanjo lasi siya tolu ma, nin wo mu Kirisita la naafulu banbalo ti. ⁹ N xa xan x'a xoyiya hadamadinjo bee ƴen, Ala b'a la gullo labaarala ƴa men. Ate Ala men mu fenjo bee dabaxo ti, a tun xa wo kuwo tu duguwo to kabirin duniya man da. ¹⁰ A xa wo ke walasa Ala la jama fe; kuntigiyalu nin

fangolu mennu be sanjo to, wolu xa Ala la hakilitigiya ƴasifa bee lon. ¹¹ Ala tun xa kuwo men natege kabirin abada, a xa wo ke, n Marigi Isa Kirisita barako to. ¹² N nin Kirisita la kafuƴoxoya xanma, anin n na lannaya koso ate la, n si fatiya no x'e sodun Ala la, n hakilo lasigininjo. ¹³ Wo xanma, n b'a njinna alu fe xo, nte be tooro mennu xono alu nofe, wo xana alu juso dox- oya. Wo mu alu kunxotota kunjo le ti. ¹⁴ Wo xanma, n be ƴongila Fa Ala xoto, ¹⁵ dinbayalu bee sabaabubaxo, sanjo to anin duguxulo xan. ¹⁶ N b'a tarala xo a x'a ke a la nooro danjebalo xanma, a xa barako dun alu jusukunjo to, a Ni Senunjo la sintigiya fe. ¹⁷ N b'a tarala du xo Kirisita xa sigi alu jusukunjo lu la lannaya fe; anin alu xa lillidun, xa sinsin xanuya to; ¹⁸ walasa alu nin Ala la senumanjo lu bee xa sin xa Kirisita la xanuya xono nin a lo nin a janja nin a jironja lonjo soto. ¹⁹ N b'a tarala xo alu xa Kirisita la xanuya lon, wo men xa bun xa tanbi lonjo bee xan; walasa alu xa fa Ala la dafaninjo bee la. ²⁰ Ala men si sin no xa fen bee ke, xa tanbi n na taralolu nin n mirolu xan, a la sintigiya fe, men be baaro la n jusukunjo la; ²¹ tanto b'a ƴen Ala la jama xono, anin Isa Kirisita kafuƴoxoya xono, tuma bee, fo abada. Amiini.

4 Nte men be kaso la Marigi la kuwo xanma, n b'a xoleyala alu ma, xo Ala x'alu kili men xanma, alu i taxama xa ben wo ma. ² Alu i majigi xa sabari xa muja. Alu muja i ƴoxo xoto xanuya to. ³ Ni Senunjo x'alu ke kilin ti xa benjo ke alu te, alu i balan wo benjo xa tu alu nin i ƴoxo te. ⁴ Bala kilin ne be je; anin Ni Se- nun kilin, í xo gigi kilin be je ƴa men, alu kilita men xanma. ⁵ Marigi kilin ne be je, anin lannaya kilin, anin batiseli kilin. ⁶ Ala kilin ne be je, n bee Fa, men be n bee kunna, men be baaro la n bee to, anin men be n bee jusukunjo la. ⁷ Ala x'a la neemo do xarifa n bee ma, x'a la Kirisita la solifen sumanninjo xan. ⁸ Wo le x'a tu, a safeta Ala la Kitaabo xono xo: «A yeleta sanjo to, a nin kasolamoxo kiika taxata; a xa fenjo lu di moxolu ma fu.» ⁹ X'a fo xo: «A yeleta», wo xoto mu mun ti? Wo xoto mu le xo a tun jigita folo, fo duguxulo dula jigin- injo lu. ¹⁰ Men jigita, wo le du yeleta fo sanxulo dulalu bee sanjo to, walasa a xa duniya bee fa. ¹¹ Ate le xa solifen mategeninjo lu di moxolu ma. A xa dolu ke ki- ladinjo lu ti, xa dolu ke kilalu ti, xa dolu ke xibaru Di- manjo waajubaxolu ti, xa dolu ke lannayabaxolu ne- gaanibaxolu ti, xa dolu ke karanmoxolu ti. ¹² A xa wo bee ke, walasa xa senumanjo lu toben Ala la baaro xanma, nin Kirisita balo, wo xoto Ala la jama, wo si taxa ƴa lannaya to ƴa men. ¹³ Nin wo keta, n bee ka- funinjo si ke kilin ti lannaya to, anin Ala Dinxe lonjo to. N si ke lannayabaxa moninjo lu nin moxo dafan- injo lu ti, í xo ate Kirisita be dafanin ƴa men. ¹⁴ Wo ƴa ma, n me ke í xo dindin bitugun, xa tu í fillifallala, xa taxa diina silo sifa bee woyo fe, moxolu la lafililo koso. Wo moxolu be kewuya le kela xa moxo tolu lafililo. ¹⁵ Bari

xa n tu tonja fola xanuya to; n si bunja lannaya to ja bee do ma, fo xa ke í xo Kirisita, ate men mu Ala la jama kunjo ti. ¹⁶ Ate le barako to, nin balo bee mu kilin ti, men dulalu bee be i joxo mutaninbete a xulukun- nafasolu la. Wo to, nin wo balo dulalu bee kilin kilin be a la baaro kela a ja ma, balo muume si bunja xa taxa ja xanuya to. ¹⁷ Awa n badinjo, saasa n be nala men xoleyala alu ma, Marigi koso, wo mu le xo: Atelu lan- nayabaxolu kukeja man xan xa ke í xo siya tolu men- nu man Ala lon; wolu be i taxamala hakilintanja xono. ¹⁸ I be i miirila í xo dibitomoxolu. Ala be nilamaya kuto men dila, i luntanjo le be wo to i la kulonbaliya koso, i la sondonme xoleya xa men sabaabu. ¹⁹ Maluya kese kilin nte i la. I xa i fannu ladi jadoya ma, xa son xa ku noxonin sifa bee do ke, dansigi nte men na. ²⁰ Bari atelu xa men xaran Isa Kirisita la kuwo to, wo nte wo kuwolu joxonnu ti de! ²¹ Sikka nte a to, men be Isa la kuwo to, alu xa wo bee me; anin alu xaranta a la tonja ma. ²² Wo to, alu tunnu be i taxamala ja men ma folo- folo, alu wo dabula. Alu moxo xoto nego lelu be moxo lafilila, xa halagilo lasi a ma. ²³ Wo xanma, alu a tu alu hakilolu nin alu miirolu bee xa yeleva xa ke kuto ti. ²⁴ Alu moxo kuto jigolu ta, wo men data Ala mununjo la. Wo mu le xa í taxama tilinninga nin senuya xono, tonja xa mennu bange. ²⁵ Wo le x'a tu, alu faniya dab- ulla, xa tonja fo i joxo nen, bawo n bee kafunin mu bala kilin dula lelu ti. ²⁶ Nin alu diminta, alu i korosi alu xana junube ke. Tilo xana boyi x'alu diminningo tara. ²⁷ Alu xana a tu Sentane xa ja si soto alu xan. ²⁸ Nin men tun be suupalo kela, wo xa suupalo dabula, bari a xa baaro ke a bulu fulo la, x'a baluwo soto tilinjo to, anin xa fen soto xa segebaxantunjo deema. ²⁹ Xuma jaxu si xana bo alu da, fo xuma jumalu, mennu si moxo do maakuwo nija, xa do kafu moxo xotelu barako ma, walasa a xa neemo ke alu lamebaxolu nen. ³⁰ Alu xana Ni Senunjo juso xasi, wo men mu Ala la taagumansedo ti alu la, xo lunjo si na, Ala si alu kun- bo pewu. ³¹ Alu miiriyaxo, nin juso, nin diminjo, nin sonxo, nin nanilo, nin jaxuya sifa bee xoyi x'e soobo alu la. ³² Alu juma ke i joxo nen, xa hinna, xa yaafa i joxo ma, í xo Ala yaafata alu ma Kirisita koso ja men.

5 Awa, x'a la a xan alu mu Ala dinjo ti, a be men- nu xanunin, alu ke a ladigibaxolu ti. ² Alu xanuya yita alu la nilamaya xono, í xo Kirisita xa n xanu ja men, fo a x'a niyo di n nofe, xa ke nilifenjo nin sadaxo ti, men diyata Ala nen. ³ Alu keta Ala la moxolu ti; wo xanma a man xan jadoya nin kunoxoninko, anin wasa- baliya ja wo ja xa haali me alu dappo to. ⁴ Malibaliya xumolu nin xuma kuntanjo walla xuma noxoninjo dula man xan xa me alu da. Alu xa xan xa men ke, wo mu barakelalo le ti Ala nen. ⁵ Alu xa xan x'a lon, sikka nte a to xo: Jadolu nin moxo noxoninjo, anin wasa- balolu, wo mennu mu bolibatulalu ti, wolu si me nidu- la soto Kirisita nin Ala la Mansaya xono abada. ⁶ Alu

xana a tu moxolu x'alu lafilila xuma fuwolu la. Wo joxon junube lelu b'a tula nin Ala la diminjo be boyila a soosobaxolu to. ⁷ Wo to, alu nin wo moxolu xana kafu fusi la. ⁸ Folofolo, alu tunnu mu dibo le ti, bari saasa, alu mu keneya le ti, bawo alu nin Marigi kafuta. Wo to, alu i taxama í xo moxo mennu be keneya la. ⁹ Awa, keneya ken be jumaya nin tilinninga nin tonja le bangela. ¹⁰ Alu i balan xa Marigi diyanno mategeninjo lon. ¹¹ Kuwo mennu be kela dibo to, nin nafa nte i la, alu sin xana dun wolu to. Alu xuma i xan ne fan, x'a yita xo i man pin. ¹² Moxo dolo be kuwo mennu kela dibo to, maluya be wolu tofolo fan na. ¹³ Ku wo ku je yita xo a man pin, wo bulata keneya la. ¹⁴ Fen fen du bulata keneya la, wo keta keneya ti. Wo le x'a tu, a fota xo: «Ite men be sinnoxola, kuni. Kuni xa bo furelu to, Kirisita si keneya bo í nen.» ¹⁵ Wo to, alu i korosi alu bosilolu to. Alu xana i taxama í xo hakilintanjo, bari alu i taxama í xo hakilimalu. ¹⁶ Alu waxato tomuta bete, bawo bi lunjo xa jaxu. ¹⁷ Wo to, alu xana ke hakilintanjo ti, bari alu i balan xa Marigi sago lon. ¹⁸ Alu xana i fa dolo la; wo si alu bula kukuntanko le la. Bari alu a tu Ni Senunjo x'alu fa. ¹⁹ Alu i joxo jusudun Jaburu donkilolu nin tantuli donkilolu nin Alabunja donkilolu la. Alu donkilo la xa Marigi tantu alu jusukunjo bee la. ²⁰ Alu barako bula n Fa Ala nen tuma bee, anin kuwo bee to, n Marigi Isa Kirisita toxo la. ²¹ Alu xulu i joxo nen, Kirisita jasilanja xanma. ²² Mu- solu, alu xulu alu xelu nen í xo alu be xulunin Marigi nen ja men. ²³ Bawo, xe le mu a musu kuntigo ti, í xo Kirisita mu Ala la jama kuntigo ti ja men. Kirisita le mu Ala la jama Kisibaxo ti, nin wo mu a balo ti. ²⁴ Wo xan- ma, musolu xa xan xa xulu i xelu nen kuwo bee to, í xo Ala la jama be xulunin Kirisita nen ja men. ²⁵ Xelu, alu dula x'alu musulu xanu í xo Kirisita xa Ala la jama xanu ja men, fo a x'a fan niyo di a nofe. ²⁶ A keta a fe wo ja ma Ala la jama xa ke Ala ta ti, tumo men a x'a senuya jijo nin Ala la xumo la. ²⁷ Katugala a diyata a nen xa Ala la jama lalo a fan ja xoto, a nooroma, a matakibalo, a moromorobalo, anin a fentanjo. A diy- ata a nen a xa ke senumanjo nin jalagibalo ti. ²⁸ Wo ja ma, xe xa xan x'a musu xanu í xo a fan balo. Xe men be a musu xanula, wo be a fan ne xanula. ²⁹ Awa moxo bada man í ban a fan balo to; bari a si a balu, x'a topo- to, í xo Kirisita be Ala la jama topotola ja men, ³⁰ nin wo mu a balo ti, n bee mu men dula do ti. ³¹ Kitaabo x'a fo xo: «Wo le xanma, xe ba si a na nin a fa bula x'e noto a musu la; i fulo si ke kilin ti.» ³² Gulleba le mu pin ti. Nte b'a fola xo Kirisita nin Ala la jama te kuwo le mu le wo ti. ³³ Wo bee nin a ta, bee kilin kilin x'e musu xanu í xo í fan. Muso du x'a xe bunja.

6 Dinjo, al'alu wulubaxolu lame x'a la Marigi sago xan, bawo wo be bennin. ² «Í na nin í fa bunja.» Wo le mu Ala la sariya folo ti, lahido kafuta men ma: ³ «walasa í xa heero soto, xa me í nila duguxulo xan.»

⁴ Alu falu, alu dulu xana alu dinḡolu juso tija, bari alu i labunḡa, x'e laxaran anin x'e tonben x'a la Marigi sago xan. ⁵ Jonḡolu, marigo mennu be alu ma pin duniya in to, alu xulu wolu nen silanḡa nin jarajaro to. Alu baaro ke i nen jusukun xoyiya to, x'a ke í xo nin alu b'a kela Kirisita le fan nen. ⁶ Alu xana baaro ke nin i be alu lakosinin tumo men doron, walasa x'alu fannu kudiya i nen; bari alu Ala sago ke alu jusukunḡo bee la, í xo Kirisita la jonḡolu. ⁷ Alu baaro ke i nen xonotodiya to, í xo nin alu be baaro kela Marigi le fan nen. Alu xana a jaate moxolu nen ti. ⁸ Alu a lon xo moxolu bee, jon wo, hoo-ro wo, bee kilin kilin s'í la ku numa keninḡolu sara soto Marigi la. ⁹ Marigolu, alu dulu xa wo noxon ke alu la jonḡolu nen, alu xana feten feten i la, x'e lasila. Alu x'a lon xo atelu nin itelu bee Marigi be sanḡo to, wo nte moxo fisiyala moxo ti. ¹⁰ N' na xuma labanḡo fele xo: Alu barako ta alu nin Marigi la kafupoxoya xono, xa bo a la sintigiya barakemaba to. ¹¹ Ala be kelekemiranḡo mennu dila, alu wolu bee dun alu ma, walasa alu xa sin xa Sentane la feere jaxolu kele. ¹² Bawo n nin mennu be kelo la, wolu nte hadamadinḡolu ti, bari kuntigiyalu nin fangolu, anin pin duniya dibinin in kun-nasigibaxolu, anin jinnolu mennu be siginin sanḡo to, ku jaxo xanma. ¹³ Wo le x'a tu, alu Ala la kelekemiranḡolu bee ta, walasa nin lun jaxo nata, alu xa sin xa kelo ke; kelo xofe, alu xa sin xa tu lonin. ¹⁴ Awa, alu i

toben! Alu tonḡa ke alu tetositalanḡo ti, xa tilininḡa ke alu la negedoroko ti. ¹⁵ xibaru Dimanḡo men be heero dila, wo xa ke alu sintosamato ti, alu x'e jija xa wo fo. ¹⁶ Lannaya xa ke alu la tuma bee, a be í xo negekun-bennanḡo, wo s'a tu alu si Sentane la beje wulen-inḡolu bee faxa. ¹⁷ Alu kisisita, alu wo kisilo muta x'a ke alu kunna negekufuno ti. Alu Ni Senunḡo la fanḡo ta, nin wo mu Ala la xumo ti. ¹⁸ Alu wo bee ḡinin Ala fe, taralo la. Alu Ala matara tuma bee Ni Senunḡo barako to, xa taralolu nin taraliba sifa bee do ke. Alu tu i pala, x'e balan xa tu taralo kela Ala la moxo senumanḡolu bee nen. ¹⁹ Alu Ala matara nte du nen, walasa nin nte be xumala tumo men, Ala xa xuma sinḡo di nte ma, n' hakilo lasigininḡo xa Xibaru Dimanḡo gullo yita moxolu la. ²⁰ Nte keta wo Xibaru Dimanḡo la lasigidinḡo ti, xa n' tu negejoloxo la, kaso la. Alu Ala matara nte nen walasa n' xa Xibaru Dimanḡo fo a foḡa ma, xa n' hakilo lasigininḡo tu. ²¹ Awa, Tisike, nin wo mu n badinxe xanuninḡo, anin nte baarakepoxo xantigo ti Marigi nen, wo si nte xibaro bee fo alu nen, walasa alu xa nte la ḡa lon. ²² Nte b'a kila alu ma pin ne xanma, walasa a xa ntelu la xibaruya di alu ma, anin a x'alu hakilo lasigi. ²³ Fa Ala anin Marigi Isa Kirisita xa heero nin xanuya anin lannaya di badinḡolu bee ma. ²⁴ Ala la neemo xa ke n Marigi Isa Kirisita xanubaxa jonjonḡolu bee fe.

FILIPENGOLU

1 Nte Poli nin Timote le be jin safe in kila, ntelu mennu keta Isa Kirisita la jonɗolu ti. N b'a kila Ala la moxo senumanɗolu bee ma Filipe gallo to, mennu nin Isa Kirisita kafuta, anin Ala la jama lakorosibaxolu nin a baaralalu. 2 N Fa Ala anin Marigi Isa Kirisita xa neemo nin heero di alu ma. 3 Nte xa n miiri alu ma tuma wo tuma, n si barako bula n na Ala jen. 4 Nin nte be Ala matarala alu bee jen tuma wo tuma, nte nitodiyaniɗo le be wo kela, 5 bawo alu keta nte kafuɗoxolu ti xibaru Dimanɗo fo to, kabirin folofolo fo saasa. 6 N be lanin a la xo Ala men xa jin baara puma in damuta alu to, a si taxa ɗa fo a dafalunɗo, Isa Kirisita nalunɗo. 7 A xa bete jin poxon miiriya xa ke n na alu bee la kuwo to, bawo alu la kuwo xa xole nte ma bete. Ala x'a la neemo di nte ma x'a la baaro men ke, alu bee xa do soto wo to, saasa xa nte tu kaso la, anin xa n tu Xibaru Dimanɗo lafaasala, x'a sinsin. 8 Ala mu n seedo ti xo nte be alu bee xanunin bete, i xo Isa Kirisita be n xanunin ɗa men. 9 N be Ala matarala alu jen men na, wo fele: N b'a matarala, alu la xanuya xa bunɗa xa taxa a fe, lonniya soobe nin faamuyali dafaniɗo xono, 10 walasa alu xa sin xa puma lon. Nin wo keta, alu si senuya, xa ke jalagibalolu ti Kirisita la lunɗo. 11 Alu si ke ku tilinnin kiika kebaxolu ti, Isa Kirisita barako to, mennu si nooro nin bunɗa la Ala xan. 12 N badinɗolu, n b'a fe alu x'a lon xo kuwo men xa nte soto, tonɗa la, wo keta sabaabu ti xibaru Dimanɗo xa taxa ɗa. 13 Wo ɗa ma, goferenere la xube xono moxolu, anin a xoxan-moxolu bee x'a lon xo nte be kaso la Kirisita le la kuwo to. 14 Badin lannayabaxolu tala bee x'e gigo senbe Marigi la, nte la kasolabulo koso. I xa jaxoleya soto bete, xa Ala la xumo fo x'a tara i man sila. 15 Dolu kennu be Kirisita la kuwo waajula kiiliya le xanma, xa soosolo ke. Bari do dulu b'a kela ɗanneya puma le la. 16 Wolu be i la baaro kela xanuya la, bawo i x'a lon xo nte be jan Xibaru Dimanɗo lafaasalo le xanma. 17 Bari tolu kennu be Kirisita la kuwo waajula fadinɗa le la. I ɗanneya man jin; i miiro mu le xa do kafu nte la tooro ma xa n tu kaso la. 18 Bari wo si nte fen ti. ɗanneya jaxu tarata i la wo, ɗanneya bete tarata i la wo, a keta ɗa wo ɗa, Kirisita la kuwo be waajuxan moxolu jen, wo nitodiya be nte la. N be tula wo nitodiya xono, 19 bawo n x'a lon xo alu la Alamataralu barako to, anin Isa Kirisita Niyo la deemalo fe, wo kuwolu bee si falin nte la kisilo la. 20 Nte kepeninɗo be wo le ma, anin nte gigo be wo le

xan, nte me malu abada. Bari xa nte hakilo lasiginiɗo tu, saasa, anin tuma bee, Kirisita si bunɗa nte balo to, n na nilamaya fe, walla n na saya fe. 21 Katugala nte bulu, xa nilamaya, Kirisita le mu. Nin n sata, wo mu n bulu tono le ti. 22 Bari xa tu n nila jan, nin wo si a tu n xa baara nafama ke tugun, wo to, n man a lon n si men sugandi. 23 N xono be talanin: A xa di n jen xa duniya tu, xa ke Kirisita bata; wo le ken poxon nte. 24 Bari atelu la kuwo la, n xa tu n nila, wo le xa fisa. 25 Nte be lanin wo la. Wo xanma, n x'a lon xo nte si tu n nila, xa ke alu bee senbo to, walasa alu xa taxa ɗa, xa jaxali lannaya to. 26 Wo ɗa ma, nin nte saagita nanin alu bata, nte la kuwo si ke alu jangunnaku ti xa tanbi folo xan, Isa Kirisita la kafuɗoxoya la. 27 Bari alu bosilo xa ben Kirisita la Xibaru Dimanɗo la fota ma; walasa nte taxata bo alu ma wo, n man taxa wo, nte x'alu xibaro me xo alu balanningo be miiriya kilin na, x'alu tu kelo la jusukun kilin na, lannaya nofe, Xibaru Dimanɗo be men dila. 28 Alu xana a tu alu jaxolu x'alu lasila fen si to. Wo si ke wolu la halagilo taagumanseedo ti i jen, anin xa ke taagumanseedo ti xo atelu be kisilo silo xan. Wo kuwo bota Ala le to. 29 Ala xa jin don neemo ke alu jen alu xa la Kirisita la; wo doron nte, anin alu xa tooro ate jen du. 30 Alu xa nte je kelo men na, nin alu x'a lon xo nte be wo la haalibi, alu dulu xa wo kelo poxon ke.

2 Awa, nin jusu suma si soto Kirisita la kafuɗoxoya xono, nin poxo jusudunɗo be xanuya to, nin kafuɗoxoya be sotola Ni Senunɗo fe, nin pumaya nin hinno be je, 2 al'alu miirolu ke kilin ti, xa nte la ɗapo dafa, xa i taxama benɗo xono. Alu la xanuya xa ke kilin ti, alu xonolu xa ke kilin ti, alu kilinɗa ɗinin. 3 Alu xana fusi ke fadinɗa la walla fanbunɗa xanma. Bari alu i majigi, xa tolu jaate xo i xa bun alu ti. 4 Alu si xana i miiri alu fannu kilinnu la nafa ma, alu bee kilin kilin xa i miiri to dulu la nafa ma. 5 Miiriya men tun be Isa Kirisita la, wo poxon xa ke alu dulu la: 6 Ate men tun keɗa nin Ala keɗa mu kilin ti, a man a nin Ala la xaapanɗo ke fen ti, a me bo notonin men na. 7 Bari a buruta wo bee to, xa jonɗo keɗa ta, xa ke moxolu poxonɗo ti. A x'e yita moxo ti tumo men, 8 a x'a fan majigi, xa xulu fo saya, gengenyiro xan saya fan. 9 Wo le x'a tu, Ala x'a xotota bete, xa toxo di a ma, toxo men xa bun toxo bee ti, 10 walasa fen wo fen be sanɗo to, anin duguxulo xan, anin duguxulo xoto, wolu pongi Isa toxo la; 11 anin xo

nenjo bee x'a fo xo Isa Kirisita mu Marigi ti, walasa bunja xa la n Fa Ala xan. ¹² Wo ja ma, n badin xanuningjolu, alu xa nte lame tuma bee, xa nte tu alu bata. Alu wo ke tugun xa tanbi folo xan, x'a tara nte nte alu bata. Alu xa kisilo men soto, alu baaro ke wo hukumo xono, silanpa nin jarajaro to. ¹³ Bawo Ala le be baaro kexan alu xono, a si sinjo di alu ma, alu xa ke a la ku lategeninjo xanubaxolu nin a kebaxolu ti. ¹⁴ Alu kuwo bee ke x'a tara alu man daxotoxuma nin soosoli ke, ¹⁵ walasa alu xa ke jalagibalolu nin senumanjolu ti, alu xa ke Ala dinjolu ti, fe nte mennu la jin duniya in moxo tilinbalolu nin moxo jaxu innu to. Alu xa xan xa mana i to i xo sanxulo ma loololu, ¹⁶ xa xumo di i ma men be nilamaya dila. Wo banna kela, nte kunjjo si xotota Isa Kirisita nalunjo alu la kuwo koso, bawo n na baaro nin n na sege me na ke fuwo ti. ¹⁷ Haali nin nte jelo bonta xa ke i xo sadaxo, xa kafu alu la lannaya la baaro ma, nte si papa le wo la, xa papa alu bee fe. ¹⁸ Alu dulu xa xan xa papa wo kuwo la, xa kafu nte ma xa papa. ¹⁹ Nte yilo b'a ma, nin a keta Marigi Isa sago ti, xo dondin nte si Timote ki alu ma; walasa nte du xa jusudun alu xibaruya soto xanma. ²⁰ Bawo nin ate kilin nte, moxo xote nte je, n nin men be xono ma. Alu la kuwo hanmo be ate kilin ne la soobe la. ²¹ Tolu bee be hanmela i fannu la kuwo lelu la, i nte hanmela Isa Kirisita la kuwo la. ²² Bari alu fannu x'a lon Timote x'a la xantigiya yita ja men: A nin nte xa xibaru Dimanjo baaro ke, i xo dinjo nin a fa. ²³ N hakilo b'a ma x'ate le ki alu ma, nin n xa n na lon tumo men. ²⁴ Nte be lanin a la Marigi barako to, xo a me me, nte fan si taxa alu je. ²⁵ Nte x'a mafele xo a xa xan nte xa Epaforodite lakoppa alu ma, nin wo mu nte badinxe nin nte baarakepoxo nin nte kafupoxo ti kelo to. Alu tunnu x'a ki xa na nte maakunanfenjolu ti. ²⁶ Alu bee jo loxoba tun b'a la. A tun jusukunjo be tooronin bawo alu x'a la jangaro xibaro me. ²⁷ Tonja le mu a jangaruta, fo a tun be njinin xa sa. Bari Ala hinnata a la, ate kilin nte, a hinnata nte du la, walasa jusuxasi xote xana kafu nte la jusuxaso ma. ²⁸ Wo le x'a tu, nte xa n tariya x'a ki alu ma, walasa nin alu x'a je, do xa kafu alu la papa ma. Wo to, do si bo nte la jusuxaso la. ²⁹ Nin a sita je, alu x'a kunben papaba to, Marigi toxo la. Alu xa xan xa wo joxon moxo lelu bunja, ³⁰ bawo a tun be njinin xa sa Kirisita la baaro le nofe. A bota a fan na nte deemalo le xanma, alu tunnu fannu me men no nte pen.

3 Awa saasa, n badinjolu, alu papa Marigi la kafupoxoya la. Nte tun xa xumo mennu safe xa ban, a man xole nte ma xa saagi wo fen kilinjolu safenin alu pen. Alu la nafa le be wo to. ² Alu i korosi wulumoxolu ma, alu i korosi baarajaxukelalu ma, alu i korosi paxa fuwo lafaasabaxolu ma. ³ Nte lelu mu paxanin soobelu ti, ntelu mennu be Ala batula a Ni Senunjo barako la, xa n fanbunja kunjjo ke Isa Kirisita la kafupoxoya ti. N nte n gigo lala n fannu xan. ⁴ Awa, nte

du tun s'a no xa n gigo la n fan xan. Nin a be moxo men pen xo a s'i gigo la no a fan xan, nte tun si wo ke xa tanbi wo tigo xan. ⁵ Nte paxata n wuluwo tili sago. N mu Banisirayila siya do le ti, Bensamen bonsonjo do. N mu Heburo yerewuluwo le ti. Musa la sariya to, nte keta Farisiya soobe le ti. ⁶ Nte tun be balannin ja men, fo n keta Ala la jama toorobaxo ti. N keta jalagibalo ti sariya xa tilinjinja men fo wo silo la. ⁷ Bari nte tun be wo kuwo mennu jaatenin tono ti, saasa n xa wolu jaate bono ti, Kirisita koso. ⁸ Nte be fenjo bee fan ne jaatela bono ti jin fen nafamaba in koso, nin wo mu n Marigi Isa Kirisita lonjo ti. Ate la kuwo xanma, n xa n xodi fenjo bee la, x'a bee mafele fen filita ti, walasa n xa Kirisita soto tono ti, ⁹ anin n xa tu a la kafupoxoya xono. Nte nte a jaatela tugun xo nte xa tilinjinja soto sariya labatulo fe. Nte xa tilinjinja soto Kirisita lannaya le fe, wo tilinjinja men bota Ala la, anin a be men dila lannaya fe. ¹⁰ Nte b'a njinna le, xa Kirisita lon, sinjo men be a la kuniyo to, xa wo lon, xa do soto a la toorolu to, anin n nin a xa ke kilin ti a la saya to, ¹¹ xa don gigo tu n na xo nte du si kuni xa bo furelu to. ¹² A nte xo nte xa n na fen bunta soto xa ban, walla xo nte keta moxo dafaninjo ti xa ban. Bari n be taxala ja haalibi, xa n balan xa wo soto; bawo Isa Kirisita xa nte muta xa n ke a ta ti xa ban. ¹³ N badinjolu, nte nt'a jaatela xo nte xa wo bandeero ta xa ban de! Bari nte be ku kilin ne kela: Men be n xo, nte be n hakilo bola wo kun, men be n ja, xa n balan wo nofe. ¹⁴ Nte be n borila taxanin n borikunjo ma, walasa xa bandeero ta, Ala be n kilinin men ma sanjo to, Isa Kirisita barako to. ¹⁵ Awa, alan mennu bee xoxota lannaya to, wo le xa xan xa ke n bee miiriya ti. Bari nin miiriya xote be alu la wo kuwo to, Ala fan si tonja yita alu la. ¹⁶ Ja wo ja b'a to, alan xa silo men taxama fo saasa, alan xa taxa ja wo xan. ¹⁷ N badinjolu, alu bee xa ke nte ladigibaxo ti. N keta payitolu ti, wo to, mennu b'e taxamala xa ben wo payito ma, alu wolu ladigi. ¹⁸ N dalita a fola alu pen, n xasito be saagila a ma alu pen saasa tugun xo: Moxo kiika b'a yitanin i bosilolu la xo Kirisita gengennen yiro ma, xo i mu wo kuwo jaxolu ti. ¹⁹ Wo moxolu labanjo mu halagilo le ti, bawo i la ala mu i xonodaxo le ti. Kuwo mennu xa xan xa i malu, i jangunnakuwo mu wo lelu ti. Hanme xote nte i la nin duniya kuwo lelu nte. ²⁰ Ntelu kennu fasuwo be sanjo to le. N be n Kisibaxo, Marigi Isa Kirisita laxononin xa bo non. ²¹ A si n bala barakentan sata yeleva, x'a ke a fan bala nooroma joxonjo ti. A si wo ke a la sintigiya la, men be fen bee xulula a pen.

4 Nte badin xanuningjolu, a loxoba be nte la x'alu je. Ate lelu mu nte la papa kunjjo ti. Ate le dulu mu nte kunxotota sabaabo ti. Alu i balan xa tu Marigi la kafupoxoya xono. ² Nte be n badinmusu Efodi nin Sentise tarala, xo i x'e xono ke kilin ti Marigi la kafupoxoya xono. ³ Ite du, n baarakepoxo xankilintigo, n

b'é tarala xo í xa wo musolu deema. Wolu tunnu nin nte kafuta xa kelo ke, nin wo mu xibaru Dimanḡo fo ti, wolu nin Kileman anin nte baarakeḡoxo tolu. I bee toxo be safenin nilamaya bukko xono. ⁴ Alu ḡaḡa tuma bee Marigi la kafuḡoxoya la. N' be saagila a ma, alu ḡaḡa. ⁵ Alu sabaro yita moxolu bee la. Dondin Marigi si na. ⁶ Alu xana hanme fusi la, bari ku wo ku je na alu ma, alu Ala matara wo la, x'a xoleya, x'a nin barakebulo kafu. ⁷ Nin wo keta, Ala la heero men xa bun hadamadinḡolu la miiriyalu bee ti, wo si alu jusukunḡolu nin alu miirolu mara Isa Kirisita la kafuḡoxoya xono. ⁸ Awa saasa, n' badinḡolu, n' na xuma labanḡo mu men ti wo fele: Nte b'a fe xo kuwo fen wo fen mu tonḡa ti, bunḡa si soto fen wo fen to, ku wo ku be tilinnin, kuwo mennu xa senu, kuwo mennu xa di Ala ḡen, kuwo mennu fo be bennin, jigo mennu xa ḡin, moxo si tantu kuwo mennu to, alu la jaate xanta xa la wo lelu bee xan. ⁹ Alu laxaranta men na, alu xa men soto, alu xa men me nte la, alu xa men je nte la, alu wolu bee ke. Nin wo keta, Ala men mu heero tigo ti, wo si ke alu fe. ¹⁰ Nte be ḡaxalibetela Marigi la kafuḡoxoya la, bawo alu x'a yita tugun xo nte la kuwo be alu xono. Wo miiriya tun be alu la kabirin xotonin, bari alu tunnu man a keḡa le soto folo. ¹¹ Nte nte xumala ten bawo nte maakuwo be fen do la. Men be n' bulu, nte dalita xa muta ke wo ti. ¹² Nte xa n' keḡa lon bulu-toxulunḡa xono, xa n' keḡa lon fentigiya xono. Ku wo

ku to, ḡa wo ḡa, xa fa wo, xa tu xonxo la wo, xa fentigiya wo, xa bulutoxulunḡa wo, nte dalita a bee la. ¹³ Nte si sin xa wo bee ke Kirisita le barako la; ate le be nte barako bunḡala. ¹⁴ Wo bee nin a ta, alu xa men ke, xa nte deema n' na toorolu waxato, wo keta ku beto le ti. ¹⁵ N' badin Filipengolu, alu fannu x'a lon xo kabirin nte xa xibaru Dimanḡo waajulo damuta waxato men, nin nte bota Maseduwane jamano la, nin alu la jama kilin nte, Ala la jama xote man ke nte kafuḡoxo ti, nilo nin soto la. ¹⁶ Haali nte be Tesalonike tumo men, alu xa nilifenḡo ki nte ma í xo sinḡa fula, xa n' maakuwo ḡiḡa. ¹⁷ A nte xo nte be nilifenḡo lelu ḡininxan. Nte b'a fe alu la kebaara ḡuma le xa siya, xa jaate alu ḡen. ¹⁸ Alu xa fen fen ki n' ma, n' xa i bee soto. Epaforodite nata wolu di nte ma tumo men, n' maakuwolu ḡiḡata. Wo keta í xo sadaxa sumadimanḡo; Ala be wo ḡoxon sadaxa le fe, x'a muta. ¹⁹ Nte la Ala si alu maakunfenḡolu bee di alu ma, x'a la a la fentigiyaba maḡoxonjebalo xan, Isa Kirisita la kafuḡoxoya barako to. ²⁰ Tanto be n Fa Ala ḡen fo abada. Amiini! ²¹ Alu Ala la moxo senu-manḡolu kilin wo kilin xonton, mennu be Isa Kirisita la kafuḡoxoya xono. Nte nin badinḡo mennu be jan, wolu bee be alu xontonna. ²² Ala la moxo senu-manḡolu bee be alu xontonna; sakuta mennu be baaro kela mansaxe la luwo xono, wolu be alu xontonna. ²³ Marigi Isa Kirisita la neemo xa ke alu bee fe.

KOLOSENGOLU

1 Nte Poli, nte men mu Isa Kirisita la kiladinño ti, x'a la Ala sago xan, anin n badinxé Timote, ² nte lelu be pin safe in kila n badinñolu ma, senuman xantigolu Kirisita la kafupoxoya xono, mennu be Kolose gallo to. N Fa Ala xa neemo nin heero ke alu pen. ³ N be barako bulala n Marigi Isa Kirisita Fa Ala pen tuma bee, nin n be Ala matarala alu pen. ⁴ Lannaya men be alu la Isa Kirisita la, n xa wo xibaro me anin xanuya men be alu la, moxo senumanñolu bee pen. ⁵ Alu be wo kela gigo xono, men be maranin alu na sanño to. Wo gigo kufota alu pen tonña xumo fe, nin wo mu xibaru Dimanño ti. ⁶ Xibaru Dimanño be jenenxan xa nafa ke duniya bee xono, í xo a x'a ke alu tema na men, kabirin lun folo men, nin alu xa Ala la neemo kume anin x'a lon a mu men ti tonña la. ⁷ N baarakepoxo xanuninño Epafarasi le xa xaranño di alu ma wo kuwo la. A be baaro kela alu pen í xo Kirisita la baarakedin xantigo. ⁸ Ni Senunño xa xanuya men di alu ma, a xa wo fo n pen. ⁹ Wo le x'a tu, kabirin n x'alu la xibaruya me, n nte Alamatara dabulala alu pen. N b'a njinna Ala fe alu x'a sago lon bete, anin alu xa hakilitigiya nin faamuyalo soto Ni Senunño fe. ¹⁰ Wo na ma, alu si sin no x'e taxama x'a ben Marigi sago ma, x'a diyanpekuwo ke tuma bee. Alu si ku beto sifa bee ke, anin xa taxa na Ala lonño to. ¹¹ N be a njinna a fe, xo a xa barako di alu ma kuwo bee to, a la sintigiya nooroma la, walasa alu xa sin xa kuwo bee kun muño to. ¹² Alu napaninño xa barako la n Fa Ala pen, ate men xa sinño di alu ma xa nidula soto senumanñolu la ke to, men be keneya xono. ¹³ A xa n bo dibo fango bulu, xa taxa n ti a Dinxe xanuninño la mansaya xono. ¹⁴ Ate le barako to n kunbota, n na junubolu yaafata. ¹⁵ Kirisita mu Alajebalo mununño le ti. A xa dafenñolu bee saawa. ¹⁶ Bawo fenño bee data ate le fe, sanño to anin duguxulo xan, fen jetalu nin fen jebalolu, mansayalu, marigiyalu, kuntigiyalu, fangolu. Fenño bee data ate le fe anin ate le pen. ¹⁷ A tun be je kabirin dafen si man da, ate le du barako to, nin fenño bee b'a no to. ¹⁸ Ate le mu balo kunño ti, nin wo mu Ala la jama ti. Ate le mu damuto ti. Ate le mu folo ti xa bo furelu to, walasa a xa foloya soto kuwo bee to. ¹⁹ Bawo a diyata Ala pen x'a la dafaninña bee lasigi a Dinxe to. ²⁰ Ate le fe, nin a xa benño ke a nin fen bee te: Mennu be duguxulo xan, anin mennu be sanño to. A xa benño ke i te a jelu boninño fe, gengeniyero xan. ²¹ Ate mennu nin Ala te tun

xa jan folo, alu tunnu mu a jaxo lelu ti jaxumanño mi-iriya nin a ko koso. ²² Bari saasa, Ala xa benño ke alu nin a te, a Dinxe la saya fe, x'a moxoma balo tu a ma. A xa wo ke walasa alu senumanño nin alu fentanño nin alu jalagibalo xa lo a na xoto. ²³ Bari alu xa xan xa tu lannaya xono, xa tu siginin bete jusigilan xolenñolu xan. Alu xa gigo men soto xibaru Dimanño lamelo fe, fusi xana wo lasoto alu la. Wo Xibaru Dimanño waajulo keta hadamadinñolu bee pen duniya xono. Nte Poli keta baaradinño ti wo Xibaru Dimanño fo le xanma. ²⁴ Saasa, nte be paxalila toorolu la, n be mennu xono alu koso. Tooro mennu tuta Kirisita pen xo, nte be wolu dafala n balasubo to ate balo pen, nin wo mu Ala la jama ti. ²⁵ N keta Ala la jama la baarakedinño ti, x'a la baaro xan, Ala xa men xarifa nte ma xo n x'a ke alu pen: A xa nte bula Ala la xumo fola x'a dafa, ²⁶ nin wo mu a la gullo ti, a tun xa men tu dugunin hadamadinñolu bee ma kabirin waxati jan. Bari saasa, Ala x'a yita a la moxo senumanñolu la. ²⁷ Bawo a diyata Ala pen xa wo gullo yita i la, dan nte men nafa ma, anin dan nte men nooro ma, a xa men toben siyalu bee pen. Wo gullo fele: Kirisita be alu xono, nin wo mu alu la nooro sotota gigo ti. ²⁸ N be Kirisita la kuwo waajulo le kela hadamadinñolu bee pen. N be bee lasobila anin xa bee xaran hakilitigiya dafaninño to, walasa moxo bee xa dafa Kirisita la kafupoxoya xono. ²⁹ Wo le x'a tu, nte be baaro kela anin xa kelo ke Kirisita barako la, men be baaro la nte to, sintigiya to.

2 N b'a fe alu xa nte la kelo xoleya lon, n be men na alu pen, Lawodisengolu pen, anin kiika xotelu pen, mennu man nte je abada. ² Nte b'a fe wo na ma x'e jusudun, anin i xa xanben xanuya to, i xa faamuyali dafaninño soto, xa Ala la gullo lon. Wo gullo mu Kirisita le ti. ³ Hakilitigiya nin lonño bee juwo duguninño be ate le to. ⁴ Nte be wo fola walasa moxo si xana alu lafili xumaxan dimanñolu la. ⁵ Haali nin nte xunturo nte alu bata, n be alu bata n hakilo la. Nte be napanin bawo n x'a je xo alu be alu lono to, anin xo alu sinsinningo be alu la lannaya to, Kirisita la. ⁶ Awa, x'a la a xan alu son-ta Isa Kirisita ma, xo a le mu Marigi ti, alu i taxama a la kafupoxoya xono. ⁷ Alu i lillidun anin xa jusigi ate kafupoxoya to, xa sinsin lannaya to, í xo alu laxaranta a ma na men. Walepumalonño kiika xa bo alu la. ⁸ Alu i korosi moxo si xana alu neene lafililixumolu nin xuma toxulunñolu la, mennu be bola hadamadinñolu la

hakilitigiya xono: Wolu be tanin hadamadinḡolu la laadolu ma, anin fangolu mennu be ḡin duniya in kunna, i nte tanin Kirisita ma. ⁹ Bawo Ala la dafaninḡa balama bee be siginin ate to. ¹⁰ Alu xa fenḡo bee soto x'alu wasa ate le barako to, ate men be kuntigiyalu nin fangolu bee kunna. ¹¹ Alu nin ate la kafuḡoxoya xono, alu ḡaxata ḡaxalo men nte hadamadinḡolu ta ti, bari ḡaxalo men keta Kirisita fe, men x'alu bala junubema bo alu la. ¹² Awa, alu batiseta tumo men, alu nin Kirisita lasita i ḡoxo fe, alu nin a kunita du i ḡoxo fe, bawo alu lata Ala la sintigiya la, men x'a lakuni xa bo furelu to. ¹³ Folofolo, alu tunnu saninḡo le mu alu la junubolu nin alu la ḡaxabaliya koso. Bari saasa, Ala x'alu nin Kirisita nilamaya i ḡoxo fe. A xa n na junubolu bee yaafa. ¹⁴ Jalagisafe men tun be n xanma n na sariya tipalo koso, a xa wo lasanko. A x'a gengen yiro ma. ¹⁵ A xa kuntigolu nin fangatigolu la sinḡo bo i bulu, x'e ke jelefenḡo ti. A xa sinḡo soto i xan Kirisita gengenyiro le barako to. ¹⁶ Wo le x'a tu, alu xana son moxo si x'alu jalagi domolifen ku walla minfen ku to, anin salli ku walla xaru kuta ku, walla tofoḡolun ku to. ¹⁷ Wo kuwolu bee mu fen natalu niiniyo lelu ti, bari tonḡa fan, wo mu Kirisita le ti. ¹⁸ Alu xana a tu moxo si x'alu bali x'alu la kunnawulijala soto a la fu fanmajigo, walla a la melekebato la. Wo moxo sifalu be i la jelifenḡolu jaatebetela. I be bunḡaba fuwo dila i fannu ma i la hadamadin miiriya gansanḡolu fe. ¹⁹ I nte tula sitinin Kirisita la, wo men mu kunḡo ti. Ate le ken barako to, nin balo muume be balunin x'e ḡoxo muta bete, xa tu kilin ti, xulutugudalu nin xulukunnafasolu fe, anin a be bunḡala í xo a xa di Ala ḡen ḡa men. ²⁰ Alu nin Kirisita sata i ḡoxo fe, fango mennu be ḡin duniya in kunna, alu bota wolu bulu. Wo to, mun na alu be i taxamala a be í xo nin alu be dennin ḡin duniya in ne la, xa son ḡin sariya sifa innu xa la alu xan: ²¹ «Í xana ḡin ta», «í xana ḡin nene», «í xana maxa ḡin na»? ²² Wo fenḡolu bee be banna le, nin i x'e maakuwo ḡan i la. Wolu mu hadamadinḡolu la ku lategeninḡolu anin i la xaranḡo lelu ti. ²³ Wolu be bonin hakilitigiya fe moxolu ḡala, x'a la i la batulijḡa xan, men be bola moxo la, anin i la fu fanmajigo nin i fannu balasubo toorolo. Bari nafa nte wolu si la. Hadamadinḡo nidiyanḡekuwo doron nelu mu.

3 Alu nin Kirisita kunita i ḡoxo fe xa bo furelu to. Wo to, fenḡo mennu be sanḡo to, alu wolu ḡinin, Kirisita be siginin jan men, Ala kininḡo xoto. ² Alu i miiro lataxa sanḡo to fenḡolu ma, alu xana i miiro lataxa duguxulo xan fenḡolu ma. ³ Bawo alu sata le; anin, alu la nilamaya nin Kirisita be dugunin Ala to. ⁴ Alu la nilamaya, nin wo mu Kirisita ti, wo je í yita lun men, wo lunḡo, alu dulu nin a si yita nooro dafaninḡo to. ⁵ Fen wo fen mu duguxulo xan jigo ti, alu wo bee faxa: Jadoya nin kunoxoninko nin jaxumanḡo nego nin neḡe jaxo sifa bee, anin wasabaliya, bawo wasabaliya mu

bolibato do le ti. ⁶ Wo kuwo lelu b'a tula Ala la diminḡo be boyila a soosobaxolu to. ⁷ Alu jigo le tun fele xotonin, tumo men, alu tunnu be ḡin junube innu xono. ⁸ Bari saasa, alu wo bee dabula: Diminḡo, jusubo, anin jaxuya. Nanili walla xuma jaxu si xana bo alu da. ⁹ Alu xana faniya fo i ḡoxo ḡen, bawo alu x'alu jigo xoto nin a la kewalolu bo alu la, ¹⁰ xa jigo kuto dun alu to. Alu mu moxo kuto lelu ti, n Dabaxa Ala be tula xa mennu tokutaya x'a ben a fan mununḡo ma, walasa alu xa lon dafaninḡo soto a la kuwo to. ¹¹ Awa, í keta Gereki ti wo, walla Yahudiya, í ḡaxata wo, walla í man ḡaxa, í keta luntan ti wo, walla wulaxono moxo, í keta jon ti wo, walla hooro, wo si nte jaatela. Men be jaatela, wo mu Kirisita le ti, wo men mu fenḡo bee ti, anin a be bee xono. ¹² X'a la a xan Ala x'alu sugandi, x'alu senuya, x'alu xanu, wo xanma alu hinna i ḡoxo la, xa ḡuma ke i ḡoxo ḡen, x'e majigi i ḡoxo ḡen, xa sabari anin xa muḡa. ¹³ Alu muḡa i ḡoxo ḡen. Nin do dunta do gaso to, alu xa yaafa i ḡoxo ma. Marigi yaafata alu ma ḡa men, alu dulu xa yaafa i ḡoxo ma ten. ¹⁴ X'a kafu wo bee ma, alu i ḡoxo xanu, bawo xanuya le mu kilinḡa dafalanḡo ti. ¹⁵ Kirisita la heero xa sigi alu jusukunḡolu la. Ala x'alu kili wo heero le xanma, x'alu bee ke bala kilin ti. Alu ke waleḡuma lonbaxolu ti. ¹⁶ Kirisita la xumo nin a nafa bee xa sigi alu to. Alu i ḡoxo laxaran, x'e ḡoxo lasobi hakilitigiya dafaninḡo to, Jaburu donkilolu la, tantuli donkilolu la, anin Ni Senunḡo la donkili dinmaninḡolu la. Alu donkilo la Ala ḡen alu jusukunḡo bee la, xa barako bula a ḡen. ¹⁷ Alu be ku wo ku kela, xuma wo, walla kewale, alu wo ke Marigi Isa toxo la, xa barako la n Fa Ala ḡen ate barako to. ¹⁸ Musolu, alu xulu alu xelu ḡen í xo a xa xan ḡa men Marigi ḡa xoto. ¹⁹ Xelu, al'alu musulu xanu, alu xana xutu mara í xono i ma. ²⁰ Dinḡolu, al'alu wulubaxolu lame kuwo bee to, bawo wo le xa di Marigi ḡen. ²¹ Falu, alu xana alu dinḡolu ladimin, nin wo nte, i si timinakuwa. ²² Jonḡolu, marigo mennu be alu ma ḡin duniya in to, alu wolu lame kuwo bee to. Alu xana baaro ke i ḡen xo bawo alu be lakorosinin, í xo nin alu b'a ḡininna le x'alu kudiya moxolu ḡen. Bari alu baaro ke i ḡen xono xoyiya to, í xo moxo mennu be silala Marigi ḡa. ²³ Alu be baara wo baara kela, alu a ke alu jusukunḡo bee la, í xo nin alu be a kela Marigi le fan ḡen. Alu xana a jaate moxolu ḡen ti. ²⁴ Alu a lon xo Marigi si ke di alu ma sara ti. Alu baaro ke Kirisita ḡen, wo men mu Marigi ti. ²⁵ Moxo wo moxo je tilinbaliya ke, wo tigo si a la tilinbaliya sara soto, bawo Ala nte moxo fisiyala moxo ti.

4 Marigolu, al'alu la jonḡolu mutakubete tilininḡa la, x'a lon xo Marigo be alu dulu ma sanḡo to. ² Alu i timinadiya Alamata la. Alu tu i ḡala wo la, xa barako bula Ala ḡen. ³ Alu Ala matara ntelu dulu ḡen, walasa Ala xa da do yele n ḡen x'a la xumo fo, xa Kirisita la kuwo gullo fo. Nte be kaso la saasa wo le nofe. ⁴ Alu Ala matara n ḡen walasa n xa sin xa wo gullo fo a

foɗa ma. ⁵ Mennu nte lannayabaxa ti, alu i taxama hakilitigiya la wolu mafan, xa waxato tomuta bete.

⁶ Horomo xa ke alu la xumolu to tuma bee, anin i xa ke xuma nafamalu ti. Alu moxo bee jaabina puma lon.

⁷ Tisike, men mu n badinxe xanuninɗo anin n baarakepoxo xantigo ti Marigi la baaro to, wo si nte xibaruyalu bee lasi alu ma. ⁸ Nte b'a kila alu ma jin ne xanma, walasa a xa ntelu xibaruya di alu ma, anin a x'alu hakilo lasigi. ⁹ N badinxe xantigo nin xanuninɗo, Onesime, men mu alu do ti, wo le b'a dandanna. Kuwo mennu be kexan jan, i si alu lalon wolu bee la. ¹⁰ Arisitarake, men nin nte be kaso la, wo be alu xontonna, anin Maraka, nin wo mu Baranabasi badinxe ti. Maraka la kuwo ɗafota alu jen xa ban: Nin a nata alu bata, alu a mutakubete. ¹¹ Isa men be kilila xo Yusitusi du be alu xontonna. Wolu doronnu Yahudiya lelu nin nte be

baaro la Ala la Mansaya jen. I keta nte hakililasigo ti.

¹² Epafarasi men du mu alu do ti, wo be alu xontonna.

Isa Kirisita la jonɗo le mu, men nte Alamatara kelo dabulala alu jen walasa alu xa tu sinsinnin, xa dafa anin xa son Ala sago bee ma. ¹³ Nte mu a seedo ti xo alu hanmo b'a la bete, atelu nin Lawodise lannayabaxolu anin Hiyerapolisi lannayabaxolu. ¹⁴ N xanunte dogotooro Luka nin Demasi be alu xontonna. ¹⁵ Alu Lawodise badinɗolu xonton, anin Ninfa nin Ala la jama men be kamarila a la luwo ma. ¹⁶ Nin alu xa n na safe xaran, alu i balan Ala la jama men be Lawodise du x'a xaran. Men du je bo Lawodise, alu dulu xa wo xaran.

¹⁷ Alu a fo Arasipe jen xo: «Marigi xa baaro men xarifa í ma, í hakilo tu wo la, x'a ke x'a dafa.» ¹⁸ Nte Poli fan bulo le be jin xontonna xuma innu safela: Alu xana ɗi-xo xo n be kaso la. Ala la neemo xa ke alu fe.

1 TESALONIKENGOLU

1 Nte Poli nin Silifen anin Timote le be jin safe in kila n Fa Ala nin Marigi Isa Kirisita la jama ma, men be Tesalonike. Ala xa neemo nin heero di alu ma. ² N be barako lala Ala jen tuma bee alu la kuwo la, xa n hakilo tu alu bee kun n na Alamataralu to. ³ Nin n be n Fa Ala matarala, n miiro be tula alu kun, bawo alu x'alu la lannaya yita kewalolu la, x'alu la xanuya yita kebaarolu la, anin alu gigo sigininjo be N Marigi Isa Kirisita xan bete. ⁴ N badinjo, n x'a lon xo Ala keta alu fe, anin xo a x'alu sugandi x'alu ke a ta ti, ⁵ bawo n xa xibaru Dimanjo lasi alu ma tumo men, n man a ke xuma gansanjo la; bari n x'a ke barako to anin Ni Senunjo la deemalo la. N x'a lon du xo n xa men fo alu jen, wo mu tonja le ti, sikka nte a to. Xa n tu alu bata, n bosilo keta men ti, alu xa wo je. N xa wo ke alu la nafa xanma. ⁶ Alu keta ntelu ladigibaxolu ti, anin Marigi ta, bawo alu xa tooro kiika soto. Bari haali wo, alu xa Ala la xumo muta najo to, Ni Senunjo barako to. ⁷ Wo ja ma, alu xa sila beto yita Maseduwane maro nin Akayi maro lannayabaxo bee la. ⁸ Atelu keta sabaabu ti, Marigi la xumo xa me dula kiika, men nte Maseduwane nin Akayi doron ti. Alu la lannaya fota dula bee, fo ntelu maaku nte a la xa wo ja fo tugun. ⁹ N naninma alu bata, alu xa n muta ja men, anin alu xa i xodi bolikuwo la ja men, x'e jadi Ala soobe nin Ala nilama la, xa baaro ke wo jen, i be wo fola. ¹⁰ Alu b'a Dinxe nalo laxononin xa bo sanjo to, a Dinxe Isa, a xa men nakuni xa bo saya to. Ate xa n kisi Ala la kiito masiibo ma, men be nanin.

2 N badinjo, alu fannu x'a lon xo n na taxo man ke fu ti alu bata. ² Alu x'a lon du xo n toorota xa n nani Filipe gallo to; bari wo xo, Ala xa barako di n ma n x'a la xibaru Dimanjo fo alu jen, haali x'a tara moxolu tunnu b'a fe xa n bali xa wo ke. ³ N na waajulo nte siginin faniya nin noxo xan, n nte a njinna du xa moxo lafili. ⁴ Bari n be xumala tuma bee i xo Ala b'a fe ja men; ate men lata n na x'a la Xibaru Dimanjo xarifa n ma. N nte a njinna xa n kudiya moxolu jen; bari Ala jen, wo men be n jusukunjo mafelela. ⁵ Alu x'a lon xo n man datodiyaxuma si fo n na xumolu xono, abada n man xuma nata la. Ala mu n seedo ti wo la. ⁶ N man a njin moxo xa n tantu, atelu wo, moxo tolu wo. N tunnu s'a no xa n na fango sigi alu xan, bawo n mu Kirisita la kiladinjo ti. ⁷ Bari n xonotodiyata alu xoto i xo dinbatigo b'a dinjo topotola ja men. ⁸ N keta alu

fe ja men, fo n tunnu be tobennin xa Ala la Xibaru Dimanjo di alu ma. Wo doron nte, bari haali n niyo, n tunnu si bo a la alu jen, bawo alu la kuwo diyata n jen jaxu. ⁹ N badinjo, alu hakilo b'a la n xa baaro ke ja men anin n segeta ja men ma. Xa n tu Ala la Xibaru Dimanjo waajula alu jen, n xa baaro ke suwo nin tilo, walasa n xana den alu do la. ¹⁰ Xa n tu alu bata, n xa bosila xoyiman tilinninjo anin jalagibalo men ta alu lannayabaxolu ma, alu nin Ala si n seedeya wo la.

¹¹ Alu x'a lon du, xo n keta alu kilin wo kilin jen i xo fa be a dinjo jen ja men. ¹² N x'alu jusudun x'alu tonben, x'alu x'e balan x'e taxama i xo Ala la yerewuluwolu; ate men be alu kilila, xa dun a la Mansaya nooroma xono. ¹³ N be barako bulala Ala jen tuma bee, bawo, n xa Ala la xumo lasi alu ma tumo men, alu man a mafele moxo xuma ti; bari alu x'a lame x'a muta Ala la xumo ti. Tonja, Ala la xumo le mu. Wo xumo be baaro kela atelu lannayabaxolu xono. ¹⁴ N badinjo, Ala la jama men be lanin Isa Kirisita la Yude maro la, alu keta wolu noxonjo ti. Bawo Yahudiyalu xa wolu tooro ja men, alu dulu badinjo x'alu tooro ten. ¹⁵ Wo Yahudiya lelu xa Marigi Isa faha, xa kilalu faha, xa ntelu dulu tooro. I ku man di Ala jen. I mu moxolu bee jaxo lelu ti. ¹⁶ I b'a njinna xa n bali xa kisilo xumo fo siya tolu jen. Wo ja ma, i b'a ma xa do kafu i la junubolu ma tuma bee, fo xa si a danjo ma. Bari Ala la diminjo labanta boyila i xan. ¹⁷ N badinjo, ntelu kennu nin alu fatata waxatindin xono, jada nin jada la, bari jusukunjo la nte. Alu jo loxoba tun be n na, fo n xa kuwo bee ke walasa n x'alu je. ¹⁸ A tun diyata n jen x'e koppa alu bata. Nte Poli fan x'a mafele xa na alu je, sinja kilin nte, bari Sentane xa n bali. ¹⁹ Jon mu ntelu gigo nin n na nitodiya nin n na kunxotota sabaabo ti Marigi Isa ja xoto nin a nata? Atelu nte ba? ²⁰ Iyo, ate lelu mu n na bunja nin n na najo sabaabo ti.

3 N man alu xibarusotobaliya muja tumo men, n x'a latege n kilinnu xa tu Atene, ² xa n badinje Timote ki alu ma. N nin ate be Ala la baaro kela, nin wo mu Kirisita xibaru Dimanjo fo ti. N x'a ki alu ma, walasa a x'alu la lannaya sinsin, xa do kafu alu juso ma; ³ walasa alu si xana silo bula bi toorolu xanma. Alu fannu x'a lon xo n xa xan xa tooro. ⁴ Xa n nin alu tu i noxo xan, n x'alu lasobi xo n si tooro soto. Alu x'a lon xo wo le naninjo je. ⁵ N korita alu xibarusotobaliya mujala tumo men, n xa Timote ki alu ma, a xa taxa a

mafele alu la lannaya be jan men. ¹ N tun be silanin Sentane xana tara alu neenenin x'alu lafili, xa n na baaro ke fuwo ti. ⁶ Bari Timote birin nala n ma saasa, xa bo alu bata. A xa xibaruya dimanngo di n ma alu la lannaya nin alu la xanuya xan. A xo du xo alu hakilo be n na tuma bee, anin xo a xa di alu nen xa n je, í xo n dulu b'a fe x'alu je na men. ⁷ Wo na ma, n badinngolu, xa n tu sege nin tooro bee xono, alu la lannaya le xa n hakilo lasigi. ⁸ Saasa n niyo saagita, bawo alu sinsinningo be Marigi xan. ⁹ Alu la kuwo be n napanin Ala na xoto na men, fo n man a lon n si men fo xa barako bula a pen. ¹⁰ Su nin tili, n b'a matarala na bee ma nin n nin alu s'i noxo je tugun, walasa men be alu la lannaya nen xo, n xa wo kafu a ma. ¹¹ N Fa Ala fan anin n Marigi Isa xa n na silo xoyiya fo alu bata. ¹² Marigi x'a tu alu x'e noxo xanu bete, xa moxo bee xanu bete, í xo ntelu be alu xanunin na men. ¹³ Wo na ma, a si barako di alu ma walasa alu xa senuya, xa ke jalagibalo ti n Fa Ala na xoto, n Marigi Isa nin a la senumannolu bee nalunngo.

4 Nin wo bota je, n badinngolu, n tunnu x'a yita alu la, alu xa xan x'e taxama na men, walasa alu ku xa diya Ala nen. N x'a lon xo alu be í taxamala wo na ma xa ban. Bari n be alu tarala Marigi Isa toxo la, xo alu xa i balan xa do kafu wo ma. ² N xa xaranngo mennu di alu ma Marigi Isa la xan to, alu xa wolu lon. ³ Ala sago mu le, alu xa i senuya, x'alu fannu tanga fuyanpa ma. ⁴ Alu bee xa i musu ta senuya to, anin na beto ma. ⁵ Alu xana alu fannu bula alu niyo diyanngo bulu í xo Alalonalolu. ⁶ Moxo si xana dun a badinngo gaso to wo kuwo to, x'a toonjo. N x'a fo alu nen, x'alu lasobi a la xa ban xo mennu be wo kuwolu kela, Marigi si wolu nangi. ⁷ Bawo Ala man n kili noxoninpa xanma; a xa n kili senuya le xanma. ⁸ Wo to, men je í ban pin xaran in to, wo man í ban moxo to, bari a xa í ban Ala le to, wo men x'a Ni Senunngo di alu ma. ⁹ Men mu noxoxano ti, alu maaku nte a la tugun xa do fo alu nen wo xan. Ala fan be alu laxaranna wo la. ¹⁰ Alu be Maseduwane lanayabaxolu bee xanunin. Bari n b'a njinna alu fe, alu xa do kafu wo ma tugun. ¹¹ Alu i balan benngo xa tu alu nin moxolu te, alu x'alu fannu kunkuwolu nabo, alu fannu xa baaro ke í xo n dalita xa wo xoleya alu ma na men. ¹² Nin alu xa wo ke, moxo tolu si alu bunpa. Wo to, alu me den moxo si la. ¹³ N badinngolu, mennu banta, n nte a fe alu xa tu lonbaliya xono wolu la kuwo to, walasa alu juso xana xasi í xo tolu, gigi nte mennu la. ¹⁴ Nin n lata a la xo Isa sata xa kuni, n xa la a la du xo Isa la moxo mennu sata, Ala si wolu lakuni Isa barako la. ¹⁵ Saasa, n be nala men fola alu nen Marigi la fo to, wo fele: Alan mennu nilama je tara Marigi nalunngo, n nte bulala moxo saninngolu na. ¹⁶ Bawo yanmaruya dita doron, meleke kuntigo do si xuma, Ala la buutuwo si fo, Marigi fan si jigi xa bo sanngo to. Wo to, moxo men nu sata x'e tu Kirisita la silo xan, wolu si kuni folo. ¹⁷ Wo

xo, ntelu mennu je tara í nila, n nin i bee si ta i noxo la xabolu xan, xa taxa Marigi kunben fojo fe. Wo xo, n nin Marigi si tu i noxo fe fo abada. ¹⁸ Alu i noxo hakilo lasigi wo xumolu la.

5 N badinngolu, fenngo men mu Marigi la na tumo nin a waxato ti, alu maaku nte a la moxo xa safe ki alu ma wo la. ² Bawo alu fannu x'a lon xo Marigi la lunngo si na í xo sunngo be nala na men suwo to. ³ Moxolu je a fo tumo men xo: «Heera be je, tooro nte!», wo to doron, kasaaro si na x'e ju xa boyi i xan, í xo tinngo be musu xonoma jula na men. I me kisi wo ma abada. ⁴ Bari atelu n badinngolu, alu nte dibo to, fo wo lunngo si alu ju í xo sunngo be moxo jula na men. ⁵ Alu bee mu keneya ta lelu ti, anin tiliya talu. Alan nte suwo nin dibo talu ti. ⁶ Wo to, alan xana sinnoxo í xo tolu, bari alan xa tu i nala, xa n fannu muta. ⁷ Mennu be sinnoxola, i be sinnoxola suwo le to; men dulu b'e fala dolo la, i b'e fala wo la suwo le to. ⁸ Bari ntelu mu tilo ta lelu ti; wo to, alan xa n fannu muta. Alan xa lannaya nin noxoxano ke xa n fannu lakanta, í xo sorodaso b'a fan nakan-tala a la negedoroko la na men. Alan gigo xa ke a ma xo Ala si n kisi, wo si ke í xo nin n xa negekufuno dun í kunna. ⁹ Ala man n sugandi walasa a x'a la diminngo laboyi n xan; a xa n sugandi le, nin a si kisilo di n ma, n Marigi Isa Kirisita barako to. ¹⁰ Ate sata n pen, walasa n tuta i nila wo, n sata wo, n nin a xa nilamaya i noxo fe. ¹¹ Wo xanma, alu i noxo tonben, xa do kafu i noxo barako ma, í xo alu je a ma x'a ke na men. ¹² N badinngolu, n be alu tarala xo Marigi xa mennu bula baaro la alu to, alu xa wolu bunpa. A xa wolu bula alu kunna, walasa i xa alu laxaran a la silo la. ¹³ Alu i jaate bete, x'e xanu i la baaro xanma. Benngo xa ke alu nin i noxo te. ¹⁴ N badinngolu, n be alu tarala du, xo alu xa salabaxantunngolu tonben, xa do kafu jusodoxonngolu juso ma, xa barakentanngolu deema. Alu mupa bee xoto. ¹⁵ Alu i korosi, moxo si xana jaxumannjo sara jaxumannjo la, bari alu a njin xa betemanngo ke i noxo nen tuma bee, anin moxolu bee nen. ¹⁶ Alu paxali tuma bee. ¹⁷ Alu xana Alamatara dabula. ¹⁸ Alu barako bula Ala nen kuwo bee to, bawo Ala sago mu wo le ti alu nen, atelu mennu nin Isa Kirisita kafuta. ¹⁹ Alu xana Ni Senunngo dube. ²⁰ Alu xana kilalu la xumolu mafele fuwo ti. ²¹ Alu wo xumolu bee segesege, xa betemanngo mara. ²² Alu xa ku jaxo sifa bee je x'a tu je. ²³ Heeratigi Ala fan xa ke alu muume bee senuyabaxo ti, x'alu ke a ta ti. Alu muume, nin wo mu alu niyo nin alu jusukunngo nin alu balo ti, wo jalagibalo xa tu fo Marigi Isa Kirisita nalunngo. ²⁴ Alu kilibaxo mu xantigo le ti, ate le fan be wo kela. ²⁵ N badinngolu, alu Ala matara n pen. ²⁶ Alu badinngolu bee baataya xonton. ²⁷ N b'a xoleyala alu ma Marigi toxo la, xo pin safe in xa xaran badinngolu bee nen. ²⁸ N Marigi Isa Kirisita la neemo xa ke alu fe.

2 TESALONIKENGOLU

1 Nte Poli nin Silifen anin Timote le be jin safe in kila n Fa Ala nin Marigi Isa Kirisita la jama ma Tesalonike. ² N Fa Ala nin Marigi Isa Kirisita xa neemo nin heero di alu ma. ³ N badinḡolu, n xa xan xa barako la Ala jnen tuma bee, alu la kuwo la. A be bennin bete n xa wo ke, bawo alu be taxala ja lannaya to, anin du do be kafula alu la joxoxano ma xa taxa a fe. ⁴ Wo keta ntelu kunxotota kunḡo ti Ala la jama jaala dula tolu, bawo haali x'a tu moxolu be alu toorola, x'alu jaani, alu muḡata xa lannaya ke. ⁵ Wo b'a yitala xo Ala si kiiti tilinḡo tege moxolu xan. Alu be toorola wo ja ma, walasa alu xa xan Ala la Mansaya soto ti. ⁶ Tonja, Ala bulu, a be tilinnin x'alu toorobaxolu sara tooro la. ⁷ Anin du, atelu mennu be tooronin, a si daho di atelu nin ntelu ma, nin Marigi Isa nin a la meleke barakemalu nata lunḡo men xa bo sanḡo to. ⁸ N Marigi Isa s'i yita tamano to, walasa xa Alalonbalolu jaangi anin mennu man son a la xibaru Dimanḡo ma. ⁹ Wolu la jaḡilo si ke halagili banbalo ti. I nin Marigi te si jaḡa; i ja me la a la sintigiya nooroma xan. ¹⁰ Wo si ke Marigi nalunḡo. Marigi si na wo lunba, walasa a la moxo senumanḡolu mennu be lanin a la, wolu x'a tantu x'a jaḡi. Atelu kennu mu wolu do lelu ti, bawo alu lata n na seedayalo la Isa la kuwo to. ¹¹ Wo le x'a tu, n be Ala matarala alu jnen tuma bee. N b'a njinna n na Ala la, a x'alu deema, walasa a x'alu kili nilamaya men xanma, alu xa xan wo ti. N b'a tarala du a xa barako di alu ma, walasa ku beto mennu xa di alu jnen x'e ke, anin alu b'a fe xa baaro men ke lannaya la, alu xa sin xa wolu dafa. ¹² Wo ja ma, n Marigi Isa toxo si bunja alu la kuwo xanma, anin alu dulu si bunja ate la kuwo xanma, n na Ala anin Marigi Isa Kirisita la neemo barako to.

2 N badinḡolu, fenḡo men mu n Marigi Isa Kirisita la nalikuwo ti, anin n na joxotaro a bata, n be alu tarala xo ² alu hakilo xana jaḡami tariya xa sila, nin dolu b'a fola xo Marigi la lunḡo sita xa ban. Haali nin do x'a fo xo Ala xo ten, walla waajulilalu x'a fo, walla do x'a safe ntelu toxo la, alu xana la a la. ³ Moxo xana alu lafili ja si ma, bawo wo lunḡo me na fo moxo kiika xa muruti Ala ma folo, anin fo Sentanemoxo x'e yita folo, nin wo mu halagibaxato ti. ⁴ Alaya be fola fenḡo mennu ma wo, fen fen be batula wo, a si wo bee kele, x'a fan bunja xa tanbi wolu bee xan. A si taxa sigi fo Alabatusuba xono, x'a fan yita x'a fo xo ate le mu Ala ti.

⁵ Xa n tu i joxo xan, n xa wo fo alu jnen. Alu hakilo nte a la ba? ⁶ Fenḡo men b'a balinin saasa x'e yita jannin a la waxato xa si, alu xa wo lon. ⁷ Bawo Sentanemoxo be baaro la dibo to xa ban, bari men b'a tomutanin saasa, nin wo man taxa xa bo je, wo kuwolu me ke. ⁸ Bari nin wo taxata, Sentanemoxo s'i yita; bari Marigi Isa si wo jani a dafopo la, x'a halagi a la na nooro fe. ⁹ Sentanemoxo nin Sentane barako le be nala. A si kawakuwo nin taagumanseedo nin kuba sifa bee ke, xa moxolu lafili. ¹⁰ A si ku jaxo sifa bee do ke, walasa xa halagibaxatolu lafili. Wolu si halagi, bawo i man son xa tonja muta x'a xanu, wo men tun s'i kisi. ¹¹ Wo xanma, Ala be barako lajigila i xan, men s'i lafili x'e bula lala faniya la, ¹² walasa moxo wo moxo man la tonja la, fo xa tilinbaliya le xanu, kiito xa tege wolu xan. ¹³ N badinḡolu anin Marigi la xanuninḡolu, ntelu kennu xa xan xa barako la Ala jnen tuma bee alu la kuwo xanma, bawo kabirin duniya man da nin Ala x'alu sugandi. A x'alu kisi Ni Senunḡo barako la anin lannaya xanma tonja la. Wo Ni Senunḡo x'alu ke a ta ti. ¹⁴ Ala x'alu kili wo kisilo xanma n na xibaru Dimanḡo la, nin alu si Marigi Isa Kirisita nooro soto. ¹⁵ N badinḡolu, wo xanma, alu i balan. Alu xa tonbenno mennu soto n na xumolu walla n na safe xono, alu wolu muta bete. ¹⁶ N Marigi Isa Kirisita fan, anin N Fa Ala men xa n xanu, xa hakililasigi banbalo nin gigi beto di n ma a la neemo barako to, ¹⁷ wo x'alu jusudun, xa barako di alu ma xa ku beto bee ke, kewalolu nin xumolu la.

3 N badinḡolu, jannin n xa xumo dafaxa, n b'a njinna alu fe, alu xa Ala matara n jnen, walasa Marigi la xumo xa jenjen, anin xa bunja soto, i xo a xa bunja soto atelu bata ja men. ² Alu Ala matara n jnen, walasa n xa kisi moxo jaxolu masiibo ma, bawo moxo bee nte sonna lannaya ma. ³ Marigi mu xantigo le ti. A si alu sinsin, x'alu kisi Sentane ma. ⁴ Marigi b'a la xoyiyanin n ma, xo n xa men xoleya alu ma, alu be wo kela, xo alu si taxa ja xa wo ke. ⁵ Marigi x'alu jusukunḡo tilin Ala ma, xo alu x'a xanu anin xa muḡa i xo Kirisita. ⁶ N badinḡolu, n b'a xoleyala alu ma, Marigi Isa Kirisita toxo la, xo alu x'e soobo n badin salabaxantunḡolu bee la, nin i nte sonna ntelu la folu ma. ⁷ Alu xa xan xa n nadigi ja men, alu fannu xa wo ja lon. N man ke salabaxantun ti xa n tu alu bata. ⁸ N man domolo ke moxo si bata fu; bari n xa baaro ke xa sege, suwo nin tilo, walasa n xana ke alu si ma doni ti. ⁹ Nin

n xa wo ke, a xoto nte don ti xo n tunnu nin domoli man xan alu bata. N xa wo ke le, nin alu si ke n nadi-gibaxo ti. ¹⁰ N be alu bata tumo men, n tunnu xa jin yanmaru in di alu ma xo: Nin moxo men nte a fe xa baara ke, wo xana domoli du ke. ¹¹ N be wo fola alu jen, bawo n x'a me xo dolu be alu to mennu xa sala. I me son baara ma, fo x'e da dun njandi kuwolu to. ¹² N b'a fola wo tigolu jen, x'a xoleya i ma Marigi Isa Kirisita toxo la, xo i xa baaro ke a ja ma, xa balu i fannu la. ¹³ Bari atelu kennu n badinjololu, alu xana sege kupu-

mako la. ¹⁴ N xa men fo safe in xono, nin moxo men man son xa wo ke, alu hakilo xa tu wo tigo la. Alu a sin bo alu la kuwolu to, walasa a xa malu. ¹⁵ Bari alu xana a muta alu jaxu ti, bari alu s'a tonben; bawo alu badinjo le mu. ¹⁶ Heeratigi Marigi fan xa heero di alu ma tuma bee, anin ja bee ma. Marigi xa ke alu bee fe. ¹⁷ Nte Poli fan bulo le xa jin xontonna in safe. N buluno le je n na safelu bee to. ¹⁸ N Marigi Isa Kirisita la neemo xa ke alu bee fe.

1 TIMOTE

1 Nte Poli le xa jin safe in ke. Nte men keta Isa Kirisita la kiladinjo ti, n Kisibaxa Ala nin Isa Kirisita la yanmaro fe, nin wo mu n gigo ti. ² Timote, n be jin safe in kila í ma, ite men mu n din soobe ti lannaya silo la. N Fa Ala nin n Marigi Isa Kirisita xa neemo nin hinno nin heero ke í jen. ³ Awa, a be í xo n x'a xoleya í ma na men, xa n taxato tu Maseduwane jamano to, í xa tu Efesi gallo xono. Bawo moxo dolu be non, men nu be moxolu laxaranna sila xotelu ma. Í xa wolu kaba wo xaranjo ma. ⁴ A fo wolu jen xo i xa wo taliyolu nin wo bonson kiikaba xaranjo dabula. Wo kuwolu be nala soosolo le tila. I nin Alasilu nte boxo la. Ala bulu, lannaya le be moxolu kisila. ⁵ Wo yanmaro kunjo mu le, walasa a xa xanuya bange, xanuya men be bola jusukun senumanjo nin hakilo nin lannaya soobe to. ⁶ Dolu xa wo silo bula, x'e fannu sanko soosoli nafantanjolu to. ⁷ I b'e fannu mafelenin karanmoxolu ti Ala la sariya to. Bari i be men fola, i man wo lon. I be xumala kuwo mennu xan, x'e sinsin i xan, i fannu man wo kuwolu lon. ⁸ N x'a lon xo sariya xa jin, nin í x'a muta a mutapa ma. ⁹ Alan xa don lon xo, sariya man sigi moxo tilinninjo xanma; bari a sigita kujaxukelalu nin moxo murutininjo nin Alapasilanjabalolu nin junubekelalu xanma, moxo mennu nte Ala nin fen senunjo bunjala, fa faxalalu nin na faxalalu, moxofaxalalu, ¹⁰ anin jadolu, anin xe mennu be i joxo njinna, anin moxo fiirilalu, anin fanolu, anin mennu be i xalila faniya xan, anin fen wo fen be xaran soobe soosola. ¹¹ xibaru Dimanjo men xarifata nte ma, wo xaranjo bota wo le to. Wo Xibaru Dimanjo be heero tigo Ala nin Ala nooroma le la kuwo fola. ¹² N be barako bulala Marigi Isa Kirisita jen, wo men xa barako di n ma xa n na baaro ke. N be barako bulala a jen, bawo a lata n na xa n sugandi xo n x'a la baaro ke. ¹³ Haali x'a tara nte tun x'a toxo tija, x'a la moxolu tooro, xa jaxuya moxolu ma. Bari Ala hinnata nte la, bawo nte xa wo ke lonbaliya le xanma. N tun man lannaya ke. ¹⁴ N Marigi x'a la neemaba ke n jen. Lannaya nin xanuya men be sotola Isa Kirisita kafunoxoya to, a xa wo di n ma. ¹⁵ Xumo fele, wulibalo le mu. Moxo bee xa xan x'a muta. Isa Kirisita nata duniya xono, walasa xa junubekelalu kisi. Nte fan ne mu wo junubekelalu to folo ti. ¹⁶ Bari nte men mu junubekelalu pakunjo ti, Ala makarita nte la le, walasa Isa Kirisita x'a la mupo yita, anin nte xa ke payito ti tolu jen, mennu be nala lan-

naya kela a la, xa nilamaya banbalo soto. ¹⁷ Bada-banjo Mansaxe, Mansaxe sabalo, anin Mansaxe jebalo, nin wo mu Ala kilinpe ti, bunja nin tantulo be a jen fo abada. Amiini. ¹⁸ N dinxe Timote, n be jin kila in xarifala í ma, x'a la kilaya xumafoninjo xan, mennu fota í la kuwo to xa tanbi. Wo xumolu xa barako d'í ma, nin í si lannaya kelo ke. ¹⁹ Tu lannaya to, xa í jusukunjo senumanjo tu. Dolu x'e ban xa i jusukunjo la tonbeno lame. Wo na ma, i xa i fannu la lannaya tija.

²⁰ Himene nin Alekisandere be wo moxolu to. N xa i dun Sentane bulu, walasa i xa fata Ala toxo tijala.

2 A folo, n b'a xoleyala moxolu ma, xo i xa taralo sifa bee do ke, xa Ala matara i joxo jen, xa barako bula Ala jen moxolu bee koso. ² Ala xa matara mansaxelu nin kuntigolu jen walasa n xa tu laxafiya nin heero xono, xa i taxama Alapasilanjo xono, men be bennin. ³ Wo le xa bete, wo le xa di n Kisibaxa Ala jen. ⁴ Ate b'a fe moxolu bee xa kisi, anin i xa sin xa tonja lon. ⁵ Bawo Ala kilin ne be je. Telabenbaxa kilin ne du be Ala nin moxolu te, nin wo mu Isa Kirisita ti, men keta moxo ti. ⁶ Ate x'a fan di xa ke moxolu bee kunbobaxo ti. Waxato sininma, a xa wo ke; walasa x'a yita xo Ala b'a fe moxolu bee xa kisi. ⁷ Wo le x'a tu, Ala xa n ke waajulila nin kiladinjo ti. N nte faniya fola, n be tonja le fola alu jen. A xa n bula siya tolu xaranna lannaya nin tonja silo ma. ⁸ Nte b'a fe xo, dula wo dula, xebalu xa Ala matara, x'e bulo xotota sanna, jusukun xoyiya to, x'a tara jusu xan nte, soosoli xan nte. ⁹ N b'a fe du, musolu x'e masiti na beto ma. I xa faanu dun, men s'i sutura. I la masito xana ke danmatanbi masiti ti. I xa danmatanbi kunda dabula. I xana i balamajaro ke sanu nin xonon daxolen ti. I la masito xana ke faanu daxolen ti. ¹⁰ Bari a xa ke kebaara jumalu ti. Muso mennu xo x'e be Ala bunjala, wolu xa xan xa wo le ke. ¹¹ Nin xaranjo be kela, musolu xa xan xa i de, x'a lame xa xulu. ¹² N man don yanmaru muso xa ke karanmoxo ti, walla xa ke xe kuntigo ti. A xa xan ne muso xa í de. ¹³ Bawo Adama folo le data; wo xo, Hawa. ¹⁴ Anin du, Adama man neene; muso le neeneta, xa Ala foxanjo bula. ¹⁵ Bari haali wo, muso si kisi wuluwo sabaabo la, nin a tuta lannaya nin xanuya nin senuya to, xa tu fanmajigo xono.

3 Xumo fele, sikka nte men to: Nin men b'a fe xa ke Ala la jama lakorosibaxo ti, a be baara beto le nofe wo ti. ² Ala la jama lakorosibaxo xa xan xa ke

jalagibalo ti, musukilintigo, moxo men xa dan lon ku la, hakilima, moxo soobe, luntannajigila, men si sin no xa moxolu laxaran. ³ A xana ke dolominna jaxu ti, walla moxo men xa fati. A xa ke moxo sabariningo ti. A xana ke kelekela ti. A xana ke xaalisi kunte ti. ⁴ A xa sin x'a fan na luwo mara bete, a dinŋolu xa xulu a pen x'a bunŋa. ⁵ Moxo men me a fan na luwo mara no, wo si Ala la jama mara no ŋa di? ⁶ A xana ke moxo tuubidin kuta ti; nin wo nte a xana taxa a fan bunŋa, xa jalagi í xo Sentane jalagita ŋa men. ⁷ A xa ke moxo ti, xoxan-moxolu be men toxoŋuma fola; walasa moxolu xana tango b'a xan, anin a xana bula Sentane la kalanŋo da. ⁸ Awa, Ala la jama la baaralalu xa xan xa ke moxo soobelu ti, anin xankilintigolu. I xana ke dolominna jaxu ti, anin xaalisi nanbarala. ⁹ Ala xa lannaya gullo men di i ma, i xa xan xa wo mara i hakilo senuyaninŋo la. ¹⁰ I xa xan xa mafele folo, wo xo nin jalagi man soto i ma, i si Ala la jama deemabaaro ke. ¹¹ I musu dulu xa xan xa ke moxo soobelu ti. I xana ke moxo toxojaxufo-la ti. I xa ke danlonkulamoxolu ti, xa ke lannayamoxo ti kuwo bee to. ¹² Ala la jama la baarala xa xan xa ke musukilintigo ti. A xa sin x'a fan dinŋolu nin a la luwo mara bete. ¹³ Nin Ala la jama la baaralalu b'e la baaro kela a ŋa ma, bee s'i bunŋa. Anin, lannaya men be n nin Isa Kirisita kafunin, i si xuma no wo xan x'a tara i man yilanyilan. ¹⁴ Í be ŋin safe in kila í ma, xa í yilo tu a ma, xo dondin í si taxa bo í la. ¹⁵ Bari nin í meta í man taxa, ŋin safe in s'a yita í la, í bosilo xa xan xa ke men ti Ala la luwo xono, nin wo mu Ala nilama la jama ti. Wo jama mu tonŋa losinŋo nin a sinsinbaxo le ti. ¹⁶ Soosoli si nte a to, Alapasilanŋa mu gulleba le ti! Ala moxoma x'é yita, Ni Senunŋo x'a la tilinninga yita. Melekiyolu x'a je. A la kuwo waajuta siyalu pen. Lannaya keta a la duniya xono. Ala x'a layele xa taxa a ti nooro xono.

4 Ni Senunŋo b'a fola x'a xoyiya xo: Duniya wulo waxato, moxo dolu si lannaya silo bula, x'a lo moxolafilila dolu la silo fe. Wolu b'e la xaranŋo sotola jinno lelu la. ² I s'a tu karanmoxo fanolu nin fulankafolu x'e lafili. Wo karanmoxolu jusukunŋo xa xole, í xo nege wulenŋo keta xa fenŋo men majani. ³ Wo karanmoxolu be moxolu laxaranna xo futuwo man xan xa ke, anin xo domolifenŋo dolu man xan xa domo. Bari Ala xa wo domolifenŋolu da, walasa lannayabaxo mennu xa tonŋa lon, wolu xa barako bula Ala pen i la kuwo xanma, x'e domo. ⁴ Ala xa fen wo fen da, a bee xa ŋin. Banŋo man xan xa ke fen si to. Moxo xa xan x'a bee lamuta, xa barako bula Ala pen i xanma. ⁵ Bawo Ala la xumo nin Alamatara be fenŋo bee senuyala Ala na xo-to. ⁶ Awa, nin í be badinŋolu laxaranna ŋin ku innu la ten, í si ke a Isa Kirisita la baaradin beto ti. Í be balunin lannaya xumolu la, anin xaran soobe la, í laxaranta men ma. ⁷ Í xana son taliyolu nin xuma kuntanŋolu ma, wo mennu nin lannaya nte sila la. Í fan digi

Alapasilanŋa la. ⁸ Xa fasakendeya kuwolu ke, xa í balo bo i ŋoxo to, wo nafa xa doxo. Bari x'é noto Ala la, wo nafa xa bun ŋa bee ma; bawo kenenma nilamaya anin sinin nilamaya lahidu be wo to. ⁹ Wo le mu xuma wulibalo ti, bee xa xan xa men muta. ¹⁰ Wo le x'a tu, n be segela, xa kelo ke, bawo n xa n gigo senbe Ala nilama la, wo men mu moxolu bee Kisibaxo ti, sakuta mennu xa lannaya ke. ¹¹ Í xa xan xa men xoleya, xa moxolu laxaran a la, wo le fele. ¹² Moxo si xana í doxo-oya í la dindinŋa xanma; bari ke payita beto ti lannayabaxolu pen, í la xumolu xono, í bosilolu to, í la xanuya fe, í la lannaya fe, anin i la senuya fe. ¹³ Jannin í xa na, í jija xa Ala la xumo xaran lannayabaxolu pen, x'e jusudun, x'e laxaran. ¹⁴ Ala x'a la solifenŋo men di í ma, í xana faratu wo la. A dita í ma, x'a la kilaya xumolu xan, Ala la jama moxobalu x'e bulolu la í xan xa Ala matara í pen tumo men. ¹⁵ Í jija xa wo kuwolu bee ke. Í la baaro ke a ŋa ma. Nin wo keta, bee s'a je xo í be taxala ŋa. ¹⁶ Í taxamaŋa korosi, x'é la xaranŋo du korosi. Í timinadiya wo la. Nin í xa wo ke, í s'í fan kisi, xa í lamebaxo dulu kisi.

5 Nin í be xexotoba la filo yitala a la, í xana a fo xoleya to, bari í s'a tonben í xo í fa. Xamarindinŋolu tonben í xo í badinxelu. ² Musuxotolu tonben í xo í nalu, xa musu dindinŋolu tonben í xo í mamusuwolu, senuya to. ³ Í hakilo tu musujaxelu la, mennu kilinnu be i danna. ⁴ Bari nin dinŋolu walla mamarinŋolu be musujaxe do kun, wo dinŋolu xa xan xa i la Alapasilanŋa yita i fannu la dinbayalu la folo. I wulubaxolu walla i mamalu xa men ke i pen folo, i si wo ŋoxon ke i pen. Wo le xa di Ala pen. ⁵ Musujaxe men kilin tuta a danna, nin deemabaxa nte a bulu, wo gigo mu Ala le ti. A be Ala matarala su nin tili walasa a x'a deema. ⁶ Bari musujaxe men hakilo nte fen xote ma fo duniyadiya kuwolu, wo saninŋo le mu, haali nin a b'é nila. ⁷ Í xa xan xa wo le xoleya musujaxelu ma, walasa i xa ke jalagibalolu ti. ⁸ Nin moxo men man a hakilo tu a badinŋolu la, sakuta a la lumamoxolu, wo tigi xa lannaya bula le. Haali lannayabalo xa fisa wo tigo ti. ⁹ Muso men si jaate musujaxe ti, fo a siyo xa si tan wooro san ma. A xa tara kenin xe kilin musu ti, ¹⁰ toxoŋuma xa ke a la a la kebaarolu xono. A xa tara a dinŋolu maranin bete, a xa tara luntannajigila ti, xa Ala la jama moxolu sinŋolu ku, xa segebaxantunŋolu deema, anin a xa tara ŋumaya sifa bee kebaxo ti. ¹¹ Bari í xana son xa musu dindinŋolu safe musujaxe ti; bawo nin i diyannu x'e bula sigila xela to tugun, i s'í xodi Kirisita la. ¹² Wo to, i si jalago soto, bawo i man i la lahidu folo latimme. ¹³ X'a kafu wo ma, i nte baara kela, i si ke a ma x'e taxaninsaagi lu nin lu te. X'a kafu wo ma, i si ke dasiyante ti x'e da dun ŋandikuwolu to, xa xumolu fo, mennu man xan xa fo. ¹⁴ Í b'a fe musu dindinŋolu xa sigi xela, xa wulu. I fannu x'e la luwolu mara, walasa n jaxo xana maxumalikun soto n ma. ¹⁵ Bawo musujaxe

dolu x'e xodi Kirisita la xa ban, x'a lo Sentane nofe.

¹⁶ Nin musujaxelu be lannayabaxamusu men bata, wo xa wolu deema, i xana den Ala la jama la, walasa Ala la jama xa sin xa musujaxe moxontanɗolu deema. ¹⁷ Jama moxobalu mennu be baara beto kela jama jɛn, wolu xa xan xa sara í xo sinɗa fula, sakuta mennu be waajulo nin laxaranno kela. ¹⁸ Kitaabo b'a fola xo: «Tuura men be ɗo toɗonxola x'a keso bo, í xana fen siti wo da ma.» A fota du xo: «Baaradinɗo nin a la sara xa xan.» ¹⁹ Í xana xoxuma muta Ala la jama moxoba do ma, x'a tara seede fula walla saba man bo men ma. ²⁰ Mennu je junubo ke, i lalon i la junubo la bee ɗala, walasa tolu xa sila. ²¹ N' b'a fola í jɛn x'a xoleya í ma Ala nin Isa Kirisita ɗala, anin meleke senumanɗolu ɗala, xo í xa ɗin fo innu bee ke i ɗa ma. Í xana moxo fisiya moxo ti, í xana moxo bo moxo to. ²² Í xana tariya xa í bulo la moxo xan, x'a bula Ala la jama la baaro do la. Í senuyaninɗo xa tu. ²³ Fata jiyu doron minna, bari í si tu dolo dondin minna í la xonodiminɗo anin í la doxon doxon jangarolu koso. ²⁴ Moxo dolu la junubo be keno le xan x'a tara haali kiito man tege i xan folo. Bari dolu be je, wolu ta be lonna xofe le. ²⁵ Wo ɗa ma, kewale ɗumalu si je keno xan ten ne. Haali nin mennu man lankenema junna, i duguninɗo me tu.

6 Lannayabaxo mennu mu jonɗolu ti, wolu xa xan x'e marigilu jaate, x'a lon xo i nin bunɗa bee xa xan; walasa moxo si xana toxojaxo la Ala nin n na xaranɗo la. ² Nin i marigilu mu lannayabaxo lelu ti, i xana i doxoya xo bawo i bee keta badin ti, bari i xa baaro ke i jɛn xa tanbi folo xan, bawo i be baaro kela mennu jɛn, wolu mu lannayabaxa xanuninɗo lelu ti. Í xa xan xa moxolu laxaran ɗin nelu la, x'a xoleya i ma. ³ Nin moxo do x'alu xaran sila xote la, nin a x'é tosoobo Marigi Isa Kirisita la xuma senunɗolu la, anin xa xaran di, men nin n na Alasilo nte kilin ti, ⁴ wo tigo mu fanbunɗala le ti. A man fen lon. Xa soosolo ke, anin xa kelo ke xumo dolu nofe, wolu falama le b'a tigo to. Wo kuwolu si na kiiliya nin kelo nin nanilolu nin miiri jaxolu, ⁵ anin soosoli banbalo ti moxo hakilintanɗolu te, mennu man tonɗa lon tugun. Wolu hakilo la xo lan-

naya mu tonosotoda le ti. ⁶ Tonɗa, xa la Ala la, wo mu tonoba le ti, nin moxo men si muta ke a bulufenɗolu ti. ⁷ N nin fusi man na ɗin duniya in xono. N nin fusi du nte i saagila. ⁸ Nin baluwo nin feetofato be n kun, n xa xan xa muta ke wo ti. ⁹ Bari mennu b'a fe xa naafulu kiika soto, xotobolo si wolu laboyi. I nege jaxu kuntanɗolu si ke i ma kalannɗo ti, x'e muta, x'e bula halagilo nin tijalo la. ¹⁰ Xaalisikunteya le mu ku jaxo sifa bee juwo ti. Moxo dolu keta xaalisi kunte ti, a xa wolu bula i xodila lannaya silo la, x'e jusukunɗolu bula tooro sifa bee xono. ¹¹ Bari ite men mu Ala la moxo ti, í fan tanga wo kuwolu ma. Tilininɗa nin Alanasilanɗa nin lannaya nin xanuya nin muɗalo nin sabaro ɗinin. ¹² Í be kele beto men na, nin wo mu lannaya kelo ti, í jija wo kelo la, xa sinɗo soto, xa nilamaya banbalo muta, í kilita wo men xanma. Í xa seedeya ɗuma ke seede kiika ɗala wo kuwo la. ¹³ Ala men be nilamaya dila fenɗo bee ma, anin Isa Kirisita men xa seedeya beto ke Ponsi Pilate ɗa xoto, n' b'a xoleyala í ma wolu ɗala xo, ¹⁴ í xa Ala la folu mara, í jalagibalo nin í senumanɗo xa tu, fo n Marigi Isa Kirisita nalunɗo. ¹⁵ A si na Ala la waxati lategeninɗo lunɗo. Ala kilin ne mu Mansaxe ti; heero tigo, mansaxelu la Mansaxe, marigolu Marigi. ¹⁶ Ate kilinpe le nte sala; keneya men b'a to, moxo si man í sodun no a la. Moxo bada man a je. Moxo du me a je no. Bunɗa nin sintigiya banbalo mu ate le ta ti. Amiini. ¹⁷ A xoleya ɗin duniya in naafulutigolu ma xo i xana i wasu. A fo i jɛn xo i xana i gigo ke ɗin naafulu banta innu ti, bari i xa i gigo ke Ala ti, wo men be fen bee dila n ma a kiika, walasa n x'e diyabo. ¹⁸ A xoleya i ma, xo i xa ke ɗumakela ti, kebaara ɗuma kiika xa ke i la naafulo ti, xa nilo ke, x'e bulufenɗo dolu di moxolu ma. ¹⁹ Nin i xa wo ke, i si naafuluba tara i ɗa sinin, naafulo men xa ɗin, men nte tijala, walasa i xa nilamaya soobe soto. ²⁰ Timote baaba, kuwo mennu xarifata í ma, wolu mara bete. Í fan tanga xuma fuwolu ma, mennu nin Alasilo nte boxo la, anin soosoli gansanɗolu ma. I be wo mafelenin lonɗo ti, x'a tara tonɗa nte. ²¹ Moxo dolu x'a fo xo i xa wo lonɗo soto. I filita xa lannaya silo bula. Ala la neemo xa ke alu fe!

2 TIMOTE

1 Nte Poli le xa pin safe in ke. **1** N keta Isa Kirisita la kiladinjo ti, x'a la Ala sago xan. Ala xa n bula xumala nilamaya xan, nilamaya men be sotola Isa Kirisita la kafujoxoya xono. A tun xa wo lahido ta n nen. **2** Timote, n dinxe xanuningjo, nte le be pin safe in kila í ma. Fa Ala anin n Marigi Isa Kirisita xa neemo nin hinno nin heero di í ma. **3** N be barako bulala Ala nen, n jusukunjo senuyaninjo be baaro la men nen, í xo n mamaxelu x'a ke na men. Su nin tili, n nte njinala í kun n na Alamataralu to. **4** N hakilo be í la najiyolu kun. A xa di n nen bete x'é je tugun, walasa n xa nana bete. **5** Nte hakilo be í la lannaya soobe la. Wo lannaya joxon tun b'é mamamuso Loyise anin í na Unise la, jannin ite xa lannaya ke. N be lanin a la xo wolu la lannaya joxon be í du la. **6** Wo xanma, n be í hakilo lajigila a la xo Ala x'a la solifenjo men di í ma, n xa n bulolu la í xan tumo men, xa Ala matara í nen, xana a tu wo xa sa. **7** Bawo Ala xa Niyo men di n ma, wo nte silanjo bulala n xono, bari a be barako nin xanuya nin fanmuto le dila n ma. **8** Í xana maluya xa n Marigi la kuwo fo moxolu nen. Í xana maluya du xo nte be kaso la a la kuwo to. Bari son í nin nte xa tooro xibaru Dimanjo nofe, Ala barako la. **9** Ate Ala fan ne xa n kisi, xa n kili xa n ke a ta ti. Wo man ke n na kewalolu xanma; a keta a fan na ku lategeninjo nin a la neemo le xanma. Wo neemo dita n ma Isa Kirisita barako to, jannin duniya xa da. **10** N Kisibaxa Isa Kirisita la na xa wo yita saasa. Isa Kirisita xa saya barako ban, xa nilamaya nin sabaliya yita Xibaru Dimanjo la. **11** Wo Xibaru Dimanjo le xanma, nin nte keta waajulikela nin kiladinjo nin karanmoxoba ti. **12** Wo le x'a tu, nte be pin tooro innu mujala. Nte nte maluyala; bawo nte be lanin men na, nte xa wo tigo lon. Nte be lanin a la, xo a xa men xarifa nte ma, a sinjo b'a nen xa wo mara fo labanjo lunjo. **13** Nte x'é laxaran xuma senumanjo mennu la, wolu mara í xono, lannaya nin xanuya to, mennu be sotola Isa Kirisita la kafujoxoya to, x'é taxamasinjo ben wolu ma. **14** Xaran puma men xarifata í ma, wo mara Ni Senunjo barako to, Ni Senunjo men be siginin n to. **15** Í fan x'a lon xo Asi maro lannayabaxolu bee xa nte bula. Fijeli nin Heremojene be wolu xono. **16** Ala mu a la hinno kela Onesifore la dinbaya nen, bawo a xa n hakilo lasigi kiika ti. Nte la kasolabulo man a maluya, **17** bari kabirin a sita Rome, nin a x'é jija xa n njinin, fo a xa n je. **18** Marigi mu a kela a xa Ala la jumaya soto kiito lunjo.

A xa nte maaku kiika men nan xa n tu Efesi, ite fan xa wolu bee lon.

2 N din, neemo men be n nen Isa Kirisita kafujoxoya to, í barako njinin wo neemo to. **2** Í xa men me nte la seede kiika nala, wo xarifa lannayamoxo dolu ma, mennu fannu si sin no xa moxo xotelu laxaran wolu ma. **3** Í nidula tooro ta, í xo Isa Kirisita la sorodasi puma. **4** Sorodasi nte hanmela duniya kuwolu la, nin a b'a fe a la kuwo xa diya a kuntigo nen. **5** Moxo mennu be joxodanboro kela, wolu xa xan xa i bori boro sariya la, nin wo nte, i me kunnawulijala soto. **6** Senekela men be segela, wo folo le xa xan x'a niyo soto senefenjo to. **7** Nte be men fola í nen, í miiri bete wo ma. N x'a lon xo Marigi fan si hakilo di í ma xa wo bee faamu. **8** Í hakilo xa tu Isa Kirisita kun, mansaxe Dawuda mamarinjo. A kunita xa bo furelu to, í xo xibaru Dimanjo x'a fo na men. Nte be wo Xibaru Dimanjo le foxan. **9** Wo Xibaru Dimanjo nofe, nte be tooronin, xa n siti joloxo la, í xo nin n mu kujaxukela le ti. Bari Ala la xumo nte sitinin de! **10** Wo le x'a tu, nte be kuwo bee mujala Ala la moxo sugandininjo koso, walasa i dulu xa kisi Isa Kirisita kafujoxoya xanma, xa nooro banbalo soto. **11** Nin xuma in mu tonja le ti xo: «Nin n nin Kirisita sata i joxo fe, n nin a si nilamaya i joxo fe du. **12** Nin n x'e timinadiya xa tu lannaya la fo a labanjo, n nin a si sigi mansaya la i joxo fe. Nin n x'e bo a la, a du si í bo n na. **13** Nin ntelu man ke xantigi ti, ate si tu xantigo ti, bawo a me a fan sooso no.» **14** Í xa moxolu hakilo lajigi wo kuwolu la, x'a fo x'a xoleya i ma Ala nala xo i xana soosoli ke xuma to. Wo nte fen nanna, fo x'e mebaxolu lafili doron. **15** Í jija baaro la, fo í xa Ala la toxo dimanjo soto. Í la baaro ke x'a ben; fe xana je a la, men si a tu í xa malu. Ala la tonja waajulo ke tilininna to. **16** Í fan tanga xumakuntanfo ma, mennu nin Alasilo me ben, bawo i fobaxolu b'e soobola le Ala la xa taxa a fe. **17** I la xaranjo be le í xo telo men be moxo subo pimila. Himene nin Filete mu wo moxo dolu ti. **18** Wolu x'e jenge, x'e soobo tonja la. I xo, xo furekuniyo keta xa ban. I xa moxo dolu la lannaya tija. **19** Wo bee nin a ta, Ala fan xa jusigilanjo mennu sigi, wolu si tu je. Nin xuma innu safeta wo kuwo to xo: «Marigi fan x'a talu lon», anin xo: «Moxo wo moxo be Marigi toxo kilila, wo x'é soobo tilinbaliyakuwolu la.» **20** Bunba xono miranjo nte sano nin xalisixoyo doron ti, dolu si tara je mennu be daranin yiro nin banxo du la. Miranjo

mennu da xa xole, wolu be je lunbalu xanma, tolu be je lun gansanḡolu xanma. ²¹ Nin moxo do x'é senuya wo ku jaxolu bee ma, wo tigo si ke baara pumakemiranḡo ti; a keta Ala ta ti, xa senuya. A si ke maakupanmiranḡo ti a Marigi jen. A be tobennin baara puma bee xanma. ²² Í bori xamarindinḡa nege jaxolu ma. Mennu be Marigi tarala xa i jusukunḡo senumanḡo tu, í nin wolu xa tilinninḡa nin lannaya nin xanuya nin heero ḡinin i noxo fe. ²³ Í ban hakilintanḡolu la soosoli fuwolu ma. Í x'a lon xo wolu be nala kelo le tila. ²⁴ Marigi la jonḡo dun man xan xa kele ke. A xa xan xa ke moxo puma ti bee ma, a xa sin moxolaxaranḡo la, xa muḡa. ²⁵ Mennu b'a la xumo soosola, a xa xan xa wolu xaran sabaro to. Jon x'a lon fo Ala si tuubijuso dun wolu xono, walasa i xa tonḡa lon, ²⁶ xa hakili soto, xa bo Sentane la kalanḡo da, wo men tun xa i muta xa i bula a sago kela?

3 Í hakilo xa tu a la xo duniya laban tumo, waxati xolenḡolu si ke. ² Moxolu s'i fannu kilin na nafa ḡinin, xa ke xalisi kunte nin wasubaxantelu nin fanbunpalalu ti. I si Ala toxo tija, xa muruti i wulubaxolu ma. I si ke fisiriwalo ti, xa Alakuwo bee toxosi. ³ I si ke moxo sondonme xolenḡolu nin hinnabalolu ti, anin moxo toxotipalalu nin fanmutabalolu nin masiibemoxolu. I nte puma si fe. ⁴ I si ke janfantelu nin jusu tarinḡolu nin fankekutolu ti. I diyanḡekuwo lu si diya i jen Ala ti. ⁵ I s'i fannu ke Alapasilanḡabaxolu ti moxolu jala, x'a tara i nte a ti i jusukunḡo la. Í soobo wo moxo sifalu la. ⁶ I dolu si dun luwolu xono, xa musu hakilidoxonḡo dolu bula i la jala xono, junubo kiika be mennu la, anin nege sifa bee be mennu la. ⁷ Wo musolu be lonḡo ḡininna tuma bee, bari i nte tonḡa jela. ⁸ Janesi nin Janbere xa kila Musa sooso ḡa men, nin moxo in dolu si tonḡa sooso ten. Moxo hakili tipaninḡo lelu mu. I la lannaya mu fuwo le ti. ⁹ Bari i me taxa dulajan, bawo moxo bee s'i la hakilintanḡa je, í xo Janesi nin Janbere. ¹⁰ Bari ite ken tuta n'xo, xa n'na xaranḡo muta, xa n' bosilo ta, x'a lo n' miiriyalu nofe, xa n' na lannaya noxon ke, xa n' na sabaro nin n' na xanuya nin n' na timinadiya noxon ke. ¹¹ Í tuta n' nofe n' na toorolu nin n' na segelu dolu xono, fen fen xa n' soto Antiyosi nin Ikone nin Lisitere. Tooro joman be je nin a man la n' xan? Bari Marigi xa n' bo a bee xono. ¹² Moxo wo moxo fan b'a fe xa í taxama Ala sago ma, Isa Kirisita kafunoxoya xono, wolu bee si tooro soto. ¹³ Bari moxo jaxolu nin nanbarantelu si taxa ḡa jaxuya to. I si moxo dolu lafili. I fannu be filo xono xa ban. ¹⁴ Ite ken xaranta kuwo mennu la, nin í x'e muta lannaya to, í jija wolu xana í soto í la. Mennu x'é laxaran wo kuwolu la, í fan xa wo tigolu lon. ¹⁵ Kabirin í dindinma, í xa Kitaabo xuma senumanḡolu lon, i si sin no xa hakilitigiya di í ma nin í

si kisi, bawo í xa lannaya ke Isa Kirisita la. ¹⁶ Ala le xa Kitaabo xonoxumolu bee fo a safebaxolu jen. Nafa be wo xumolu la, xa moxolu laxaran, x'e lason, x'e latilin, x'e xulu tilinninḡa silo xan, ¹⁷ walasa Ala la moxo xa ke moxo dafaninḡo ti, xa toben kewale puma bee ko xanma.

4 Nte b'a fola x'a xoleya í ma Ala nin Isa Kirisita jala, wo men be nilamalu nin furelu la kiito tegela, n' b'a ḡininna í fe Kirisita la nalo nin a la Mansaya xanma, ² xo í x'é jija Ala la xumo waajulo la, tuma bete nin tuma jaxu. Moxolu la filo yita i la fo i xa yeleva. Mennu nin jalagilo xa xan, wolu jalagi, x'e jusudun, x'e xaran muḡo to. ³ Waxato do si na, moxolu me son xaran soobe to tugun, bari x'a la i fannu negolu xan, i si karanmoxo kiika ḡinin i fannu ma, mennu s'i tulutodiya xumolu fo i jen. ⁴ I s'i tulo bo tonḡa la, x'a lo taliyolu nofe. ⁵ Ite ken xa ke moxo hakilima ti kuwo bee to, xa tooro muḡa, xa ke xibaru Dimanḡo waa-jubaxo ti, xa í la baaro bee ke x'a dafa. ⁶ Nte ken keta í xo sadaxo xa ban. Dondin, nte si duniya tu. ⁷ Nte xa kele beto ke. Nte xa n' soto n' na boro la. N' tuta lannaya silo xan. ⁸ Saasa, n' be kunnawulijala laxononin. Wo mu tilinninḡa jala le ti. Marigi, men mu kiititegela tilinninḡo ti, ate le be nala wo jala dila nte ma duniya labanḡo lunḡo. A nte wo dila nte kilin ma; bari mennu x'a xanu x'a nalunḡo laxono, a b'a dila wolu bee le ma. ⁹ Í tariya í xa na n' bata jan. ¹⁰ Demasi bota n' na, bawo jin duniya in kuwolu diyata a jen. A taxata Tesalonike. Keresan taxata Galasi maro xan. Tite taxata Dalamanasi. ¹¹ Luka kilinpe le be nte bata jan. Nin í be nala, í nin Maraka xa na, bawo a si nte deema no n' na baaro la. ¹² N' xa Tisike ki a xa taxa Efesi. ¹³ N' xa dorokeba men tu Karapusi bulu Torowasi, í nin wo xa na, a nin kitaabolu, sakuta gulumalu. ¹⁴ Numuxe Alekisandere xa ku jaxu kiika ke n' na. Marigi si a sara a la kebaaro la. ¹⁵ Í du x'é korosi bete a ma, bawo a xa n na xumolu sooso bete. ¹⁶ Nte taxata kiititegedula xa n' nafo tumo men folofolo, moxo si man nte deema. I bee xa n' bula. Ala xana wo jaate i jen. ¹⁷ Bari Marigi xa nte deema, xa barakeba di n' ma, walasa n' xa waajulo ke a ḡa ma, anin, Alalonbalolu bee x'a lame. Nte bota waraba da xono. ¹⁸ Marigi si nte bo ku jaxo bee bulu, xa n' nakisi, xa n' nadun sanxulo Mansaya xono. Nooro xa la Fa Ala xan, birin abada, fo abada. Amiini. ¹⁹ Í xa Pirisiye nin Akilasi xonton, anin Onesifore la lumamoxolu. ²⁰ Erasite tuta Korente. N' xa Torofime tu Mile, bawo a tun man kende. ²¹ Í balan í xa na jannin neno xa si. Ubulusi b'é xontonna, anin Pudansi nin Linusi nin Kulodiya anin badin tolu bee. ²² Marigi xa tu í fe. Ala la neemo xa ke alu fe.

TITE

1 Nte Poli le xa pin safe in ke, nte men mu Ala la jonngo anin Isa Kirisita la kiladinjo ti. Ala xa n ki x'a la sugandinngolu ladun lannaya xono, xa tonja yita i la, men nin Alapasilanja be taxala i joxo fe. ²Wo kunjo mu le walasa i xa nilamaya banbalo soto gigo ti. Ala, ate men nte a foxanjo soosola xa wo nilamaya lahido ta n pen, jannin duniya xa da. ³A la waxato sininma, a xa wo yita a la xumo la. N Kisibaxa Ala xa wo xumo xarifa nte ma, xo n x'a waaju. ⁴Tite, ite men mu n dinxe soobe ti lannaya silo la, lannaya men nin alan mu kilin ti a to, nte Poli le be pin safe in kila i ma. Fa Ala anin n Kisibaxa Isa Kirisita xa neemoo nin heero ke i pen. ⁵Nte x'e tu Kereti, walasa kuwo mennu nabobalo tuta je, i xa wolu nabo. I xa Ala la jama moxobalu sigi gallolu bee to, i xo n x'a fo i pen na men. ⁶Moxoba xa xan xa ke jalagibalo ti, anin musukilintigo. A dinngolu xa ke lannayabaxolu ti, i xana ke moxo tjaninno ti walla wulubaxa bunjabalolu. ⁷Ala la jama lakorosi-baxo xa xan xa ke jalagibalo ti, bawo Ala la moxolu kunnasigibaxo le mu. A xana ke wasubaxante ti, walla jusu tarinjo, walla dolominnaba. A xana ke moxo fatinba ti, a xana xaaliso njinin nanbaro la. ⁸A xa ke luntannajigila ti, anin ku numa xanubaxo. A xa ke hakilima nin moxo tilinninjo ti, anin moxo senunjo nin fanmutala ti. ⁹A xa xan xa ke moxo ti, men be notonin Ala la xumo la, i xo a xaranta a la na men. Wo na ma, a si sin xa moxolu tonben xaran soobe la, xa soosolilalu da xati. ¹⁰Moxo murutininjo kiika be kenin mennu be moxolu lafilila i la xuma kuntanngolu la. Wolu kiika bota Yahudiya lelu to. ¹¹I xa xan xa lade, bawo i be luwo dolu muume lafilila, xa moxolu xaran ku kabaninjo la, xaaliso nofe. ¹²I to do, i fannu la kila do xo: «Keretingolu mu faniyafola lelu ti tuma bee; wara jaxu nuxumalu.» ¹³Wo xumo mu tonja le ti. Wo le x'a tu, i xa xan xa xumaxolen wolu pen, walasa i xa lannaya soobe soto, ¹⁴anin, nin i me i noto Yahudiyalu la taliyolu nin hadamadinngolu la folu la, wo mennu x'e xodi tonja la. ¹⁵Fenjo bee xa senu moxo senumanngolu pen; bari fusi man senu moxo noxonin lannabalolu pen. Wolu hakilolu nin i jusukunngolu noxoninjo le mu. ¹⁶I b'a fola xo i xa Ala lon, bari i b'a yitala i la kebaarolu la xo i man a lon. Moxo haramunin, murutininjo lelu mu. I me kebaara bete si ke no.

2 Ite Tite ken, moxolu xaran xaran soobe la. ²A fo xexotobalu pen xo i xana danmatanbi ku to, i xa

bunja tu i fannu xan, xa ke hakilimalu ti. I sinsinningo xa tu lannaya nin xanuya to, i xa muja. ³A fo musuxotoba dulu pen xo i bosilo xa senuya. I xana toxo jaxu la moxolu la, i xana i fannu ladi dolo ma. I xa ke tonben-nikela betolu ti. ⁴Musuxotobalu xa musu dindinngolu xaran i xelu nin i dinngolu xanula, anin ⁵xo i xa ke hakilimalu ti, x'e fannu muta, x'e la lumabaarolu ke a na ma, anin xa beteya, xa xulu i xelu pen, walasa moxo si xana soto xa xumajaxo fo Ala la xumo ma. ⁶Wo na ma, a fo xamarindinngolu dulu pen i xa hakili beto ta kuwo bee to. ⁷Ite fan xa ke kupumakela ti, xa ke payito ti moxolu pen. Moxolu laxaran xoyiya nin soobe to. ⁸Ite fan na xumolu xa ke tonja nin soosolibalolu ti, walasa i jaxolu xa malu, i xana xuma jaxu soto x'a fo n ma. ⁹Jonngolu xa xulu i marigilu pen kuwo bee to, x'e diyanpekuwolu ke. I xana i sooso. ¹⁰I xana i marigilu bulufen si ta. I xa nuyaya nin xantigiya dafaninjo yita tuma bee, walasa i xa bunja la n Kisibaxa Ala la xaranjo xan kuwo bee to. ¹¹Bawo Ala x'a la neemoo yita, walasa moxolu bee si kisi na men. ¹²Wo neemoo be n xaranna xo n xa i xodi Alapasilanjabaliya nin duniya nege jaxolu la; xo bi, n xa i taxama hakilimaya nin tilinninjo nin Alapasilanja xono, ¹³jannin heero xa na, n gigo be men xan, anin jannin n na Alaba nin n Kisibaxa Isa Kirisita la nooro xa yita. ¹⁴Isa x'a fan di ntelu nofe walasa xa n kunbo tilinbaliya bee ma, xa n senuya, xa n ke a ta ti, xa n ke moxolu ti, mennu jjaninjo be nukumako la. ¹⁵I xa xan xa moxolu laxaran, x'e jusudun, anin x'e jalagolu yita i la, i barako bee la pin na in ne ma. Moxo si xana i doxoya.

3 I xa lannayabaxolu hakilo lajigi a la, xo i xa xulu kuntigolu nin fango pen. I xa wolu lame, anin i x'e toben ku numa bee ko xanma. ²I xana xumajaxu fo moxo si ma, i xana ke kelelalu ti, bari i xa ke moxo sabarininngolu ti, x'e juso faxa moxo bee xoto. ³Bawo n du tunnu mu hakilintanjo lelu ti folofolo, anin Ala foxanmutabalolu, nin moxo filininngolu. N tunnu be nege sifa bee nin nidiyanje sifa bee la jonja la. N tunnu b'e taxamala jaxuya nin kiiliya xono. Moxo tunnu be n jaxuyala, n du tunnu b'e joxo jaxuyala. ⁴N Kisibaxa Ala x'a la nuyaya nin a la xanuya yita hadamadinngolu la tumo men, ⁵a xa n kisi wo tumo. A man n kisi bawo n xa kewale tilinnin ke; a x'a ke a la hinnayeba le xanma. Ni Senunjo xa n na towulu xa n tokutaya batiselijiyo la. Wo le xa n kisi. ⁶N Kisibaxa Isa Kirisita barako to, a

xa wo Ni Senunjo kiika lajigi n xan, ⁷ walasa Ala la tilin-
ninna soto tanbo xo, a la neemo xanma, n xa nilamaya
banbalo soto ke ti, n gigo be wo men xan. ⁸ Wo xumo
mu tonja le ti. Nte b'a fe í xa wo fo x'a xoleya, walasa
mennu lata Ala la, wolu x'e jija kujumako la. Wo ku-
wolu xa jin; nafa b'e la moxolu jen. ⁹ Í fan tanga njin-
inxali kuntanjo lu nin buruju kuwolu nin keke kuwolu
nin sariya xan soosololu ma; bawo nafa nte wolu la, i
me fusi njina. ¹⁰ Moxo men be nala talalo tila Ala la ja-
ma xono, nin í xa wo lasobi, sinja kilin nte, fula nte, í
tosoobo wo tigi la. ¹¹ A lon xo wo moxo sifa filita, a xa

silo bula. A si tu junubo kela, fo x'a fan jalagi. ¹² Nin n
xa Aratemasi walla Tisike ki í ma tumo men, í x'é balan
xa na n tara Nikopolise, bawo n x'a latege xa sankunjo
ke non. ¹³ Í x'é balan xa sariya karanmoxo Senasi nin
Apolosi deema í la dugutotaxo la, walasa fen xana
dasa i la. ¹⁴ N na moxo dulu xa xan xa kewalejumako
digi; walasa i xa dolu haajolu njina. I xana ke moxo
nafantanjo lu ti. ¹⁵ Mennu be nte bata jan, wolu bee be
í xontonna. Mennu be n xanula lannaya silo la, í xa
wolu bee xonton. Ala la neemo xa ke alu bee fe.

FILEMON

1 Nte Poli men bulata kaso la Isa Kirisita la baaro nofe, anin n badinxé Timote, nte lelu be nin safe in kila n baarakeŋoxo xanuninŋo Filemon ma, ² anin n badinmusu Afiya nin Arasiŋe men mu n kafuŋoxo ti ke-lo to, anin Ala la jama ma, men be kamarila í la luwo ma. ³ N Fa Ala anin Marigi Isa Kirisita xa neemo nin heero ke alu ŋen. ⁴ N be barako bulala n na Ala ŋen, xa n hakilo tu í kun tumo bee, n na Alamataralu xono; ⁵ bawo nte b'a mexan xo xanuya nin lannaya be í la Marigi Isa la anin senumanŋolu bee ŋen. ⁶ Nte be a ŋininna Ala fe xo n nin í mu kilin ti lannaya men to, wo xa baaro ke, walasa nafa mennu bee be n ŋen Kirisita la kafuŋoxoya to, í xa sin xa wolu lon bete. ⁷ N badinxé Filemon, í la xanuya xa ŋaxaliba nin juso di nte ma, bawo í xa senumanŋolu jusudun. ⁸ Wo to, haali x'a tara Kirisita la kafuŋoxoya xono, n be yanmarunin x'é la keta fo í ŋen, ⁹ a xa fisa nte ŋen x'é tara xanuya koso. Nte be ŋa men, nte Poli, xexotoba, nte men be kaso la saasa Isa Kirisita nofe, ¹⁰ n b'é tarala Onesime ŋen. A keta nte dinxe ti Isa Kirisita la kafuŋoxoya to, kaso la jan. ¹¹ Xotonin a keta í ma nafantannŋo ti, bari saasa, nafa b'a la ite nin nte ŋen. ¹² N b'a lasaagila í ma, ate men be í xo nte fan dula do. ¹³ A tun si diya nte ŋen x'a tu n senbo to, xa nte tu kaso la xibaru Dimannŋo koso, walasa a xa nte haajolu ke ite no to. ¹⁴ Bari nte man ke

a fe xa fusi ke x'a tara í man son men ma, walasa í xana ku ŋuma ke diyakuwa la, bari í x'a ke ŋanneya ŋuma la. ¹⁵ A do to, í nin Onesime talata waxati le la, walasa a xa saagi í ma fo badabannŋo. ¹⁶ A nte jonŋo ti tugun, a xa fisa jonŋo ti bete, badinxé xanuninŋo le mu. A la kuwo xa di nte ŋen haali. A la kuwo xa xan xa diya ite le ŋen xa tanbi nte xan, hadamadinŋa xanma, anin Marigi la kafuŋoxoya koso. ¹⁷ Wo to, nin í be nte mutanin í badin lannayabaxo ti, a lamuta í xo nin nte le tun fan mu. ¹⁸ Nin a x'é toonŋo kuwo do to, walla nin í la julo do b'a la, wo jaate nte kun. ¹⁹ Nte Poli fan bulo le be nin xuma innu safela: Nte fan si í sara. Nte nte í hakilo lajigila a la xo ite du la julo do be nte la, wo mu ite fan ne ti. ²⁰ Iyo, n badinxé, n be í matarala xo í xa wo ku ŋuma ke nte ŋen Marigi xanuya koso: Nte jusudun Kirisita la kafuŋoxoya xanma. ²¹ A be xoyiyanin nte ma, xa nte tu nin safe in kela í ŋen xo n je fenŋo men ŋinin í fe, í si wo ke nte ŋen. Nte x'a lon du xo í be nala men kela, wo si tanbi nte la fota xan. ²² Anin du, bunŋo do toben nte ŋen, bawo n yilo b'a ma xo nte si saagi alu ma, alu la Alamataralu barako to. ²³ Epafarasi be í xontonna, nte nin wo men be kaso la Isa Kirisita la kuwo to. ²⁴ Nte baarakeŋoxolu: Maraka, nin Arisitarake, nin Demasi anin Luka dulu be í xontonna. ²⁵ Marigi Isa Kirisita la neemo xa ke alu fe!

HEBUROLU

1 Folofolo, Ala x'a la xumo dun a la kilalu da x'a fo n mamaxelu pen. A xa wo ke sinpa kiika ti, anin pa kiika ma. ² Bari bi duniya laban in na, a x'a la xumo dun a Dinxe da x'a fo n pen. Ala xa duniya da ate le fe. A x'a ke dafenjo bee ketabaxo ti. ³ Wo Dinxe be Ala nooro mapoxonjebalo yitala. A kepa nin Ala kepa bee kilin. A be duniya tomutanin a la xumo barako le la. A xa hadamadinjolu senuya i la junubolu ma tumo men, a taxata í sigi fo sanjanba to, Sinjobeetigi Ala kininjo xoto. ⁴ A bunpata melekoyolu bee ti, fo Ala xa toxo di a ma, toxo men xa bun wolu ta ti. ⁵ Ala bada man a fo a la meleke si pen xo: «Íte le mu n Dinxe ti; kabirin bi nte keta í Fa ti.» A man a fo meleke du ma xo: «Nte si ke a pen fa ti; ate si ke nte pen dinxe ti.» ⁶ Bari Ala be a Dinxe folo wuluninjo kila xa na duniya to tumo men, a xo: «Ala la melekoyolu bee xa ke a batubaxo ti.» ⁷ A xo melekoyolu la kuwo to xo: «Ala b'a la melekoyolu kela fojo ti, x'a la baaradinjolu ke tamanolu ti.» ⁸ Bari Ala x'a fo a Dinxe ma xo: «Íte Ala, í be tula mansasigilanjo xan fo abada. Í b'é la maro kela tilininja le xan. ⁹ Í be ku tilininjo le fe, Jaxumanjo mu í tano le ti. Wo le x'a tu Ala, í la Ala x'é sugandi xa paxaliba tulu daxolenjo yeleva í kunjo xan, xa lodula di í ma, men xa bun í kafunoxolu bee ta ti.» ¹⁰ Ala xo du a Dinxe pen xo: «Marigi, folofolo ite le xa duguxulo da; sanxulo du mu í buluno le ti. ¹¹ Wolu bee si sanko, bari ite si tu. Sanxulo nin duguxulo si xoto, í xo faano be xotola pa men. ¹² Í s'i soola, í xo moxo be dorokeba soolala pa men; i si mayelema, í xo moxo be a la faanu dunta mayelemala pa men. Bari ite ken si tu í pa ma, í la nilamaya me ban muume.» ¹³ Awa, Ala x'a fo a la meleke joman ne pen xo: «Í sigi n kininjo xoto, fo nte xa í jaxolu ke í sinxotofenjo ti?» ¹⁴ Melekoyolu mu munnu ti? I bee mu niyo lelu ti, kiladinjo lelu mu. I be baaro kela Ala pen. Moxo mennu xa xan xa kisilo soto ke ti, Ala be melekoyolu kila xa taxa wolu deema.

2 Wo le x'a tu, n xa kuwo mennu me, n xa xan xa i hakilo tu wolu la bete, walasa n xana sanko. ² N x'a lon xo melekoyolu xa xumo men fo, wo keta tonpa ti. Mennu xa wo xumolu sooso, x'e fili i xo, Ala xa wolu bee sara i la kebaarolu la, i nin sara men xa xan. ³ Marigi xumata kisiliba men xan, nin n man wo muta barako to, n si kisi no pa di Ala la pangilo ma? Marigi fan folo xumata n pen wo kisilo xan. Wo xo, mennu xa Marigi lame, wolu x'a laxoyiya n ma xo tonpa le mu.

⁴ Ala du xa i la sedehyalolu sinsin taagumansedolu nin kubalu nin kawaku sifa bee do kelo la. A xa Ni Senunjo la solifenjo dulu di i ma, x'a la a fan sago xan. ⁵ Awa, n be xumala sinin duniya men na kuwo la, Ala man wo kuntigiya di melekoyolu ma. ⁶ Bari moxo do xumata wo xan Kitaabo dula do la xo: «Ala, moxo mu mun ti, nin í be í miirila a la kuwo la? Hadamadinjo mu mun ti, nin í be í hakilo tula a kun?» ⁷ Í x'a doxoya melekoyolu ti waxatindin xono, wo xo, í x'a xotota xa nooro nin bunpa di a ma, ⁸ x'a lasigi fenjo bee kunna.» Nin a fota xo Ala x'a lasigi fenjo bee kunna, wo xoto le, xo fen nte je, a nte men kunna. Wo bee nin a ta, n pa nte a la saasa xo sinjo bee dita a ma xa sigi fenjo bee kunna. ⁹ Bari n x'a je xo: Isa doxoyata melekoyolu ti waxatindin xono, walasa a xa sa moxolu bee pen, Ala la neemoo barako to. Bari saasa n x'a je xo Ala xa nooro nin bunpa la Isa xan, a la tooro nin a la saya xanma. ¹⁰ Tonpa la, Ala le xa fenjo bee da, anin ate le be fenjo bee tomutanin. A tun xa xan Ala xa Isa la bunpa dafa wo toorokuwolu la. Wo keta walasa moxo kiika xa ke Ala dinjolu ti, xa dun a la nooro xono. Wo pa ma, Isa le mu i la kisilo sabaabo ti. ¹¹ Isa men be moxolu senuyala i la junubolu ma, anin mennu be senuyala, ate nin wolu bee be Fa kilin ma, nin wo mu Ala ti. Wo le x'a tu, Isa man maluya xa wolu kili xo a badinjolu. ¹² Wo le x'a tu, a xo: «Ala, nte si í yita n badinjolu la, nte s'í tantu donkilolu la, í la jama bee pala.» ¹³ A xo du xo: «Nte si n gigo la Ala xan.» Anin du a xo: «Ala xa dinjo mennu di nte ma, nte nin wolu fele.» ¹⁴ Awa, Isa xa dinjo mennu kisi, wolu mu jelo nin balasubo ti pa men, wo pa ma, Isa du keta i poxon ti, a keta jelo nin balasubo ti. A keta i poxon ti, walasa saya barako be men bulu, nin wo mu Sentane ti, a xa wo joroxi a fan na saya fe. ¹⁵ Wo keta walasa mennu be Sentane la jonpa la, i siyo bee xono, saya nasilanpa bulu, a xa wolu kunbo. ¹⁶ Tonpa, Isa man na xa melekoyolu deema de; a nata Burehima bonsonjo le deema. ¹⁷ Wo le x'a tu, a tun xa xan xa ke a badinjolu poxonjo ti, walasa a xa ke sadaxalasibaxa kuntigiba hinnantunjo nin xantigo ti Ala la baaro to; walasa x'a la moxolu la junubolu bo je. ¹⁸ Wo pa ma, mennu be xotobolo xono, Isa si sin xa wolu deema, bawo a fan toorota xa xotobo.

3 Wo pa ma, n badin lannayabaxolu, Ala xa atelu mennu kili xa ke a talu ti, alu i miiri Isa ma. Ate le

mu Ala la kiladinjo nin n na sadaxalasibaxa kuntigiba ti n na lannaya silo la. ² Ala le tun x'a sugandi wo baaro xanma. A keta xantigo ti Ala la baaro bee to, í xo Musa keta xantigo ti ja men Ala la luwo muume xono, nin wo mu Ala la moxolu to ti. ³ Bari Isa nin bunja xa xan xa tanbi Musa xan, bawo bunlobaxo xa fisa bunjo fan ti. ⁴ Bun wo bun, moxo do le x'a lo; bari fenjo bee lobaxo mu Ala le ti. ⁵ Kila Musa ken tun mu baaradinjo le ti. A x'a la baaro bee ke xantigiya to, Ala la luwo xono. Ala tun be nala xumo mennu fola, Musa la baaro tun mu le xa wolu seedeaya. ⁶ Bari Kirisita keta xantigo ti x'a tu ate mu Ala Dinxe ti, xa sigi Ala la luwo bee kuna. Nte lelu mu Ala la luwo ti, nin n gigi xoyimanjo tuta n na, anin xa tu jaxalinin a la. ⁷ Wo le xanma, í xo Ni Senunjo x'a fo ja men xo: «Nin alu xa Ala xumaxanjo me bi, ⁸ alu xana alu sondonmolu xoleya, í xo alu mamaxelu murutita ja men, xotobolo lunjo, fuxo la. ⁹ Ala mamaxelu xa nte xotobo xa n mafele, haali a x'a tara i xa n na kebaarolu je, tan naani sanji xono. ¹⁰ Wo le x'a tu, n diminta wo moxolu xoto x'a fo xo: "I sondonmo be taxala filo le ma tuma bee. I man nte la silolu je." ¹¹ Nte diminta xa n xali xo: Nte xa jamano men toben i la tofojo xanma, i me dun non abada.» ¹² N badinjo, alu i korosi jusukun jaxo nin lannayabaliya xana ke moxo la alu to, fo wo x'a bula i xodila Ala nilama la. ¹³ Kitaabo be «bi» men fola, alu i joxo jusudun lun wo lun wo «biwo» waxato xono. Alu wo ke walasa junubo xana alu do lafili x'a bula a jusukunjo xoleyala. ¹⁴ Alan keta Kirisita kafujoxolu ti, nin n na lannaya folo tuta n na fo xa labanjo si. ¹⁵ Kitaabo xo: «Nin alu xa Ala xumaxanjo me bi, alu xana alu sondonmolu xoleya, í xo n mamaxelu murutita ja men.» ¹⁶ Jon nelu xa Ala xumaxanjo me xa muruti? Kila Musa nin mennu bee bo-ta Misira jamano to, wo lelu nte ba? ¹⁷ Ala diminta jon nelu xoto tan naani sanji xono? Mennu xa junubo ke nin i sata fuxo la, wo lelu nte ba? ¹⁸ Ala x'e xali xo jontigi lelu me dun a la jamano xono x'e tofojo? Mennu murutita a ma, wo lelu nte ba? ¹⁹ Wo ja ma, n x'a je xo i man sin xa dun wo tofojodula, i la lannayabaliya koso.

4 Ala la lahido be je haalisa xo a si n nadun a la dula, n na tofojo xanma. Wo to, alan xa sila moxo si dunbalo xana tu alu to. ² Xibaru Dimanjo waajulo keta n pen ja men, a keta n mamaxe dulu pen wo ja in. Bari a man fusi nja wolu pen, bawo i x'a me tumo men, i man a muta lannaya to. ³ Ntelu mennu xa lannaya ke, ntelu si dun wo tofojodula. Ala xo n mamaxelu pen wo tofojodula la kuwo to xo: «Nte diminta xa n xali xo, Nte xa jamano men toben i la tofojo xanma, i me dun non abada.» Ala xa wo xumolu fo, x'a tara a tun xa wo tofojodula nin fenjo bee da xa ban kabirin duniya da tumo. ⁴ A fota Kitaabo dula do, tili woorowulanajo la kuwo to xo: «Ala x'a la baaro bee ke x'e soto tumo men, tili woorowulanajo a x'e tofojo.» ⁵ Wo du-

la kilinjo Ala xo tugun xo: «Nte xa jamano men toben i la tofojodula xanma, i me dun non abada!» ⁶ Awa, mennu fololu xa Xibaru Dimanjo me, wolu man dun Ala la tofojodula bawo i man a lame. Bari wo bee nin a ta, moxo xotelu si dun no wo dula. ⁷ Wo le x'a tu, Ala xa lun xote sigi, nin wo mu «bi» ti. Waxati jan tanbita, wo xo, a xa wo xumo dun mansaxe Dawuda da, xumo men nin n birin a fola xo: «Nin alu xa Ala xumaxanjo me bi, alu xana alu sondonmo xoleya.» ⁸ Awa, Ala xa tofojodula men lahido ta, nin Yosuwe tun sinta xa Banisirayila dinjolu ladun non, Ala tun me lun xote la xumo fo tugun. ⁹ Wo ja ma, Ala x'e tofojo tili woorowulanajo ja men, wo joxon tofojo be Ala la jama du pen. ¹⁰ Bawo moxo men je dun Ala la tofojodula, wo s'i tofojo a la baarolu la, í xo Ala x'e tofojo a talu la ja men. ¹¹ Alan x'e balan xa dun wo tofojodula, walasa moxo si dunbalo xana tu í xo Ala foxanmutabalolu dunbalo tuta ja men xotonin. ¹² Ala la xumo mu fen nilama le ti. Barako b'a to, a da xa di xa tanbi fan dafulo xan. A si dun fo xa si moxo subo nin a niyo te ma, fo xa si xulukunjo nin senbo te naaniyo ma. A be moxo sagolakuwolu nin i feeneninjo le be a ja xoto. N bee be nala i jafola ate le pen. ¹⁴ Sadaxalasibaxa kuntigiba be n kun. Wo mu Isa le ti: Ala Dinxe, men yeleta fo sanjo to. Wo xanma, alan xa tu sinsinnin n na lannaya xan, lannaya men, nin n b'a foxan. ¹⁵ Sadaxalasibaxa kuntigiba men be n kun, wo nte moxo ti men me hinna n na, xa n deema n na barakentanja to. N na sadaxalasibaxa kuntigiba fan xotobota ja bee do ma í xo ntelu, bari a man junube ke. ¹⁶ Wo xanma, alan x'e sodun neematigi Ala la, siginin a la mansasigilajo xan, lannaya jonjonjo to, walasa n x'a la hinno nin a la neemo soto, walasa n xa deemalo soto a tumo to.

5 Awa, sadaxalasibaxa kuntigiba fen wo fen be sugandila hadamadinjo to, Ala be wo lasigila x'a bula a la baaro la, walasa a xa moxo tolu deema. Moxolu be fenjo mennu dila Ala ma, anin i la sadaxolu, a si wolu lasi Ala ma i la junubolu koso. ² Moxo mennu man Ala la sariya lon, anin mennu be filila xa Alasilo bula, sadaxalasibaxa kuntigiba si hinna wolu la, bawo ate du fan mu wolu joxon barakentan ne ti. ³ Wo xanma, a xa xan xa sadaxo do bo a fan na junubolu xanma, í xo a b'a bola jama ta xanma ja men. ⁴ Moxo si me don bunja di no í fan ma xa ke sadaxalasibaxa kuntigiba ti. Ala le be í kilila a xanma, í xo a xa Haruna kili a xanma ja men. ⁵ Wo be ja men, Kirisita du man a fan bunja, xo ate be kela sadaxalasibaxa kuntigiba ti a fan ma. Ala le x'a ke a ti. A x'a fo Kirisita ma xo: «Ite le mu n Dinxe ti, kabirin bi nte keta í Fa ti.» ⁶ Ala x'a fo Kirisita pen Kitaabo dula xote xo: «Í mu sadaxalasibaxo ti fo abada, a be í xo Melikisedeki ta keja.» ⁷ Isa tun be duguxulo xan waxato men, a tun

x'a lon xo sinjo be Ala j'en x'a kisi saya ma. A xa Ala matara, x'a matara barako to, fo xa xasixanba nin ja-jiyo labo. Ala x'a la taralo jaabi a la Alapasilanja xanma. ⁸ Haali x'a tara a mu Ala Dinxe le ti, wo bee nin a ta, a x'a digi xa Ala sago ke tooro xono. ⁹ Wo ja ma, a xa bunja dafaninjo soto tumo men, mennu bee be a sago kela, a keta wolu j'en kisili banbalo sabaabubaxo ti. ¹⁰ Ala x'a fo xo a mu sadaxalasibaxa kuntigiba ti, í xo Melikisedeki ta kepa. ¹¹ Awa, n badinjo, fen kiika be n ma x'a fo alu j'en wo xan, bari a xa xole x'alu lafaamu a kuwo la, bawo alu lafaamu man di. ¹² Saasandin in tun xa xan x'a tara xo alu keta karanmoxolu ti, bari haalibi alu maakuwo b'a la x'alu laxaran Ala la xumo ku fololu ma. Alu be le í xo deenano, alu me domoli xulin domo no fo nono doron. ¹³ Moxo men me fen xote domo no fo nono, wo mu deenano le ti, a man ku tilinnin lon. ¹⁴ Bari domoli xulinjo mu moxoba lelu ta ti. Wolu x'a digi dalinno fe, xa juma nin jaxumango faranfansi, x'e bo i joxo to.

6 Wo ja ma, xarango mennu be kela lannaya damuto, alan xa tanbi wolu xan, xa taxa ja xarango la, men mu lannayabaxa moninjo la ta ti. N man xan xa alu xaran fenjo mennu la tugun wolu fele: X'é xodi kewale jaxolu la, xa la Ala la, ² batiselolu nin bululanxango, xa Ala matara moxolu j'en, nin furekuniyo kuwo, anin kiiti labango kuwo. ³ Alan xa taxa ja! N be nala wo le kela nin Ala sonta. ⁴ Moxo mennu be i koppala i jigo xotolu ma, wo be di? I xa Ala la keneya soto xa ban. I xa Ala la nilifenjo nene, xa Ni Senunjo soto. I x'a je xo Ala la xumo xa jin, i xa sinin duniya sintigiya nene. Bari wo bee xan, i saagita i jigo xotolu ma. A me no x'e lana lannaya ma tugun, bawo a be le í xo i xa Ala Dinxe layele gengenyiro xan tugun, x'a lamalu moxolu bee jala. ⁷ Sanjiyo be nala duguxulo men xan xa siya, nin a xa senefenjo lafalin a senexolu j'en, wo duguxulo si Ala la neemo soto. ⁸ Bari nin wo duguxulo xa njanin tuwolu nin bin njanima lelu labo, a me fusi njana, a nin Ala la dango soto te man jan. A labango la, ta si a jani. ⁹ N' badin xanuninjo, haali nin n be xumala ten, n be lanin a la xo alu be sila beto xan, nin wo mu kisilo silo ti. ¹⁰ Ala nte kujumalonbali ti, a me njina alu la kebaaro kun, bawo alu x'alu la xanuya yita a la, alu badin lannayabaxa tolu maakuwo njalo fe. Haalibi du, alu be wo kela. ¹¹ Bari men xa di n j'en, wo mu le alu bee balanninjo xa tu fo labango lunjo, walasa alu gigo be men xan, alu xa wo xoyimango soto. ¹² Alu xana ke salabaxantunnu ti, bari moxo mennu be lannaya kela x'e timinadiya, xa Ala la lahidufenjo soto ke ti, alu ke wolu ladigibaxolu ti. ¹³ Ala xa lahido ta Burehima j'en tumo men, a x'é xali a fan toxo la, bawo fen nte je men xa bun ate fan ti, a tun si í xali men na. ¹⁴ A xo: «N' si duwabete í j'en, xa bonson kiika di í ma.» ¹⁵ Burehima mupata, xa Ala laxono. Ala xa men lahido ta a j'en, a xa wo soto. ¹⁶ Nin

moxolu b'e xalila, i si wo ke fen na, men xa bun i ti. Xalilo mu soosolo bee dafaxalango le ti. ¹⁷ Men tunnu xa xan xa Ala la lahidufenjo soto ke ti, a xa xalilo la a la lahido xan, walasa x'a laxoyiyabete wolu ma, xo a xa lahido men ta, wo me bo a ma. ¹⁸ Ku fula be je, mennu me bo no a ma, nin wo mu Ala la xalilo nin a la lahido ti. Wo lelu b'a yitala xo Ala me faniya fo. Wo ja ma, ntelu mennu x'e xarifa a ma, wolu si n jusudun bete, xa n bulo xutu wo gigi foninjo ma. ¹⁹ Wo gigo mu ntelu la nilamaya tonte le ti, í xo negeba men be batonjo tomotala jiyo xan. A be barakenin, a be lonin bete. Wo gigo tanbita Alabatusuba totegefaano la, xa dun fo xono to. ²⁰ Isa dunta non ntelu ja, anin ntelu j'en. Ate keta sadaxalasibaxa kuntigiba ti fo abada, í xo Melikisedeki ta kepa.

7 Wo Melikisedeki tun mu Salemu mansaxe nin Ala Xototaninba la sadaxalasibaxo le ti. Burehima tun taxata mansaxe dolu keke x'e no. X'a boto tu non, Melikisedeki x'a kunben xa duwa a j'en. ² Burehima xa fen wo fen soto wo kelo to, a xa wolu bee jakko di a ma. Melikisedeki xoto le xo «tilinninjo mansaxe». Anin du, Salemu mansaxe le tun mu. Wo xoto xo «heero mansaxe». ³ Moxo man fa nin na nin buruju lon a ma. A bangexuma nin a sayaxuma man fo dula si. A be le í xo Ala Dinxe: A mu sadaxalasibaxo ti fo abada. ⁴ Alu a mafele Melikisedeki xa bun ja men. N mamaxe Burehima xa fenjo mennu soto kelo to, a xa wolu to fen jalamalu jakko di a ma. ⁵ Lewi bonsonjo moxo mennu mu sadaxalasibaxolu ti, yanmaro be wolu bulu, sariya la, xa jakko muta Banisirayila dinjo la, nin wolu mu i fannu badinjo ti, haali x'a tara wolu dulu mu Burehima bonsonjo lelu ti. ⁶ Melikisedeki tun nte Lewi bonson ti, bari a xa jakko muta Burehima la. Ala tun xa lahido ta moxo men j'en, nin wo mu Burehima ti, Melikisedeki duwata wo j'en. ⁷ Awa, duwawo kebaxo le xa bun duwawo be kela men j'en ti. ⁸ Lewi bonsonjo moxo men tunnu be jakko mutala, wolu tunnu mu moxolu ti, mennu be sala. Bari Melikisedeki men xa jakko muta Burehima la, a fota ate la kuwo to xo a be í nila. ⁹ N si a fo xo Lewi bonsonjo mennu xa jakko muta, wo dulu xa jakko bo x'a di Melikisedeki ma, i mamaxe Burehima la dinmalo to. ¹⁰ I xa jakko di Melikisedeki ma, bawo haali nin Lewi tun man wulu wo tuma, a tun be a mamaxe Burehima tiyo to, Melikisedeki xa wo kunben tumo men, xa jakko muta a la. ¹¹ Sariya men dita Banisirayila dinjo ma, Lewi bonsonjo la sadaxalasiyo le tun mu wo sigixulo ti. Nin wo sadaxalasiyo baaro tun keta baara dafanin ti, kun tun me ke a la, sadaxalasibaxa xote xa na, a be í xo Melikisedeki keta ti ja men. Sadaxalasibaxolu tunnu si tu xa bo Lewi xabiilo la doron, í xo Haruna. ¹² Awa, nin sadaxalasibaxaya yelemata, sariya du xa xan xa yelma. ¹³ Wo kuwolu fota n Marigi men na kuwo to, wo bota bonson xote to, mennu bada man sadaxalasibax-

aya ke. ¹⁴ Sikka nte a to xo Marigi mu Yuda bonsonjo do le ti. Kila Musa xumata sadaxalasibaxolu xan tumo men, a man fen fo Yuda bonsonjo la kuwo to. ¹⁵ Isa keta sadaxalasibaxa xote ti í xo Melikisedeki. Wo keta sabaabu ti x'a toxoyiya xo Isa la sadaxalasibaxaya nin Lewi xabiilo ta nte sila la. ¹⁶ Wo xoto, xo wo sadaxalasi-baxo man sigi x'a la hadamadinjolu la sariya sigininjo xan; bari a la nilamaya men nte banna, a keta a ti wo le barako to. ¹⁷ Bawo Ala la xumo b'a fola xo: «Í si tu sadaxalasibaxaya la fo abada, a be í xo Melikisedeki ta kepa.» ¹⁸ Wo na ma, sariya xoto bulata, bawo barake tun nte a la xa moxolu kisi, nafa du nt'a la. ¹⁹ Kila Musa la sariya man sin xa fen si ke fen dafaninjo ti. Bari saasa, n xa gigi jalama soto, men si a tu n s'i sutiya no Ala la. ²⁰ X'a kafu wo bee ma, Ala x'é xali. Tolu keta sadaxalasibaxolu ti, x'a tara Ala man í xali. ²¹ Bari Isa be kela sadaxalasibaxo ti tumo men, Ala x'é xali ten xo: «Nte Marigi Ala xa n' xali, nte me n' xumaxanjo bo a ma: "Í si tu sadaxalasibaxaya la fo abada."» ²² Wo le x'a tu, Isa keta telabenbaxo ti Kafuxanjo men to, wo xa fisa folo ti. ²³ Fen xote be je men x'e tala: Sadaxalasi-baxa tolu siyata, bawo saya tun b'a tula i me taxa no na i la baaro la. ²⁴ Bari Isa be í nila fo abada, a be tula sadaxalasibaxaya la kadawu. ²⁵ Wo le x'a tu, mennu je i sodun Ala la, ate la kafupoxoya fe, a sinjo b'a pen xa kisili banbalo di wolu ma, bawo a b'é nila kadawu, xa Ala matara i jen. ²⁶ N maakuwo tun be sadaxalasibaxa kuntigiba men na tigi tigi, Isa le mu. A xa senu, fe nte a la, junube nte a la. Ala x'a tala junubekelalu ma, x'a xotota bete fo sanxulo to. ²⁷ A maaku nte a la xa sadaxa bo lun wo lun, a fan na junubolu xanma folo, wo xo xa sadaxolu bo moxo tolu la junubolu xanma, í xo sadaxalasibaxa kuntigiba tolu tunnu b'a kela na men. A x'a fan di xa ke sadaxo ti tumo men, a xa wo ke sinja kilinpe le. A waseta ten fo abada. ²⁸ Musa la sariya tun xa moxo mennu lasigi sadaxalasibaxa kuntigibaya la, wolu tunnu mu moxo dafabalo lelu ti. Bari Ala x'é xali xa xumo men fo sariya xofe, wo keta a Dinxe lasigilo ti sadaxalasibaxa kuntigibaya la, wo men xa bunja dafaninjo soto fo abada.

8 N be xumo men fola, wo xulo fele xo, nin noxon sadaxalasibaxa kuntigiba be n kun, a be siginin sanjo to, mansasigilanjo xan, noorotigi Ala kininjo xoto. ² A be baaro la bun senumanjo men xono, wo mu Alabatusuba tillisima soobe le ti, moxo man men lo. Marigi le mu wo lobaxo ti. ³ Sadaxalasibaxa kuntigibalu bee be lasigila le walasa xa nilifen sadaxolu nin sadaxa tolu lasi Ala ma. Wo xanma, waajibo le tun mu Kirisita du xa do bo. ⁴ Nin a tun be duguxulo xan, a tun me haali ke sadaxalasibaxa ti, bawo sadaxalasibaxa xotelu be je, mennu be nilifen sadaxolu lasila x'a la sariya xan. ⁵ Wolu la sadaxalasibaxaya baaro mu sanxulo ta ladigibaaro nin i taagumansedo le ti. Kila Musa be Alabatusuba tillisima lola tumo men, Ala x'a fo a

jen xo: «Nte xa men yita í la kuro xan, a ke wo noxonjo ti.» ⁶ Bari saasa, Kirisita la baaro xa bun sadaxalasibaxa tolu ta ti bete bete; bawo Kafuxanjo men xa fisa folo ti, Isa keta telabenbaxo ti Ala nin moxolu te wo to. Wo Kafuxanjo be siginin lahidolu xan, mennu xa fisa. ⁷ Nin fe tun man je Kafuxan folo la, kun tun me ke a la xa fulanan bula a no to. ⁸ Bari Ala xa jalago le soto a la moxolu ma, men x'a bula a fola xo: «Lunjo be nanin, nte si kafuxan kuto do sigi nte nin Banisirayila moxolu nin Yuda moxolu te. ⁹ Wo me ke í xo n' tun xa men ke n' nin i mamaxelu te, n' x'e muta i bulolu ma lun men, x'e labo Misira. I man wo kafuxanjo labatu. Wo xanma, n' man n' hakilo tu i kun tugun. Marigi xo ten. ¹⁰ Wo lunjolu tanbo xo, nte be nala kafuxanjo men sigila n' nin Banisirayila moxolu te, wo fele: Nte si n' na sariyalu sigi i hakilo la, x'e safe i sondonmekunjo la. Nte si ke i la Ala ti, i si ke nte la moxolu ti. ¹¹ Moxo si me a jamanadinjoxo walla a badinjo laxaran xo: "Marigi lon". Bawo i bee si nte lon, moxoba fara moxondin xan. ¹² Nte s'i la tilinbaliyakuwolu yaafa, n' me n' hakilo tu i la junubolu la bitugun.» ¹³ Ala xa Kafuxan Kuto xumo fo tumo men, wo xa Kafuxan folo ke xotomanjo ti. Awa, Kafuxan folo men xotota, nin a waxato tanbita, wo xa xan xa lasanko.

9 Kafuxan folo waxato, sariya do tunnu be je, mennu be batulo kepa xan. Bun senumanjo do du tun lota duguxulo xan. ² Alabatusuba tillisima do tun lota, men be talanin dula fula ti. A dula folo kilita xo dula Senumanjo. Lanpa sifa dolu, nin tabalo, nin buuro mennu be dila Ala ma sadaxo ti, wolu tunnu be non. ³ Totegefaano tun be wo dula fulu te. Faano boxo do kilita xo dula Senumanba. ⁴ Sadaxajanilan sanuma tun be non, digico be janila men xan, anin Kafuxanjo waxande; sano be a dula bee ma. Sanudaxo do be wo waxande xono, manne b'a to, anin Haruna la guma men nerunta, anin kuru walafolu, Kafuxanjo xumolu safeta mennu xan. ⁵ I xa meleke danfatanma fula dara, x'e lalo wo waxande xan. Wolu mu taagumansedo le ti x'a yita xo Ala be non. I danfatanjolu tunnu be tosanin junube yaafa sadaxo bodula kunna. Bari wo kuwolu bee nafowaxato nte saasa ti. ⁶ Alabatusuba tillisima nin a xonofenjolu bee tobenninjo xo, sadaxalasibaxolu si dun dula folo xono lun wo lun, xa i la baaro ke. ⁷ Bari sadaxalasibaxa kuntigiba kilin doron si dun dula fulanango xono sinja kilinpe doron san wo san. A me dun je marafen jelo xo. A si wo lasi Ala ma, a fan nin moxolu la filolu nin i la junubolu yaafa xanma. ⁸ Wo na ma, Ni Senunjo b'a yitala n na, xo dula Senumanba silo man dayele folo, fo Alabatusuba tillisima folo xa bo je tumo men. ⁹ Nin bun folo in mu bi waxati in kuwolu taagumansedo le ti. A b'a yitala n na xo nilifen sadaxolu nin marafen sadaxolu tunnu me i bobaxolu jusukunjo senuya no. ¹⁰ Wolu nte fen xotelu ti fo domolifenjolu nin minfenjolu, anin jilasenuyalo pasi-

fa kiika. Wolu bee tunnu mu hadamadin laado lelu ti, mennu sigita i kunna fo waxato men, Ala nata fenjo bee yelema. ¹¹ Bari Kirisita nata xa ke sadaxalasibaxa kuntigiba ti, walasa ntelu xa Ala la fen pumalu soto. Kirisita dunta Alabatusuba tillisima men xono, wo be folo ja, a be dafanin a ti. Moxo man wo lo, nin duniya in ta du nte. ¹² Kirisita dunta dula Senumanba sinja kilinpe le. A waseta ten fo abada. A nin bakoton jelu nin ninsirin jelu man dun je. A x'a fan jelo le di xa n kunbo, xa n bo n na junubolu xono. Wo kunbolo barako nte banna fo abada. ¹³ Awa, moxo mennu be noxonin Ala ja xoto, bakotonjolu nin tuuralu jelo anin ninsi janinjo buguto tunnu be kela wolu xan x'e banto to senuya. ¹⁴ Bari Kirisita jelo ken, wo si senuyalo ke xa tanbi wo xan bete bete. A x'a fan di Ala ma, xa ke sadaxo ti, fe nte men na, Ni Senunjo barako to, wo men be je fo abada. A jelo si n jusukunjo senuya xa bo ku nafantanjolu xono, walasa n xa baaro ke Ala nilama pen. ¹⁵ Awa, wo le x'a tu, Kirisita keta Ala nin moxolu te Kafuxan Kuta telabenbaxo ti. A sata xa ke junubolu sara ti, mennu keta Kafuxan folo xoto. Wo keta, walasa Ala xa mennu kili, wolu si Ala la neemafen banbalolu soto ke ti, a tun xa mennu lahido ta wolu pen. ¹⁶ Nin moxo do xa safe ke jannin a xa sa, safe men b'a yitala a ke xa xan xa tala ja men, waajibo le mu a tigo xa sa folo. ¹⁷ Wo safe me labaara no x'a safebaxo nilama tu. Nin a sata le mu a si labaara. ¹⁸ Awa, wo le x'a tu, haali Kafuxan folo du man sigi x'a tara jelo man bon. ¹⁹ Musa xa sariya xumolu bee fo jama pen tumo men, a xa ninsirinjolu nin bakotonjolu jelo ta, xa jiyo ta, xa do sari sariya Kitaabo nin jama bee xan, hisope yiribulo nin saaxati wulenjo la. ²⁰ Wo xo, a xo: «Nin jelu in mu alu nin Ala te Kafuxanjo taagumanseedo le ti, Ala xa men nabatulo waajibiya alu ma.» ²¹ Wo ja kilinjo ma, Musa xa jelo sari sari Alabatusuba tillisima nin Ala batulimiranjolu bee ma. ²² Sariya la, jelo le be fenjolu tala bee senuyala. Nin jelo man bon, junubeyafo me soto. ²³ Alabatusuba tillisima xonofenjolu tunnu mu sanxulo xono fenjolu taagumanseedo le ti. Awa, nin sanxulo to fenjolu taagumanseedolu tunnu xa xan xa senuya ten, sanxulo fenjolu fannu maakuwo be senuya xote la, men be wolu ta ja. ²⁴ Kirisita dunta bun senumanjo men xono, moxo bulu man wo lo. A dunta bun senuman soobe le xono, men nte taagumanseede gansan ti. A dunta sanxulo fan ne xono, walasa x'e lo Ala ja xoto saasa, ntelu pen. ²⁵ A man dun je walasa x'a fan ke sadaxo ti sinja kiika ti, i xo sadaxalasibaxa kuntigiba be dunna dula Senumanba xono ja men san wo san, a nin jelo, men nte a fan jelu ti. ²⁶ Nin wo nte, Kirisita tun xa xan xa tooro sinja kiika, kabirin duniya data. Bari saasa, duniya laban in na, a nata ke sadaxo ti sinja kilin doron, walasa xa junubo ban a fan sadaxalo la. ²⁷ A lategeta xo moxolu xa sa sinja kilin doron, wo xo,

Ala si kiito tege i xan. ²⁸ Wo be ja men, Kirisita du keta sadaxo ti sinja kilinpe, walasa xa moxo kiika la junubolu bo je. A si na tugun; wo nte junubeyafo xanma ti tugun, bari a be nala a laxonobaxolu kisilo le xanma.

10 Ala xa fenjo mennu lahido ta n pen, wolu taagumanseedo doron ne be Musa la sariya xono. Sariya nte wo fenjolu keja jonjonjo yitala n na. Moxo mennu x'e sodun Ala la, xa wo sadaxa sifa kilin innu lasi a ma san wo san kadawu, sariya man wolu ke no moxo dafaninjolu ti. ² Nin wo sadaxabobaxolu tunnu senuyata sinja kilin doron xa ban, i jusukunjolu tunnu me i jalagi i la junube si kuwo to tugun. I tunnu si sadaxabo dabula. ³ Bari a man ke ten. Wo sadaxolu kunjo mu le, xa moxolu hakilo bula i la junubolu kun san wo san. ⁴ Bawo tuura jelolu nin bakoton jelolu me junubolu bo no je abada. ⁵ Wo le x'a tu, Kirisita be nala duniya to tumo men, a xo Ala pen xo: «Í xo xo í nte marafen sadaxa nin nilifen sadaxa fe, bari í xa balo dara nte ma. ⁶ Sadaxa janitalu nin junube yaafa sadaxolu si man diya í pen. ⁷ Wo tumo la nte xo: "Ala, nte fele, n be nala í sago kela, í xo a fota n na kuwo to sariya kitaabo to ja men." » ⁸ Awa, Kirisita x'a fo Ala pen folo xo: «Í nte marafen sadaxa, nin nilifen sadaxa, nin sadaxa janita, nin junube yaafa sadaxa fe, wolu man diya í pen.» Haali wo, i be sadaxala x'a la sariya la fo le xan. ⁹ Wo xo, a xo du xo: «Ala, nte fele, nte be nala í sago kela.» Wo ja ma, a xa batulija folo bo je, xa kuto bula a no to. ¹⁰ Ala sago tun mu men ti, Isa Kirisita xa wo le ke. A x'a fan di Ala ma sadaxo ti sinja kilinpe, men barako nte banna fo abada. Wo xanma, n senuyata xa bo junubo xono. ¹¹ Sadaxalasibaxolu bee be i lola lun wo lun xa i la baaro ke. I be sadaxa kilin innu dila sinja kiika ti, mennu me junubolu bo no je abada. ¹² Bari Kirisita xa sadaxa kilinpe le lasi junubeyafo xanma, men barako nte banna fo abada. Wo xo, a x'e sigi Ala kininjo xoto. ¹³ A be tula non fo Ala x'a jaxolu mano xa na i ti a sinjo xoto. ¹⁴ Wo ja ma, mennu senuyata xa bo junubo xono, a xa wolu ke moxo dafaninjolu ti fo abada, a la sadaxa kilinjo barako to. ¹⁵ Ni Senunjo du be wo kuwo sedehyala n pen. A x'a fo xo: ¹⁶ «Marigi xo: Wo lunjolu tanbo xo, nte be nala Kafuxanjo men sigila n nin i te, wo fele: Nte si n na sariyalu safe i sondonmekunjo la, x'e sigi i hakilo la.» ¹⁷ Wo xo, a xo du xo: «N hakilo me jigi i la filolu nin i la junubolu la tugun.» ¹⁸ Nin junubolu yaafata xa ban, kun nte a la tugun xa sadaxa bo junubeyafo xanma. ¹⁹ Awa n badinjolu, Isa jelo men bonta, wo barako xanma, n hakilo lategeninjo si dun no saasa dula Senumanba. ²⁰ A xa sila kuto nin nilamaya silo dayele n pen totegefaano to la, men tun be dula Senumanjo nin dula Senumanba te. Wo totegefaano mu a balo le ti, men gengenta yiro ma. ²¹ Sadaxalasibaxa kuntigiba be n kun, men be siginin Ala la luwo kunna. ²² Wo xan-

ma, alan x'e sodun Ala la n jusukunjo bee la, lannaya jonjonjo to. Bawo n jusukunjolu senuyata, xa hakili jaxolu bo n na, anin n balo kuta ji senumanjo la. ²³ N be gigo men na xumo fola, n x'e balan wo xa tu n na, bawo Ala men xa lahidolu ta n pen, ate mu xantigo le ti. ²⁴ Alan xa i hakilo tu i noxo kun, walasa n xa i noxo jusudun, noxoxano nin kunumako xanma. ²⁵ Alan xana noxo kamaro dabula, í xo dolu be wo kela ja men, bari n x'e noxo so hakili la, bawo alu fannu ja b'a la xo Marigi la na sutiyata. ²⁶ Awa nin n xa tonja lon xa ban, nin n x'e tawu xa tu junubo kela, sadaxa xote si nte je tugun men si n na junubolu bo no n na. ²⁷ Do xote nte n pen xo, fo n silaninba xa sigi xa Ala la kiito nin ta fatimanba laxono, men be nala a jaxolu janila. ²⁸ Nin moxo wo moxo tun xa kila Musa la sariya sooso, hinna tun nte a to, wo si faxa x'a la moxo fula walla saba la seedeyalo xan. ²⁹ Wo be ja men, nin moxo men man Ala Dinxe jaate, Ala la Kafuxanjo jelo men keta x'a senuya, a man wo mafele fen ti, a xa Ala Ni Senunjo doxoya, men be neemo dila n ma. Wo tigo nin tooroba man xan bete bete ba xa tanbi Musa la sariya soosobaxo xan? ³⁰ N x'a lon xo men x'a fo xo: «Nte le mu tasarabaxo ti; nte si alu ta sara.» Anin du xo: «Marigi si kiito tege a la moxolu xan.» ³¹ Nin n dunta Ala nilama bulo xono kiito xanma, wo xa jaxu de! ³² Alu xa kuwo men je folofolo, alu i hakilo lajigi wo la. Wo waxato, alu xa Ala la keneya soto tumo men, alu xa tooro kiika nin keleba muja. ³³ Alu dolu nanita, xa mutakujaxu bee jaala tumo men, alu tolu x'a yita wolu la xo alu nin i mu kilin ti. ³⁴ Alu nin kasolamoxolu kafuta i la toorolu to. Alu bulufenjolu mutata alu la tumo men, alu sonta xa bono wolu to ja jo to; bawo alu x'a lon xo naafulo do be alu kun men xa fisa, anin men si tu fo abada. ³⁵ Wo xanma, lannaya xoyo men be alu la, alu xana faaratu wo la. Baraajiba be wo la. ³⁶ Haalibi alu maakuwo be timinadiya la, walasa alu xa Ala sago ke. Nin wo keta, a xa fenjo men lahido ta alu pen, alu si wo soto. ³⁷ A be safenin Kitaabo to xo: «Dondin, men xa xan xa na, wo si na. A me me tugun. ³⁸ Nte la moxo tilinningjo si nilamaya soto lannaya fe. Bari nin a xa lannaya silo bula, a la kuwo me diya nte pen tugun.» ³⁹ Moxo men nu be sila beto bulala, xa taxa i fannu halagi, ntelu nte wolu do ti; bari mennu be tula lannaya la, xa i niyolu lakisi, ntelu mu wo lelu do ti.

11 Lannaya mu jin ne ti xo: Í gigo be fenjo men xan, wo soto be xoyiyanin í ma; walla í ja nte fenjo men na, í b'a yitanin xo í ja be wo la. ² Alan maxelu la lannaya le x'a tu, i la kuwo diyata Ala pen. ³ N x'a lon lannaya le fe xo Ala xa duniya da a la xumo la. Wo ja ma, n ja be men na, nin wo mu duniya ti, Ala xa wo da fen jebalo la, nin wo mu a la xumo ti. ⁴ Abila la lannaya le x'a tu, a xa nilifen sadaxo di Ala ma, men xa fisa Kabila ta ti. A la lannaya xanma, Ala x'a jaate moxo tilinningjo ti, bawo Ala fan x'a seedeya xo a sonta

a la nilifenjolu to. Haali nin Abila sata xa ban, haalibi a be xumala n pen a la lannaya koso. ⁵ Enoke la lannaya le x'a tu a sabalo tata xa taxa a ti Ala bata. Moxo si man a je tugun, bawo Ala x'a ta xa taxa a ti a bata. Kitaabo b'a fola xo jannin Enoke xa ta, xa taxa a ti sanjo to, a la kuwo diyata Ala pen. ⁶ Moxo si me diya no Ala pen nin lannaya nte í la. Moxo men b'a fe xa í sodun Ala la, a xa xan xa la a la, xo Ala be je, anin xo a si a njinbaxolu barajaji. ⁷ Nuhun na lannaya le x'a tu, Ala x'a lasobi tumo men, xo kuwo do be nala kela, a xa Ala lame, x'a tara a ja man wo kuwo je folo. A xa xulunba dara walasa a nin a la dinbaya xa kisi. A la lannaya le x'a tu, kiito tegeta duniya xan, anin Ala xa ate jaate moxo tilinningjo ti. ⁸ Burehima la lannaya le x'a tu, Ala x'a kili tumo men, a sonta xa Ala la xumo muta. Ala tun be nala jamano do dila a ma ke ti. A bota a fan na jamano to, xa silo muta, x'a tara a man a lon a be taxala jan men. ⁹ A la lannaya le x'a tu, Ala xa jamano men lahido ta a pen, a sigita non xa ke signife ti. A keta tilliso xono, í xo Nsiyaxa nin Yaxuba, lahidu kilin in tun tata wo men dulu pen. ¹⁰ Burehima tun yilo be galluba soto ma, men mu gallu wulibalo ti. Wo gallo loja lategebaxo nin a lobaxo mu Ala le ti. ¹¹ Saran na lannaya le x'a tu, haali a xotonin banningjo, a sinta xa dinjo wulu, bawo Ala men tun xa wo lahido ta a pen, a lata a la xo wo mu xantigo le ti. ¹² Wo ja ma, a xe Burehima, men tun nte fusi xote laxononin nin saya nte, wo kilin xa bonson kiika soto í xo sanxulo ma loololu, anin xooxojida la kejo, wo men me dan no. ¹³ Wo moxolu bee sata x'e tu lannaya to. Ala tun xa fenjo mennu lahido ta i pen, i man wolu soto folo. Bari i keta í xo nin i tunnu ja be i la dulajan, xa ja ja i la. I fannu x'a fo i da la xo i mu luntanjo nin signife lelu ti jin duguxulu in xan. ¹⁴ Mennu la fo keta jin ti, wolu b'a yitala xo i be fasuwo do njinna. ¹⁵ I bota jamano men to, nin i tunnu x'e miiri xa nimisi non ma, i tunnu si ja soto no x'e koppa non ma. ¹⁶ Bari i tunnu be fasuwo do njinna men xa fisa, men be sanjo to. Wo le x'a tu, Ala si son wo moxolu x'a kili xo i la Ala; bawo a xa gallo do toben x'a bula i ja. ¹⁷ Burehima la lannaya le x'a tu, Ala x'a xotobo tumo men, a sonta x'a dinxe Nsiyaxa di, a xa ke sadaxo ti. A sonta a dinxe kilinpe xa ke sadaxo ti, x'a tara Ala tun xa lahido ta a pen. ¹⁸ Ala tun x'a fo a pen xo: «Í xa bonsonjo men lahido ta í pen, wo be bola Nsiyaxa le to.» ¹⁹ Burehima tun x'a jaate xo a sinjo be Ala pen xa Nsiyaxa lakuni xa bo furelu to. Wo le x'a tu, Ala x'a dinjo saagi a ma. A keta í xo nin a kunita le xa bo furelu to. ²⁰ Nsiyaxa la lannaya le x'a tu, a xa duwa ke Yaxuba nin Esawu pen, i sininjo si ke men ti kuwo la. ²¹ Yaxuba la lannaya le x'a tu, a sa tumo, a duwata Yusufu dinjolu pen, anin a x'e tintin a la guma la, xa Ala batu. ²² Yusufu la lannaya le x'a tu, a be nala sala tumo men, a xumata Banisirayila dinjolu labo xan Misira jamano xono, anin a xumata a xulolu xa xan xa

ke na men a sa xofe. ²³ Musa bangebaxolu la lannaya le x'a tu, Musa wuluwo xo, i x'a dugu xaru saba xono, bawo i x'a je xo a xa kepin. I man sila xa Misira mansaxe la ku lategeninngo sooso. ²⁴ Lannaya le x'a tu, kila Musa bunpaninma, a x'é ban a xa kili xo Farawuna dinmuso dinngo. ²⁵ A nin Ala la moxolu xa tooro i noxo fe, a xa wo fisiya don ti xa naxali junubekuwolu la, mennu mu waxatindin ku ti. ²⁶ A x'a jaate xo xa doxoya í xo Kirisita doxoyata na men, nafa be wo la xa tanbi Misira naafulo bee xan. Ate na tun be fen xote le to, nin wo mu Ala la barajjo ti. ²⁷ Musa la lannaya le x'a tu, a bota Misira. Mansaxe tun diminta a xoto, bari a man sila wo na. Ala men nte jela, a na tun be wo le to. Wo xanma, a man yilanyilan. ²⁸ Lannaya le x'a bula Tanbinxansallo sigila, xa jelo sari sari bunda yirolo ma, walasa meleke halagilila xana maxa Banisirayila din fololu la. ²⁹ Lannaya le x'a tu, Banisirayila dinngolu xa Xooxoji Wulenngo tege í xo duguxulu jaro. Bari Misiranngolu xo x'e be tegela tumo men, jiyo xa i bee domo. ³⁰ Lannaya le x'a tu, Banisirayila dinngolu xa Yeriko tato laminin tili woorowula tumo men, a boyita tili woorowulanango lunngo. ³¹ Lannaya le x'a tu, jadomuso do keta je xo Arahabu, Ala foxanmutabalolu halagita xa ate tu je, bawo Banisirayila dinngo mennu wulita xa taxa jamano mafele dibi to, a xa wolu mutakubete. ³² Awa, n si a fo di tugun? Waxati nte n bulu xa xuma Jedewon nin Baraki nin Samuson nin Jefite nin mansaxe Dawuda nin Samuyeli nin kilalu xan. ³³ Lannaya le x'a tu, i xa mansayalu no, xa i taxama tilinningna silo xan, xa Ala la lahidufenngolu soto, xa warabalu dalu taxun. ³⁴ I xa i dolu bula ta napaninba to, bari ta man fusi ke wolu la. Dolu kisita fanngo masiibo ma. I dolu tunnu barako xa doxo, bari i xa barako soto. Dolu keta xe fatinngolu ti keledula, fo jamana xote keledinngolu x'e bori i na. ³⁵ Muso dolu la lannaya xanma, i la furelu kunita xa di i ma. Lannayabaxo dolu toorota fo xa doxola i faxala; bari wolu man son i xa bo bulo to. Wolu sonta saya ma, walasa i si kuni xa nilamaya soobe soto. ³⁶ Dolu sonta moxolu xa jele i ma, xa i buwo gajo la. Joloxo keta dolu la, xa i bula kaso la. ³⁷ I xa dolu bun kurolo la xa i faxa, xa dolu tokutun fula ti yiritege siyo la, walla xa i faxa fanngo la. Dolu tunnu bulutoxulunngo be taxala dula nin dula. Saaxagulo walla bagulo le tun mu i la dunfaanolu ti. Moxolu tunnu b'e toorola, xa i mutakujaxu. ³⁸ I jenjenninngo tun b'e mininmininna fuxolu nin kurolo to, x'e dugu kuruwuwolu nin dinxolu xono; bawo duniya tun nin i man xan. ³⁹ Wo moxolu bee la kuwo diyata Ala pen i la lannaya le xanma. Wo bee nin a ta, Ala xa men lahido ta, i man wo soto folo. ⁴⁰ Ala tun xa fen xote le latege n bee pen, men xa fisa. Ala tun nte a fe wolu xa dafaningna soto ntelu xo.

12 N badinngolu, nin lannayabaxa jamaba in be n namininnin. Wo xanma, fen wo fen si n bali xa taxa na lannaya taxamo to, alan xa wolu bee bula.

Alan xa junubo bula, wo men xa tari x'é noto n na. Ala xa n bula boro men na, alan x'e balan wo boro to. ² Alan x'e na tu Isa to, n na lannaya damuto nin a labanngo be men bulu. A xa gengenyiro xan saya muja. Maluya men be gengenyiro xan saya la, a man wo jaate; bawo naxalo men tun b'a pen wo xo, a na tun be wo le to. Saasa a be siginin mansasigilango xan, Ala kininngo fe. ³ Ate men xa nin noxon tooro muja kujaxukelalu bulu, alu i miiri ate ma, walasa alu xana sege, anin alu juso xana doxoya. ⁴ Alu man junubo kele folo fo wo kelo xa si saya ma. ⁵ Men x'alu tonben í xo fa b'a dinngo tonbenna na men, wo la xumo bota alu xono ba? A xo: «N din, nin Marigi xo x'a be í latilinna, í xana wo bataramuta. Í balo xana faxa í ma, nin a x'é laxosi. ⁶ Bawo Marigi be men xanula, a si wo latilin, dinngo fen wo fen na kuwo xa di a pen, a si wolu bee busa.» ⁷ Alu Ala la latilinni guma muja; bawo Ala be alu jaatenin a dinngo lelu ti. Din joman be je nin a fa nte a latilinna? ⁸ Dinngolu bee be latilinna le. Nin alu man natilin, alu nte yeerewulu ti, alu nte din soobelu ti. ⁹ Alan x'e miiri n falu ma duguxulu in xan jan. I xa n natilin, n dulu x'e bunna. N man xan ba xa xulu bete bete n Fa men be sanngo to le pen, walasa n xa nilamaya soobe soto? ¹⁰ N fa mennu be duguxulo xan xa n natilin waxatindin, i fannu hakiliya la; bari Ala be n natilinna n na nafa le xanma, walasa n xa senuya í xo ate xa senu na men. ¹¹ Moxo si me nana a be latilinna tumo men, a be jusula le. Bari wo keta mennu pen xaran ti, a si falin heero nin nilamaya tilinningna la wolu pen. ¹² Wo le x'a tu, alu niyo ke alu fannu to, alu xunbalinkunngolu xa fata jarajala. ¹³ Alu i taxama sila tilinningngolu xan; walasa alu sin yellaningngolu xana silo bula, bari i xa kendeya. ¹⁴ Alu a njinin benngo xa ke alu nin moxo bee te, anin alu xa senuya; bawo nin alu man senuya, alu si na me la Marigi xan. ¹⁵ Alu i korosi moxo si xana í sinbo Ala la neemo to. Moxo si xana ke í xo yirililli xunimanngo, baxo be men na. A si falin, xa moxo kiika xono fa a baxo la. ¹⁶ Alu i korosi moxo si xana ke jado ti alu to, xa fen senumanngolu toxosi í xo Esawu, wo men x'a la xotoniyo fiiri kini miran kilin na. ¹⁷ Alu x'a lon xo a tun b'a fe x'a fa la duwa soto. Bari son man ke wo ma a pen. A man na si soto a ma xa wo yelema, haali nin a xasito xa wo njinin. ¹⁸ Alu man i sodun fen na, maxo tun si ke no men na. Wo tun mu Turusinna kuro le ti, ta fatinba nin dibo nin sanjifinba nin fonoba, ¹⁹ nin buutu foxanngo nin xumaxanngo tunnu be je. Banisirayila dinngolu xa wo xumaxanngo me tumo men, i x'a njinin xo xuma xana ke i pen tugun x'a kafu wo ma. ²⁰ Kankero men lata i pen xo: «Moxo wo moxo maxata wo kuro la, haali nin a keta marafenngo le ti, wo xa bun kurolo la, x'a faxa», i man fatiya wo xumo na. ²¹ Wo kuwo men keta Turusinna kuro dula, wo tun mu silannga kuba men ti, fo kila Musa fan x'a fo xo: «N be jarajala, silannga kujaxo bulu.» ²² Bari atelu kennu x'e sutiya Siyon kuro le

la, anin Ala nilama la galluba, nin wo mu sanjo to Yerusaleme ti, anin a meleke wulu kiika. ²³ Ala la moxo banganin folo mennu toxo safeta sanjo to, alu x'e sodun wolu la jama la, mennu be paxalo to. Alu x'e sodun Ala la, wo men be nala kiito tegela moxolu bee xan, x'e sodun moxo tilinningolu la, mennu sata nin i niyolu taxata Ala bata. ²⁴ Alu x'e sodun Isa la, wo men mu Kafuxan Kuto telabenbaxo ti, x'e sodun a jelo bonningo la, wo men jelo barako xa bun xa tanbi Abila jelo xan. ²⁵ Wo to, alu i korosi. Men be xumaxan alu pen, alu xana i ban xa wo lame. Mennu x'e ban x'e laso-bibaxo lame duguxulu in xan, wolu man kisi Ala la pangilo ma. Wolu man kisi jan men, sakuta ken ntelu mennu xumanpenbaxo be bola sanjo to. Nin n x'e xodi wo la, n me kisi Ala la pangilo ma fewu. ²⁶ Xotonin, a xumaxanjo xa duguxulo lajarajara; bari saasa, a xa jin lahidu in ta n pen xo: «N si duguxulo lajarajara sinja xote tugun; nte danna wo kilin ma, bari n si sanxulo du lajarajara.» ²⁷ Nin xuma in xo: «Sinja xote tugun», wo b'a yitala xo dafenjololu bee si jarajara, xa sanko, walasa fen jarajarabalolu xa tu je. ²⁸ Mansaya men fenjololu nte jarajarala, n xa wo le soto. Wo le x'a tu, n xa xan xa Ala walejumalon, xa baaro ke a pen, x'a la a diyanjo xan, a bunja nin a nasilanja xono; ²⁹ bawo n na Ala be le i xo ta, men si janilo ke.

13 Haalibi alu taxa ja xa i noxo xanu i xo badinmalu. ² Alu xana njina luntannajigo kun. Dolu keta luntannajigila ti, fo i xa melekoyolu jigija x'a tara i man a lon. ³ Alu i hakilo tu kasolamoxolu kun, x'a ke i xo nin alu dulu nin i be kaso la le i noxo fe. Alu i hakilo tu moxo tooroninjololu kun, x'a ke i xo nin alu fannu balo lelu je tooroxan. ⁴ Bee xa futuwo bunja. Futunoxomaluxa dan i noxo ma, bawo Ala si kiito tege fuyannjololu nin jadolu xan. ⁵ Naafulukunteya xana ke alu jigo ti. Men be alu bulu alu muta ke wo ti, bawo Ala fan xo: «Nte me n xodi i la, n me n bulo bo i xoto muume.» ⁶ Wo le x'a tu, n hakilo lategeninjo si a fo xo: «Marigi le mu n deemabaxo ti, n me sila fusi ja. Moxolu si mun ke no n na?» ⁷ Alu i miiri alu la pamoxo fololu ma, mennu xa Ala la xumo fo alu pen. Alu i miiri i la nilamaya labanja ma, x'e la lannaya noxon ke. ⁸ Isa Kirisita mu men ti kunun, a mu wo le ti bi, a nte ye-

mala fo abada. ⁹ Alu xana son moxo x'alu lafilu sila xotelu la. A xa bete Ala la neemo le xa do kafu n juso ma. Sariya mennu be xumala domolifenjololu doron xan, wolu me fen kafu no n juso ma. Mennu xa wo sariyalu labatu, a man fusi njina wolu pen. ¹⁰ Sadaxala-sibaxo mennu be baaro kela Yahudiyalu la Alabatusuba tillisima xono, a man dage wolu pen i xa n na sadaxajanidula fen domo. ¹¹ Anin du, sadaxalasibaxa kuntigiba tun nin marafenjo mennu jelo be dunna du-la Senumanba junubeyaafu xanma, wo marafenjo tunnu subo be janila le xa ban sigidula xoxan. ¹² Wo le x'a tu, Isa du toorota xa sa gallo xoxan, walasa a xa moxolu senuya a fan jelo la. ¹³ Wo to, alan xa bo xa si a ma gallo xoxan, x'a la doxoyalo noxon muna. ¹⁴ Bawo gallu nte n kun duniya in to jan, n si tu men xono tuma bee; gallo men be nanin xa bo Ala bata, n be wo le njinna. ¹⁵ Isa Kirisita barako to, alan xa Ala tantu tuma bee, xa wo ke n na sadaxa bota ti; wo xoto xo n x'a toxo bunja n da la tuma bee. ¹⁶ Alu xana njina kubeteko kun, anin noxo deema, bawo wo noxon sadaxa lelu xa di Ala pen. ¹⁷ Al'alu la pamoxolu bunja, xa xulu i pen, bawo i lelu mu alu niyolu korosibaxolu ti. Ala be nala i lelu njinxala alu la kuwo la sinin. Alu wo ke, walasa i x'e la baaro ke nitodiya to, i xana a ke jusuxaso to. Nin i x'a ke jusuxaso to, nafa si nte alu pen wo la. ¹⁸ Alu Ala matara n pen. N be lanin a la xo jusukun beto be n na, bawo n b'a fe n bosilo xa ben kuwo bee to. ¹⁹ N b'a xoleyala alu ma xo alu xa Ala matara nte pen, walasa nte xa saagi alu bata junna. ²⁰ Heeratigi Ala xa n Marigi Isa Kirisita lakuni xa bo furelu to. A jelo bonta xa ke Kafuxan banbalo sadaxo ti. Wo xanma, a keta Ala la saaxolu korosibaxaba ti. ²¹ Ala mu ku numa bee ko sinjo dila alu ma, walasa alu x'a sago ke. Ala mu a fan diyanpekuwolu bulala n sondonmo la, Isa Kirisita barako to. Nooro xa la Isa xan fo abada. Amiini. ²² N badinjololu, n be alu matarala xo alu xa muna xa jin tonbennixan innu lame. N xa men fan safe, wo man jan. ²³ N be alu lalonna a la xo n badinxe Timote bula-ta. Nin a nata junna, n nin a si taxa alu je. ²⁴ Al'alu la pamoxolu nin Ala la jama moxolu bee xonton. N badinjo mennu be Itali jamano to, wolu be alu xontonna. ²⁵ Ala la neemo xa ke alu bee fe.

YAXUBA

1 Nte Yaxuba le xa jin safe in ke, nte men mu Ala nin Marigi Isa Kirisita la jonŋo ti. ¹ N na xontonno be taxala Ala la jama moxolu bee ma, mennu be jennin duniya bee xono. ² N badinŋolu, nin tooro wo tooro nata alu ma, alu wo jaate naxalikuwo ti; ³ bawo nin alu xa xoleyalu soto x'e muja xa tu lannaya xono, wo si a ke alu x'e timinadiya lannaya to. ⁴ Alu la timinadiya xa taxa ja, walasa alu xa ke lannayabaxa dafaninŋolu nin lannayabaxa moninŋolu ti, fo fusi me dasa alu la. ⁵ Hakilitigiya be dasanin moxo men na, wo xa Ala matara wo la, a si a di wo tigo ma; bawo Ala mu solilaba le ti, a si moxo so, x'a tara a man fen fo í ma. ⁶ Bari a x'a tara lannaya to, a xana sikka. Bawo moxo men be sikkala, wo be le í xo xooxojiyo fanfe, foŋo be í tulunna men na, xa taxa a ti boxo bee. ⁷ Wo moxo sifa ken xana í miiri xo a si fen do soto Marigi la. ⁸ Hakili fulanfulanŋo le b'a la; a la ku si me sila soto. ⁹ Awa, badinŋo mennu mu segebaxantunŋolu ti, wolu xa nana; bawo Ala s'i xotota. ¹⁰ Bari badin naafulutigo dulu xa nana, nin Ala x'e majigi. Bawo lun do, i la kuwo si ban í xo binfiro be kela ja men. ¹¹ Nin tilo nin a funtaniba wulita, a si binŋo ja, a firo si bon. A dawulo bee si bo a la. Naafulutigo du be banna ten ne, x'a tu a la kuwolu temo to. ¹² Moxo men be tooro mupala a la lannaya xanma, heero be wo jen; bawo nin a xa tooro muja, a si nilamaya banbalo soto kunnawulijala ti. Ala xa wo lahido ta a xanubaxolu bee jen. ¹³ Nin moxo men be jarabo xono, wo xana a fo xo Ala le b'a bulala jarabo xono; bawo fusi me Ala bula no jarabo xono, x'a bula jaxumanŋo kela, a fan du nte moxo lajarabila. ¹⁴ Moxo bee fan nidiyanŋo le b'a sabala x'a neene, x'a bula jarabo xono. ¹⁵ Nin í x'a lo í nidiyanŋo nofe, wo be junubo le bangela. Nin í tuta junubo xono, wo si falin saya la. ¹⁶ N badin xanuninŋolu, alu xana a tu moxo si x'alu lafili. ¹⁷ Fen puma mennu be dila n ma, anin n be nilifen dafaninŋo mennu sotola, wolu bee be nala xa bo sanŋo le to. I be nala xa bo Ala le bata, wo men mu sanxulo keneyalu dabaxo ti. Ala nte yelemala, a nte dulen kela, í xo fenŋo mennu be bola i no to. ¹⁸ A diyata a jen xa nilamaya kuto di n ma a la xumo barako la, wo men mu tonja ti, walasa n xa ke folo ti a la dafanŋolu bee to. ¹⁹ N badin xanuninŋolu, alu jin tu alu hakilo la xo: Moxo bee tulo xa tu dayelenin xa lamelo ke junna, bari alu xana tariya xa xuma, alu xana dimin junna. ²⁰ Bawo moxo dimininŋo me ku ke

no, men be tilinnin Ala ja xoto. ²¹ Wo le x'a tu, ku wo ku si moxo noxo, alu wo bee dabula, anin jaxuya bee. Ala la xumo men lanta alu jusukunŋo la, alu son wo ma majigininŋa to; wo si sin x'alu kisi. ²² Alu xana ke Ala la xumo lamebaxolu ti gansan, alu ke a latimbebaxolu ti; nin wo nte, alu si alu fannu lafili. ²³ Moxo men be Ala la xumo lamela, bari a nte wo xumaxanŋo latimmela, wo tigi be le í xo moxo men b'a fan mafelela dunare to. ²⁴ A x'a fan mafele tumo men, a taxata, wo no bee to, a njinata a fan kepa kun. ²⁵ Bari xibaru Dimanŋo, wo mu sariya ti, men be dafanin, men si moxo hooroya. Awa, nin moxo wo moxo xa wo mafele bete x'a faamu, xa í hakilo tu a la, nin í xa í sinsin a xan, í man a lame doron xa njina a kun, bari í x'a latimme, wo tigo si heero soto a la ku ketalu to. ²⁶ Nin a be moxo do jen xo a be silala Ala ja, x'a tara a ta nte a da ti, wo tigo b'a fan ne janfanin. A la batulo nin fuwo bee xa xan. ²⁷ Fa Ala ja xoto batulija mu men ti tigi tigi, noxo nte men to, wo fele: Xa í hakilo tu kilondinŋolu nin musujaxelu la, i la tooro xono, anin xa í fan tanga duniya fen noxoninŋolu ma.

2 N badinŋolu, atelu mennu lata n Marigi nin nooro Mansaxe la, nin wo mu Isa Kirisita ti, alu xana moxo fisiya moxo ti, wo lannaya silo xan. ² Alan x'a misaali xo moxo do nata alu la kafo xono, sanudoronma b'a bulo la, faanu betolu be a ma. Segebaxantunŋo do du nata je, faanu kurunŋolu be a ma. ³ Awa, nin alu xa faanubetetigo bunja x'a fo a jen xo: «Í sigi jin dula bete in», x'a fo segebaxantunŋo jen xo: «Ite xa í lo jan!» walla xo: «Ite xa í sigi dugo ma jan, n sinŋolu xoto», ⁴ alu man do fisiya do ti ba? Alu man wo ke x'a la miiriya jaxo xan ba? ⁵ N badin xanuninŋolu, alu n name! Ala xa segebaxantunŋolu sugandi le jin duniya in xono, walasa i xa ke fentigolu ti lannaya to, xa dun a la Mansaya xono. A xa wo Mansaya le lahido ta a xanubaxolu bee jen. ⁶ Bari atelu kennu be segebaxantunŋolu doxoyala. Mennu be alu toorola, x'alu lasi kiititegelalu ma, naafulutigo lelu nte ba? ⁷ Marigi toxonuma men be lanin alu la, naafulutigo lelu nte wo toxo tijaxan ba? ⁸ Ala la sariya men be safenin Kitaabo xono xo: «Í xa í moxoxo xanu í xo í fan», nin alu xa wo dafa, sikka nte a to, wo mu ku puma le ti. ⁹ Bari nin alu be moxolu bola i noxo to, wo mu junubo le ti. Sariya be alu jalagila; bawo alu mu sariya soosobaxo lelu ti. ¹⁰ Moxo wo moxo xa sariyalu bee dafa, bari xa

kilin doron sooso, a xa sariya muume le sooso. ¹¹ Bawo men x'a fo xo: «Í xana jadoya ke,» wo le du x'a fo xo: «Í xana moxo faxa.» Awa, nin í man jadoya ke, í dun xa moxo faxa, í xa sariya sooso. ¹² Sariya men x'alu hooroya, kiito be nala tegela alu xan, x'a la wo sariya le xan. Wo xanma, alu xumaña nin alu taxamaña xa ben wo ma. ¹³ Nin moxo men man hinna tolu la, hinna me na ke wo tigi du la kiito lunjo. Bari moxo men be hinna, wo silakun nte kiito ja. ¹⁴ Awa, n' badinjololu, nin moxo do xo, xo lannaya b'a la, x'a tara a tigo nte kewale numa kela, men si a la lannaya yita, wo lannaya si mun dun wo tigo la? Wo lannaya si a kisi no ba? ¹⁵ Nin feeto be alu badinjo dolu la, musu walla xe, anin nin lunjo baluwo nte i bulu, ¹⁶ atelu do xo i j'en xo: «Ala mu newoya kela alu j'en. Alu faanu xulinjololu dun, xa domolo ke x'e fa», x'a tara a man i balo maakuwo jinafenjo di i ma, a la wo xumo be mun dunna? ¹⁷ Lannaya du be wo ja in ne. Nin í nte a yitala kewale numalu fe, í la lannaya be le í xo fen saninjo. ¹⁸ Do si a fo no xo: «Lannaya mu dolu ta ti, kewale numako mu do dulu ta ti.» N' si wo tigo jaabi xo: «A yita n' na xo lannaya be í la kewale numalu xo. Nte ken be n' na lannaya yitala í la n' na kewale numa lelu fe.» ¹⁹ Xodi í be lanin a la de xo Ala kilin ne be je? Wo xa bete. Jinno dudu be lanin wo la. I be silala Ala ja fo i be jarajarala. ²⁰ Hakilintan in! Í b'a fe a xa yita í la ba xo nin lannaya b'e la x'a tara í nte kewale numa kela, xo wo lannaya mu fuwo le ti? ²¹ Ala xa n mamaxe Burehima jaate moxo tilinningjo ti ja men, í man wo lon ba? A keta a la kewalo lelu xanma, bawo a sonta x'a dinxe Nsiyaxa di nin a si ke sadaxajanita ti sadaxajanidula. ²² Í x'a je xo a la lannaya nin a la kewalolu tunnu be taxala i joxo fe. A la kewalo lelu x'a la lannaya latimme. ²³ Wo ja ma, Kitaabo tun xa men fo, wo keta xo: «Burehima lata Ala la, wo xanma, Ala x'a jaate moxo tilinningjo ti.» Ala x'a kili xo a xanunte. ²⁴ Alu x'a je, Ala be moxo jaatela moxo tilinningjo ti ja men. A la kewalolu dulu xanma le mu, a la lannaya gansanjo doron xanma nte. ²⁵ Jado-muso do keta xo Arahabu, Ala xa wo du jaate moxo tilinningjo ti a la kewale numa le xanma. Ate xa Banisir-ayila dinjololu la kiladinjololu lajigi a bata, xa taxa i ti sila xote fe. ²⁶ Nin niyo bota hadamadinjo to, wo be sanin ja men de, wo ja ma, lannaya du be le í xo fen saninjo, kewale numalu xo.

3 N' badinjololu, alu kiika xana karanmoxoya njinin, bawo ntelu karanmoxolu la kiito si jaxuya xa tanbi tolu ta xan. ² Alan bee be filila ja kiika ma. Moxo men nte filila xumo to, wo tigo mu moxo dafaningjo le ti. A si a fan muume bee muta no a la ku ketalu bee to. ³ Nin í xa n je xarabe dunna suwolu da ma, a kunjjo mu le, walasa i xa xulu n j'en. Wo ja ma, n s'i ke n sago ti. ⁴ Walla alu jixanxulunbalu mafele. I xa bun ja wo ja, anin fopobalu b'e norila ja wo ja, i laborilango mu batarafendin ne ti, men be taxala i tila i laboribaxo

diyanjedula. ⁵ Wo be ja men, moxo nenjo mu a balo dula doxomandinjo do le ti. Bari moxo si a fan bunja a nenjo la, xa xumabalu fo. Alu i miiri tandinjo ma, a si sin xa wulaba bee jani. ⁶ Nenjo du mu ta le ti. Fen-jaxuba le mu, men mu n balo do ti. A be moxo muume bee noxola. A si ta dun n na kuwolu bee la. Wo ta be bola jahanaba le fan xono. ⁷ Hadamadinjo si sin xa wulaxonosubu sifa bee, nin xonolu, nin fenjo mennu b'e fuufula, nin jitofen sifa bee xulu, x'e mara. ⁸ Bari nenjo ken, moxo si man sin xa wo xulu. Fen jaxu xulubalo le mu nenjo ti. Xuno b'a la, men si moxo faxa. ⁹ N be Marigi, n Fa Ala tantula n nenjo la. Ala xa moxo mennu da a mununjo la, n be wolu dangala nen in ne du la. ¹⁰ Duwawo nin dangalo bee be bola da kilin to. N' badinjololu, a man xan xa ke ten. ¹¹ Ji dimanjo nin ji kumanjo fulo bee si bo no dula kilin ba? ¹² N' badinjololu, turo me oliwedinjjo ke no. Resenjuwo du me turodinjo ke. Ji dimanjo me bo no ji xooxoma bodula.

¹³ Moxo do be alu to ba, men mu hakilitigo ti, men xa ku lon? Wo tigi xa wo yita a bosila numa la. A x'a yita kewalolu fe, mennu be lanin majigo nin hakilitigiya xan. ¹⁴ Bari nin a x'a tara kiiliya nin fadinja juso le be alu xono, wo tuma, alu xana alu fannu bunja xa faniya fo, x'e ban tonja ma. ¹⁵ Wo hakilitigiya man bo Ala to. Duguxulo xan ta le mu. Hadamadinjololu fannu la hakilitigiya le mu. A bota Sentane le to. ¹⁶ Bawo kiiliya nin fadinja be dula wo dula, ku jaxamininjo nin kujaxu sifa bee du be non. ¹⁷ Bari hakilitigiya men be bola Ala la, a folo wo xa senu, wo xo, a si heero di, a xono xa di, a be benjo fe. A si hinna bete, a la kewale numa dulu me ban; a nte moxo bola moxo to, a man fulankafuya du ja lon. ¹⁸ Mennu be benjo njinina i nin moxo tolu te, wolu be baaro kela benjo le du xono. Wo tono mu tilinningja soto le ti, Ala be men dila.

4 Kelolu nin soosololu mennu be alu te, mun be nala wolu tila? Alu nidiyanjekuwo mennu be alu xono jaxaminin, wo lelu nte alu bulala a la ba? ² Fen kiika loxo be alu la, bari alu me i soto no. Wo xanma, alu si moxo jaxuya, x'a faxa. Alu ja si bo fen kiika fe, bari alu me fusi soto no. Wo xanma, kelolu nin sonxolu be alu te. Alu be men fe, alu nte wo sotola; bawo alu nte a njinina Ala la. ³ Haali nin alu x'a njinin, alu me a soto; bawo alu b'a njinina alu fannu nidiyanjo lelu xanma. ⁴ Moxo banninjololu! Alu man a lon ba xo xa duniya xanu, wo xoto mu le xa ke Ala jaxolu ti? Moxo men b'a fe xa duniya xanu, wo tigi be jaxuya le dunna a nin Ala te. ⁵ A xana ke alu j'en xo Kitaabo xa xumo men fo, xo wo fota fu le. A xo: «Ala xa niyo men dun n to, kiiliya b'a la wo la kuwo to.» ⁶ Wo bee nin a ta, Ala be neemo men dila n ma, wo le xa bun wo bee ti, bawo a fota Ala la xumo to xo: «Ala be bunfanmamoxolu kelela, bari a be a la neemo dila moxo majigininjololu ma.» ⁷ Wo to, alu xulu Ala j'en. Alu xana alu fannu tu Sentane bulu, alu a kele, a s'í bori xa í soobo alu la.

⁸ Alu i sodun Ala la, a du s'í sodun alu la. Alu junubekelalu, alu junubeko dabula. Xonofulatigolu, al'alu jusukunjo senuya! ⁹ Alu a lon xo alu mu naanibaxato lelu ti. Al'alu fannu maxasi, alu najiyo bo. Jannin alu xa jele, alu xasi. Jannin alu xa najali, al'alu na tositi. ¹⁰ Alu i majigi Marigi nen, a si alu xotota. ¹¹ Awa, n badinjololu, alu xana xuma jaxu fo i joxo ma. Moxo wo moxo be xuma jaxo fola a badinjo ma walla xa kiito tege a xan, a be í xo wo tigo xa xuma jaxo fo Ala la sariya le ma, xa kiito tege a xan. Nin í dun be kiito tegela sariya xan, wo tumo, í nte sariya latimdebaxa ti, í mu a kiitibaxo le ti. ¹² Ala kilin ne xa sariya sigi, a kilin ne du mu kiititegebaxo ti. Ate le si a no du xa moxo kisi, a si a no du xa moxo halagi. Ite be í fan mafelela jon ti, ite men be kiito tegela í badinjo xan? ¹³ Awa, saasa, ate mennu b'a fola xo: «Bi wallama sinin, n be taxala galluba do to xa san kilin ke je. N be nala jaago kela xa tonoba soto.» ¹⁴ Men be nala alu ma sinin, alu xa wo lon ba? Alu be le í xo siisiyo men be bola waxatindin, wo xo, a si sanko. ¹⁵ Alu tunnu xa xan x'a fo le xo: «Nin Ala sonta, xa n kendo tu, n si jin ke, xa jin ke.» ¹⁶ Bari saasa, alu xa kuba mennu latege alu fannu la miiriya la, alu be alu fannu bunpala wolu la. Xa í fan bunna ten, wo man jin. ¹⁷ Awa, nin í x'a na lon xa ku numa ke, bari í man son x'a ke, wo to, í xa junubo soto.

5 Awa saasa, naafulutigolu, alu n name. Bone men nu be alu na, alu xasi xa xuure wolu koso. ² Alu la naafulolu si toli, baxabaxo si alu la faanolu nimi. ³ Sama, walla sonjo si alu la sano nin alu la xaa sisixoyo muta. Wo sama le b'a yitala xo alu xa xan xa jalagi. Wo sama si alu subo domo x'a ban, í xo ta. Alu xa naafulo lakamari duniya laban tumo. ⁴ Baarakela mennu x'alu la senefenjololu ladara, alu man wolu sara. Wo baarakedinjololu xasita wo xanma, Ala tulo xa wolu xasixanjo me, ate men mu Kelebulolu tigo Marigi ti. ⁵ Alu x'alu la duniyatotego ke duguxulo xan fen betolu la, mennu danmatanbita, anin alu nidiyanjekuwolu la. Alu x'alu fannu latolo í xo marafenjo, xa faxalo lunjo

laxono. ⁶ Alu xa kiito tege moxo tilinningjolu xan, x'e faxa. I x'e fannu tu alu bulu. ⁷ Wo le x'a tu, n badinjololu, alu mu na fo Marigi xa na. Alu senekela mafele: A be mu na la x'e lo senefenjololu xa sabati. A be mu na la fo sanji folo nin labanjo xa na. ⁸ Alu dulu xa mu na wo na kilin in ma. Alu i balan, bawo Marigi nawaxato sutiya-ta. ⁹ N badinjololu, alu xana i joxo maxuma; nin wo nte, Ala si kiito tege alu xan. Kiititegela nawaxato sita, a be da la fan. ¹⁰ N badinjololu, kila mennu xumata Marigi toxo la, wolu mu na ta na men toorolu xono, alu wolu ladigi. ¹¹ Mennu xa tooro mu na xa tu lannaya to, heero be wolu nen. Alu xa Yuba la mu na xibaro me. Alu x'a lon du Marigi xa men ke a nen labanjo la; bawo Marigi la hinno nin a la jumaya xa bun. ¹² N badinjololu, nte be men xoleyala alu ma, wo mu le, xo alu xana i xali fewu. Alu xana i xali sanxulo fen na, alu xana i xali duguxulo fen na. Alu xana i xali fuyi xote la. Alu a fo doron «iyo», nin iyo le mu, x'a fo doron «ayi» nin ayi le mu, walasa alu xana Ala la kiito lasi alu fannu ma. ¹³ Alu to, nin do be tooro xono, wo xa Ala matara. Nin do be nananin, a xa tantuli donkilo dolu la. ¹⁴ Alu to, nin do man kende, a xa Ala la jama moxobalu kili wolu xa Ala matara a nen, x'a mu tulo la Marigi toxo la. ¹⁵ Nin Alamatarata keta lannaya to, jangaruto si kende ya. Marigi si a lawuli tugun. Nin a xa junubolu ke, wolu si yaafa a ma. ¹⁶ Wo xanma, alu i lo alu la junubolu la i joxo nen, xa Ala matara i joxo nen, walasa alu xa kende ya. Barakeba be moxo tilinningjolu la Alamatarata to. ¹⁷ Kila Eli tun mu ntelu joxon hadamadin ne ti. A xa Ala matara, x'a matara nin sanji me na. Haali sanjikese kilin, a man butun duguxulo xan san saba nin tala xono. ¹⁸ Wo xo, a xa Ala matara tugun. Sanjiyo nata, duguxulo x'a la dinfenjololu ke. ¹⁹ N badinjololu, nin alu do filita, xa tonna silo bula, nin alu do keta sabaabu ti xa wo lakoppa sila beto ma, ²⁰ alu a lon xo men be junubekela kilin nakoppala sila beto ma, a si wo niyo kisi saya ma, xa ke junube kiika yaafa sabaabo ti.

1 PIYERE

1 Nte Piyere men mu Isa Kirisita la kiladinjo ti, nte le be nin safe in kila alu ma, Ala x'ate mennu sugandi, ate mennu be jenjennin xa ke siginfelu ti Pon nin Galasi nin Kapadosi nin Asi anin Bitini marolu xan. ² N Fa Ala x'alu sugandi, x'a la a la ku natalu lonjo xan. Alu keta Ala ta ti Ni Senunjo barako to, walasa alu xa Isa Kirisita sago ke, anin alu xa senuya a jelo fe. Ala mu neemo nin heero kiika kela alu nen. ³ Alan xa n Marigi Isa Kirisita Fa Ala tantu! A la numayaba koso, a x'a ke xo ntelu towuluta, walasa n xa gigi nilama soto. A xa wo ke Isa Kirisita lakuniyo fe xa bo furelu to, ⁴ walasa n xa ke soto, men nte tijala, men nte noxola anin men nte moromorola. Wo ke be maranin alu nen sanjo to, ⁵ atelu mennu be maranin lannaya koso, Ala la sintigiya fe, kisilo xanma, men be nala yitala duniya labanjo lunjo. ⁶ Wo kuwo be alu nitodiyala, haali nin a x'a tara x'alu si jusuxasi waxatindin xono, xotoboli sifa bee fe. ⁷ Sano fan men mu fen tijata ti, wo be xotobola ta fe; wo ja ma, alu la lannaya men xa xole bete sano ti, wo be xotobola walasa alu xa sin xa tantulo nin nooro nin bunja soto wo koso, Isa Kirisita yitalunjo. ⁸ Alu be a xanunin x'a tara alu man a je folo. Alu be lanin a la du haali nin alu ja nte a la saasa. Wo le x'a tu, alu be nitodiya mapoxonjebalo xono, men me laxali no, ⁹ bawo alu be alu la lannaya kekunjo sotola, nin wo mu alu kisilo ti. ¹⁰ Kilalu xa njinno nin sege-segelo ke wo kisilo kuwo la. Wolu xa kilaya ke Ala la neemo kuwo la, men tun be nala dila alu ma. ¹¹ Kirisita Niyo tun be i xono; wo tun be i lasobila Kirisita la toorolu la, anin nooro men tun be nala lala a xan wolu xofe. Kilalu x'a njin xa wo kuwolu kewaxato nin i keja lon. ¹² Ala x'a yita i la, xo i tunnu be xumala kuwo men-xan, x'e baaro ke, xo wo kuwolu nte itelu talu ti, bari atelu talu. xibaru Dimanjo fobaxolu xa wo kuwolu fo alu nen saasa, Ni Senunjo barako to, men kita xa bo sanjo to. Haali melekijolu b'a fe xa wo kuwolu je, x'e lon. ¹³ Wo le x'a tu, alu i jusukunjo toben baaro xanma, x'alu hakilo lasigi, xa tu i jala. Neemo men be nala dila alu ma Isa Kirisita yitalunjo, alu i gigo bee la wo sotolo xan. ¹⁴ Alu ke Ala foxanjo labatubaxolu ti. Nege jaxo men tunnu be alu la, jannin alu tunnu xa lonjo soto, alu xana alu jigo ben wolu ma tugun. ¹⁵ Bari alu senuya alu la ku ketalu bee to, i xo Ala men x'alu kili xa senu ja men, ¹⁶ bawo a be safenin Kitaabo to xo: «Alu senuya bawo nte xa senu.» ¹⁷ Alu la taralolu

xono, alu be Ala kilila xo alu Fa, wo men be kiiti tilin-ninjo tegela moxolu bee xan, x'a la bee la kebaaro xan. Wo le x'a tu, alu xa xan xa sila ate ja, alu la duniya tokutunjo waxato xono, nin duguxulu in xan. ¹⁸ Alu x'a lon xo fen tijatalu, xaaliso walla sano, wolu man ke x'alu kunbo alu la jigo kuntanjo ma, alu xa mennu soto ke ti alu falu la. ¹⁹ Bari, alu kunbota Kirisita jelu nafamaba le la. A x'a fan ke sadaxo ti i xo saaxandinjo, fe si nte men na, takki si nte men na. ²⁰ Ala tun xa wo kuwo latege jannin duniya xa da, a x'a yita nin waxati laban in, alu koso. ²¹ Ate le barako to, alu xa lannaya ke Ala la, wo men x'a lakuni xa bo furelu to, xa nooro la a xan. Wo ja ma, alu la lannaya nin alu gigo be Ala le xan. ²² Alu x'alu jusukunjo senuya tonja mutalo fe, walasa alu xa badinjo xanu soobeya la. Wo to, alu i joxo xanu bete, alu jusukunjo bee la, ²³ ate mennu towuluta, wuluwo men man ke si tolita la, bari fo si tolibalo la, nin wo mu Ala la xuma nilama nin xuma banbalo ti, ²⁴ i xo a be safenin Kitaabo to ja men xo: «Moxo bee be le i xo binjo. A nooro bee be i xo bin-firo; binjo si ja, firo si butun. ²⁵ Bari Marigi la xumo be tula fo abada.» Wo xumo mu xibaru Dimanjo le ti, men fota alu nen.

2 Wo to, alu jaxuya nin nanbaro nin fulankafuya nin nangoya anin maxumalo bee dabula. ² Deenano be sunjinono fe ja men, wo ja ma, Ala la xumo men be i xo nono yerewuluwo, wo loxo xa ke alu dulu la, walasa alu xa bunja wo fe, xa kisi; ³ bawo alu x'a je xo Marigi xa nin. ⁴ Alu i sodun Marigi la, kuru nilama le mu. Moxolu x'e ban a to, bari a sugandita anin nafaba b'a la Ala bulu. ⁵ Alu dulu, mennu be i xo kuru nilamalu, alu lo Ni Senunjo la Su lota la, walasa alu xa ke sadaxalasibaxa senumanjo ti, xa ke Ala diyanjesadaxolu lasibaxolu ti, Isa Kirisita barako to. ⁶ Bawo men be safenin Kitaabo to, wo fele xo: «N' fele kuru daxolenjo do lala Siyon, i xa men sugandi, x'a ke bunjo jusigikuro ti; nin moxo men lata a la, wo tigo me malu abada.» ⁷ Ate mennu lata Ala la, atelu x'a lon xo nafaba be nin kuru in na, bari mennu man la a la, a keta wolu nen nin ti: «Kurubunlolalu x'e ban kuro men to, wo keta bunjo jusigikuro ti.» ⁸ A fota Kitaabo dula do xote tugun xo: «Wo kuro si moxolu latakki, fataxulo le mu, men si moxolu laboyi.» Wo moxolu takkita bawo i x'e ban lala Ala la xumo la. Wo le du lategeta i nen. ⁹ Bari ate lelu mu siya sugandininjo nin sadaxalasi-

baxa mansamalu nin siya senumanjo anin Ala la moxolu ti. Ala x'alu kili xa bo dibo to, xa taxa alu ti a la keneya mapoxonjebalo la, walasa alu x'a la kebaara numabalu laxali. ¹⁰ Folofolo, alu tunnu nte Ala la moxolu ti, bari saasa alu keta Ala la moxolu ti. Folofolo, alu tunnu man Ala la hinno soto, bari saasa, alu xa wo soto. ¹¹ N badin xanuningolu, alu mu luntanjo nin siginfe lelu ti nin duniya in to. Wo le x'a tu, nte be alu matarala xo alu xa alu fannu muta alu nidiyanjekuwolu ma, wo mennu be moxo niyo kelela. ¹² Alu bosila beto ta lannayabalolu to. Wo to, haali nin i x'alu toxojaxo fo, xo alu mu kujaxukelalu ti, i si alu la kewale betolu je, xa Ala tantu wolu koso, a nalunjo. ¹³ Alu xulu hadamadinjolu la fanga sigininjolu bee jen, Marigi koso. Alu xulu mansaxe jen, wo men be fango bee kunna. ¹⁴ Alu xulu goferenerolu jen, mansaxe xa wo mennu bula xa kujaxukelalu jangi, xa numakelalu jangi. ¹⁵ Ala sago mu le, xo alu xa kewale numalu ke, xa moxo hakilintan kulonbalolu da taxun. ¹⁶ Alu i taxama i xo moxo hooroyaninjolu, wo bee nin a ta, alu xana alu la hooroya ke jaxumanjo buurilanjoti, bari alu bosilo xa ke i xo Ala la jonjolu. ¹⁷ Alu hadamadinjolu bee bunja, al'alu badin lannayabaxolu xanu. Alu sila Ala ja, xa mansaxe bunja. ¹⁸ Baaradinjolu, alu xulu alu la kuntigolu jen, xa bunja bee la i xan, mennu xa jin anin mennu xono xa di doronnu jen nte, bari haali mennu la kuwo xa xole, alu xulu i jen. ¹⁹ Bawo moxo nin tooro men man xan, nin a xa wo muja Alapasilanja koso, wo mu neemo le ti. ²⁰ Awa, nin i buwota i la kewale jaxolu koso, bunja joman be wo buwolo mujalo to? Bari nin i toorota i la kewale betolu koso, nin i xa wo muja, wo mu neemo le ti Ala ja xoto. ²¹ Alu kilita wo le xanma, bawo Kirisita fan toorota alu jen. A xa wo ke x'a yita alu la, walasa alu x'a lo a nolu fe. ²² Ate man junube si ke, faniya bada man bo a da. ²³ A nanita tumo men, a man a ta sara. A toorota tumo men, a man fuujali ke, bari a x'a la kuwo tu Ala bulu, wo men mu kiiti tilinningjo tegebaxo ti. ²⁴ Kirisita fan xa n na junubolu ta a balo to, gengenyiro xan, walasa n xa ke moxo saninjolu ti junubo boxo la, xa nilamaya tilinningja xanma. A la joogilida lelu x'alu kendeya. ²⁵ Alu tunnu be le i xo saaxa sankoninjolu, bari saasa, alu x'e koppa alu niyolu negaanibaxo nin i lakantabaxo ma.

3 Awa, musolu, alu dulu xa xulu alu xelu jen, walasa nin i dolu man la Ala la xumo la, alu bosilo xa ke sabaabu ti wolu xa lannaya ke, x'a tara xuma man ke i jen, ² alu bosila senumanjo nin alu la bunja jelo fe. ³ Alu la masito xana ke bantato masito ti: Kunda, sanukenmo, anin faanubetedunjo. ⁴ Bari alu la masito xa ke xonoto masiti duguningjo ti, wo mu jusukun puma sabariningjo le ti, wo mu masitifen banbalo le ti. Nafaba be wo le la Ala bulu. ⁵ Folofolo, musu senumanjolu men tunnu gigo be Ala xan, wolu tunnu

be i masitila ten ne. I tunnu be xulunin i xelu jen, ⁶ i xo Saran, men tun be Burehima bunjala fo a x'a kili xo a marigi. Alu mu wo dinmusolu ti tonja la, nin alu be ku puma kela, anin nin alu man a tu fusi x'alu lasila. ⁷ Wo ja kilinjo ma, xelu, alu nin alu musulu xa mara i pojoma, xa don faamu xo musuya mu miran ti, men xa fe. Alu i bunja bawo i nin alu bee be nala Ala la neemo sotola ke ti, nin wo mu nilamaya ti. Alu a ke ten, walasa fusi xana alu la taralolu bali xa muta. ⁸ Wo bee tanbo xo, alu bee xa ben x'alu la miiriyalu ke kilin ti. Alu hinna i pojoma la, x'e pojoma xanu i xo badinmalu, xa numaya i pojoma ma, x'e majigi i pojoma jen. ⁹ Alu xana ku jaxo sara ku jaxo la, walla xa nanilo sara nanilo la. Bari alu duwawo le ke, bawo Ala x'alu kili tumo men, a xa duwawo le lahido ta alu jen. ¹⁰ Kitaabo b'a fola xo: «Nin moxo men b'a fe xa nilamaya diyabo, anin xa heera lunjolu je, wo tigo xa xan x'a nenjo mara xumajaxufo ma, x'a da muta nanbaranteya xumolu ma. ¹¹ A xa xan xa i xodi jaxumanjo la, xa puma ke, xa benjo njinin timinadiya la. ¹² Bawo Marigi ja be moxo tilinningjolu to, a tulo be i la taralolu la, bari Marigi si a pada tirimin kujaxukelalu ma.» ¹³ Awa, nin alu be balannin kubeteko la, jon si ku jaxo ke alu la wo to? ¹⁴ Haali nin alu be toorola tilinningja silo taxamo xanma, heero be alu jen. Alu xana sila i ja, alu hakilo du xana jaxami. ¹⁵ Bari alu Kirisita bunja alu jusukunjolu la, x'a lon xo alu Marigi le mu. Gigo men be alu la, nin moxo wo moxo x'alu njinxaxo ma, alu tobeningjo xa tara tumo bee xa wo jaabi. ¹⁶ Bari alu wo ke majigininja nin bunja xono. Jusukun puma xa ke alu la, walasa nin i x'alu toxo tija tumo men, xo alu mu kujaxukelalu ti, alu bosila beto, Kirisita kafupoxoya xono, wo xa ke sabaabu ti, alu toxo tijabaxolu xa malu. ¹⁷ Bawo xa tooro x'e tu puma kela, nin wo le mu Ala sago ti, wo xa fisa don ti xa tooro x'e tu ku jaxo kela. ¹⁸ Awa, Kirisita fan toorota hadamadinjolu la junubolu koso sinja kilinpe. Ate tilinningjo sata moxo tilinbalolu jen, walasa x'alu ladun Ala la kafupoxoya xono. A faxata balasuboboxo la, bari a lakunita Niyo fe. ¹⁹ Wo Niyo le sabaabo la, niyo men tunnu be kaso la, a taxata wolu waaju. ²⁰ Wo lelu tunnu xa Ala sooso kabirin Nuhun na waxato. Ala x'e maxono xa muja i xoto Nuhun na xulunba dara waxato. Moxo dondinu, i muume moxo sagi, wo lelu dunta xulunba xono, xa kisi xa bo jiyoto. ²¹ Wo jiyoto tun mu batiselo taagumansedo le ti, men be alu kisila saasa. Wo xoto nte don ti xo n balo le be kula xa noxo bo a la. A xoto mu le xo n b'a njinna Ala fe, a xa jusukun senunjo di n ma. A be alu kisila Isa Kirisita la kuniyo le barako to, ²² wo men taxata sanjo to, a be Ala kininjo xoto, a be siginin mansaya la, melekijolu nin fanga tolu anin sanxulo sintigiyalu bee kunna.

4 Kirisita toorota a balo to, wo xanma, alu dulu nin wo miiriyaki linjo xa sigi, bawo moxo men toorota a balo to, wo x'e fata junubo ma. ² Wo le x'a tu,

kabirin saasa, wo xa xan x'a la duniyatotego to ke x'a ben Ala sago ma, a xana a ke x'a ben hadamadinjo ni diyanjekuwolu ma. ³ Tonja la, alu xa waxato men ke Alalonbalolu sagolakuwolu kela xotonin, x'e taxama jadoya xono, anin nidiyanjekuwolu, nin dolobaminjo, nin domoliba jaxo, nin minniba jaxo, anin bolibatuli haramuninjolu, wo waseta. ⁴ Saasa, wolu dabaro be bannin xo alu nte a loxan i nofe bitugun, xa wo joxon jadoya danmatanbinin ke, wo xanma, i be alu nanila. ⁵ Bari men be tobennin xa kiito tege nilamalu nin furelu xan, i si i jafo wo jen. ⁶ Wo le x'a tu, haali mennu sata, xibaru Dimanjo fota wo dulu jen, kiito tegeta wo mennu xan i xo hadamadinjolu, x'e tu duniya to, walasa wo xo, i xa nilamaya Ala bulu, Ni Senunjo barako to. ⁷ Fenjo bee labanjo sutiyata. Alu hakili soto, x'alu fannu korosi, walasa alu xa sin xa Ala matara. ⁸ A folo, alu i joxo xanu bete, bawo xanuya si sin xa junube kiika dugu. ⁹ Alu i joxo jigiya, x'a tara alu man ruunuruunu. ¹⁰ Alu bee kilin kilin xa solifenjo men soto, alu i joxo maakuwo jija wo la, xa ke Ala la neema sifalu bee marabaxa betolu ti. ¹¹ Nin men be xumala, wo xa Ala la xumo lelu lasi moxolu ma. Nin men be moxolu deemala, wo xa deemalo ke Ala la barake dinmaninjo la, walasa bunja xa la Ala xan kuwo bee to, Isa Kirisita barako to. Nooro nin sintigiya mu wo le ta ti, fo abada. Amiini! ¹² Xanuninjolu, alu be xotoboli xandimanjo men xono i xo ta, wo xana alu dabaro ban x'a ke i xo fen ne x'alu soto men man xan x'alu soto. ¹³ Bari alu nitodiya, bawo alu xa alu nidula soto Kirisita la toorolu to, walasa a la nooro yitalunjo, alu xa jaja, xa sewo. ¹⁴ Nin alu nanita Kirisita toxo nofe, heero be alu jen, bawo Ala Ni nooroma be alu xan. ¹⁵ Alu si la tooro kunjo xana ke moxo faxo ti, walla x'alu xa suupalo ke, walla x'alu mu kujaxukela ti, walla x'alu x'e sin bula jandi kuwo to. ¹⁶ Bari nin do toorota xo bawo a mu lannayabaxo ti, wo xana maluya wo la, bari a xa barako bula Ala jen wo toxo soto xanma. ¹⁷ Kiito damutawaxato sita, a dun be folola Ala la moxo lelu ma. Awa, nin kiito be damutala nte lelu ma, wo to mennu man son Ala la xibaru Dimanjo ma, wolu labanjo be kela ja di? ¹⁸ I xo Kitaabo b'a fola ja men xo: «Nin moxo tilinninjo kisi xa xole, Ala nasilanbalo nin

junubekela ta si ke ja di?» ¹⁹ Wo le x'a tu, mennu be toorola x'a la Ala sago xan, wolu x'e niyo xarifa Dabaxa Ala ma, ate men mu xantigo ti, xa tu jumako la.

5 Mennu mu Ala la jama moxobalu ti alu to, nte be xumala wo lelu jen saasa. Nte du mu moxoba do le ti anin Kirisita la toorolu seedo. Nooro men be nala yitala, nte nidula be wo to. Nte be men njinna i fe, wo fele: ² Ala xa saaxagoore men xarifa alu ma, alu wo lakorosi. Alu xana wo ke a be i xo diyakuwa baaro, bari alu wo ke alu diyanjeku ti, x'a ben Ala sago ma. Alu xana a ke xalisotoda ti, bari alu a ke njanne beto la. ³ Mennu xarifata alu ma, alu xana alu la fango digi wolu xan, bari alu ke jayito ti saaxagoore jen. ⁴ Wo to, nin negaanilalu la kuntigo x'e yita, alu si kunnawulijala nooroma soto, men dawulo me bo a la muume. ⁵ Wo ja ma, xamarindinjolu, alu xulu moxobalu jen. Alu bee x'e majigi i joxo jen, x'e joxo maakuwo jija, bawo Kitaabo b'a fola xo: «Ala be bunfanmamoxolu kelela, bari a be a la neemo dila fanmajigibaxolu ma.» ⁶ Wo le x'a tu, alu i fan majigi Ala bulu barakema xoto, walasa a xa lunjo men natege, a x'alu xotota wo lunjo. ⁷ Al'alu hanmenakuwolu bee la ate xan, bawo a hakilo be alu kun. ⁸ Alu hakili soto, x'alu fannu korosi! Alu jaxu Sentane, men be i xo waraba xunboto, be taxaninsaago la, a b'a njinna xa do domo. ⁹ Alu a kele, xa tu sinsinnin lannaya to. Alu a lon xo wo joxon toorolu be alu badinjo dulu sotola duniya xono. ¹⁰ Nin alu toorota waxatindin na, neemo bee tigi Ala men x'alu kili a la nooro banbalo ma, alu nin Kirisita la kafujoxoya xono, wo fan si alu dafa, x'alu sinsin, x'alu barako bunja, x'alu sigi jusigilan jonjonjolu xan. ¹¹ Sintigiya xa tu a jen fo abada. Amiini! ¹² Nte xa Silifen bula a xa jin xuma kese danta innu safe alu jen, n be ate men jaatenin badinxe xantigo ti, walasa x'alu jusudun anin x'a laxoyiya alu ma xo alu be notonin Ala la neemo fan fan ne la. ¹³ Ala la jama men be Babilone, Ala xa mennu sugandi i xo a x'alu sugandi ja men, wolu be alu xontonna, anin Maraka men mu nte dinxe ti lannaya silo la. ¹⁴ Alu i joxo xonton baatayalixontonno la, xanuya to. Ate mennu be Kirisita la kafujoxoya la, heero xa ke alu bee fe!

2 PIYERE

1 Nte Simon Piyere le xa jin safe in ke, nte men mu Isa Kirisita la jonjo nin a la kiladinjo ti. **1** N b'a kila moxolu ma, mennu xa n na lannaya nafamaba joxon soto, n na Ala nin n Kisibaxa Isa Kirisita la tilinninga barako to. **2** Neemo nin heero xa ke alu jen fo xa fu-uma, Ala anin n Marigi Isa lonniya soobe fe. **3** N maakuwo be fen wo fen na nilamaya nin Alapasilanja xanma, Marigi xa wo bee di n ma a la sintigiya la, men bota Ala la. Men xa n kili xo n xa dun a fan na nooro nin a la jumaya xono, a xa wo lonjo di n ma. **4** Wo ja le ma, nin a xa fen nafamabalu nin jalamalu di n ma, a tun xa mennu lahido ta, walasa wolu soto fe, alu xa sin xa kisi duniya negolu ma, mennu be moxo halagila, anin alu xa sin xa Ala keja ta. **5** Wo le x'a tu, alu i balan bete xa jumaya kafu alu la lannaya ma, xa lonjo kafu jumaya ma, **6** xa fanmuto kafu lonjo ma, xa mupo kafu fanmuto ma, xa Alapasilanja kafu mupo ma, **7** xa badinxano kafu Alapasilanja ma, xa xanuya kafu badinxano ma. **8** Bawo nin wo jigo betolu be alu la, anin nin i keta alu la xa fuuma, i me alu tu baarabalo nin nafakebalo ti n Marigi Isa Kirisita lonjo to. **9** Bari wolu nte moxo men na, wo mu fiyonto le ti, a la jeta xa sutu. A be njinanin xo a xa junubo mennu ke xotonin, a senuyata xa bo wolu xono. **10** Wo le x'a tu, n badinjo, alu kiika kafu alu la jijalo ma walasa x'alu la kililo nin alu la sugandilo sinsin. Nin alu be wo kela, alu me boyi abada. **11** Wo ja le ma, nin n Marigi anin n Kisibaxa Isa Kirisita la Mansaya banbalo si dayele alu jen a ja ma. **12** Wo le x'a tu, nte si tu x'alu hakilo lajigi wo kuwolu la tuma bee, haali x'a tara alu x'e lon xa ban, anin alu xa tonja men soto, alu be sinsinnin wo xan. **13** Bari nte b'a miirila xo xa nte tu jin bala sata in to, a xa jin nte x'alu tu i jaala n na hakililajigi xumolu fe. **14** Bawo nte x'a lon xo dondin, nte si bo jin bala sata in to, i xo n Marigi Isa Kirisita x'a yita n na ja men. **15** Wo to, nte si n jija bete walasa haali nte sa xo, alu xa sin x'alu hakilo lajigi jin ku innu la tuma bee. **16** Awa, n Marigi Isa Kirisita be nala sintigiya men to, n man wo fo alu jen xa n gigo tu lanin hadamadinjo la taali daraninjo xan. Bari n fan nelu ja x'a je a la nooroba xono. **17** Bawo a xa bunja nin nooro soto n Fa Ala la tumo men, jin xumaxan in bota Ala nooro mapoxonjebalo la x'a fo a jen xo: «Nin mu n Dinxe baato le ti, men na kuwo xa di bete nte jen.» **18** Ntelu fannu xa wo xumaxanjo me xa bo sanjo to, xa n nin a tu kuru senumanjo xan.

19 Wo ja ma, n be tolala bete kilalu la xumo la. Nin alu xa i hakilo tu wo la, wo xa jin: Wo xumo be le i xo lanpo men be manala dibo to, jannin saxo xa yeke, anin jannin saxuyelenda la loolo xa keneya bo alu jusukunjo la. **20** Alu a lon folo xo moxo si me Kitaabo kilayaxumo do xoto lon no a fan jen. **21** Bawo hadamadinjo sago bada man kilayaxuma sabaabu, bari Ni Senunjo le xa moxolu bula xumala Ala la xan to.

2 Kila fanolu keta Banisirayila dinjo to xotonin, wo ja ma, karanmoxo fanolu si ke alu dulu to. I si xaransila fuwolu mundin nadun alu to. I si i bo Kuntigo la, wo men x'e kunbo, xa halagilo lasi i fannu ma tariya. **2** Moxo kiika si a lo i nofe x'e la ku noxoninjo lujoxonnu ke. Xumajaxo si fo tonja silo ma. **3** Wo karanmoxo fanolu la natantunja xanma, i si alu domo nanbara xumolu la. Bari kabirin waxati jan nin wo moxolu la kiito lategeta xa ban, i la halagilo nte nala mela bitugun. **4** Bawo mekiyo mennu xa junubo ke, Ala man wolu tu je, bari a x'e fili jahanaba, xa joloxo ke i la x'e mara dibo to non, xa kiito lunjo laxono. **5** A man duniya folo du tu je, bari a nata waameba ti wo Alapasilanjabali duniya xan. A xa Nuhun ne kisi, wo men tun be waajulo kela tilinninga xan, anin moxo woorowula xotelu. **6** A xa Sodome nin Gomore gallolu jalagi x'e halagi ta fe, xa wo ke misaali ti x'a di Alapasilanjabali natalu ma. **7** Bari a xa Lote kisi, wo men tun mu moxo tilinningo ti. Wo kujaxukela jadolu tunnu la nilamaya keja xa wo tooro bete. **8** Bawo wo moxo tilinningo men tun b'e to, wo ja nin a tulo tun be i la lun wo lunjo ketalu la. I la nilamaya noxoninjo tun be a jusukun tilinningo toorola. **9** Wo to, Marigi x'a pasilanjabaxolu boja lon tooro xono, anin a xa kujaxukelalu lamarapa lon walasa x'e pangi kiito tegelunjo. **10** Mennu be a lola i nidiyanjeku noxoninjo nofe, xa Ala la Marigiya mafele fuwo ti, wo lelu la pangilo be jaxuyala. Wo karanmoxo fanolu be lanin i fannu la, i la xumolu xa jaxu, i nte silala xa Noorotigolu nani. **11** Haali x'a tara mekiyolu mennu fango nin i la sintigiya xa bun bete, wolu nte i jalagila x'e nani Marigi ja xoto. **12** Bari wo moxolu kennu be le i xo wulaxonosubu hakilintanjo, mennu be danin mutalo nin tolilo xanma. I man men lon, i be wo nanila. I si toli i xo subolu be tolila ja men. **13** I si sara i la kujaxu keninjo bee la. I be i diyanjo sotola i nidiyanjekuwolu kelo to,

tiliya to. I mu noxo nin jagamo lelu ti, i be i diyanneku-wolu kela alu lafililo ti, nin i nin alu be kafula xa domolibalu ke. ¹⁴Jadoya be lanin i nakeso xan, i nte fala junubeko la. I be hakilidoxonjolu neenela x'e lafili. Wasabaliya bandeero b'e bulu, moxo danganinjo lelu mu. ¹⁵I xa sila tilinninjo bula. I filita x'a lo Bosore dinxe Balamu la silo nofe. Wo keta xalisso fe, men dita a ma kujaxuko xanma. ¹⁶Bari xumo keta a nen a la soosolo koso. Falimusu damuntunmafenjo xumata a nen í xo hadamadinjo, xa dansigi ke kila la hakilintanja la. ¹⁷Wo moxolu be le í xo jiwoyo mennu jata, anin í xo xabolu, fofoba be taxaxan mennu tila. Dibiba le be i laxononin. ¹⁸I be xumabatoxulunjo lelu fola. Mennu birin bola moxo filininjolu bulu, i be wolu neenela nidiyanneku noxoninjolu la. ¹⁹I be hooroyalo lahido tanin wolu nen, x'a tara i fannu be tolininja la jonja xono, bawo fenjo men be sinjo sotonin í xan, í mu wo la jonjo le ti. ²⁰Awa, mennu bota duniya ku noxoninjolu xono, n Marigi anin n Kisibaxa Isa Kirisita lonjo koso, nin wo kuwolu xa wolu muta tugun, xa sinjo soto i xan, i kepa labanjo si jaxuya xa tanbi i folo kepa xan. ²¹Nin wo tunnu man tilinninja silo lon, wo le tun xa fisa i ma a lonjo ti, wo xo xa saaginin i xodila sariya senunjo la, men dita i ma. ²²Sando men be fola xo: «Wulo xa men foono, a x'é koppa wo ma,» anin xo: «Lemuso men birin í kula, wo taxata í birigintin booxo to tugun.» Wo keta tonja ti i la kuwo to.

3 Ní badin xanuninjolu, nin mu n na safe fulananjo le ti xa ban, n xa men ki alu ma. I do wo do to, n keta a fe miiriya senunjolu xa ke alu la, n na hakililajigolu bee fe. ²Nte b'a fe kila senumanjolu xa xumo mennu fo xotonin, alu hakilo xa jigi wolu la, anin Marigi nin Kisibaxo la sariya la, alu la kiladinjolu xa mennu lasi alu ma. ³Alu a lon folo xo duniya labanjo lunjolu, moxo dolu si bo mennu be i taxamala i nidiyanjolu la. I si alu ke jelefenjo ti. ⁴I s'a fo xo: «Xo di a man lahido ta le xo a be nala? Awa, a dun be min? Bawo kabirin mamolu sa tumo, kuwo bee b'a ja ma í xo duniya damuto.» ⁵Wolu be i fannu lanjala a kun xo kabirin waxati jan, Ala xa sanxulo nin duguxulo da a la

xumo fe. Duguxulo talata xa bo jiyo ma, xa dara jiyo fe. ⁶Wo ji kilinjo le fe, nin wo mu waameba jiyo ti, nin duniya folo halagita. ⁷Men mu jin sanxulu in nin jin duguxulu in ti, wo xuma kilinjo le b'e lamaranin ta ja. A b'e lamaranin kiito anin Alapasilanjabalolu halagi lunjo ja. ⁸Bari n badin xanuninjolu, fen do be je, alu man xan xa njina men kun: Marigi bulu, tili kilin be le í xo wulu san, anin wulu san be le í xo tili kilin. ⁹Marigi xa lahido men ta, a nte mela x'a tara a man wo latimme, í xo dolu b'a miirila ja men. Bari a be mupanin alu xoto le, bawo a nte a fe moxo si xa halagi; bari a b'a fe le bee xa tuubi. ¹⁰Marigi la lunjo be nala le í xo sunjo. Wo lunjo, sanxulo si sanko mankanba to. Sanxulo fenjolu bee si jani ta fe, duguxulo nin a xan fenjolu bee si ban. ¹¹Awa, nin wo fenjolu bee be nala banna ten, wo tuma alu xanta xa men ke, alu wo lon. Alu taxamaja xa xan xa ke senuya to, anin alu xa xan xa do kafu alu la Alapasilanja ma. ¹²Alu xa xan xa Ala la lunjo laxono, x'alu sinkuwo bee ke walasa a xa na junna. Wo lunjo le mu nin ta be sanxulo janila, anin sanxulo fenjolu si xolen tafuntano bulu. ¹³N be sanxulu kuto nin duguxulo kuto laxononin í xo Ala xa wo lahido ta ja men, tilinninja si sigi non. ¹⁴Wo le x'a tu, n badin xanuninjolu, x'alu tu wo lunjo laxononin, alu i jija, walasa alu senumanjo jalagibalo xa tara a ja xoto, heero to. ¹⁵Alu a jaate xo Marigi la mujo kunjo mu le walasa alu xa kisi, í xo n badinxe xanuninjo Poli x'a fo alu nen, a la safe to ja men, x'a la Ala la hakilitigiya dininjo ti a ma. ¹⁶A be wo xumo le fola safelu bee to, a xumata jin ku in xan mennu to. Wo safelu dulalu dolu xa xole x'e faamu, fo moxo kulonbalolu nin basigibalolu b'e xotolu yelemala, í xo i be Kitaabo dula xote dula kela ja men. Wo ja ma, i be halagilo lasila i fannu ma. ¹⁷Atelu kennu, n badin xanuninjolu, alu lasobininjo le mu. Wo to alu i korosi, alu xana Alapasilanjabalolu ladigi, wo mennu be filixan, anin alu xana son alu xa labo alu lodula sinsinninjo xan. ¹⁸Bari alu taxa ja n Marigi anin n Kisibaxa Isa Kirisita la neemo nin a lonjo to. Nooro xa la ate xan kabirin saasa fo abada. Amiini.

1 YAYA

1 Men tun be je kabirin folofolo, n xa men me, n xa men je n palu la, n xa men mafele nin n bulolu maxata a la, nin wo mu nilamaya banbalo Xumo ti, n be pin safe in kila alu ma wo la kuwo xan. ² Nilamaya x'é yita, n x'a je, n b'a seede ya bola. N be nilamaya banbalo fola alu nen, men tun be Fa Ala bata n'a yitata n na. ³ N xa men je anin n xa men me, n be wo fola alu dulu nen, walasa alu dulu xa dun n na kafuɲoxoya xono. Ntelu be kafuɲoxoya men xono, wo mu Fa Ala anin a Dinxe Isa Kirisita la kafuɲoxoya le ti. ⁴ N be pin ku innu safela x'e ki alu ma, walasa n na ɲaɲo xa dafa. ⁵ N xa xumo men me Isa Kirisita la, nin n b'a fola alu nen, wo mu le xo: Ala mu keneya le ti, dibi si nte a la. ⁶ Nin n xo, xo n be a la kafuɲoxoya xono, x'a tara n be n na kuwolu kela dibo to, wo to, n xa fani n na xumolu anin n na kebaarolu xono. ⁷ Bari nin n be i taxamala keneya la í xo Ala fan be keneya la ɲa men, wo to, kafuɲoxoya be n nin i ɲoxo te anin a Dinxe Isa jelo be n senuyala xa junubo bee bo n na. ⁸ Nin n xo xo junube nte n na, n be n fan nelu lafilila, n nte tonɲa silo xan. ⁹ Bari nin n be n lola n na junubolu la Ala nen, ate mu xantigo nin tilinninɲo le ti, a si n na junubolu yaafa n ma, xa n senuya n na tilinbaliyakuwolu bee to. ¹⁰ Nin n xo xo n man junube ke, n be Ala kela fano le ti, a la xumo nte n xono.

2 N na dindinɲolu, n be pin safe in kila alu ma walasa alu xana junube ke. Bari nin do xa junubo ke, deemabaxo do be n kun Fa Ala bata: Wo mu Isa Kirisita le ti, ate men be tilinnin. ² Bawo ate fan keta n na junubeyaafu sadaxo ti. Ntelu talu kilinnu nte, bari a keta a ti duniya bee nen. ³ Nin n be Ala la sariyalu labatula, n b'a lonna wo le to xo n xa Ala lon. ⁴ Nin do xo: «N x'a lon» x'a tara a nte a la sariyalu labatula, wo mu fano le ti, a nte tonɲa silo xan. ⁵ Bari moxo men be a la xumaxanɲo labatula, Ala la xanuya dafaninɲo be wo tigo jusukunɲo la soobeya la. Wo le to, n b'a lonna xo n nin Ala be kafunin. ⁶ Moxo men je a fo xo ate nin a be kafunin, wo tigo xa xan xa í taxama í xo Isa xa í taxama ɲa men. ⁷ N xanuntelu, nte be safe men kila alu ma, wo nte sariya kuta ti, bari sariya xoto le mu, alu xa men soto kabirin folofolo. Alu xa xumo men me, wo le mu wo sariya xoto ti. ⁸ Wo bee nin a ta, n be sariya kuto le kila alu ma. Wo mu tonɲa le ti, Kirisita nin atelu dulu bulu; bawo dibo be tanbila le, keneya soobe be manala xa ban. ⁹ Moxo men je a fo xo ate be í taxam-

ala keneya la, x'a tara a be a badinɲo jaxuyala, wo be dibo to haalibi. ¹⁰ Moxo men be a badinɲo xanula, wo tigo be tunin keneya la. Fusi nte wo tigo la men si ke sabaabu ti xa moxo xote bula filo xono. ¹¹ Bari moxo men be a badinɲo jaxuyala, wo tigo be dibo to, a be í taxamala dibo to, a man a lon a be taxala dula men, bawo dibo x'a fiyonɲa. ¹² N na dindinɲolu, nte be pin safe in kila alu ma, bawo alu la junubolu yaafata Isa le toxo barako to. ¹³ N falu, nte be pin safe in kila alu ma, bawo men be je kabirin folofolo, alu xa wo lon. Xamarindinɲolu, nte be pin safe in kila alu ma, bawo alu xa sinɲo soto Sentane xan. ¹⁴ N na dindinɲolu, nte be pin safe in kila alu ma, bawo alu xa n Fa Ala lon. N falu, nte be pin safe in kila alu ma, bawo men be je kabirin folofolo, alu xa wo lon. Xamarindinɲolu, nte be pin safe in kila alu ma, bawo barako be alu la, Ala la xumo be tunin alu xono, anin alu xa sinɲo soto Sentane xan.

¹⁵ Alu xana duniya xanu, alu xana duniya xono fenɲolu xanu. Nin moxo men be duniya xanula, wo tigo nte n Fa Ala xanula. ¹⁶ Fenɲo mennu bee be duniya xono: Hadamadinɲo nidiyanɲefenɲolu, ɲabonfekuwo lu anin duniya fanbunɲa kuwolu, wolu nte bola Fa Ala to, bari i be bola duniya le to. ¹⁷ Duniya be tanbila le, moxolu ɲa be bola fen wo fen fe, wo du bee be tanbila le, bari moxo wo moxo be Ala sago kela, wo tigo si nilamaya fo abada. ¹⁸ N na dindinɲolu, duniya bantumo sita. A fota alu nen xo Kirisita Jaxo be nala, bari Kirisita jaxolu kiika nata xa ban. Wo le to, n b'a lonna xo duniya bantumo sita. ¹⁹ Wo moxolu tunnu nte n do ti, wo le x'a tu i x'e fata n ma, bawo nin i tunnu mu n do ti, i tunnu si tu n to. Bari i x'e fata n ma walasa a xa xoyiya xo i si nte n do ti. ²⁰ Atelu kennu xa Ni Senunɲo soto, Ala senumanɲo xa men di alu ma. Alu bee xa lonɲo du soto.

²¹ Nin nte xa pin safe in ki alu ma, a nte xo alu man tonɲa lon de! Alu xa tonɲa lon, wo le x'a tu, nte b'a kila alu ma, alu x'a lon du xo faniya si me bo no tonɲa to.

²² Awa, jon mu fano ti? Men xo xo Isa nte Kirisita ti, wo le nte ba? Men x'é ban Fa Ala nin a Dinxe to, wo le mu Kirisita Jaxo ti. ²³ Moxo men x'é ban Ala Dinxe to, wo ti gi man n Fa Ala soto. Bari moxo men je son a Dinxe to, wo xa n Fa Ala du soto. ²⁴ Atelu kennu xa xumo men me kabirin folofolo, wo xa tu alu jusukunɲo la. Alu xa xumo men me kabirin folofolo nin wo tuta alu jusukunɲo la, alu dulu si tu Ala Dinxe nin n Fa Ala la kafuɲoxoya xono. ²⁵ Kirisita xa men lahido ta xo a b'a

dila n ma, wo fele: Nilamaya banbalo. ²⁶ Moxo mennu be a njinna x'alu lafili, nte xa jin safe, x'a ki alu ma wo lelu la kuwo la. ²⁷ Atelu kennu, Kirisita x'a Ni Senunjo di alu ma. Alu maaku nte a la, moxo x'alu laxaran, bawo Ni Senunjo fan be alu laxaranna fenjo bee la xa ban. Ate la xaranjo mu tonja le ti, faniya nte. Wo le x'a tu, alu Ni Senunjo la xaranjo labatu, xa tu Kirisita la kafupoxoya xono. ²⁸ N' na dindinjolu, alu tu Kirisita la kafupoxoya xono, walasa nin a nata lun men, a xa lannaya xoyo tara n na, n xana malu wo lunjo. ²⁹ Alu x'a lon xo Kirisita be tilinnin. Wo xanma, alu xanta x'a lon du xo moxo wo moxo be tilinninja silo taxamala, wo tigo mu Ala dinjo le ti.

3 N' badinjolu, alu a mafele, Fa Ala xa n xanu ja men. A la xanuya koso, n be kilila xo Ala dinjolu. Tonja la, n mu wo lelu ti. Wo le x'a tu, duniya moxolu man n lon, bawo wolu man Ala lon. ² Xanuninjolu, kabirin saasa, n mu Ala dinjolu ti. Bari n be kela men ti, wo man yita folo. N x'a lon xo nin a nata, n si ke i xo a fan be ja men, bawo a be ja men, n be a jela wo ja in ne. ³ Wo gigo be moxo wo moxo la, wo tigo si i senuya i xo Isa Kirisita xa senu ja men. ⁴ Moxo wo moxo be junubo kela, wo tigo be Ala la sariya tipala, bawo junubo mu sariya tipalo le ti. ⁵ Alu x'a lon xo Isa Kirisita nata xa moxolu la junubolu bo je. Alu x'a lon xo junube nte ate la. ⁶ Wo to, moxo wo moxo be tunin ate la kafupoxoya xono, wo si junubeko dabula. Moxo wo moxo be tula xa junubo ke taxanin, wo tigo man a je, wo tigo man a lon. ⁷ N' na dindinjolu, alu xana a tu moxo si x'alu lafili! Moxo wo moxo be tilinninja silo taxamala, wo tigo be tilinnin i xo Isa Kirisita be tilinnin ja men. ⁸ Moxo wo moxo be tula xa junubo ke taxanin, wo tigo mu Sentane la moxo le ti. Sentane xa junubo ke kabirin folofolo. Ala Dinxe nakunjo mu le xa Sentane la kebaarolu tija. ⁹ Moxo wo moxo keta Ala dinjo ti, wo tigo si junubeko dabula, bawo Ala la siyo be a to, a me tu no junubo kela, bawo Ala x'a bange. ¹⁰ Ala dinjolu anin Sentane dinjolu be bola i poxo to ten ne: Moxo wo moxo nte tilinninja silo taxamala, walla moxo wo moxo nte a badinjo xanula, wo tigo nte Ala din ti. ¹¹ Alu xa xumo men me kabirin folofolo, wo le fele xo: Alan x'e poxo xanu. ¹² N xana ke i xo Kabila. Ate tun mu Sentane la moxo le ti. A x'a doxoxe faxa. Mun na a x'a faxa? Bawo ate Kabila fan na kebaarolu tunnu xa jaxu, x'a tara a doxoxe la kebaarolu tunnu be tilinnin. ¹³ N' badinjolu, nin duniya moxolu be alu jaxuyala, wo xana alu dabaro ban. ¹⁴ Nin n be n badinjolu xanula, wo le b'a yitala xo n bota saya to xa dun nilamaya banbalo to. Moxo men nte a badinjo xanula, wo tigo be tunin saya to. ¹⁵ Moxo wo moxo be a badinjo jaxuyala, wo mu moxofaxala le ti. Alu x'a lon xo nilamaya banbalo nte moxofaxala si pen. ¹⁶ N xa xanuya lon men ma, wo fele: Isa x'a niyo di ntelu xanma, ntelu du lu xa xan xa n niyo di n badinjolu xanma. ¹⁷ Nin jin

duniya in naafulo be do kun, a x'a badinjo do je a maakuwo be fen do la, nin a man son xa hinna a la, Ala la xanuya be wo tigo la ja di? ¹⁸ N' na dindinjolu, n na xanuya man xan xa ke da nin nenkunjo la ti. Bari a xa xan xa ke xanuya soobe le ti, men si lon n na ke walolu fe. ¹⁹ Wo ja in ne ma, n b'a lonna xo n be i taxamala silo men xan, xo wo mu tonja silo le ti. N hakilo sigininjo si tu Ala ja xoto wo ja in ne ma. ²⁰ Nin n jusukunjo be n jalagila, Ala xa bun n jusukunjo ti; ate xa fen bee lon. ²¹ Xanuninjolu, nin alan jusukunjo nte n jalagila, n hakilo si sigi Ala ja xoto. ²² N je fen wo fen njin a la, a si wo di n ma, bawo n b'a la sariyalu labatula, x'a sago ke. ²³ A la sariya fele: Xo n xa la a Dinxe Isa Kirisita toxo la, anin xo n x'e poxo xanu i xo Kirisita x'a fo n pen ja men. ²⁴ Moxo men be Ala la sariyalu labatula, wo tigo be Ala to, Ala du be wo tigo to. N b'a lonna ja men xo Ala be n to, wo fele: A xa Ni Senunjo di n ma.

4 Xanuninjolu, mennu bee b'a fola xo Ala Niyo be i fe, alu xana la wolu bee la. Alu wolu segesege folo, x'e mafele nin a x'a tara i niyo bota Ala le to. Awa, ki la fano kiika nata duniya to. ² Alu si Ala Niyo lon ja men, wo fele: Ni wo ni b'a fola xo Isa Kirisita xa balasubota xa na, wo niyo bota Ala le to. ³ Bari ni wo ni man a fo xo Isa Kirisita xa balasubota xa na, wo niyo nte bola Ala to. Wo niyo mu Kirisita Jaxo niyo le ti. Alu x'a me xo wo be nala, a be duniya to saasa xa ban. ⁴ N' na dindinjolu, atelu kennu mu Ala ta lelu ti. Alu xa sinjo soto kila fanolu xan, bawo niyo men be alu to, wo barako xa bun xa tanbi duniya moxolu ta xan. ⁵ Wolu mu duniya ta lelu ti, wo le x'a tu, i be xumala x'a ben duniya keja ma, duniya be i lamela. ⁶ Bari ntelu mu Ala ta lelu ti. Moxo wo moxo xa Ala lon, wo si n name, bari moxo wo moxo nte Ala ta ti, wo me n name. N si tonja Niyo nin faniya niyo bo i poxo to ten ne. ⁷ Xanuninjolu, alan x'e poxo xanu, bawo xanuya be bola Ala le to. Xanuya be moxo wo moxo la, wo tigo mu Ala dinjo ti, a xa Ala lon. ⁸ Xanuya nte moxo men na, wo tigo man Ala lon, bawo Ala mu xanuya le ti. ⁹ Ala x'a la xanuya yita n na ja men, wo fele: A x'a Dinxe kilinpe ki xa na duniya to, walasa n xa nilamaya soto ate barako to. ¹⁰ Xanuya mu jin ne ti: A nte don ti xo ntelu xa Ala xanu, bari Ala le xa ntelu xanu, a x'a Dinxe ki x'a ke n na junubeyaafu sadaxo ti. ¹¹ Xanuninjolu, nin Ala xa n xanu ten, n dulu xa xan x'e poxo xanu. ¹² Moxo si bada man Ala je, bari nin n be i poxo xanula, Ala be n to. A la xanuya dafaninjo si je n na. ¹³ N s'a lon ja men xo n be tunin Ala to anin x'a be tunin n to, wo fele: A x'a Niyo di n ma. ¹⁴ N x'a je anin n b'a seedayala xo n Fa Ala x'a Dinxe le ki xa na ke duniya Kisibaxo ti. ¹⁵ Nin men xo, xo Isa mu Ala Dinxe ti, Ala be wo tigo to, wo tigo du be Ala to. ¹⁶ Ala be ntelu xanula ja men, ntelu xa wo lon, anin n lata a la. Ala mu xanuya le ti. Moxo men be tunin xanuya to, wo tigo be

Ala to, Ala be wo tigo to. ¹⁷ Nin xanuya dafaninjo be n na, wo to, kiito tegelunjo n hakilo si sigi, bawo n na nilamaya jin duniya in xono, wo keta í xo Isa ta.

¹⁸ Silanja nte xanuya xono. Xanuya dafaninjo be silanja kabala le. Wo ja ma, moxo men be silala, wo la xanuya man dafa, bawo silanja be a yitala xo pangilo be je. ¹⁹ Ntelu kennu be Ala xanula, bawo a folo xa ntelu xanu. ²⁰ Nin moxo men xo xo ate be Ala xanula, x'a tara a be a badinjo jaxuyala, wo tigo mu fano le ti. A ja be a badinjo men na, nin a nte wo xanula, a ja nte Ala men na, a si wo xanu ja di? ²¹ Isa Kirisita xa sariya men di n ma, wo fele: Moxo men be Ala xanula, wo xa xan x'a badinjo du xanu.

5 Moxo wo moxo lata a la xo Isa le mu Kirisita ti, wo tigo mu Ala dinjo ti. Moxo wo moxo du be Ala xanula, wo tigo be a dinjo dulu xanula. ² N si a lon ja men xo n be Ala dinjolu xanula, wo fele: Nin n be Ala xanula anin x'a la sariyalu labatu. ³ Xa Ala xanu, wo mu jin ne ti, x'a la sariyalu labatu. A la sariyalu man xuli n ma. ⁴ Awa, Ala dinjo bee si sinjo soto no duniya xan. N be sinjo sotola duniya xan ja men, wo fele: N na lannaya fe. ⁵ Jon si sinjo soto duniya xan? Fo men kilin lata a la xo Isa le mu Ala Dinxe ti. ⁶ Isa Kirisita le nata, a nin jiyo nin jelo. A nin jiyo doron man na, bari a nin jiyo nin jelo nata. Ni Senunjo b'a seedeyala xo wo mu tonja le ti, bawo Niyo mu tonja le ti. ⁷ Seede saba le be je. ⁸ Ni Senunjo nin jiyo anin jelo, wo sabo bee be xanma. ⁹ N be sonna hadamadinjolu la seedeyalo ma, Ala la seedeyalo le joxon nte. Ala xa wo seedeyalo le

ke a Dinxe la kuwo to. ¹⁰ Wo ja ma, moxo wo moxo lata Ala Dinxe la, wo tigo sonta wo seedeya ma; bari moxo men man la Ala la, wo xa Ala ke fano ti, bawo Ala xa seedeyalo men ke a Dinxe la kuwo to, a man la wo la. ¹¹ Wo seedeya fele: Ala xa nilamaya banbalo di n ma. N be wo nilamaya sotola a Dinxe to. ¹² Wo Dinxe be men bulu, wo xa nilamaya soto. Ala Dinxe nte men bulu, wo man nilamaya soto. ¹³ N be jin safela alu jen, walasa alu x'a lon xo alu xa nilamaya banbalo soto, atelu mennu lata Ala Dinxe toxo la. ¹⁴ Hakililasigo men be n na a bata, wo fele: Nin n xa fen do njinin a la men mu a sago ti, a si n name. ¹⁵ Nin n x'a lon xo a be n namenin, n x'a lon xo n je fen wo fen njinin a la, n xa wo soto. ¹⁶ Nin moxo do x'a badinjo je junubo kela men nte saya lasila a ma, a xa Ala matara a jen, Ala si nilamaya di a ma, nin a la junubo nte saya lasila a ma ken. Junubo do be je men be saya lasila moxo ma. N man a fo xo alu xa taralo ke wo joxon junube xanma. ¹⁷ Tilibaliyakuwo bee mu junubo le ti. Bari junubo bee nte saya lasila moxo ma. ¹⁸ N x'a lon xo moxo wo moxo bangeta tugun xa ke Ala dinjo ti, wo tigo me tu no junubeko la, bawo Ala Dinxe b'a lakantala, Sentane me fusi no a ma. ¹⁹ N x'a lon xo n mu Ala ta lelu ti, xo duniya bee be Sentane la fango le xono. ²⁰ Bari n x'a lon xo Ala Dinxe nata, xa hakilitigiya di n ma, walasa n xa Ala soobe lon. N be Ala soobe la kafujoxoya to a Dinxe Isa Kirisita le barako to. Ate le mu Ala soobe ti, anin nilamaya banbalo. ²¹ N na dindinjolu, alu i korosi bolibatutalu ma.

2 YAYA

¹ Nte Moxoba le xa pin safe in ke x'a ki Ala la Musu sugandininjo nin a dinjolu ma, nte be mennu xanula tonja la. Nte kilin doron nte alu xanula, bari fen wo fen xa tonja lon, wolu dulu bee le be alu xanula. ² Tonja men be tunin n na, xa ke n fe fo abada, nte be alu xanula wo tonja koso. ³ N Fa Ala nin Isa Kirisita, nin wo mu n Fa Dinxe ti, wo xa neemo nin hinno nin heero di n ma, walasa n xa tu tonja nin xanuya silo xan. ⁴ Nte x'a tara í dinjolu dolu be tonja silo taxamala í xo n Fa Ala la sariya x'a fo n nen ja men. Wo diyata nte nen kujaxu. ⁵ Awa saasa, Musu sugandininjo, nte b'a njinna í fe xo: Alan x'e joxo xanu. Nte be men safela x'a ki í ma, wo nte sariya kuta ti, n xa sariya men soto kabirin folofolo, wo le mu. ⁶ Xanuya mu men ti, wo fele: Xa Ala la sariyalu silo taxama. Alu xa wo sariya le me kabirin folofolo, walasa alu xa wo silo taxama. ⁷ Moxolafilila kiika jenjenta duniya xono, wo lelu nte

sonna xa la a la xo Isa Kirisita keta moxo ti. Wo joxon moxo le mu moxolafilila ti anin Kirisita Jaxo. ⁸ Wo to, al'alu fannu korosi, walasa n xa baaro men ke, alu xana bono wo to, bari alu xa baraaji dafaninjo soto. ⁹ Moxo wo moxo be taxala ja xa tanbi Kirisita la xaranjo xan, Ala nte wo tigo to. Moxo men be tula Kirisita la xaranjo xan, n Fa Ala nin a Dinxe be wo tigo to. ¹⁰ Nin moxo wo moxo nin xaran xote nata alu bata, men nte Kirisita la xaranjo ti, alu xana a jigiyu alu bata, alu xana son xa haali a xonton. ¹¹ Bawo men je a xonton a bata, a be le í xo wo nin a be kafunin a la baara jaxolu la. ¹² Xuma kiika be n ma x'a fo alu nen, bari n nte a fe xa wolu bee safe. Bawo nte hakilo be a ma xa taxa alu bata, n fan nin alu xa xuma da nin da, walasa n na jajo xa dafa. ¹³ Í Badinmusu sugandininjo du dinjolu be í xontonna.

3 YAYA

1 Nte Moxoba le xa pin safe in ke x'a ki n xanunte Gayusi ma, n be men xanula tonja la. ² N xanunte, n b'a fe í la kuwo bee xa ben, í kendeyaninjo xa tu balasubo la, í xo í be ja men lannaya silo la. ³ Badinjo dolu nata jan; í mu xantigo ti ja men tonja to, anin í be í taxamala wo silo xan ja men, i xa wo fo n jen. Wo xumo diyata nte jen kujaxu. ⁴ X'a me xo n dinjolu be tonja silo taxamala, fusi man di nte jen xa wo bo. ⁵ N xanunte, í be fen wo fen kela badinjolu jen, haali badin luntanjolu, í be wo bee kexan xantigiya le to. ⁶ Wolu xa í la xanuya seedeya Ala la jama jen jan. I be nala taxamo men kela, nin í x'e deema wo kuwo to x'a ben Ala sago ma, wo si ben bete. ⁷ Bawo i be taxamo men na, i be wo la Kirisita le toxo jen, i man son lannayabalolu la deemalo ma. ⁸ Wo to, ntelu xanta xa wo noxon moxolu deema, walasa n dulu xa lodula ta tonja fo to. ⁹ N xa xuma dantalu safe x'e ki Ala la jama ma. Bari Diyoterefu men

be namoxoya njinna, wo nte sonna xa n jigiya. ¹⁰ Wo le x'a tu, nin nte sita je, a be ku jaxo mennu kela, xa xuma jaxolu fo n ma, xa faniya tege x'a la n na, nte si a lalon wolu la: Bari wo doron nte, badinjo mennu be nala, a nte sonna wolu xa jigi a bata, anin mennu b'a fe x'e jigiya, a si wo dulu bali, anin x'e xoyi x'e labo Ala la jama xono. ¹¹ N xanunte, í xana jaxumankelalu ladigi, bari kubetekelalu ladigi. Moxo men be ku numa kela, wo mu Ala la moxo le ti, bari moxo wo moxo be tula ku jaxo kela, wo man Ala lon. ¹² Moxo bee be Demetiriyusi toxo dimanjo fola. A bosilo men be tonja xan du be a seedeyala. Nte dulu be a toxo dimanjo fola, í x'a lon xo wo seedeya mu tonja le ti. ¹³ Xuma kiika be n ma x'a fo í jen, bari n nte a fe xa wolu safe. ¹⁴ Nte hakilo b'a ma xo dondin n s'í je. Wo to, n fan nin alu si xuma da nin da. ¹⁵ Heero xa ke í fe. Í xanuntelu be í xontonna. N xanuntelu kilin wo kilin xonton.

YUDE

1 Nte Yude, Isa Kirisita la jonngo, Yaxuba badinxé, nte le be pin safe in kila alu ma, Ala xa atelu men- nu kili, n Fa Ala be atelu mennu xanunin, anin a be atelu mennu maranin Isa Kirisita jen: ² Hinno anin heero nin xanuya xa di alu ma fo xa fuuma. ³ N badin xanuninngolu, a tun diyabeteta nte jen xa safe ki alu ma n na kisilo kuwo la, n xa xan men to. Nte x'a je xo a keta nte bulu waajibo ti xa pin safe in ki alu ma, walasa x'alu jusudun alu xa kelo ke lannaya jen, Ala xa men di a la senumannolu ma sinpa kilin fo abada. ⁴ Bawo moxo jaxo dolu x'e soli xa mundin dun alu to, mennu la halagilo safeta xa ban kabirin waxati jan. Wo Alapasilanpabalolu be n na Ala la neemo xuno mayele- mala, xa wo ke i la jadoya kekunjo ti. Wo pa ma, i s'i bo Isa Kirisita la, wo men kilin mu n Kuntigo nin n Ma- rigi ti. ⁵ Haali nin alu xa wo kuwolu bee lon a pa ma, n b'a fe x'alu hakilo lajigi a la xo Marigi xa Banisirayila dinngolu kisi xa bo Misira jamano to tumo men, wo xo, mennu xa lannayabaliya yita, a xa wolu halagi. ⁶ Melekiyo mennu man muta ke i la sintigiya ti, men di- ta i ma, fo i bota i sigidula, a be wolu tula sitinin joloxo la diboto, kiiti lunba xanma. ⁷ Al'alu hakilo lajigi Sodome nin Gomore la, anin i senbetogallolu, mennu x'e fannu ladi wolu la jadoya noxon ma, xelu x'e noxo njinin. I be ta sabalo la pangilo xono, men mu misaali ti x'a di bee ma. ⁸ Wo pa kilinjo le ma, nin wo siibolalu be i balo noxola, xa Ala la Marigiya mafeya, xa Noorotigolu nani. ⁹ Haali meleke kuntigiba Minkayilo man wo ke. X'a nin Sentane tu kelo la, x'e noxo sooso kila Musa fure la kuwo to, a man fatiya x'a nani a la jalagilo xono. A xo a jen ne doron xo: «Marigi x'é pang- gi!» ¹⁰ Bari wo moxolu man men lon, i be wo le nanila. I xa men lon i fannu ma, í xo damuntunmafengolu, wo be halagilo le lasila i ma. ¹¹ Bone be i jen, bawo i xa Kabila la silo ta. Sara koso, i x'e fannu bula Balamu la filo noxon xono, xa halagi Kore la murutilo noxon xan- ma. ¹² I lelu be alu la badinpadomololu noxola, xa tu- lunjo ke malibaliya to non, x'e fannu kilinnu maakuwo

pinja. I be le í xo xabolu mennu be taxala fojo fe, anin ji nte mennu to. I be le í xo yiro mennu nte din kela haali sankunjo to, i lillo bota, i sata muume. ¹³ I be le í xo xooxojiyo fanfebalu, i be i la malibaliya kuwolu jen- jenna í xo xooxojiyo b'a xanxo sarila xooxojiyo dagulo la pa men. I be le í xo loolo mennu nte tula dula kilin. Ala xa dibiba banbalo le bula i pa. ¹⁴ Adama bonson woorowulanango Enoke du xa kilaya xumolu fo ite lelu la kuwo to ten xo: «Alu i lame: Marigi nin a la meleke senumannolu wulu tan kiika si na, ¹⁵ walasa xa kiito tege hadamadinngolu bee xan. A si Alapasilanpabalolu bee lalo i la Alapasilanpabaliya kewale jaxolu la. Alapasilanpabali junubekela innu xa xuma jaxo mennu fo a ma, a si kiito tege i xan wolu fo koso.» ¹⁶ Wo mox- olu mu nuununuunula lelu ti tuma bee, anin i b'e max- asila i fannu la kuwo la. I be i fannu diyanjo le nofe, i be i wasula i la xumolu to, xa moxolu lajanmu nata xanma. ¹⁷ Atelu kennu, n badin xanuninngolu, n Marigi Isa Kirisita la kiladinngolu tunnu xa xumo mennu lasi alu ma folofolo, alu i hakilo lajigi wolu la. ¹⁸ I tunnu x'a fo alu jen xo: «Duniya labanjo waxato, jelenmalila dolu si wuli, mennu si i nidiyanpekuwolu ke, x'a la i la Alapasilanpabaliya xan.» ¹⁹ Moxo fatala lelu mu. Hadamadinpa miiro lelu b'e la, Ni Senunjo nte i fe. ²⁰ Bari atelu kennu, n badin xanuninngolu, alu taxa pa x'alu la nilamaya jusigilango ke alu la lannaya senu- manba ti. Alu Ala matara Ni Senunjo barako to. ²¹ Alu tu Ala la xanuya xono; alu yilo xa sigi n Marigi Isa Kirisita la hinno ma, nilamaya banbalo xanma. ²² Men- nu be yilanyilanna, alu hinna wolu la. ²³ Alu i kisi, x'e sa- ba xa bo ta to. Do xotelu be je, alu hinna wo dulu la, bari alu wo ke silanpa to. Haali alu xana son xa maxa wolu la doroko la, men noxota i balo fe. ²⁴ Men si alu kisi no boyo bee ma, x'a tu fe nte alu la, anin x'alu pax- alininba lalo a la nooro pa xoto, ²⁵ Ala kilinpe, n Kisi- baxo, n Marigi Isa Kirisita barako to: Nooro nin bunpa nin sintigiya nin fango b'a jen kabirin abada, saasa anin fo abada! Amiini.

YITALOLU

1 Ninnu mu Isa Kirisita la ku yitaninŋo lelu ti, Ala xa mennu di a ma, walasa kuwo men be nala kela dondin, a xa wo yita a la jonŋolu la. Kirisita x'a la melesiyo ki a la jonxe Yaya ma, walasa a xa wo kuwo yita a la. ² Wo xa fen wo fen je: Ala la xumo anin Isa Kirisita la seede ya, a xa wo fo. ³ Moxo men be jin kila ya xuma innu xaranna, moxo mennu b'a lamela anin x'a xono xumolu labatu, heero be wolu pen bawo waxato sutiyata. ⁴ Yaya le be jin safe in kila Ala la jama woorowulo ma, mennu be Asi maro xono: Neemo nin heero xa ke alu fe xa bo Ala dula, men be je, men tun be je, anin men be nala; anin xa bo Ala Ni woorowulo dula, mennu be a la mansasigilanŋo ŋafe, ⁵ xa bo Isa Kirisita dula, ate men mu seede xantigo ti, ate men mu folo ti xa bo furelu to, anin duguxulo xan mansaxelu la Mansaxe. Kirisita be n xanula, a xa n kunbo n na junubolu ma a jelo bonno fe. ⁶ A xa n ke mansaya nin sadaxalasibaxolu ti a Fa Ala ŋen. Tanto nin sintigiya be a ŋen fo abada! Amiini. ⁷ A fele, a nato be xabolu temo to, moxo bee ŋa si a je, haali mennu x'a soxo. Duguxulo siyalu bee si xasi a la kuwo xanma. Iyo! Amiini! ⁸ «Nte mu Alifa nin Omega le ti», Marigi Ala, Sinŋobeetigo xo ten, men be je, men tun be je, anin men be nala. ⁹ Nte mu Yaya le ti, alu badinxe nin alu kafuŋoxo, tooro nin Mansaya nin timinadiya to, Isa kafuŋoxoya xono. N' tun be Patimosi xooxoji sutto to, bawo n' xa Ala la xumo fo anin xa Isa seede ya. ¹⁰ Marigi la lunŋo, Ni Senunŋo jigita nte to. N' xa xumaxanba do me n' xofe men tun be i xo buutuwo. ¹¹ Wo xo: «I' ŋa be men na, wo safe bukko do to, x'a ki Ala la jama woorowulo ma: Efesi, Simirine, Peregame, Tiyatire, Sarade, Filadelifi anin Lawodise.» ¹² N' xa n' xofele xo n' be n' xumanŋenbaxo mafelela. Wo to, n' xa sanu lanpa woorowula je. ¹³ Do tun be wo lanpolu temo to, a be i xo hadamadinŋo. Dorokeba do tun b'a xanna, men be jigila fo a sinŋolu ma, sanu tetositalanŋo tun be baratunin a xaro to. ¹⁴ A kunŋo tun be xoyinin a be i xo saaxati xoyimanŋo walla i xo kotondibuna. A ŋalu tunnu be i xo tamano. ¹⁵ A sinŋo tunnu be ŋelenxula i xo silo men xolenta takenbuba to, x'a janxo b'a to. A xumaxanŋo be i xo jiba sonxoxanŋo. ¹⁶ Loolo woorowula tun be a kininbulo to, fan dafula dimanŋo do tun be bola a da xono. A ŋada tun be manala i xo tilo, nin a be kun. ¹⁷ N' x'a je tumo men, n' boyita a sinŋolu xoto xa ke i xo fure. A x'a kininbulo la n' xan x'a fo xo: «I' xana sila!

Nte mu folo nin labanŋo le ti. ¹⁸ Nte le mu nilama ti. N' tun sata, a fele n' be n' nila fo abada. Saya nin lahara xundinŋolu be n' bulu. ¹⁹ Wo to, i safe, i xa fenŋo mennu je, mennu be je, anin mennu xa xan xa ke wo xo. ²⁰ I' ŋa be loolo woorowulo mennu la n' kininbulo to, anin sanu lanpa woorowulo, wolu gullo fele: Loolo woorowulo mu Ala la jama woorowulo la melesiyo lelu ti, lanpa woorowulo mu Ala la jama woorowulo ti.»

2 «A safe Efesi Ala la jama melesiyo ŋen xo: «Loolo woorowulo be men kininbulo to, nin a be i taxamala sanu lanpa woorowulo temo to, wo be men fola wo fele: ² Nte xa i la kewalolu lon, i la sege anin i la timinadiya. N' x'a lon xo i me moxo jaxolu la kuwolu muŋa no. Mennu b'a fola x'e mu kiladinŋolu ti x'a tara i nte a ti, i xa wolu xotobo, i xa wolu tara fanolu ti. ³ I' xa timinadi, i toorota nte toxo nofe, bari i man sege. ⁴ Bari n' be fen kilin fola i ma, xanuya folo men tun be i la, i man wo tu i la. ⁵ I' hakilo lajigi i boyidula kun, nimisi xa i la kewale fololu ke, nin wo nte, n' si na i ma. Nin i man nimisi, n' si i la lanpo bo a no to. ⁶ Bari i la ŋin xa bete: Nikolayi diino moxolu la kebaarolu man di i ŋen, i xo i man di nte du ŋen ŋa men. ⁷ «Tulu be men ma, wo x'a lame, Ni Senunŋo be men fola Ala la jamalu ŋen. «Men je sinŋo soto, n' si nilamaya yiro dinŋolu di wo ma domolo ti, men be Ala la arajanna xono.» ⁸ «A safe Simirine Ala la jama melesiyo ŋen xo: «Men mu folo nin labanŋo ti, nin a tun sata xa nilamaya tugun, wo be men fola wo fele: ⁹ Nte x'e la tooro nin i la segebaxantunŋa lon. Bari tonŋa la, i mu fentigo le ti! Mennu be i fannu kenin Yahudiya ti, x'a tara i nte a ti, wolu be toxotinaxumo mennu fola, n' xa wolu lon. Wolu mu Sentane la batusuwo le ti. ¹⁰ Naaga men be nala i soto-la, i xana sila wo ŋa. A fele, Sentane si alu dolu bula kaso la walasa x'alu xotobo, alu si tooro tili tan xono. Ke xantigo ti fo saya. Nin wo keta, n' si nilamaya di i ma kunnawulijala ti. ¹¹ «Tulu be men ma, wo x'a lame, Ni Senunŋo be men fola Ala la jamalu ŋen! «Men je sinŋo soto, wo si kisi saya fulanannŋo ma.» ¹² «A safe Peregame Ala la jama melesiyo ŋen xo: «Fan dafula dimanŋo be men bulu, wo be men fola wo fele: ¹³ Nte xa i sigidula lon: Sentane la mansasigilanŋo be dula men ne mu. I' be notoninbete nte la, anin i man i la lannaya bo nte xan, haali n' seede xantigo, Antipasi faxata alu bata waxato men, Sentane sigidula. ¹⁴ Bari haali wo, fen dantalulu be n' bulu x'e fo i ma: Moxo dolu be i bata

mennu b'a lonin Balamu la xaranjo xo. Balamu xa Balaki bula kalanjo lola Banisirayila dinjolu na x'e bula bolisosubo domola anin xa jadoya ke. ¹⁵ Ite du bata, moxo dolu be je, mennu be a lonin Nikolayi diino moxolu la xaranjo xo. ¹⁶ Wo le x'a tu, nimisi. Nin wo nte, dondin n si na i ma, n si wo moxolu keke fanjo la, men be n da la. ¹⁷ «Tulu be men ma, wo x'a lame, Ni Senunjo be men fola Ala la jamalu nen! «Men je sinjo soto, n si manne duguninjo di wo ma. N si kuru xoyo du kilin di a ma, toxo kuto be safenin men xan, moxo man men lon fo a dita men kilin ma.» ¹⁸ «A safe Tiyatire Ala la jama melesiyo nen xo: «Ala Dinxe, ate men palu be manala i xo ta, a sinjolu be njelenxula i xo silo, wo be men fola wo fele: ¹⁹ N x'e la kewalolu lon, anin i la xanuya, nin i la xantigiya, nin i la baaro, nin i la timinadiya. N x'a lon x'e la kewale numa labanjo xo xa sa folofolo talu ti. ²⁰ Bari fen be n bulu x'a fo i ma: I be Jesabeli tunin je, wo muso men b'a fan kilila xo kila, a be n na jonjolu lafilila. A b'e laxaranna x'e xa jadoya ke anin x'e xa bolisosubolu domo. ²¹ N xa waxati di a ma walasa a xa nimisi, bari a nte a fe xa nimisi a la jadoya la. ²² Wo le x'a tu, nte be nala a lalala jangaru laranjo xan. Mennu xa jadoya ke a fe, n si tooroba lana wolu dula ma, nin i man nimisi wo kewalolu la. ²³ Nte be nala a dinjolu faxala. Wo to, Ala la jamalu bee si a lon xo nte le mu hadamadinjolu miiriyalu nin i xonoto kuwolu bee segegeboxo ti. Nte si alu bee kilin kilin sara x'a ben alu la kewalolu ma. ²⁴ «Bari atelu tolu mennu be Tiyatire, nin alu man son wo xaranjo ma, anin alu man a lon wo moxolu xa men kili xo "Sentane la gullebalu", n b'a fola alu nen xo, nte nte doni xote lala alu kun. ²⁵ Bari men be alu bulu, alu wo tomuta bete fo n xa na. ²⁶ «Men je sinjo soto, anin xa n na kewalolu mara fo labanjo lunjo, n si fango di wo ma, nte fan xa men soto n Fa la: N si fango di wo ma siyalu xan. A si i mara negeguma la, x'e tote i xo banxudaxolu. N si saxuyelendala loolo du di wo ma. ²⁹ «Tulu be men ma, wo x'a lame, Ni Senunjo be men fola Ala la jamalu nen!»

3 «A safe Sarade Ala la jama melesiyo nen xo: «Ala Ni woorowulo, anin loolo woorowulo be men bulu, wo be men fola wo fele: Nte x'e la kewalolu lon. Toxo b'e la xo i be i nila, bari i saninjo le mu. ² Kuni! Barako dun i totuninjo to, men be njinin xa sa, bawo n man i la kewalolu tara dafanin n na Ala na xoto. ³ Wo to, i laxaranta men na, anin i xa men me, i hakilo lajigi wo kun. Wo mara, xa nimisi! Nin i man kuni, n si na i xo sunjo, x'a tara i man a lon n be nala waxato men, x'e ju. ⁴ Bari haali wo, moxo dolu be i bata Sarade, mennu man i la faanolu noxo. Wolu nin nte si i taxama i noxo fe, xa faanu xoyo tu i la, bawo i nin wo xa xan. ⁵ «Wo na ma, men je sinjo soto, faanu xoyimanjo si dun wo xanna. Nte me a toxo bo nilamaya bukko xono. Nte si a fo n Fa anin a la melesiyolu pala xo wo tigo mu nte ta le ti. ⁶ «Tulu be men ma, wo x'a lame, Ni Senunjo be

men fola Ala la jamalu nen!» ⁷ «A safe Filadelifi Ala la jama melesiyo nen xo: «Men mu Senumanjo nin Tonjatigo ti, mansaxe Dawuda la xundinjo be men bulu, men si da yeke moxo si me men taxun no, anin men si da taxun moxo si me men yeke no, wo be men fola wo fele: ⁸ Nte x'e la kewalolu lon. N xa da do yeke x'a bula i na xoto, moxo me men taxun no, bawo barakendin doron ne be i la, anin bawo i xa n na xumo mara, anin du i man i xaro nte toxo la. ⁹ A fele, n be nala Sentane batusuwo moxo dolu dila i ma, wo fanolu mennu b'e fannu kenin Yahudiyalu ti, x'a tara i nte a ti: N si i diyakuwa i xa na njongi i xoto. I si a lon xo nte be i xanula. ¹⁰ X'a la a xan i xa nte la xumo mara timinadiya to, nte du si i mara tooro waxato, men be nala sila duniya moxolu bee ma, xa duguxulo xan moxolu xoto-bo. ¹¹ Dondin n si na. Men be i bulu wo tomuta bete, walasa moxo si xana i la kunnawulijala muta i la.

¹² «Men je sinjo soto, nte si wo tigo ke losinjo ti n na Ala la batusuba xono. A me bo je wo xo tugun. Nte si n na Ala toxo safe wo tigo xan, xa n na Ala la galluba toxo safe a xan, nin wo mu Yerusaleme kuto ti, men be bola sanjo to, n na Ala bata. Nte si n toxo kuto du safe a xan. ¹³ «Tulu be men ma, wo x'a lame, Ni Senunjo be men fola Ala la jamalu nen.» ¹⁴ «A safe Lawodise Ala la jama melesiyo nen xo: «Men toxo xo Amiini, Seede xantigo, anin Tonjatigo, men mu Ala la dalo bee sabaabubaxo ti, wo be men fola wo fele: ¹⁵ Nte x'e la kewalolu lon: I man suma, i man xandi. Nin i tun xa suma le, walla i xa xandi le, wo le tun xa fisa! ¹⁶ X'a la a xan i man xandi, i man suma, i be naminin ne, n be nala i foonola. ¹⁷ I b'a fola xo: "N mu fentigo le ti, n fentigiyata, fusi lafi nte n na". I man a lon xo i mu bulu-toxulunjo nin paanibaxato nin segebaxantunjo nin fiyonto anin balamaxulunjo le ti. ¹⁸ Wo le x'a tu, nte be i tonbenna xo i xa sano san nte ma, ta xa men janjo b'a to, walasa i xa fentigiya. Faanu xoyolu san nte ma x'e ke i ma, walasa i la balamaxulunja xana lon x'e maluya. Nadimin tulo san nte ma x'a ke i palu to, walasa i palu xa yeke. ¹⁹ Nte be mennu xanula, nte si xuma wolu nen, x'e laxosi. Wo to, i balan i xa nimisi. ²⁰ A fele, n be lonin da la x'a konkon; nin moxo do xa n xumaxanjo me xa da yeke, n si dun wo tigo bata, n nin a si domolo ke, ate nin nte si domolo ke. ²¹ «Men je sinjo soto, n si wo tigi nin nte lasigi i noxo fe, n na mansasigilanjoo xan, i xo nte fan xa sinjo soto na men, n nin n Fa Ala xa sigi i noxo fe, a la mansasigilanjoo xan. ²² «Tulu be men ma, wo x'a lame, Ni Senunjo be men fola Ala la jamalu nen!»

4 Wo tanbo xo, n xa jeli xote ke: N xa da do yelinjo je sanxulo to. N tun xa xumaxan folo men me xumala n nen, nin a be i xo buutu xanjo, wo xo n nen xo: «Yeke jan, men be nala kela wo xofe, n si wo yita i la.» ² Wo no bee to, Ni Senunjo jigita nte to. A fele, mansasigilanjoo do tun be sanxulo to. Do tun be sig-

inin wo mansasigilanŋo xan. ³ Men tun be siginin wo xan, wo tun kepa be í xo kuru daxolenŋo dolu: Jasipekuro anin saraduwanekeuro. Mansasigilanŋo tun be lamininnin Ala la fanŋo la, men tun be nelenxula í xo emerodekuro. ⁴ Mansasigilan muxan nin naani tun be wo mansasigilanŋo lamininnin. Moxoba muxan nin naani tunnu be siginin wo mansasigilanŋolu xan. Faanu xoyimanŋolu b'e ma. Mansakufune sanuma be i kunna. ⁵ Sanjimepenxolu nin xumaxanŋolu nin sanjifetenŋolu tunnu be bola mansasigilanŋo xan. Moopo mananin woorowula tunnu be mansasigilanŋo pafe: Wolu mu Ala Ni woorowulo lelu ti. ⁶ Mansasigilanŋo pafe tun be í xo xooxoji weerema, a be í xo kuro men be nelenxula. Fen nilama naani tunnu be mansasigilanŋo temo to anin a lamininŋo to. Wolu pafela nin i xofela bee faninŋo be pakesolu la. ⁷ Fen nilama folo be í xo waraba, fulananŋo be í xo tuurandinŋo, sabananŋo pada be í xo hadamadinŋo, naaninanŋo be í xo bonŋo baninŋo. ⁸ Danfatan wooro tun be wo fen nilama naano kilin wo kilin ma, mennu boxo bee nin i xoto be fanin pakesolu la. Suwo nin tilo, i nte fatala a fola xo: «Senumanŋo, senumanŋo, senumanŋo, Mari-gi Ala, Sinjobeetigo, men tun be je, men be je, anin men be nala.» ⁹ Tuma wo tuma, nin fen nilama naano be donkilo lala xa mansasigilanŋo tosigibaxo tantu, x'a bunŋa anin xa barako la a pen, ate men be í nila fo abada, ¹⁰ wo tuma, moxoba muxan nin naano si i pongo mansasigilanŋo tosigibaxo xoto x'a batu, wo men be í nila fo abada. I si i la mansakufunolu fili mansasigilanŋo xoto x'a fo xo: ¹¹ «N Marigi nin n na Ala, í nin nooro nin bunŋa nin sintigiya xa xan; bawo ite le xa fenŋo bee da. A diyata í pen i xa ke je, wo to i data.»

5 Í xa bukke mininninŋo je mansasigilanŋo xan sigibaxo kininbulo to, a xo nin a pa be safenin. A be dataxunnin. Buluno woorowula be a xan. ² Í xa meleke barakema do je, men tun be fetenxan x'a fo xo: «Jon nin a xa xan xa bulunolu bo je, xa bukke in dayele?» ³ Bari moxo si tun nte sanxulo to, anin duguxulo xan, anin duguxulo xoto, a sinŋo tun be men pen xa bukke in dayele, walla x'a mafele. ⁴ Nte tun be xasila bete, bawo moxo si man tara je men tun nin bukke in dayelelo xa xan walla x'a mafele. ⁵ Wo to, moxoba do xo í pen xo: «Xana xasi. A mafele: Yuda xabiilo waraba, mansaxe Dawuda tobo xa sinŋo soto. A si buluno woorowulo bo je, xa bukko dayele.» ⁶ Í xa Saaxandinŋo do je lonin mansasigilanŋo nin fen nilama naano nin moxobalu temo to. A tun be í xo a faxata. Bija woorowula tun b'a ma anin pakese woorowula, nin wolu mu Ala Ni woorowulo ti, mennu kita xa taxa duguxulo bee xan. ⁷ Saaxandinŋo x'é sodun xa bukko muta mansasigilanŋo tosigibaxo kininbulo to. ⁸ A xa bukko muta tumo men, fen nilama naano nin moxoba muxan nin naano x'e pongi Saaxandinŋo xoto. Kontinŋo be i bee bulu, anin sanu felinŋolu, mennu be

fanin digico la, wo digico mu moxo senumanŋolu la Alamatarala lelu ti. ⁹ I tunnu be donkilo kuto laxan xo: «Í nin a xa xan xa bukko muta, x'a bulunolu bo je; bawo í faxata, í x'é jelo ke xa moxolu kunbo Ala pen, xa bo xabiilolu nin xanŋolu nin jamanolu nin siyalu bee to. ¹⁰ Í x'e ke mansaya, nin sadaxalasibaxolu ti, n na Ala pen. I si sigi mansaya la duguxulo kunna.» ¹¹ Wo xofe, í xa meleke kiika xanme i be mansasigilanŋo nin fen nilama naano nin moxobalu lamininnin. Wolu jaate tun mu wulu tan wulu tanŋo lelu ti anin wulu wulolu. ¹² I tunnu b'a fola barako to xo: «Saaxandinŋo men faxata, wo nin sintigiya nin fentigiya nin hakilitigiya anin barako nin bunŋa nin nooro nin tantulo xa xan!» ¹³ Dafenŋo fen wo fen be sanxulo to, anin duguxulo xan, anin duguxulo xoto, anin xooxojiyo to, dafenŋolu bee, nte xa wolu me a fola xo: «Men be siginin mansasigilanŋo xan anin Saaxandinŋo, tantulo nin bunŋa nin nooro anin sintigiya be wolu pen fo abada!» ¹⁴ Fen nilama naano tunnu b'a fola xo: Amiini! Moxobalu x'e pongi xa batulo ke.

6 Wo xo, í xa Saaxandinŋo je, a xa bukko buluno woorowulolu to folo bo je. Í xa fen nilama naanolu to kilin xanme í xo sanjifetenŋo, a xo: «Na!» ² Nte xa felelo ke, í xa su xoyo do je. Xalo tun be a xan sigibaxo bulu. Mansakufuno do dita a ma. A sintigima le taxata walasa xa sinŋo soto tugun. ³ Saaxandinŋo xa buluno fulananŋo bo je tumo men, í xa fen nilama fulananŋo xanme a fola xo: «Na!» ⁴ Wo to, suwo do xote bota, wulemanŋo le mu. Men tun b'a xan, sinŋo dita wo ma xa heero bee bo duguxulo xan, walasa moxolu x'e poxo faxa. Fan janjamanŋo dita a ma. ⁵ Saaxandinŋo xa bukko buluno sabananŋo bo je tumo men, í xa fen nilama sabananŋo xanme a fola xo: «Na!» Nte xa felelo ke, í xa su finmanŋo do je. Men tun be siginin a xan, sumannikelanŋo le tun be wo bulu. ⁶ Í xa xanŋo do me í xo xumaxanŋo, fen nilama naano temo to, a tun b'a foxan xo: «Alixaamo kilo kilin mu tili kilin baaro sara le ti. No kilo saba mu tili kilin baaro sara le ti. Bari í xana maxa tulo nin dolo la.» ⁷ Saaxandinŋo xa bukko buluno naaninanŋo bo je tumo men, í xa fen nilama naaninanŋo xanme a fola xo: «Na!» ⁸ Í xa felelo ke, í xa su pugujilama do je. Men tun be a xan, wo toxo le xo Saya, lahara tun be a nofe. Duguxulo talaninŋo naani ti sinŋo dita i ma tala kilinŋo xan, walasa i xa moxolu faxa fanŋo nin xonxo nin fopojangaro anin duguxulo xan wara jaxolu la. ⁹ Saaxandinŋo xa bukko buluno luulunanŋo bo je tumo men, nte xa moxolu niyolu je sadaxajanilanŋo xoto, mennu faxata Ala la xumo nofe, anin i xa seedeyalo men ke nofe. ¹⁰ I tunnu be kulela barako to xo: «Marigi senumanŋo, anin tonpatigo, fo tuma joman í be tula í man kiito tege duguxulo moxolu xan, xa n jelo bonno julo sara?» ¹¹ Dorokeba xoyimanŋo dita i bee ma, anin a fota i pen xo i xa i popo dondin haalisa, fo i baaradin topoxolu

nin i badinḡolu moxo xa dafa tumo men, mennu xa xan xa faxa, í xo itelu fannu faxata ḡa men. ¹² Saaxandinḡo xa bukko buluno wooronanḡo bo je tumo men, ḡ x'a je xo duguxulu jarajara keta. Tilo finta í xo furuja faano, xaro muume wuleta í xo jelo. ¹³ Loololu butunta dugo ma xa bo sanḡo to, í xo foḡoba be turojuwo lamaxala ḡa men x'a din kerengḡolu labon. ¹⁴ Sanxulo sankota í xo bukke mininta be mininna ḡa men. Kurolo nin jisuttolu bee bota i nolu to. ¹⁵ Duguxulo mansaxelu nin fangatigolu nin sorodasi kuntigolu, nin naafu-lutigolu, nin baraketigolu anin moxo tolu bee, jonḡolu nin hoorolu, i bee x'e dugu kuruwuwolu xono anin kurolo to. ¹⁶ I x'a fo kurolo nin gojelu ḡen xo: «Alu boyi n to, xa n dugu mansasigilanḡo tosigidaxo ḡada ma anin Saaxandinḡo la diminḡo ma; ¹⁷ bawo i la diminḡo lunba sita. Jon si bo no a xono?»

7 Wo xofe, ḡ xa meleke naani je, i be lonin duguxulo tonxon naano to. I tunnu be duguxulo foḡo naano mutanin, walasa foḡo si xana tege duguxulo nin xooxojiyo xan anin yiriju si xan. ² Nte xa meleke xote je, a be bola koton mafanḡo, Ala nilama la bulunokelanḡo b'a bulu. A fetenta meleke naano la, sinḡo tun dita mennu ma xa ku jaxo ke duguxulo nin xooxojiyo la, a xo: ³ «Alu xana kujaxu ke duguxulo nin xooxojiyo nin yirijuwolu la, jannin n be taagumanseedo kela n na Ala la jonḡolu foda la.» ⁴ Taagumanseedo keta moxo mennu foda la Banisirayila dinḡolu xabiilolu bee to, ḡ xa wolu jaate me xo: Wulu keme nin tan naani wulu nin wulu naani. ⁵ Yuda xabiilo la, taagumanseedo keta wulu tan nin fula la; Ruben xabiilo la, wulu tan nin fula; Gadi xabiilo la, wulu tan nin fula; ⁶ Asere xabiilo la, wulu tan nin fula; Nefutali xabiilo la, wulu tan nin fula; Manase xabiilo la, wulu tan nin fula; ⁷ Simeyon xabiilo la, wulu tan nin fula; Lewi xabiilo la, wulu tan nin fula; Isakari xabiilo la, wulu tan nin fula; ⁸ Sabulon xabiilo la, wulu tan nin fula; Yusufu xabiilo la, wulu tan nin fula; Bensamen xabiilo la, wulu tan nin fula, taagumanseedo keta mennu la. ⁹ Wo xofe, nte xa felelo ke xa jamaba je, moxo si tun me men jaate no. Wo moxolu mu siyalu bee nin xabiilolu bee nin jamanolu bee nin xanḡolu bee do moxo lelu ti. I tunnu be lonin mansasigilanḡo nin Saaxandinḡo ḡafe, dorokeba xoyolu b'e xanna, tamarabulolu b'e bulu. ¹⁰ I tunnu be fetenna barako to xo: «Kisilo mu n na Ala le ta ti, men be siginin mansasigilanḡo xan, anin Saaxandinḡo!» ¹¹ Melekiyolu bee tunnu be lonin xa mansasigilanḡo nin moxobalu anin fen nilama naano laminin. I x'e boyi i ḡadalu xan dugo ma, mansasigilanḡo ḡafe, xa Ala batu. ¹² I tunnu b'a fola xo: «Amiini! Tantulo nin nooro nin hakilitigiya nin barakebulo nin bunḡa nin sintigiya anin barako mu n na Ala le ta ti, fo abada! Amiini!» ¹³ Wo to, moxobalu do xa xumo ta x'a fo ḡ ḡen xo: «Dorokeba xoyo be mennu xanna, wolu mu jonnu ti, anin i be bola minto?» ¹⁴ ḡ x'a jaabi xo: «ḡ Marigi, ite le

xa wo lon.» A xo ḡ ḡen xo: «Mennu bota tooroba xono, wo lelu mu. I x'e la dorokebalu ku x'e laxoyiya Saaxandinḡo jelo la. ¹⁵ Wo le x'a tu, i be lonin Ala la mansasigilanḡo ḡafe x'a batu su nin tili, a la batusuba xono. Mansasigilanḡo tosigidaxo si i lasawu a la tilliso xono. ¹⁶ Xonxo me i muta tugun, mindoxo me i muta tugun, tilo nin a funtano me i jani tugun, ¹⁷ bawo Saaxandinḡo men be mansasigilanḡo temo to, wo si ke i negaanibaxo ti, a si taxa i ti nilamaya jiyo bodulalu. Ala si ḡajiyo bee fita x'a bo i ḡalu la.»

8 Saaxandinḡo xa buluno woorowulanḡo bo je tumo men, de keta sanxulo to xa leere tala ḡoxon ke. ² Wo xo, ḡ xa meleke woorowulo je, i be lonin Ala ḡa xoto. Buutu woorowula dita i ma. ³ Melekiyo do xote nata í lo sadaxajanilanḡo senbo to, siisilitegenen sanuma tun b'a bulu. Digico kiika dita a ma, walasa a xa wo nin moxo senumanḡolu bee la Alamataralu lasi i ḡoxo fe, sadaxajanilan sanuma xan, men be mansasigilanḡo ḡafe. ⁴ Digice siisiyo nin moxo senumanḡolu la Alamataralu yeleta i ḡoxo fe Ala ḡa xoto, xa bo melekiyo bulu. ⁵ Wo to, melekiyo xa siisilitegenenḡo ta x'a fa sadaxajanilanḡo ta la, x'a bon duguxulo xan. Wo no bee to, sanjifetenḡo nin xumaxanḡolu nin sanjimeḡenxolu nin duguxulu jarajaro keta. ⁶ Buutu woorowulo tunnu be meleke woorowulo mennu bulu, wolu x'e toben buutufo xanma. ⁷ Meleke folo x'a la buutuwo fo. Maramallekeso nin ta nin jelo ḡaxamininḡo bonta duguxulo xan. Duguxulo talaninḡo saba ti, tala kilinḡo janita, yirijuwolu dudu talaninḡo saba ti, tala kilinḡo janita anin bin kerengḡo bee. ⁸ Meleke fulanḡo x'a la buutuwo fo. A keta í xo nin í xa kuru belebebeba nin ta fili xooxojiyo to. Xooxojiyo talaninḡo saba ti, tala kilinḡo yelemata xa ke jelo ti. ⁹ Xooxojiyo dafen nilamalu talaninḡo saba ti, tala kilinḡo sata, batonḡolu talaninḡo saba ti, tala kilinḡo bee tinata. ¹⁰ Meleke sabanḡo x'a la buutuwo fo. Loolo belebebeba do butunta xa bo sanḡo to, a be manala í xo moḡo. Bajjiyolu talaninḡo saba ti, a butunta tala kilinḡo to anin jibodulalu to. ¹¹ Wo loolo toxo le xo: «Xuniya». Jiyolu talaninḡo saba ti, tala kilinḡo xuniyata, moxo kiika sata jiyolu la xuniya bulu. ¹² Meleke naaninanḡo x'a la buutuwo fo. Tilo nin xaro nin loololu talaninḡo saba ti, tala kilinḡo yellata. I talaninḡo saba ti, tala kilinḡo dibita. Tilo keneya talaninḡo saba ti, tala kilinḡo bota a la, suwo du keta ten. ¹³ Wo to, nte xa felelo ke, ḡ xa bonḡo do me a fola barako to, x'a tu banin sanjanba to xo: «Bone! Bone! Bone be duguxulo xan moxolu ḡen, nin meleke to sabo x'e la buutuwo fo tumo men!»

9 Meleke luulunḡo x'a la buutuwo fo. Nte xa loolo do je, men butunta duguxulo xan xa bo sanḡo to. Dinxajironba danjebalo xolonḡo xundinḡo dita a ma. ² A xa dinxajironba danjebalo xolonḡo dayele. Siisiyo do bota non xono, men be í xo wureba siisiyo. Tilo nin foḡo finta wo siisiyo bulu. ³ Tonḡolu bota wo si-

isiyo to xa jenjen duguxulo xan. Sinŋo dita wolu ma, men nin duguxulo xan dondonkoŋelu ta bee xa xan. ⁴A fota i pen x'e xana fusi ke duguxulo binŋo la, i xana fusi ke fen kerengolu la, i xana fen ke yiriju si la, fo moxolu doronnu, Ala la taagumanseedo nte mennu foda la. ⁵I man yanmaru xa moxolu faxesa, bari i yanmaruta le x'e paaga xaru luulu xono. I la bunnida dimiŋŋo be le í xo dondonkoŋe bunnida dimiŋŋo. ⁶Wo lunŋolu, moxolu si saya lanjinin, bari i me a soto. I si a ŋanne xa sa, bari saya si í bori i ma. ⁷Wo tonŋolu tunnu be bonin suwolu fe, mennu be tobennin kelo xanma. Fen dolu be i kunna a be í xo mansakufune sanumalu. I ŋadalu be í xo hadamadiŋŋo ŋada. ⁸I kunsinolu be í xo musu kunsinolu, i ninŋolu be í xo waraba ninŋolu. ⁹I xaradalu be í xo negedoroko b'e ma, i danfataniŋolu mankaŋŋo be í xo su wuturu kiika taxato be keledula. ¹⁰Xu sulenniŋŋolu b'e ma í xo dondonkoŋelu. Sinŋo tun be i xuwo lelu to xa dimiŋŋo lasi moxolu ma xaru luulu xono. ¹¹I la mansaxe mu dinxajironba danjebalo melesiyo le ti, men toxo heburuxaniŋo to xo «Abadon», gerekixaniŋo to xo «Apoliyon». Wo xoto xo «Halagilila». ¹²Bone folo tanbita, wo tanbo xo, bone fula xote fele nanin tugun. ¹³Meleke wooronaniŋo x'a la buutuwo fo. N' xa xumaxaniŋo do me, xa bo sadaxajaniŋan sanuma tulukunŋolu la, men be Ala ŋafe. ¹⁴A tun b'a foxan meleke wooronaniŋo pen, buutuwo tun be men bulu xo: «Meleke naano bula, mennu be sitinin joloxo la, ba belebeleba da la, xo Efarati.» ¹⁵Wo meleke naano men tunnu be tobennin nin san in, nin nin xaru in, nin nin lun in, nin nin leere in xanma, wolu firinta, walasa moxolu talaniŋŋo saba ti, i xa tala kilinŋo faxesa. ¹⁶Kelediŋŋolu men tunnu be suwo xan, n' xa wolu jaate me xo: Miliyon keme fula. ¹⁷Suwolu nin i yelenxanbaxolu nata nte ma ŋa men, n' na jelo xono, wo fele: Negedorokolu tunnu be i xarada ma, mennu be wulenin í xo ta, i be buloyanin í xo safirekuro, i be netemunguyanin í xo tinbiritiyo. Suwolu kunŋolu tunnu be le í xo waraba kunxulo, ta nin siisiyo nin tinbiritiyo tun be bola i da xono. ¹⁸Duniya moxolu talaniŋŋo saba ti, tala kilinŋo faxata wo kasaare sabo fe, nin wolu mu ta nin siisiyo nin tinbiritiyo ti, men tunnu be bola suwolu da xono. ¹⁹Suwolu barako be i da nin i xuwo lelu to. I xuwolu be í xo salu. Kunxulo be wo xuwo lu ma, i si ku jaxo ke no mennu la. ²⁰Men ken mu duniya moxo tolu ti, kasaaro man mennu faxesa, wolu man nimisi i bulo la fen daraninŋolu la. I taxata ŋa xa jinŋolu nin boli sanumalu, nin a xalisixoyimalu, nin a silamalu, nin a kurumalu, nin a yirimalu batu, mennu me jeli ke no, i me meli ke no, i me i taxama no. ²¹I man nimisi i la moxofaxolu nin i la suuya nin i la jadoya nin i la suupalolu la.

10 Wo xo, n' xa meleke barakema do xote je, men tun be jigixan xa bo sanŋo to. Xabo tun be burinin a ma, Ala la fanŋo b'a kunŋo la. A ŋada be í xo ti-

lo, a sinŋolu be í xo losin tamalu. ²Bukke doxomandiŋŋo do dayeleninŋo tun be a bulu. A x'a kininbulu sinŋo lo xooxojiyo xan, x'a numanbulu sinŋo lo duguxulo xan. ³A fetenta barako to í xo waraba be guutumela ŋa men. A fetenta tumo men, sanjifeten woorowulo xumaxaniŋo meta. ⁴Sanjifeten woorowulo xumata tumo men, nte tun b'a fe xa wo safe, bari n' xa xumaxaniŋo do me xa bo sanŋo to xo: «Sanjifeten woorowulo xa men fo, wo gullo mara í xono, í xana a safe.» ⁵N' tun xa melesiyo men loninŋo je xooxojiyo nin duguxulo xan, wo x'a kininbulu xotota sanŋo la. ⁶Men be í nila fo abada, a x'e xali wo toxo la, ate men xa sanxulo nin duguxulo nin xooxojiyo da, i nin i xan fenŋolu bee. Melesiyo xo: «Laxonoli nte kela bitugun!» ⁷Bari meleke woorowulananiŋo je a la buutuwo fo damuta lunŋo mennu, wo to, Ala la gullo si dafa, í xo a tun x'a fo a la kilalu pen ŋa men, nin wolu mu a la jonŋolu ti.» ⁸Wo xo, n' tun xa xumaxaniŋo men me xa bo sanŋo to, wo xumata n' pen tugun ten xo: «Taxa bukke dayeleninŋo muta melesiyo la, men be lonin xooxojiyo nin duguxulo xan.» ⁹N' xa n' sodun melesiyo la x'a ŋinin a fe, xo a xa bukke doxomandiŋŋo di n' ma. A xo n' pen xo: «A muta í x'a domo. A si xuniya í xono, bari a si diya í da í xo liyo.» ¹⁰N' xa bukke doxomandiŋŋo muta melesiyo la x'a domo. A diyata n' da í xo liyo; bari n' x'a domo tumo men, a xuniyata n' xono. ¹¹A fota n' pen xo: «Í xa xan xa kilaya ke tugun jamanolu nin siyalu nin xaniŋolu nin mansaxe kiika la kuwo to.»

11 Boguma dita nte ma a be í xo sumannikeguma. A fota n' pen xo: «Taxa Alabatusuba nin sadaxajaniŋan suman anin mennu be batulo kela je. ²Bari í xa Alabatusuba lukeno tu je, í xana wo suman, bawo wo dita siya tolu ma, mennu si gallu senumanŋo toponxo, tan naani xaru anin xaru fula xono. ³N' si sinŋo di n' na seede fulo ma, i xa kilaya ke wulu nin keme fula nin tan wooro tili xono, xa caake faano tu i xanna.» ⁴Seede fulo mu oliweju fulo nin lanpa fulo lelu ti, mennu be lonin duguxulotigi Marigi ŋafe. ⁵Nin moxo do b'a fe xa ku jaxo ke i la, ta si bo i da xono x'e jaxolu jani. Nin moxo wo moxo b'a fe xa ku jaxo ke i la, waajibo le mu wo tigo xa sa ten. ⁶Sinŋo be i pen xa sanxulo dataxun walasa sanji xana na i la kilaya lunŋolu. Sinŋo be i pen xa jiyolu yeleva jelo ti, anin xa kasaaro kiika laboyi duguxulo xan, sinŋa jaate men je diya i pen. ⁷Nin i la seedevalo banta tumo men, wara jaxo men be yeleva xa bo dinxajironba danjebalo xono, wo si i keleva, x'e no, anin x'e faxesa. ⁸I furelu si tu wo gal-luba dakeno la. Xumaxotoma la, wo gallo si kili xo Sodome nin Misira, i Marigi gengenta yiro ma dula men. ⁹Jamanolu nin xabiilolu nin xaniŋolu nin siyalu bee moxo si na i furelu mafele tili saba nin tala xono. I me son moxolu x'e lasi. ¹⁰Duguxulo xan moxolu si ŋaŋa i la kuwo la, x'e tulun, xa nilifenŋolu ki i ŋoxo ma, bawo wo kila fulo tunnu xa tooro kiika lasi hadamad-

inḡolu ma. ¹¹ Bari wo tili saba nin tala tanbo xo, nila-maya foṅo do bota Ala la, xa dun i to. I wulita x'e lo. Wo to, silanḡaba xa i mafelebaxolu muta. ¹² Kila fulo xa xumaxanba do me xa bo sanḡo to, wo x'a fo i pen xo: «Alu ye le jan.» I yeleta sanḡo to, xabo to, x'e jaxolu ḡalu loninḡo tu i to. ¹³ Wo waxato fan, duguxulu jara-jaraba keta, gallo talaninḡo tan ti, tala kilinḡo boyita, wulu woorowula moxo tuta wo kasaaro to. Moxo men-nu kisita, silanḡaba xa wolu muta, i xa sanxulotigi Ala bunḡa. ¹⁴ Bone fulananḡo tanbita. Bone sabananḡo nato fele dondin. ¹⁵ Meleke woorowulaninḡo x'a la buutuwo fo. Xumaxanbalu bota sanḡo to x'a fo xo: «Kabirin saasa, duniya mansaya mu n Marigi nin a la Kirisita ta le ti, a si tu mansaya la fo abada!» ¹⁶ Moxoba muxan nin naano mennu be siginin i la mansasigilanḡolu xan Ala ḡa xoto, wolu x'e boyi i ḡadalu xan dugo ma, xa Ala batu, ¹⁷ x'a fo xo: «Marigi Ala, Sinḡobeetigo, n be barako bulala í pen, ite men be je, anin ite men tun be je, í x'é la sintigiyaba ke, x'é la mansaya sigi. ¹⁸ Siyalu tunnu diminta, bari saasa ite la diminḡo nata. Furelu la kiito tege waxato sita. Waxato sita xa í la jonḡolu sara, nin wolu mu kilalu ti, anin i la moxo senumanḡolu nin í ḡasilanḡabaxolu, moxondin nin moxoba. Duguxulo tinabaxolu halagi tumo sita.» ¹⁹ Alabatusuba men be sanḡo to, wo dayeleta, Kafuxanḡo waxande jeta Alabatusuba xono. Sanjimepenxolu nin xumaxanḡolu nin sanjifetenḡolu nin duguxulu jarajaro keta. Maramallekese kunba du nata.

12 Wo xo, taagumanseede ba do bota sanḡo to: Muso do fele tilo be buurinin a ma, xaro be a sinḡolu xoto, loolo tan nin fula mansakufunema b'a kunna. ² A xonoma le tun mu, tinḡo diminḡo tun b'a bulaxan kulela. ³ Wo xo, taagumanseede xote bota sanḡo to: Samaane wulenḡo do fele, kunxulu woorowula b'a ma anin bina tan. Mansakufuno tun be wo kunḡolu kilin wo kilin na. ⁴ Sanxulo loololu talaninḡo saba ti, a xuwo tun be i tala kilinḡo fitaxan x'e labutun duguxulo xan. Samaano x'é lo muso ḡa xoto, men tun je na wulu, walasa x'a dinḡo domo a wuluwo xo. ⁵ A xa dinxe wulu, men si siyalu bee mara negeguma la. A dinḡo tata xa taxa a ti Ala nin a la mansasigilanḡo senbo to. ⁶ Wo to, muso x'é bori xa taxa wulafuxo xono, Ala tun xa dula do toben a pen jan men, walasa a xa labalu je tili wulu nin keme fula nin tan wooro xono. ⁷ Wo to, kelo keta sanḡo to. Minkayilo nin a la melekoyolu xa samaano kele. Samaano du nin a la melekoyolu xa kelo ke. ⁸ Bari samaano manota, i man dula soto sanḡo to tugun. ⁹ Samaano filita keno ma. Ate le mu sa xoto ti, men be kilila xo jinnolu la kuntigo nin Sentane anin duniya bee lafilibaxo. A filita duguxulo xan, a nin a la melekoyolu. ¹⁰ Wo xo, í xa xumaxanba do me xa bo sanḡo to, men tun b'a fola xo: «Kisilo waxato fele! N na Ala la sintigiya nin a la Mansaya sita saasa, anin a la Kirisita la fangatigiya. Bawo n bad-

inḡolu jalagibaxo filita keno ma, ate men tun be i jalagila n na Ala pen suwo nin tilo. ¹¹ N badinḡolu x'a mano Saaxandinḡo jelo barako to, anin i xa xumo men seede ya wo barako to. I bota i niyo la fo i tunnu nte silala saya ḡa. ¹² Wo le x'a tu, sanxulo nin a xono sigibaxolu, alu ḡaxali! Bari duguxulo nin xooxojiyo, bone be alu pen, bawo Sentane jigita taxanin alu ma, a diminninba, bawo a x'a lon xo waxatindin ne tuta a pen xo.» ¹³ Samaano x'a je tumo men xo a filita duguxulo xan, a x'a lo muso nofe, men tun xa dinxe wulu. ¹⁴ Bari bonba danfatan fula dita muso ma, walasa a x'é ba fo wula fuxo xono, a la dula, dula men bulaninḡo be a labalulo xanma, x'a tu tejanḡanin sa la, sanji saba nin tala xono. ¹⁵ Wo to, sa xa jiba sari xa bo a da xono, men be í xo bajiyu, taxanin muso ma, walasa a xa taxa jiwoyo fe. ¹⁶ Bari duguxulo xa muso deema: Duguxulo x'a da ye le xa bajiyu min, samaano xa men sari xa bo a da xono. ¹⁷ Xa samaano diminninba tu muso xanma, a taxata wo bonsonḡo to kele, mennu be Ala la sariyalu labatula, anin mennu be Isa la seede ya marala. ¹⁸ Wo xo, a x'é lo xooxojida la keḡo xan.

13 Wo xo, í xa wara jaxo do je bola xooxojiyo to. Bina tan tun b'a ma, anin kunxulu woorowula. Mansakufuno tun be wo binolu do wo do la, Ala toxtotinoxolu be safenin wo kunxulolu bee xan. ² Nte xa waro men je, wo be le í xo maanoxo, a sinḡolu be í xo urusi waro sinḡolu, a da be í xo waraba da. Samaano x'a la sintigiya nin a la mansasigilanḡo nin fangaba di a ma. ³ Wara jaxu in kunxulu kilin tun be jooginin x'a ke í xo a je sa le. Bari wo joogida men tun be a faxala, wo kende yata. Duguxulo moxolu bee kawakuyata x'a lo wo waro nofe. ⁴ Moxolu bee keta a ma xa samaano batu, bawo a tun xa fango di wara jaxu in ma. Bee xa wara jaxu in du batu x'a fo xo: «Waro ḡoxon be min? Jon s'a kele no?» ⁵ Da dita wara jaxo ma a xa wasubaxanteya xumolu nin toxtotinoxumu fo Ala ma. Fango dita a ma xa kuwolu ke tan naani xaru anin xaru fula xono. ⁶ A keta a ma xa xuma jaxo fo Ala ma, x'a toxo tija, x'a la bun senumanḡo toxo tija, anin mennu be siginin sanxulo to. ⁷ Yanmaruya dita a ma a xa moxo senumanḡolu kele, x'e no. Fango dita a ma xabiilolu nin jamanolu nin xanḡolu nin siyalu bee xan. ⁸ Duguxulo xan moxolu bee si a batu. Fen wo fen toxo man safe kabirin duniya da tumo, Saaxandinḡo men faxata wo la nilamaya bukko xono, wo lelu bee be wara jaxu in batula. ⁹ «Tulu be men ma, wo xa lamelo ke! ¹⁰ Nin do xa xan xa bula kaso la, wo tigo si taxa kaso la, nin do xa xan xa faxesanḡo la, wo tigo si faxesanḡo la. Wo le x'a tu, moxo senumanḡolu xa xan x'e timinadiya xa tu lannaya to.» ¹¹ Wo xo, í xa wara jaxu xote je, men tun be bola duguxulo xoto. Bina fula tun b'a ma, men-nu be í xo saaxandinḡo do binolu. A tun be xumala í xo samaano. ¹² A tun be wara folo la fango bee labaaraxan a ḡa xoto. A xa duguxulo nin a moxolu diyakuwa i

xa wara folo batu, wo men na joogilida tun b'a faxala, bari a kendeyata. ¹³ Nin wara fulanan in tun be kawakubalu kela, fo a tun be ta lajigixan duguxulo xan xa bo sanjo to moxo bee nala. ¹⁴ A xa duguxulo xan moxolu lafili kawakuwolu la, fango dita a ma xa men- nu ke wara in na xoto. Waro men tun joogita fanjo la, nin a kendeyata, wara fulananjo tun be i bulala wo waro noxonjo darala. ¹⁵ Wara fulanan in xa fango soto xa niyo ke wara folo noxonjo daraninjo to, walasa a xa sin xa xuma, anin xa moxo bee bula faxala, moxo fen wo fen je í ban x'a batu. ¹⁶ Wara fulanan in tun be hadamadinjolu bee diyakuwala, moxondin nin moxo- ba, fentigi nin segebaxantun, jon nin hooro, taagu- manseedo do xa ke i kininbulo to, walla i foda la. ¹⁷ Moxo si me sanni ke no, walla fiiri ke no nin wo taagumansedo nte a la, nin wo mu waro toxo ti, walla a toxo jaate la. ¹⁸ Hakilitigiya be njinna jan. Moxo men mu hakilitigo ti, wo tigo xa waro toxo xoto fo jaate la, bawo wo jaate be bennin moxo jaate do le ma. Wo jaate mu keme wooro nin tan wooro nin wooro le ti.

14 Wo xo, nte xa felelo ke: Ní xa Saaxandinjo loninjo je Siyon kuro xan, a nin wulu keme nin tan naani wulu nin wulu naani moxo. Ate toxo nin a Fa toxo tun be safenin wo moxolu bee foda la. ² Ní xa xumaxanjo do me bola sanjo to. A be í xo jiba sonxox- anjo, a be í xo sanjifetenxanba. Ní tun xa xumaxanjo men me, wo be le í xo kontinfolalu la kontinfoxanjo. ³ Wo moxolu be donkili kuto do ma x'a la mansasigi- lanjo nafe, anin fen nilama naano nin moxobalu nafe. Moxo si xote tun me wo donkilo digi no, nin wo wulu keme nin tan naani wulo nin wulu naano moxolu doronnu nte, mennu kunbota duguxulo xan. ⁴ Wolu man i fannu noxo musulu fe, bawo musulonbalo lelu mu. Saaxandinjo je taxa dula wo dula, i si a lo a nofe. I kunbota moxolu to. I mu Ala nin Saaxandinjo la fenso- tota folo lelu ti. ⁵ Faniya man soto i da. Jalagibalo lelu mu. ⁶ Wo xo, ní xa meleke xote je men tun be í baxan fo sanjanba to. Badabanjo xibaru Dimanjo tun b'a bulu x'a fo duguxulo xan moxolu nen, siyalu nin xabiilolu nin xanjo, anin jamanolu bee nen. ⁷ A tun b'a fola xanba to xo: «Alu sila Ala na, x'a bunna, bawo a la kiito tege waxato sita moxolu xan. Alu sanxulo nin duguxu- lo nin xooxojiyo nin jibodulalu dabaxo batu.» ⁸ Meleke fulananjo do x'a lo folo nofe, x'a fo xo: «Galluba Ba- bilone boyita, a boyita! A xa siyalu bee lamin a la jadoya jaxo dolo la.» ⁹ Meleke sabananjo x'a lo fula fo- lo nofe, x'a fo xanba to xo: «Moxo wo moxo be wara jaxo nin a noxonjo daraninjo batula, anin x'a taagu- mansedo soto í foda la, walla í bulo to, ¹⁰ wo tigo du si Ala la diminba doloma min, men naxamibalo yelemata a la diminjo felinjo xono. A si naaga ta anin tinbiritiyo to, meleke senumanjolu nin Saaxandinjo na xoto. ¹¹ I la naaga siisiyo si wuli fo abada. Mennu be wara jaxu in nin a noxonjo daraninjo batula, anin a

toxo taagumansedo be moxo mennu xan, wolu me lafiya soto su fara tili xan.» ¹² Wo le x'a tu, moxo senu- manjolu xa xan x'e timinadiya, mennu be Ala la sariyalu labatula anin mennu be lannaya marala Isa la. ¹³ Wo xo, ní xa xumaxanjo do me xa bo sanjo to xo: «Nin safe: "Moxo mennu be sala x'e tu Marigi la ka- fupoxoya xono kabirin saasa, heero be wolu nen!" Ni Senunjo xo: "Iyo, tonja le mu, i s'i tofojo i la baarolu la bawo i la kupumalu be i nofe!" » ¹⁴ Ní xa felelo ke tu- gun, ní xa xaba xoyimanjo do je, do be siginin wo xabo xan a be í xo hadamadinjo. Mansakufune sanuma b'a kunna, woroto da dimanjo b'a bulu. ¹⁵ Wo xo, meleke xote bota Alabatusuba xono, xa feten barako to xabo xan sigibaxo la xo: «Í la woroto lajigi xa tegelo ke. Senefennadara waxato sita, bawo duguxulo sene- fenjolu mota!» ¹⁶ Wo to, men tun be siginin xabo xan, wo x'a la woroto lataxa duguxulo xan, duguxulo sene- fenjolu ladarata. ¹⁷ Meleke xote bota sanxulo Alaba- tusuba xono, woroto da dimanjo be a du bulu. ¹⁸ Wo xo, mekiyo do xote bota sadaxanilanjo dula. Fan- go tun be wo bulu ta xan. A fetenta barako to fan dadi- mantigo la xo: «Í la woroto da dimanjo lajigi xa duguxulo resenjuwo sunjiyolu tege, bawo a resend- injolu mota.» ¹⁹ Melekiyo x'a la woroto lataxa duguxu- lo xan, a xa duguxulo resenjuwo sunjiyolu tege, x'e fili Ala la diminjo dinxaba xono, men be í xo resenjibod- inxaba. ²⁰ I xa resendinjolu toponxo resenjibodinjo xono, gallo xofe. Jelo bota resenjibodinjo xono xa yele fo xa si suwolu xarabe haxxo ma, xa woyo kilometere keme saba noxon xan.

15 Wo xo, ní xa taagumansede xote je sanjo to, a xa bun, dabariban kuwo le du mu: Tooroku woorowula tunnu be meleke woorowula bulu. Wo tun- nu mu labanjo lelu ti, bawo wo lelu be Ala la diminjo dafala. ² Wo xo, ní xa men je, wo be í xo xooxoji weere- ma nin ta naxamininjo. Moxo mennu xa sinjo soto wara jaxo nin a noxonjo daraninjo anin a toxo jaatema xan, wolu tunnu loninjo be xooxoji weerema xan. Ala tun xa kontinjo mennu di i ma, wolu tunnu be i bulu. ³ I tunnu be Ala la jonxe Musa la tantuli donkilo lala anin Saaxandinjo la donkilo xo: «Marigi Ala, Sinjobeetigo, í la ku keninjolu bee xa bun, kawakuwo lelu mu! Siyalu la Mansaxe, í la silolu bee be tilinnin anin wolu mu tonja le ti! ⁴ Marigi, jon si ke nin a man sila í na? Jon si í ban í toxo bunpala? Bawo ite kilinpe le xa senu. Siyalu bee si na í batu, katugala í la ku tilinninjolu yitata keno xan i bee la.» ⁵ Wo xofe, ní xa Alabatusuba dayelete je sanjo to, nin wo mu seedeya Alabatusuba tillisima ti. ⁶ Tooroku woorowulo tunnu be meleke woorowulo mennu bulu, wolu bota Alabatusuba xono. Lenfaanu puma njelenxuninjolu tunnu b'e xanna, sanu tetositilanjo be baratunin i xaro to. ⁷ Fen nilama naanolu to kilin xa sanu felin woorowula di meleke woorowulo ma. Wo felinjo

tunnu be fanin Ala la diminjo la, ate men be í nila fo abada. ⁸ Alabatusuba fata siisiyo la, Ala la nooro anin a la sintigiya xanma. Moxo si tun me dun no Alabatusuba xono fo meleke woorowulo la tooro woorowulo xa ke xa dafa tumo men.

16 Wo xo, í xa xumaxanba do me, men bota Alabatusuba xono. Wo tun b'a fola meleke woorowulo nen xo: «Alu taxa Ala la diminjo felinfa woorowulo bon duguxulo xan!» ² Meleke folo taxata x'a la felinjo xono fenjo bon duguxulo xan. Wo to, wara jaxo taagumaseedo tun be moxo wo moxo xan anin men tunnu b'a noxonjo daraninjo batula, da jaxolu bota wolu bee ma x'e tooro bete. ³ Meleke fulananjo x'a la felinjo xono fenjo bon xooxojiyo to. Xooxojiyo bee keta jelo ti, í xo moxo faxaninjo jelo. Nilamafenjo fen wo fen be xooxojiyo to, a bee sata. ⁴ Meleke sabananjo x'a la felinjo xono fenjo bon bajiyolu nin jibodulalu xan, wolu bee keta jelo ti. ⁵ Melekiyo men be jiyolu kunna, í xa wo xanme a fola xo: «Í be tilinnin, ite men be je, anin ite men tun be je, ite men mu Senumanjo ti, katugala í xa í la tilinninpa yita xa kiito tege ten. ⁶ Moxolu xa í la moxo senumanjolu nin kilalu jelo bon, saasa í xa jelo di i ma i x'a min. I nin wo le xa xan!» ⁷ Wo xo, í xa xumaxanjo do me, xa bo sadaxajanilanjolu dula xo: «Iyo, Marigi Ala, Sinjobeetigo, í la kiitolu mu tonja lelu ti, anin i be tilinnin!» ⁸ Meleke naaninanjolu x'a la felinjo xono fenjo bon tilo xan. Fango dita wo ma a xa moxolu jani a la ta la. ⁹ Funtaniba xa moxolu jani. I xa Ala toxo tija, sinjo be wo men bulu wo toorokuwolu xan. Bari i man nimisi xa Ala bunja. ¹⁰ Meleke luulunanjolu x'a la felinjo xono fenjo bon wara jaxo la mansasigilanjolu xan. A la mansaya dula bee bulata dibo to. Diminjo men tun be moxolu xan, wo x'e bula i nenjolu kinna. ¹¹ I xa sanxulo Ala toxo tija, i la diminjolu nin i la da jaxolu la kuwo xanma. Bari i man nimisi i la kewalolu la. ¹² Meleke wooronanjolu x'a la felinjo xono fenjo bon bajiba Efarati xan. Wo bajijo jata, walasa mansaxe mennu be bola koton, silo xa toben wolu nen. ¹³ Wo xo, í xa ni jaxu saba je, mennu be í xo serantotolu, men tunnu be bola samaano nin wara jaxo nin kila fano da xono. ¹⁴ Wo niyolu mu jinnolu niyo lelu ti. I be kawakuwolu kela anin i be taxala duniya mansaxelu bee bata, walasa x'e kamari kelo xanma, men be nala kela Sinjobeetigi Ala la lunba lunjo. ¹⁵ Marigi xo: «A fele, í be nala í xo sunjo! Moxo men je tu í pala, x'a la faanolu mara, walasa a balamaxulunjo xana í taxama, x'a maluya yita, heero be wo tigo nen.» ¹⁶ Jinnolu xa mansaxelu kamari dula do, men be kilila heburuxanjolu to xo «Haramagedon.» ¹⁷ Meleke woorowulananjolu x'a la felinjo xono fenjo bon fojo fe. Xumaxanba do meta Alabatusuba xono, wo bota mansasigilanjolu xan x'a fo xo: «A keta xa ban.» ¹⁸ Wo to, sanjimepenxolu nin xumaxanjolu nin sanjifetenjolu keta, anin duguxulu

jarajaraba, men noxon bada man ke kabirin hadamadinjo sigita duguxulo xan. ¹⁹ Galluba teta xa tala saba ti. Siyalu bee la gallubalu boyita. Ala man njina galluba Babilone kun. A x'a lamin a la felinjo xono dolo la, nin wo mu a la diminba ti. ²⁰ Jisuttolu bee sankota, kurolo man je tugun. ²¹ Maramallekese xulinbalu, mennu kilin wo kilin si kilo tan naani noxon bo, wolu jigita moxolu xan xa bo sanjo to. Moxolu xa Ala toxo tija maramallo toorokuwo bulu, bawo wo toorokuwo tun xa jaxu fo xa danmatanbi.

17 Wo to, felin woorowulo tunnu be meleke woorowulo mennu bulu, wolu to kilin x'é sodun x'a fo í nen xo: «Na, jadamusuba men be siginin xooxojiyolu senbo to, í si wo la kiito kuwo yita í la. ² Duguxulo mansaxelu nin a xa jadoya ke. Duguxulo xan moxolu nin a xa jadoya ke x'e su a to, a be í xo moxo x'é su dolo la.» ³ Melekiyo taxata í nima ti fuxo do la. Í xa muso do je non, a be siginin wara jaxu wulemanjo do xan. Ala toxotijatoxolu be safenin wo waro dula bee xan. Kunxulu woorowula anin bija tan ne be wo waro ma. ⁴ Faanu wulen daxolenjolu tunnu be muso ma, anin sanu manarolu nin kuru daxolenjolu anin xononjolu. Sanufelinjo do tun b'a bulo to, men be fanin ku haramuninjolu nin a la jadoya ku noxoninjolu la. ⁵ Toxo do be safenin a foda la, men mu gullo ti: «Babiloneba, jadolu nin duguxulo ku haramuninjolu wuluna.» ⁶ Nte xa wo muso suninjo je moxo senumanjolu jelo la, anin Isa seedolu jelo la. Nte x'a je tumo men, í dabaro bee le banta. ⁷ Wo to, melekiyo xo í nen xo: «Mun x'é dabaro ban? Í si gullo fo í nen, muso mu men ti, anin a be wara jaxu kunxulu woorowulatigo nin bija tantigo men xan. ⁸ Í xa wara jaxo men je, a tun be je, bari a nte je tugun. A si yele xa bo dinxajironba danjebalo xono, xa taxa halagi. Duguxulo xan moxo mennu toxo man safe nilamaya bukko xono kabirin duniya da tumo, wolu dabaro si ban nin i xa wara in je, bawo a tun be je, a nte je tugun, bari a si na tugun. ⁹ «Lonjo nin hakilitigiya le be njinnin jan. Kunxulu woorowulo mu kuru woorowula lelu ti, muso be siginin mennu xan. Mansaxe woorowula le dulu mu. ¹⁰ Luulu boyita i to, wooronanjolu be mansaya la saasa, woorowulananjolu man na folo. Nin a nata, a be waxatindin doron ne kela. ¹¹ Wara jaxo men tun be je, nin a nte je tugun, wo fan mu mansaxe saginanjolu le ti. Ate mu wo woorowulolu to kilin ne ti, a be taxala halagilo dula. ¹² «Í xa bija tanjo mennu je, wolu mu mansaxe tan ne ti, mennu man sigi mansaya la folo. Bari i si fango soto i nin waro, xa mansaya ke i noxo fe leere kilin xono. ¹³ Mii-riya kilin ne be wo mansaxe tanjo la, nin wo mu pin ti: X'e la sintigiya nin i la fango di waro ma. ¹⁴ I si Saaxandinjo kele. Bari Saaxandinjo le be sinjo sotola i xan, bawo ate mu marigolu Marigi le ti, anin mansaxelu la Mansaxe. Ate nin a la moxo kilininjolu nin

sugandininḡolu nin a la xantigolu si sinḡo soto i xan.»
¹⁵ Melekiyo xo ḡ nen tugun xo: «Í xa jiyo mennu je, nin jadomuso be siginin i xan, wolu mu jamanolu nin jamalu nin siyalu anin xanḡolu do lelu ti.»¹⁶ Í xa bija tanḡo mennu je, wolu nin wara jaxo si jadomuso jaxuya. I s'a bulufenḡolu bee muta a la, x'a balamaxulunḡo bula. I si a subo domo x'a to jani ta la.»¹⁷ Katugala Ala x'a sago kelo dun i jusukunḡo la. I bee si ben a to x'e la mansaya fango bula waro la baaro la, fo Ala la xuma foninḡolu xa dafa.»¹⁸ «Í xa muso men je, wo mu galluba le ti, men be siginin duguxulo xan mansaxelu kunna.»

18 Wo xofe, ḡ xa meleke xote jigito je xa bo sanḡo to. Fangaba tun b'a bulu. Duguxulo keneyata a nooro bulu.² A fetenta barako to xo: «Galluba Babilone boyita, a boyita! A keta jinnolu sigidula ti, a keta jinne noxoninḡolu bee dugudula ti, a keta xono noxoninḡolu nin xono paxunninḡolu bee dugudula ti.»³ Duguxulo siyalu bee x'e min a la jadoya jaxo dolo la. Duguxulo mansaxelu xa jadoya ke a fe. Duguxulo fiirikelalu fentigiyata a la fen ḡumalu siya xanma.»⁴ Wo xo, ḡ xa xumaxanḡo do xote me xa bo sanḡo to xo: «Nte la moxolu, alu bo Babilone, walasa alu nin a xana kafu a la junubolu to, anin xa do soto a la toorokuwolu to.»⁵ Bawo a la junubolu siyata fo xa si sanxulo ma, anin Ala hakilo jigita a la tilinbaliyakuwolu kun.»⁶ A xa men ke tolu la, alu wo ḡoxon ke a du la. Alu a sara a la ku keninḡolu ḡoxon fula la. A xa moxolu lamin minfenḡo men na, alu a la minnilanḡo lafa minfen na, men xa fati wo ti í xo fula.»⁷ A xa fanbunḡa nin fen ḡuma kiika mennu di a fan ma, alu wo ḡoxon tooro nin bone lasi a ma. Bawo a b'a fola a xonoto xo: "N be siginin jan í xo mansamusu, ḡ nte musu ti men xe sata, saya jusuxaso me nte soto abada." ⁸ Wo le x'a tu, toorokuwo mennu lategeta a nen, wolu bee si boyi a xan tili kilin xono: Fopojangaro, saya jusuxaso, xonxo, ta si a jani xeru. Bawo Marigi Ala men x'a la kiito tege, wo mu baraketigo le ti.»⁹ Wo to, duguxulo mansaxelu mennu nin a kafuta a la jadoya nin a la fen ḡuma kiika la, wolu si xasi xa xuure, nin i x'a janisiisiyo je wulila.»¹⁰ I s'i tu dulajan a la tooro ḡasilanḡa xanma x'a fo xo: «Bone! Bone! E galluba, Babilone, galluba barakema! Leere kilin doron x'a bo xa í la kiito tege!»¹¹ Duniya jaagukelalu be xunbola, anin x'a saya xasi, bawo moxo si nte i la fiirifenḡolu sanxan bitugun: ¹² Sano, xalaisixoyo, kuru daxolenḡolu, xononkese daxolenḡolu nin lenfaanu ḡumalu nin faanu wuleman daxolenḡolu, nin suwafaanolu, a nin yiri xasa dimanḡolu, anin fenḡo mennu darata samapinḡo la, anin yiri daxolenḡolu, nin silo nin nego anin kuru beto men be kilila xo maraburu.»¹³ Nafen mungu sumadimanḡo do, men be kilila xo kaneli, anin wo ḡoxon sifa xotelu bee, latikolonḡolu, mire sumadiyalanḡolu, digicolu, dolo nin tulo nin farinmungo, nin ḡo, nin ḡinsolu, nin saaxolu, suwolu, nin

suwuturolu, jonḡolu, nin moxo santalu.»¹⁴ A si fo xo: «Í niyo tun be fenḡo mennu xan, wolu taxata x'e soobo í la. Fen wo fen mu naafulo nin fen beto ti, wo bee sankota í ma. Í me wolu soto tugun.»¹⁵ Jaagukela mennu fentigiyata x'e tu jaago la wo galluba xono, wolu s'i lo dulajan a la tooro ḡasilanḡa xanma. I si xunbo, x'é saya xasi; ¹⁶ i s'a fo xo: «Bone! Bone! Galluba men, nin lenfaano nin faanu wuleman daxolenḡolu b'a ma, men be maparanin sano nin kuru daxolenḡolu anin xononkese daxolenḡolu la, ¹⁷ leere kilin doron ne x'a bo xa wo naafuluba bee tija!» Batonnaborilalu nin batonxonomoxolu, xooxojan baarakelalu anin mennu be i baluwo sotola xa bo xooxojiyo to, wolu bee tunnu be lonin dulajan.»¹⁸ I xa wo galluba janisiisiyo je tumo men, i kuleta xo: «Gallu joman si ḡin galluba in bo?»¹⁹ I tunnu b'a ma xa buruxallo sari i fannu kunḡo to, i be xunbola, anin x'é fure xasi xo: «Bone! Bone! Galluba men na naafulo xa xooxojan batontigolu bee fentigiya, leere kilin doron ne x'a bo xa wo galluba tija.»²⁰ Sanxulo, ḡaḡa a tija la! Alu dulu, moxo senumanḡolu nin kiladinḡolu nin kilalu, alu ḡaḡa, bawo Ala xa kiito tege a xan, x'alu ta sara.»²¹ Wo to, meleke barakema do xa kuro do ta, men be í xo silikuru xulimanba, x'a fili xooxojiyo to, x'a fo xo: «Galluba Babilone du be nala tala x'a fili barako la ten ne. A me je tugun.»²² Kontinfoxan nin donkililaxan nin fulefoxan anin buutufoxanḡo me me í bata tugun. Bululabaarakela si me tara í bata tugun. Silixan si me me í bata tugun.»²³ Lanpo keneya me bo í bata tugun. Maapoxe nin maapḡo xanḡo me me í bata tugun, bawo í la jaagukelalu tun nelu ḡoxonnu nte duguxulo xan. Í la suuyakuwolu xa siyalu bee lafili.»²⁴ Kilalu nin moxo senumanḡolu faxali jelo jeta Babilone le, anin moxo mennu bee faxata duguxulo xan.

19 Wo xo, ḡ xa men me xa bo sanḡo to, wo be le í xo jamaba mankanḡo. A tun b'a foxan xo: «Aleluya! Kisilo nin nooro nin sintigiya mu n na Ala le ta ti.»² Bawo tonḡa nin tilininḡa b'a la kiitolu xono. A xa kiito tege jadomusuba xan, men tun be duguxulo noxola a la jadoya la. A x'a la jonḡolu faxalo julo sara a ma.»³ I xo tugun xo: «Aleluya! A janisiisiyo be wulila fo abada.»⁴ Moxoba muxan nin naano anin fen nilama naano x'e ḡongi xa Ala batu, men be siginin mansasigilanḡo xan, i xo: «Amiini! Aleluya!»⁵ Wo to, xumaxanḡo do bota mansasigilanḡo xan xo: «Alu n na Ala tantu, ate mennu bee mu a la jonḡolu ti, ate mennu be silala a ḡa, moxondin nin moxoba!»⁶ Wo xo, ḡ xa men me, wo be le í xo jamaba mankanḡo, a be í xo jiba sonxoxanḡo, a be í xo sanjifetenxanbalu. I tunnu b'a foxan xo: «Aleluya! Bawo Marigi, n na Ala, Sinḡobeetigo x'a la Mansaya sigi.»⁷ Alan xa ḡaḡa, xa ḡaxali anin x'a bunḡa, bawo Saaxandinḡo la maapḡo sininḡo fele. A musu x'é toben.»⁸ Lenfaanu ḡuma ḡelxenuninḡo dita a ma a x'a dun.» Wo lenfaano mu moxo senumanḡolu la ke-

wale tilinningo lelu ti. ⁹ Melekiyo xo n̄ nen xo: «A safe! Mennu kilita Saaxandingo la maapoya domolo ma, heero be wolu nen!» A xo du xo: «Ala la xumo fan ne mu pinnu ti.» ¹⁰ Nte xa n̄ boyi a sinngolu xoto xo n̄ b'a batula, bari a xo n̄ nen xo: «Í xana wo ke! Nte mu baarakedingo le ti í xo ite nin í badin tolu, mennu be Isa la seede ya marala. Í xa xan xa Ala le batu!» Isa xa tonja men yita, wo le be barako dila kilalu ma xa kila ya ke. ¹¹ Wo xo, n̄ xa sanxulo dayeleningō je. Su xoyo do bota. A xan sigibaxo toxo xo Xankilintigo anin Tonpatigo. A be kiito nin kelo kela tilinninga la. ¹² A pa tunnu be manala í xo tamano, mansakufuno kiika tun be a kunna. Toxo do tun be safenin a xan, moxo man men lon nin a kilin nte. ¹³ Doroko do tun be a xanna, men bulata jelo to. A toxo xo: «Ala la Xumo». ¹⁴ Sanxulo kebulolu tunnu b'a nofe, x'e tu su xoyolu xan, lenfaanu xoyiman jumalu be i xanna. ¹⁵ Fan da dimanngō be bola a da xono, wo be kela xa siyalu busa. A si i mara negeguma la, xa resendolodaradinxo toponxo, wo resendolo mu Ala, Sinngobeetigo la diminba le ti. ¹⁶ Toxo do tun be safenin a la doroko nin a wuto xan xo: «Mansaxelu la Mansaxe anin marigolu Mari-gi». ¹⁷ Wo xo, n̄ xa melekiyo do je lonin tilo xono to. A fetenbeteta xono balalu bee la, sanjanba to xo: «Alu na, alu kamari Ala la domoliba xanma!» ¹⁸ Alu na mansaxelu subo domo, anin sorodasi kuntigolu subo, anin kelekemansolu nin suwolu subo, anin suxanye-baxolu nin moxo bee subo, hooro nin jon, moxondin nin moxoba.» ¹⁹ Wo xo, n̄ xa wara jaxo je, anin duguxulo mansaxelu nin i la kebulolu, i be kamarinin suwo xansigibaxo nin a la kebulu kelo xanma. ²⁰ Waro mutata, anin kila fano, wo men tun xa kawakuwolu ke a jalalu xa moxolu lafili, waro taagumanseedo keta men-nu la, anin men tunnu b'a noxonngō daraningō batula. Waro nin kila fano kendo filita ta nin tinbiritiyo dalaba xono. ²¹ Tolu faxata fanjo la, men tun be boxan suwo xansigibaxo da xono. Xonolu bee x'e fa i subo la.

20 Wo xo, n̄ xa melekiyo do jigito je xa bo sanngō to. Dinxajironba danjebalo xundinngō b'a bulu anin negejoxoba do. ² A xa samaano muta, sa xoto, nin wo mu jinnolu la kuntigo nin Sentane ti, x'a siti negejolo xo la san wulu xono. ³ Melekiyo x'a fili dinxajironba danjebalo xono x'a da soxo a ma, xa taagumanseedo ke a la, walasa a xana siyalu lafili tugun fo san wulu kilinngō xa dafa. Wo xo, a xa xan xa bula waxatindin xono. ⁴ Wo xo, n̄ xa mansasigilanngō dolu je, sinngō dita i tosigibaxolu ma xa kiito tege. Men du tunnu kunngō tegeta Isa seede ya nin Ala la xumo nofe, n̄ xa wolu niyolu je. Wolu tunnu man wara jaxo batu walla a noxonngō daraningō, a taagumanseedo man ke i fodalu la walla i bulolu to. Wolu kunita xa bo furelu to, xa sigi mansaya la Kirisita fe, san wulu kilin xono. ⁵ Fure tolu man kuni xa bo furelu to, jannin san wulu kilinngō xa dafa. Wo le mu furekuni folo ti. ⁶ Moxo men-

nu xa nidula soto furekuni folo to, heero be wolu nen, wolu keta senumanngōlu ti. I mu Ala talu ti, saya fulananngō la julu nte i la. I si ke Ala nin Kirisita la sadax- alasibaxolu ti. I nin Kirisita si sigi mansaya la san wulu kilin xono. ⁷ Nin san wulu kilinngō dafata tumo men, Sentane si bula xa bo a la kaso la. ⁸ A si taxa siyalu lafili, mennu be duguxulo tonxon naano to, Gogu nin Magogu. A si wolu lakamari kelo xanma. Wolu xa sa í xo xooxojida la kepo. ⁹ I nata xa duguxulo dula bee fa, xa moxo senumanngōlu la dula laminin, nin wo mu Ala la gallu xanuningō ti. Bari ta jigita xa bo sanngō to x'e jani. ¹⁰ Sentane men tun b'e lafilixan, wo filita ta nin tinbiritiyo dalaba xono, wara jaxo nin kila fano bata. I si paaga suwo nin tilo fo abada. ¹¹ Wo xo, n̄ xa mansasigilanba xoyimanngō do je, anin a xan sigibaxo. Duguxulo nin sanxulo x'e bori xa bo a pa xoto, i man je tugun. ¹² N̄ xa furelu je, moxoba nin moxondin, i be lonin mansasigilanngō pafe. Bukko dolu dayeleta. Bukke xote dayeleta, nin wo mu nilamaya bukko ti. Furelu la kiito tegeta x'a la i la kewalolu xan, x'a ben wo bukkolu xono safeninngō ma. ¹³ Xooxojiyo x'a la furelu di. Saya nin lahara x'e la furelu di. Kiito tegeta furelu bee kilin kilin xan, x'a ben i la kewalolu ma. ¹⁴ Saya nin lahara filita ta dalaba xono. Wo ta dalaba le mu saya fulananngō ti. ¹⁵ Moxo wo moxo toxo safeninngō man tara nilamaya bukko xono, wo filita ta dalaba xono.

21 Wo to, n̄ xa sanxulo kuto nin duguxulu kuto je, bawo sanxulu folo nin duguxulu folo tunnu sankota. Xooxojiyo nte je tugun. ² N̄ xa gallu senu-manngō je, Yerusaleme kuto, a tun be jigixan xa bo sanngō to, Ala bata. A x'é toben í xo maapo men x'é masiti a xe nen. ³ N̄ xa xumaxanba do me xa bo mansasigilanngō dula xo: «Saasa Ala sigidula fele moxolu temo to! A si sigi i bata, i si ke a la moxolu ti. Ala fan si ke i bata, a si ke i la Ala ti. ⁴ A si najiyo bee fita x'a bo i jalalu la. Saya me ke tugun, walla furexaso, walla xuure, walla tooro, bawo fen fololu sankota.» ⁵ Men be siginin mansasigilanngō xan xo: «A fele n̄ be fenngō bee kela kuto ti.» Wo xo, a xo n̄ nen xo: «A safe, bawo nin xuma innu mu wulibalo nin tonja le ti.» ⁶ A xo n̄ nen du xo: «A keta xa ban! Nte mu Alifa nin Omega le ti, damuto nin labanngō. Mindoxo be men na, nte si nilamaya jiyo bodula jiyo di a ma a x'é min a la fu. ⁷ Men je sinngō soto, wo tigo si pin fen innu soto ke ti; nte si ke a la Ala ti, a si ke nte dinngō ti. ⁸ Men ken mu jitolu nin lannayabalolu, nin ku haramuninkelalu, nin moxofaxalalu, nin jadolu, nin subaxolu, nin bolibatulalu, anin fanolu bee ti, wolu nidula be ta nin tinbiritiyo dalaba mananingō le to. Wo le mu saya fulananngō ti.» ⁹ Wo to, meleke woorowulo mennu nin tooroku felinfa woorowula labanngōlu be i bulu, wolu to kilin xumata n̄ nen x'a fo xo: «Na, n̄ si maapo yita í la, nin wo mu Saaxandingo musu ti.» ¹⁰ Melekiyo taxata n̄ nima ti kuruba janjanngō do xan. A xa gallu senumanngō yita

nte la, Yerusaleme gallo, a tun be jigixan xa bo sanjo to, Ala bata. ¹¹ A tun be manaxan Ala nooro fe. A keja tun be í xo kuru daxolenjo do, a be í xo jasipekuro men be njelenxula. ¹² Tataba janjamango tun b'a lamininnin. Dunda tan nin fula b'a la. Meleke tan nin fula be wo dundalu la. Banisirayila dinjolu xabiile tan nin fulo toxolu tunnu be safenin wo dalu xan. ¹³ Da saba be kotonjo to, saba be sahelu, saba be banbugo, saba be tiliboyo. ¹⁴ Gallo tato tun be siginin kuru tan nin fula xan, Saaxandinjo la kiladin tan nin fulo toxolu be safenin mennu xan. ¹⁵ Melekiyo men xumata nte nen, sumannilango do tun be wo bulu, sanuguma le mu, walasa xa gallo nin a dalu nin a tato suman. ¹⁶ Gallo boxo naano bee xa xan, a lo nin a xono bee kilin janja to. Melekiyo xa gallo suman a la guma la. A benta kilometere wulu fula nin keme naani le ma. A lo nin a xono nin a janja bee xa xan. ¹⁷ A xa tato du suman. A janja benta nonxon ja keme nin tan naani nin naani le ma, hadamadinjolu la sumannikelango, melekiyo xa men ta. ¹⁸ Tato tun be kenin jasipekuro la, gallo tun be kenin sanu yerewuluwo le la, men be í xo weere juma. ¹⁹ Gallo tato jusigilanjolu tunnu be jangunin kuru daxolen sifa bee la. Jusigilan folo tun mu jasipekuro le ti, fulanango safirekuro, sabanango agatekuro, naaninango emerodekuro, ²⁰ luulunango onikisekuro, wooronango saraduwankuro, woorowulanango kirisolitekuro, saginango berilikuro, xonontonango topasekuro, tannango kirisoparasekuro, tan nin kilinango yasantikuro, tan nin fulanango ametisitekuro. ²¹ Dunda tan nin fulo tunnu mu xononkese daxolen tan nin fula le ti. Dunda wo dunda tun mu xononkese daxolen kilin ti. Gallo dakeno tun be kenin sanu yerewuluwo la, men be njelenxula í xo weero. ²² Nte man Alabatusuba je wo gallo to, bawo Marigi Ala Sinjobeetigo fan ne mu wo gallo Alabatusuba ti, ate nin Saaxandinjo. ²³ Gallo maakuwo nte tilo la, walla xaro la, walasa x'a keneya, bawo Ala nooro b'a keneyanin, Saaxandinjo le mu a lanpo ti. ²⁴ Siyalu si i taxama a keneya la, duguxulo mansaxelu nin i la naafulo si na a ma. ²⁵ A dundalu me taxun tilo to, bawo su nte nala kela non tugun. ²⁶ Siyalu nooro nin i bunja si taxa ti je. ²⁷ Fen noxonin si me dun je. Moxo wo moxo be ku haramuninjo kela anin xa faniya fo, wo me dun je, fo men doronnu toxo be safenin Saaxandinjo la nilamaya bukko xono.

22 Wo xo, melekiyo xa nilamaya bajiyu yita nte la, a be í xo kuro men be njelenxula. Wo jiyu tun be bola Ala nin Saaxandinjo la mansasigilango dula, ² xa woyo gallo dakeno temo to. Nilamaya yiro tun be wo

ba boxo fulu. A be dinjo kela sinja tan nin fula sanjo xono. Xaru wo xaru a si dinjo ke. A fitolu be siyalu jaarala. ³ Ala la dango me fen si soto non tugun. Ala nin Saaxandinjo la mansasigilango si ke gallo xono, Ala la jonjolu s'a batu. ⁴ I si a pada je. A toxo si safe i fodalulala. ⁵ Su me ke tugun. Moxo si maaku me ke lanpamana la tugun, walla tilo keneya la, bawo Marigi Ala si a keneya bo i nen. I si ke mansolu ti fo abada. ⁶ Wo xo, melekiyo xo n' jen xo: «Nin xuma innu mu wulibalo nin tonja le ti. Marigi Ala, men be a Niyo dunna kilalu to, ate le x'a la melekiyo ki, walasa kuwo men be nala kela dondin, a xa wo yita a la jonjolu la.» ⁷ Isa xo: «A fele, dondin n' si na! Moxo men je jin bukke in kilaya xumolu mara, heero be wo nen!» ⁸ Nte Yaya xa jin ku innu me, x'e je. N' x'e me anin x'e je tumo men, n' xa n' boyi melekiyo sinjolu xoto, wo men x'e yita n' na. N' xo, xo n' b'a batula. ⁹ Bari a xo n' jen xo: «Í xana wo ke! Nte mu baarakedinjo le ti í xo ite, anin í badin kilalu, anin mennu bee be jin bukke in xumolu marala. Í xa xan xa Ala le batu.» ¹⁰ Wo xo, a xo n' jen xo: «Í xana jin bukke in kilaya xumolu tu duguwo to, bawo waxato sutiyata. ¹¹ Tilinbalo xa taxa ja xa tilinbaliya ke, anin noxoninjo xa taxa ja noxoninja to. Bari tilinninjo xa tilinninja ke xa taxa ja, anin senumanjo x'e senuya xa taxa ja.» ¹² Isa xo: «A fele, dondin n' si na! N' nin bee la sara si na x'a di í ma, x'a la bee kilin kilin na kewalolu xan. ¹³ Nte mu Alifa nin Omega le ti, folo anin labango, damuto anin dafaxo.» ¹⁴ Mennu be i la faanolu kula, walasa i xa sin xa nilamaya yiro dinjo do soto, anin xa dun gallo to, a dundalu fe, heero be wolu jen. ¹⁵ Bari wulukukelalu nin subaxolu nin jadolu, nin moxofaxalalu, nin bolibatulalu, anin moxo wo moxo be faniya fe, anin mennu b'a fola, wolu bee be banto to! ¹⁶ «Nte Isa xa n' na melekiyo ki xa jin seedeya in nasi alu ma, Ala la jamalu la kuwo to. Nte mu Dawuda tobo nin a bonsonjo le ti, anin saxuyelenda la loolu, men be manala.» ¹⁷ Ni Senunjo nin maajo xo: «Na!» Men je a me wo x'a fo xo: «Na!» Mindoxo be men na, wo xa na; men be nilamaya jiyu fe, wo x'a min fu. ¹⁸ Moxo wo moxo be jin bukke in kilaya xumolu lamela, nte b'a folawolu bee nen xo: Nin do xa do kafu i ma, toorokuwo mennu fota jin bukke in xono, Ala si wolu kafu a tigo ta ma. ¹⁹ Nin men xa do bo jin bukke in kilaya xumolu la, Ala si wo tigo nidula bo nilamaya yiro nin gallu senumanjo to, wo mennu la kuwo be safenin jin bukke in xono. ²⁰ Men be jin ku innu seedeyala, wo xo: «Iyo, dondin n' si na!» Amiini! Marigi Isa, na! ²¹ Marigi Isa la neemo xa ke alu bee fe.